

M. Antoni Jamini  
Thron p[ro]p[ri]o.



B  
IV  
11

5. 8. F. 16.








M. ANTONII FLAMINII  
IN LIBRVM PSALMORVM BRE-  
VIS EXPLANATIO. AD  
ALEXANDRVM FARNE-  
SIVM, CARDINALEM  
AMPLISSIMVM.

*Bonu/  
Sol:*

*: Canaleon:  
Bian*

AL

DVS



Cum privilegio senatus Veneti, & Pauli  
III. Pontificis Maximi.

VENETIIS, M. D. XLV.

*à Fran<sup>co</sup> de Ruben*

ALEXANDRO FARNESIO, CAR-  
DINALI AMPLISSIMO,  
M. ANTONIVS FLAMI-  
NIVS, S. P. D.

ELIM, ita ratio meae uoletudinis  
tulisset, ut eam paraphrasim absol-  
uere possem, quam superioribus an-  
nis in diuina Davidis carmina in-  
stitueram, & sanctissimo auctore tuo

Paulo III. Pont. Max. dicaram. id ego mul-  
tis causis adducor ut cupiam, sed in primis, quod,  
eam rem tibi magnae uoluptati futuram, mihi  
non semel affirmauit Bernardinus Maphæus, quem  
tu propter elegantiam doctrinae, summamque fidem,  
& probitatem merito charissimum habes. quid au-  
tem mihi accidere possit optabilius, quam ut tibi  
splendidiissimo, atque ornatissimo uiro in re tam pia  
gratificer? praesertim cum tanta sit magnitudo tuae  
liberalitatis, ut me nouis beneficijs ornare nunquam  
intermittas. uerum quando ea est meae uoletudinis  
infirmetas, ut, quod debeo, praestare non ualeam, quod  
possum, hanc breuissimam explanationem ad te mit-  
to: qua omnes quidem psalmos persecutus sum, sed  
ita, ut, quae satis perspicua uidentur, non attigerim,  
obscura quaeque paucis illustrare conatus sim. id ego  
si effeci, non dubito, quin tibi pro tua pietate gra-

tissimum fecerim : cum enim quotidie hos hymnos le-  
gas , quo facilius , & melius eos intelliges , hoc liben-  
tius leges , & maiorem ex ipsis fructum capies : cumq;  
sis publicæ utilitatis amantissimus , latabere , opinor ,  
te causam fuisse , ut ego ea in re præcipue elabora-  
rim , quæ non parum commodi literarum diuinarum  
amatoribus allatura uideatur . sin autem , quod mihi  
proposueram , ob rei difficultatem , minus assecutus  
sum , at certe , quod summopere opto , consequar , ut,  
me gratum esse , ac tibi deditissimum , & tu , &  
ceteri omnes intelligant . sed anteaquam ad ipsam  
explanationem uenias , operapretium erit , earum re-  
rum , quæ discuntur in his sanctissimis hymnis , sum-  
mam tibi breuiter exponere , ut formam , & speciem  
huius pulcherrimæ doctrinæ tanquam in parua ta-  
bella adumbratam possis intueri . quam si attento ,  
ut debes , animo spectaueris , tua diuina indole fre-  
tus audeo affirmare , illam tam mirabiles amores ex-  
citaturam sui , ut hunc aureolum , & coelestem libel-  
lum de manibus nunquam sis depositurus . ipsius igitur  
hæc summa est : Deum ad declarandam infini-  
tam bonitatem suam cælum , & terram , & reli-  
qua omnia , quæ amplissimo cæli complexu coercen-  
tur , creauisse : illius nutu , & potestate mundum ,  
& res humanas regi , gubernariq; : nihil nos agere ,  
aut loqui posse , aut cum animo nostro cogitare ,  
quod ille non sentiat ; quocirca non solum ab omni  
maleficio temperandum esse , sed etiam mentem ip-  
sam , & omnem agitationem animi puram , inte-

gramq; seruandam , cum præsertim ad tribunal huius  
ius iudicis unicuique totius uitæ reddenda sit ratio :  
eundem homines uirtute , ac pietate præcellentes per  
uarios casus plerunque , & per magnas calamitatum  
angustias ad uitam ducere beatam , & immortalem ,  
contraq; impijs uitæ quidem prosperitates , secundasq;  
res ad breue tempus facile concedere , sed miseras , &  
pœnas , quæ scelera eorum sequuntur , sempiternas  
fore : quæ cum ita sint , neque illa , quæ bona fortuna  
uulgo nominantur , magno æstimanda esse , ne-  
que res incommodas , atque aduersas in malorum nu-  
mero ponendas . Docet præterea hic libellus , omnes  
mortales omnium generum iniustos , mendaces , ua-  
nos , & ipsa inanitate inaniores existere , nisi diuini  
spiritus afflatu renouentur , atque in animis eorum  
pulchritudo illius imaginis instauretur , qua primus  
homo decoratus est à Deo , & sua culpa spoliatus :  
qui uero tali , ac tanto munere affecti , atque ad hunc  
modum renati sint , illos in corporibus humanis uitam  
cœlestem imitari , ac diuinæ bonitatis effigiem in suis  
moribus , & factis adumbrare , neque tamen eorum  
quenquam tam magnos progressus habere in pietate ,  
& iustitia , quin aliquando grauius offendat ; tan-  
ta est uis naturæ labis , & corruptelæ , cuius reli-  
quæ semper in uiuis manent : ex qua quidem re  
fieri , ut nemo tam pie , tam sancte uiuat in ter-  
ris , ut uocatus ad tribunal cœleste suam causam  
defendere , ac probare possit , si summus ille iu-  
dex ab eo uelit exigere , quod sibi & meritissimo ,

et optimo iure debetur ; sed illum ex animo poenitentibus misericordiam tribuere , et summa benignitate omnia peccata condonare . quantus autem existat dolor , et cruciatus hominis pii , si quando longius ab obseruatione legum diuinarum aberrarit , quam demisso , ac humili animo peccata sua confiteatur , seq; ultro ad illa quouis supplicio luenda offerat , nunquam aliquis ita luculenter , ut hic sanctissimus uates , explicauit , nemo omnium mortalium tam feliciter , quam ipse in persona sua , imaginem poenitentis expressit . idemq; terrores horribicos conscientiae iudicium Dei , et iram formidantis , spemq; cum desperatione , atque inferis decertantem , et durissima praelia carnis , et spiritus ita describit , ut non scribere , sed rem oculis subijcere uideatur . quis uero alius ardentiores amores excitat rerum coelestium , cunctarumq; uirtutum ? quis diuiniore orationis copia , et uarietate persequitur , quam iucundi , quam uberes , ac diuturni fructus capiantur ex uero Dei cultu , et perpetua in recta uiuendi ratione constantia ? quis denique alius laudes summi rectoris , atque omnium rerum domini tam admirabili magniloquentia canit , illasq; tot , ac tantis uerborum , et sententiarum luminibus illustrat ? quid inuauat uidere , ut Rex domi , belliq; praestantissimus omnes suas uoluptates , et delectationes in Deo positas , et constitutas habeat ; ut eum placabilem , benignum , suauem , amabilissimumq; depingat ; ut rerum omnium affluentibus copiis , tanquam

inops, & rerum omnium egentissimus, misericordiam illius semper imploret; ut rebus afflictis, & capite, ac fortunis undique oppugnatus, nulli calamitatum oneri succumbat, sed cœlesti præsidio confidens audaciter exclamet, Dominus & lux, & salus mea est, quem igitur metuum? Dominus firmamentum, ac robur est vitæ meæ, quis ergo me perterreat? si me hostium castra circumsedeant, non trepidabit animus meus: si præliorum in me vis, & furor inuadat, placida, & tranquilla mente consistam. Itaque uir diuinus in singulis ferè uersibus exemplo suo demonstrat, in rebus angustiis, atque asperis ad nomen sanctissimum Dei tanquam ad arcem tutissimam summa cum fiducia confugiendum esse; ab illo certissimam opem expectandam, qui nullius spem fallere potest; reliqua omnia præsidia, & adiumenta inania existere, & pro nihilo ducenda. rebus autem prosperis, atque ad nostram uoluntatem fluentibus, monet, importunitatem, & superbiam maximopere uitandam esse; quicquid domi, uel militiæ feliciter administratur, quicquid honeste cogitamus, & gerimus, id omne attribuendum misericordiæ diuinæ, nihil uiribus nostris temere arrogandum, semper de se ipso demisse, abiecte, atque humiliter cuique sentiendum, semper gratias benignissimo numini agendas, & laudes illius in ore, atque animo nunquam non habendas. Hæc, & alia multa huius generis, ad piam, & rectam uitæ institutionem utilissima, continentur his hymnis: in

quibus etiam multa prædicuntur apertissime de IESU  
CHRISTO domino, ac deo nostro, de  
ipsius acerbissima nece, de reditu ad uitam, de  
ascensu ad cælum, deq; sacerdotio eius, & regno  
sempiterno. quorum altero nos Deo reconciliauit, se  
ipsum in cruce immolans, & omnia peccata nostra  
suo purissimo sanguine delens: altero nos defendit, ac  
tuetur ab hoste sempiterno generis humani, & spiri-  
tu suo regens, & gubernans ad uitam perducit bea-  
tam, & immortalẽ. Proinde inferuntur etiam  
prædictiones de uera cognitione Dei per uniuersas ter-  
rarum oras longe, lateq; propaganda, deq; piorum  
ecclesia ex cunctis gentibus in unum pulcherrimum  
corpus à spiritu sancto coagmentanda: cuius  
corporis caput est IESVS CHRI-  
STVS optimus, maximus, uerus  
Deus, & uerus homo: cuius sanctis-  
simum numen utinam uniuersi  
mortales ad omnes seculo-  
rum ætates auguste, san-  
cteq; uenerentur,  
& colant.

De Dauide Iudaorum rege.

Eram paterna abiectus in domo puer ,  
Cunctisq; fratribus meis  
Minor pusillum in monte pascebam gregem .  
Hic ego sub umbris arborum ,  
Dum lata tondet gramina pecus , maximi  
Laudes canebam numinis ,  
Sonora tangens fila citharæ , quam meæ  
Paruæ laborarant manus .  
At ille sanctus cœlitum rex , & pater ,  
Qui summa tangit fulmine  
Corusco , humoq; gaudet ima tollere ,  
Suum repente nuntium  
Ad parua misit tecta , qui meum sacro  
Liniret unguento caput .  
Abiecit ille uiribus præstantia  
Fratrum meorum corpora ,  
Nec forma quicquam profuit , nec asperis  
Spectata uirtus prælijs :  
At ego pusilli paruulus custos gregis  
Ad regium decus efferor .



M. ANTONII FLAMINII  
IN LIBRVM PSALMORVM  
BREVIS EXPLANATIO.



ARGVMENTVM PSALMI I.

Docet, pios, ac legum diuinarum studiosos, & amantes, beatos existere; contraq;, omnes improbos, & dei contemptores, miseros esse.

PSALMVS I.

Beatus uir, qui non ambulauit in consilio impiorum, & in uia peccatorum non stetit, & in cathedra derisorum non sedit,

Sed in lege Domini uoluntas eius, & in lege eius meditabitur die, ac nocte.

Et erit tanquam lignum, quod plantatum est secus decursus aquarum, quod fructum suum dabit in tempore suo,

Et folium eius non defluet, & omnia quaecunque faciet prosperabuntur.

Non sic impij, sed tanquam puluis, quem proiecit uentus.

Idco non resurgent impij in iudicio, neque peccatores in concilio iustorum,

Quoniam nouit Dominus uiam iustorum, & iter impiorum peribit.

Explanatio.

Beatus uir ] Monet, ad beatam uitam in primis pertinere, ut eorum consilia fugiamus, qui nos a recto Dei cultu, & honesta uiuendi ratione conantur abducere.

Et in uia peccatorum ] Rationem uiuendi turpem, & uitiosam appellat uiam peccatorum, ea enim uita est uia improbis, & flagitiosis ad inferos, & misérias sempiternas. Tunc uero in uia peccatorum non stamus, cum peccantes statim resipiscimus, & ad rectum uitæ cursum redimus.

Et in cathedra derisorum non sedit ] His uerbis monet, amicitias, & consuetudines hominum perditorum declinandas esse, sedendi enim nomine cōgressum, & familiaritatem significari, satis indicant uerba illa Psalmi XXVI. Non sedi cum concilio uanitatis, & cum iniqua gerentibus non introibo, odi coetum malignantium, & cum impijs non sedebo. Irrisores autem uocat homines sceleratos, & nefarios, qui ad id furoris, et miseriæ perducti sunt, ut homines uirtutem, & pietatem colentes derideant, & pro nihilo putent. Horum sera, & inutilis poenitentia pulcherrime describitur in libro Sapientie.

Et erit tanquam lignum quod plantatum est secus decursus aquarum ] Ut enim aqua humore suo uitali arborem educat, atque confirmat, illamq; latissimorum copia fructuum exornat, ita piorum animus meditatione rerum diuinarum alitur ad eternitatem, uberrimosq; uirtutum fructus, & illos qui

dem tempestiuos edit : sapiens enim suo quæque tempore agit . Eleganter autem uirum pium , & religiosum comparat arbori fecundæ : ut enim hæc ubertate sua non sibi , sed alijs utilitatem affert , sic uita illius fructuosa quidem est , sed ita , ut commoditates suas non quærat , tota autem in iuuandis alijs occupata sit . ceteri omnes omnia referre solent ad utilitatem propriam , nec facile animum inducere possunt , ut aliquid gratuito agant .

Et omnia quæcunque faciet prosperabuntur ] Pulcherrimum certe pietatis præmium : ut scilicet pius , & bonis omnia uertant in bonum , & quicquid agas , & molire , prosperos exitus habeat , atque etiam fructum capias ex ijs rebus , quæ detrimentum , & perniciem alijs afferre solent . Hoc ita esse , & diuus Paulus in epistola ad Romanos scripta asseueratè affirmat , & piorum quisque in se ipso quotidie experitur . ceteri , quo pacto possit hoc fieri , uix suspicari queunt .

Sed tanquam puluis ] Ut enim puluerem , & paleas dissipat uentus , sic furia scelerum homines impios , & nefarios exagitant , & quocunque illos libidinum , & cupiditatum æstus impulerit , eò miseri præcipientes ruunt .

Propterea non resurgent impij in iudicio ] Vniuersi quidem mortales ad uitam reuocabuntur , cum IESVS Opt. Max. è cælo descendet ad iudicia exercenda , uerum impij ad tribunal ipsius non sistentur , quippe de quibus iam sententia pronunciata sit , ut scriptum est in euangelio Ioannis . peccatores autem sistentur illi quidem totius uitæ rationem red-

# EXPLANATIO

dituri, sed und cum impijs procul à cœtu, & confes-  
 su iustorum hominum consistent. Sic uulgo solent ex-  
 planare hunc locum. Impios autem interpretantur  
 eos, qui uel falsas religiones colunt, ut Turcæ, ac  
 Iudæi, uel Deum res humanas curare non existimât,  
 uel etiam funditus omnem naturam, & uim diui-  
 nam tollunt. Peccatores intelligi uolunt eos, qui ue-  
 ram quidem religionem profitentur, sed flagitiose,  
 ac turpiter uiuunt, cuiusmodi sunt quamplurimi, qui  
 se christianos numerari uolunt, cum tamen Christi  
 similes in uiuendo esse nolint. Verum illud scire oportet,  
 nomen hebræum, quod in hoc psalmo quater im-  
 piij uocabulo expressum est, latine improbum sonare,  
 tametsi aliquando præcipuum impictatis uitium signi-  
 ficat. Quod autem uerbum resurgendi in hoc uersu-  
 culo positum est, fortasse rectius, quod ad uim pro-  
 priam attinet uocis hebrææ, consistendi, aut standi  
 uerbum poneretur: sed interpret latinus græca, non  
 hebræa conuertit, ut quanquam multa desiderentur  
 in hoc genere, ipse tamen extra omnem culpam sit  
 ponendus. Hæc cum ita se habeant, haud scio, an  
 melius sit huius uersiculi sententiam sic explanare:  
 Cum homines improbi, & uitiosi scelerum furijs  
 agitentur, profecto non poterunt in iudicio consiste-  
 re, sed cadent, condemnatiq; & seclusi à cœtu, &  
 concilio piorum in perpetuas tenebras relegabuntur,  
 cum summus ille iudex ab ijs rationem dictorum, fa-  
 ctorumq; reposcet. Verbum cadendi, & consistendi  
 usurpat etiam M. Tullius eo modo, quo nos usurpa-  
 uimus hoc loco. Apud eundem causa cadere est litem

amittere, & comoedus ille Terentianus cum dicit, se uix stetiſſe, nihil aliud dicere uoluit, niſi fabulas Cæciliij, quas ipſe egerat, uix populi iudicio probatas fuiſſe. Hæc ego exempla ex ſcriptoribus elegantiffimis ponere uolui, ne quis forte exiſtimaret, translationem, qua nos Dauidem uſum ſuſſpicamur, nimis duram, aut inſolentem exiſtere.

Quoniam nouit ] Deus bonorum innocentiam, & uitæ ſanctimoniam ſingulariter amat, imò proborum autem uitam, & mores ſummopere deſtatur, itaque ut illi in perpetuum florentes, ac beati erunt, ſic iſti ſempiternis ſupplicijs afficiantur.

## ARGVMENTVM PSALMI II.

Prædicit coniurationem Iudaorum contra Dominum noſtrum IESVM CHRISTVM, & ipſius regnum ſempiternum canit.

## PSALMVS II.

Quare fremuerunt gentes, & populi meditati ſunt inania?

Aſtiterunt reges terræ, & principes conuenerunt in unum aduerſus Dominum, & aduerſus CHRISTVM eius?

Dirumpamus uincula eorum, & proijciamus a nobis iugum ipſorum.

Qui habitat in cælis, irridebit eos, & Dominus ſubſannabit eos.

Tunc loquetur ad eos in ira ſua, & in furore

## E X P L A N A T I O

suo conturbabit eos.

Ego autem constitui regem meum super Sion montem sanctum meum . Narrabo decretum.

Dominus dixit ad me , filius meus es tu , ego hodie genui te.

Postula d' me , & dabo tibi gentes hereditatem tuam , & possessionem tuam terminos terræ.

Reges eos in uirga ferrea, tanquam uas figuli confringes eos.

Et nunc reges intelligite , erudimini qui iudicatis terram.

Seruite Domino in timore , & exultate cum tremore .

Osculamini filium, ne forte irascatur , & pereatis de uia ,

Cum exarserit in breui ira eius . Beati omnes, qui confidunt in eo .

## E X P L A N A T I O .

Quare fremuerunt gentes ] Hos primos uersiculos explanat sanctorum hominum cœtus in aeternis Apostolorum , his uerbis , Domine tu es Deus, qui fecisti coelum , & terram , mare , & omnia , quæ in eis sunt , qui per os Dauid pueri tui dixisti, Quare fremuerunt gentes , & populi meditati sunt inania ? Astiterunt Reges terræ , & principes conuenerunt in unum aduersus Dominum & aduersus CHRISTVM eius ? Conuenerunt enim uere aduersus sanctum filium tuum Iesum , quem unxisti , Herodes simul, & Pontius Pilatus cum gentibus , & populis Israel ad

faciendum, quæcunque manus tua, & consilium tuum prius decreuerat ut fierent.

Et aduersus CHRISTVM eius ]  
Id est filium, quem pater Iudæorum, & cæterarum nationum regem constituit.

Dirumpamus ] Hæc sunt uerba impiorum, uincula, & iugum CHRISTI à cernicibus suis repellentium.

Qui habitat ] Vaticinatur Dauid, irritos fore conatus Iudæorum.

Tunc loquetur ] Significat excisionem Hierosolymorum, & innumerabiles calamitates, quæ Iudæis impendebant.

Ego autem ] Deus inducitur loquens. intellige autem, Deum CHRISTO regnum tradidisse, quatenus ille homo est, natura enim CHRISTI diuina regnum semper obtinuit.

Narrabo decretum ] Christum facit narrantem, quid de se decreuerit pater.

Dominus dixit ad me, filius ] Ioannes Chrysostomus, Theodorus Antiochenus, Hilarius Picta-  
uorum Pontifex, & ante eos diuus Paulus in actis Apostolorum affirmant, Davidem hoc uersu prædicare CHRISTI reditum ad uitam. Itaque hoc uerbum hodie tempus id significat, quo tempore ille ab inferis exurrexit; atque imperio cæli, & terræ potestus est. Verum hac de re nos satis copiose disseruimus in ea paraphrasi, quæ superioribus annis edita est, unde assumere licebit, quæ ad hunc locum pertinebunt.

Reges eos in uirga ferrea ] Eos uidelicet,

qui imperium tuum repudiarint, neque dicto audientes tibi esse uoluerint. uirga enim ferrea seueritatem imperandi significat. Sed uidentur magis probandi, qui uerterunt ex Hebræo ad hunc modum, Conteres eos uirga ferrea.

Tanquam uas figuli ] Hoc simili magnitudo supplicij exprimitur, itaque Hieremias iussus est, lagunculam fictilem contere in conspectu populi, & hæc loqui, Hæc dicit Dominus exercituum, sic conteram populum istum, & ciuitatem istam, ut conteritur uas figuli, quod amplius refici non potest.

Et exultate cum tremore ] Hortatur princeps, & reges, ut lætentur saluari eius imperio, qui extitit uindex, & parens nostræ libertatis, quiq; obediens sibi ad uitam perducet beatam, & immortalem. Exultandum uero ait cum tremore, propterea quod ut ipsius misericordiae confidere conuenit, ita lenitati coniunctam iustitiam formidare oportet. Quamuis ego libentius crediderim, Dauidem de eo loqui timore, quem parit amor, non culpæ supplicium, quo magis enim quisque alterum ex animo amat; & colit, eo magis uereri solet, ne qua in re animum illius offendat. Hoc timoris genus aduersus CHRISTVM, & ipsius patrem ab homine christiano requiritur in primis.

Osculamini filium ] Hoc est illum esse uestrum regem agnoscite, illum summa pietate colite, & ueneramini, solemus enim osculandis principum manibus nostram erga eos obseruantiam testificari.

Et pereatis de uia ] Id est, ne si iustum eius



Imperium recusaueritis , Deum in uos ira incitetis ,  
 & aberrantes à uia , quæ ducit in coelum , in maxi-  
 mas , & perpetuas misérias uos proijciatis , id quod  
 breui tempore eueniet , nisi insaniendi , & repugnan-  
 di finem facitis .

## ARGVMENTVM PSALMI III.

Queritur de rebellionē populi , & spe diuini auxi-  
 lij animum suum confirmat .

PSALMV S David , cum fugeret à facie  
 Absalon filij sui . III.

Domine quid multiplicati sunt , qui tribulant me?  
 multi insurgunt aduersum me .

Multi dicunt animæ meæ , non est salus ipsi in Deo .

Tu autem Domine protector meus es , gloria mea ,  
 & exaltans caput meum .

Voce mea ad Dominum clamaui , & exaudiuit  
 me de monte sancto suo .

Ego cubabo , & dormiam , meq; excitabo , quia  
 Dominus sustentat me .

Non timebo millia populi circundantis me . Exur-  
 ge Domine , saluum me fac Deus meus ,

Quoniam tu percussisti omnes inimicos meos in  
 maxilla , dentes peccatorum contriuisisti .

Domini est salus , & super populum tuum bene-  
 dictio tua .

Explanatio.

Cum fugeret à facie Absalon ] Hæc histo-  
ria scripta est in secundo libro Regum , Cap. XV.

Et exaltans caput meum ] Hoc ait , quo-  
niam Deus ipsum ex humili , & infimo loco ad alti-  
simum regie dignitatis gradum perduxerat .

Ego cubabo ] Ego ( inquit ) deponam o-  
mnem sollicitudinem , & tranquilla , ac quieta men-  
te consilium , propterea quod uideo , meam salutem  
Deo curæ esse . hoc enim significat , cum dicit , se dor-  
miturum , & sponte sua se excitaturum . Hæc ead-  
em orationis exornatione usus est in Psalmo quarto  
ad significandam magnam animi securitatem , cum  
ait , In pace simul cubabo , & dormiam . & Moses in  
Leuitico , Dabo ( inquit ) pacem in finibus uestris ,  
dormietis , & non erit , qui exterreat . Quin etiam  
quod in latinorum est prouerbio , dormire in utram-  
vis aurem , id eandem sententiam continet .

Quoniam tu percussisti ] Dicit , se opem  
Dei fidenter implorare , propterea quod is sæpe aliis  
sibi periclitanti auxilio , salutisq; fuerat , & uim ho-  
minum perditorum infregerat , qui uitam ipsius tan-  
quam immanes belluæ appetebant .

Domini est salus ] Idest solus ex omnibus  
Deus salutem dare , & conseruare potest . quo circa  
omnem nostram fiduciam in sola eius misericordia  
collocare debemus .

Et super populum tuum benedictio tua ]  
Populum Dei appellat omnes pios , quos significat

non modo saluos , & incolumes à Deo conseruari ,  
sed etiam bonis omnibus augeri , atque ornari , sub  
hoc enim uerbo benedictionis hæc sententia subic-  
ta est .

## ARGVMENTVM PSAL. IIII.

Prædicat misericordiam Dei erga se , & inimicos  
suos hortatur , ut deponant odia , & libenti animo  
se subiiciant eius imperio , quem Deus ipse carissim-  
um habet , atque amplissimo regis honore , & no-  
mine affecit . uidetur autem hoc carmen initio regni  
sui composuisse .

Victori in Neginoth , Psalmus  
David IIII.

Inuocantem me exaudi Deus iustitiæ meæ , in tri-  
bulatione dilatasti mihi .

Miserere mei , & exaudi orationem meam .

Filij uiri usquequo gloriam meam ad ignomi-  
niam ? ut quid diligitis uanitatem , & queritis men-  
dacium ?

Et scitote , quod segregauit Dominus sanctum sibi ,  
Dominus exaudiet me , cum clamaui ad eum .

Contremiscite , & nolite peccare , cogitate cum  
corde uestro in cubilibus uestris , & tacete .

Sacrificate sacrificia iustitiæ , & sperate in Domi-  
no . multi dicunt , quis ostendit nobis bonum ?

Eleva super nos lumen uultus tui Domine , dedi-  
sti lætitiā in corde meo ,

## E X P L A N A T I O

Ex quo tempore frumentum eorum, & vinum eorum multiplicata sunt.

In pace simul cubabo, & dormiam,  
Quoniam tu Domine solus securum habitare fecisti me.

## E X P L A N A T I O.

Victori in Neginoth ] De inscriptionibus hymnorum, & cur in ipsis, sæpe uocabulis hebræis usi simus, explicatum est in eo proœmio, quod nostræ paraphrasi præpositum est.

Deus iustitiæ meæ ] Id est auctor, & custos innocentie meæ.

In tribulatione dilatasti mihi ] Id est, cum in maximas periculorum angustias adductus essem, tu uiam saluti meæ latam effecisti, meq; in tuto, & tranquillo collocasti.

Filij uiri ] Sic appellare solent Hebræi plerunque homines claros, & insignes. Vanitatem uero & mendacium uocat conatus illorum irritos, & inanes, atque consilia contra salutem ipsius frustra inita. Sic ficus, & arcus mendaces in literis sanctis appellantur, quod fallant expectationem. uel potius eos reprehendit, quod posthabita cura rerum diuinarum falsa, & inania bona consecutentur, & omnes cogitationes suas abijciant in res futes, atque fallaces. Est igitur huius uersiculi sententia, uos principes ciuitatis appello, quousque tandem abutemini patientia mea? Quousque toto animo, & studio omni incumbetis in eam curam, ut mihi ui-

tam, & omnia uitæ ornamenta eripiatis? Quamdiu cogitationes uestræ uersabuntur in rebus uilissimis, tamq; contemptis?

Scitote quod ] Nolite (inquit) existimare, me humana ope, aut consilio ad regiam dignitatem peruenisse: ipse enim Deus me multis è millibus electum genti suæ præfecit: ex quo fit, ut qui meum repudiet imperium, non mihi, sed Deo repugnet. Vocabulum hebræum, quod interpret latinus græcum secutus sancti uerbo exprimere solet, proprie in ijs hominibus ponitur, qui sunt animo benefico, & liberali, & ad iuuandos omnes admodum propenso. talem autem decet in primis cum esse, qui regnum administrat.

Contremiscite ] Monet illos, ut aliquando tandem metu diuini numinis à maleficio se se contineant, ne' ue animo præcipiti, & perturbato quicquã gerant, sed silentio noctis, cum mens soluta, & libera, & cæteris omnibus curis uacua est, diligenter exquirant, & cum animis suis considerent, quid faciendum, fugiendumq; sit, quid uerum, & ratio præcipiat, in primis, ut omni studio contineant linguam: quam si quis didicit moderari, maximum certe præsidium sibi ad reliquas uirtutes comparauit.

Sacrificate sacrificia iustitiæ ] Hortatur inimicos, ut resipiscant, & peccata sua expient. appellat autem sacrificia iustitiæ illa, quæ cum fide, & uera pietate fiebant. uel potius ita uocat ipsius iustitiæ cultum, atque animi exercitationem in optimis rebus. quo genere sacrificij nihil excellentius, nihil

# EXPLANATIO

Deo gratius à nobis accidere potest. sic alio in loco laudis sacrificium dixit, cum dicere uellet hymnos, & studium diuinæ bonitatis prædicandæ, & laudibus offerendæ.

Multi dicunt ] Multi quòd uiderent Dauidem maximis, & assiduis calamitatibus exagitari solitum, suspicabantur, eius imperium reip. calamitosum fore. itaque cum ille iam adeptus regiam dignitatem ipsos hortaretur ad obedientiam, secum ipsi dicebant, quis præstabit, utile nobis fore, ut hic regnum administret? His rebus permotus uir sanctus Deum precatur, ut gentem Hebræam placidis oculis intueatur, suumq; sanctissimum numen tam præsens, tamq; propitium exhibeat, ut omnes intelligant, ipso regnante omnia prospera, & secunda fore.

Dedisti læticiam ] Letabatur David, quòd initia regni sui magna fertilitas agrorum consecuta foret: ea enim res polliceri uidebatur, ipsum dignitate sua non calamitatem populo, ut multi suspicabantur, sed prosperitatem potius allaturum. Haud equidem oblitus sum, me aliter hos uersiculos interpretatum esse in paraphrasi, sed unicuique liberum erit, utram explanationem sequi malit.

In pace simul cubabo ] Sententia huius uersiculi in explanatione psalmi superioris explicata est.

## ARGUMENTVM PSAL. V.

Implorat auxilium Dei contra uim, & furorem saulis.

Victori ad Neginoth, Psalmus  
David V.

Verba mea auribus percipe Domine, intellige clamorem meum.

Intende voci orationis meae Rex meus, & Deus meus,

Quoniam ad te orabo Domine, mane exaudies vocem meam,

Mane institutam ad te (orationem) & suspiciam,  
Quoniam non Deus uolens iniquitatem tu es.

Neque habitabit iuxta te malignus, non permanent iniusti ante oculos tuos.

Odisti omnes, qui operantur iniquitatem, perdes omnes, qui loquuntur mendacium,

Virum sanguinum, & dolosum abominabitur Dominus, ego autem in multitudine misericordiae tuae.

Introibo in domum tuam, adorabo ad templum sanctum tuum in timore tuo.

Domine deduc me in iustitia tua propter inimicos meos, dirige in conspectu meo uiam tuam.

Quoniam non est in ore eorum ueritas, cor eorum fraudulentum est.

Sepulcrum patens est guttur eorum, linguis suis dolose blandiuntur, iudica illos Deus.

Decidant a cogitationibus suis, propter multitudinem praeuaricationum suarum expelle eos, quoniam rebellauerunt contra te.

Et latentur omnes, qui sperant in te, in aeternum

# EXPLANATIO

exultabunt, & proteges eos.

Et gloriabuntur in te omnes, qui diligunt nomen tuum, quoniam tu benedices iusto,

Domine tanquam scuto bona uoluntate tua circundabis eum.

# EXPLANATIO.

Mane exaudies ] Hoc ait, quoniam matutinum tempus, & uespertinum lex attribuebat precationibus, & sacris faciendis. matutinum uero in primis accommodatum est, quod ea hora magis uacui sumus à cæteris curis. hinc illud, Deus, Deus meus ad te de luce uigilo. & alio loco, mane oratio mea præueniet te.

Mane insituiam ad te (orationem) & suspiciam ] Quoniam lingua Iudeorum perangusta est, ac præcisionibus orationis abundat, quæ quidem res, mirabile dictu est, quàm magnas afferat difficultates ad intelligendum, propterea uisum est nobis esse faciendum, ut non nihil de nostro nonnullis in locis adderemus, quo fieret oratio plena, atque perfectæ, quæ uero uerba ad hunc modum adiecta fuerunt, ea ferè omnia lineis sunt inclusa, ut in hoc uersiculo factum uides.

Et suspiciam ] Verbum hebræum eam uim habet, ut in ijs ponatur, qui oculis obseruant, aliquid expectantes. itaque uerba hæc habent hanc sententiam, mane assistam supplex misericordiæ tuæ, & sublatis ad coelum oculis expectabo, dum mihi perditio, & afflicto opem aliquam feras. cum enim detesteris



detesteris maleficia, & impietatem, certissimam spem habeo, te diutius non passurum, ut boni exterminentur, & scelerati in tua sancta ciuitate floreat.

Virum sanguinum ] Hæc omnia quamquam communiter ad improbos referri possunt, tamen in Saulem præcipue dicuntur: quem quidem hominem fuisse barbarum, iniustum, crudelem, & omni scelere coopertum, legimus in libris Regum. Itaque uaticinatur fore, ut Deus tandem illius scelera, & crudelitatem puniat, & omnibus declarer, quantopere detestetur hoc hominum genus perditissimum.

Ego autem ] Prædicit, se tandem sublati inimicis saluum, & incolumem in sanctam ciuitatem reuersurum.

Domine deduc ] Quoniam hostes imminabant semper capiti ipsius, orat Deum, ut pro singulari bonitate, qua uti solet erga homines pios, sibi dux, & comes sit in tantis periculis, neque permittat, animum suum ulla ui, uel metu inimicorum de recto uitæ curriculo declinare: uiam enim Dei appellat eam uiuendi rationem, quam Deus requirit à nobis, quamq; ille suis sanctissimis legibus præscripsit.

Sepulcrum patens ] Significat ips uerbis, ex istorum ore prodire uerba mortifera, ut de salute illius actum sit, qui eorum malitiosas blanditias non cauet. Dauidem imitatus Hieremias pharetras hostium nominat sepulcrum patens, quod illorum

# EXPLANATIO

sagittæ certam perniciem ictibus afferrent .

Tanquam scuto ] Ait, Deum beneuolentia sua tanquam scuto firmissimo protegere uiros bonos , ac pios, illosq; incolumes conseruare ab omnibus telis , & insidijs inimicorum .

## ARGVMENTVM PSAL. VI.

Existimant Dauidem fecisse hos uersus , cum in morbum , & grauissimas calamitates incidisset ob stuprum Bersabeæ illatum, & maritum eius crudeliter interemptum .

Victori in Negiloth super Seminith ,  
Psalmus David V I .

Domine ne in furore tuo arguas me, neque in ira tua corripias me .

Miserere mei Domine , quoniam infirmus sum : sana me Domine , quoniam conturbata sunt ossa mea ,

Et anima mea turbata est ualde , sed tu Domine usquequo ?

Conuertere Domine , & eripe animam meam , saluum me fac propter misericordiam tuam .

Quoniam non est in morte qui memor sit tui , in inferno autem quis confitebitur tibi ?

Laboravi in gemitu meo, lauabo per singulas noctes lectum meum, lacrimis meis stratum meum rigabo .

Caligauit præ amaritudine oculus meus , inuete-

rauit propter omnes inimicos meos .

Discedite à me omnes, qui operamini iniquitatem,  
quoniam exaudivit Dominus uocem fletus mei ,

Exaudivit Dominus deprecationem meam , Do-  
minus orationem meam suscepit .

Erubescant , & conturbentur uehementer omnes  
inimici mei , conuertantur , & erubescant ualde ue-  
lociter .

## EXPLANATIO .

Domine ne in furore ] Orat Deum, ne ni-  
mis iracunde secum agat , ne' ue ad scelus, quod com-  
miserat, uindicandum acerbitatem adhibeat, sed pa-  
ternam seueritatem .

Sed tu Domine usquequo ? ] Quandiu(in-  
quit ) exercebis iram in supplicem tuum ? quousque  
differes curationem animi , & corporis mei ?

Conuertere Domine ] Id est auertisti fa-  
ciem tuam à me propter scelera , & flagitia mea ,  
nunc quaeso tandem placatus oculos tuos ad me con-  
uerte , quando animus meus humilis , & mœrens to-  
tus ad te conuersus est .

Quoniam non est in morte ] Propterea(in-  
quit ) studeo , quamprimum à te sanari animam  
meam , quoniam certo scio , nullam esse reliquam  
spem curationis , si uita excedens mecum feram uul-  
nera delictorum . Scio inquam Domine , hominem  
sic morientem unà cum uita perdere & tui memo-  
riam , & confitendi peccati sui facultatem , quòd si  
animus illius uel tui recordetur , uel peccata sua con-

# EXPLANATIO

fiteatur, inanis tunc eius confessio, inanis est eius recordatio. sic ferè ueteres explanant. Alij uero totum hunc locum interpretantur in eam sententiam, ut dicant, uirum sanctum in maximis periculis uerè san-tem de salute sua orare, & ostendere, se in uita retinendum esse, & ad eam rem demonstrandam ea ratione uti, qua ipsum usum uidemus etiam in Psalmo XXX. cum ait, Quæ utilitas in sanguine meo, si descendero in corruptionem? Nunquid confitebitur tibi puluis, aut annuntiabit ueritatem tuam? Idem in alio Psalmo ait, Nunquid narrabit aliquis in sepulcro misericordiam tuam, & ueritatem tuam in perditione? Itaque uidetur etiam hoc loco mortem deprecari, ut in uita manens possit Deum laudibus celebrare, & ueram religionem inter mortales longe, lateq; propagare: id autem qui facere poterat, si è uita excessisset? Itaque illud scire oportet, confessionem in literis sanctis sæpenumero pro laudatione appellari, & uocabulum hebræum, quod interpres latinus græcum secutus uertit infernum, proprie sepulcrum significare, tametsi eodem nomine statum quoque mortuorum appellant tam eorum, qui iuste, sancteq; uixerunt, quàm eorum, qui uitij, & sceleribus contaminati à uita discesserunt.

Lauabo per singulas noctes ] Lectum suum adulterij turpissimi foeditate commaculat, eas maculas se assidujs lachrimis deleturum ait, significans his uerbis summum animi dolorem, & cruciatum, quem sustinebat ob legem Dei uiolatam, & turpitu-

dinem sceleris commissi .

Caligauit præ amaritudine ] Dicit , se uita  
tam uiuere amarissimam , ut iam præ continuo lu-  
ctu , & lacrimis penè oculos amiserit , dum culpam ,  
& peccata sua , & acerbis iniurias inimicorum de-  
fere nunquam desinit .

Discedite à me ] Solet uir sanctus , cum dea  
fleurit calamitates suas , & misericordiam Dei implo-  
rauit , repente animum exhilarare , & uoces letitiæ  
plenas emittere , glorians , preces suas à Domino audi-  
tas esse . qua quidem re nos monet , si ad Deum pu-  
ra mente accedamus , non esse dubitandum , quin eius  
clementiam facile exoremus , & propitium numen  
sentiamus .

#### ARGVMENTVM PSAL. VII.

Cum Saul Dauidem proditiõis insimularet , qua  
de re scriptum est in primo libro Regum , uir sanctus  
his uersibus sese purgauit , in quibus commemorat in-  
nocentiam suam , & diuinam iustitiam aduersus cru-  
delitatem Saulis implorat , & illius interitum præ-  
dicit .

Psalmus Dauid , quem cecinit Domino pro  
uerbis Chus filij Iemini , VII.

Domine Deus meus in te speraui , saluum me fac  
ex omnibus persequentibus me , & libera me ,

Ne quando rapiat ut leo animam meam , laceret ,  
& non sit , qui eripiat .

# EXPLANATIO

Domine Deus meus si feci istud, si est iniquitas in manibus meis,

Si reddidi malum habenti mecum pacem, si deserui aduersantem mihi sine causa,

Persequatur inimicus animam meam, & comprehendat, & conculcet in terra uitam meam, & gloriam meam in puluere habitare faciat.

Exurge Domine in ira tua, & exaltare contra commotiones inimicorum meorum.

Et exurge ad me in iudicio, quod mandasti, & congregatio populorum circumdabit te,

Et propter hanc in altum regredere, Dominus iudicabit populos,

Iudica me Domine secundum iustitiam meam, & secundum innocentiam meam, quæ est in me.

Consumet malitia peccatores, & diriges iustum scrutans corda, & renes Deus iuste.

Adiutorium meum à Domino, qui saluos facit reftos corde.

Deus index iustus, & Deus irascitur per singulos dies.

Nisi conuersus fuerit, gladium suum acuet, arcum suum tetendit, & parauit illum,

Et ipsi parauit uasa mortis, sagittas suas in persequentes effecit.

Ecce parturivit iniustitiam, concepit dolorem, & peperit mendacium.

Lacum aperuit, & effodit eum, & incidit in foveam, quam fecit.

Conuertetur dolor eius in caput eius, & in uer-

ticem ipsius iniquitas eius descendet .

Confitebor Domino secundum iustitiam eius , & psallam nomini Domini altissimi .

## EXPLANATIO .

Pro uerbis Chus filij Iemini ] Saulem Chusim nominat, id est Aethiopem propter eius profligatos, ac perditos mores, in eiusmodi enim hominibus nomen nigri apud ueteres poni solitum; indicant etiam poëtae latini, ita tamen uerum nomen suppressit, ut satis ostenderet, in quem scribat, cum eum uocat filium Iemini, in cuius fami'ia natus est Saul, qui se ipse filium Iemini uocat in libris Regum .

Domine Deus meus si feci istud ] Ego (inquit) Domine opem tuam expecto conscius innocentiae meae, Quod si id commisi, quod Saul mihi obijcit, si eius inquam uitae, ac regno insidiatus sum, persequatur inimicus animam meam &c. Quod uero sequitur, si malum reddidi habenti mecum &c. id habet hanc sententiam: Ego quidem saulem, dum ille me amanter, & honorifice tractauit, uniuse dilexi, summamq; semper obseruantia colui, cum uero is ne uerbo quidem uiolatus à me animum alienasset, meq; omni conatu capite, & fortunis oppugnaret, tantum absuit, ut iniurias grauissimas ulciscerer, ut cum mihi non semel eius opprimendi facultas accidisset, semper illi pepercerim, semper eius salutem meae praeponerim. quod si mentior, persequatur inimicus animam meam &c.

Et exurge ad me in iudicio, quod mandasti. ]

# EXPLANATIO

Tu Domine præcepisti rectoribus ciuitatum, ut eos, qui uiolarentur, iniuria prohiberent, neque aliquem sinerent iniuste opprimi, tu ergo præsta, quod alijs faciendum præcepisti, & uindica me ab impetu Tyranni.

Et congregatio populorum ] Id quidem à summis uiris obseruatum, & memoriæ proditum est, qualescunque principes ciuitatum fuerunt, semper tales ciuitates fuisse, & ob eam causam uiciosos principes plus exemplo, quàm peccato nocere, quòd per multi imitatores eorum existant. Itaque cum Saul homo perditissimus, & contemptor Dei regnum obtineret, necesse erat, negligi in ciuitate curam rerum diuinarum. Hoc intelligens Dauid non tam uitæ suæ, quàm religioni, & saluti ciuium consulens supplicium tyranni sceleribus exposcit, confirmandum fore, ut eo sublato populi ad cultum diuinum reuertantur, id enim significat, cum ait, & congregatio populorum circumdabit te. & re uera nihil ferè est, quod magis animos uulgi ad religionem excitet, quàm ubi Deus iustitiæ suæ documenta constituit, & insigni aliquo facinore declarat, se bonis consulere, improbos ulcisci.

Et propter hanc ] Id est, pro salute huius ciuitatis, & conuentus declara uim, & potestatem tuam in homines impios, & omni scelere contaminatos, ut qui te quasi iacentem, atque humana omnia despicientem negligunt, excelsum, & omnium rerum moderatorem esse intelligant, & sanctissimum numen tuum debito cultu uenerentur.



Indica me secundum iustitiam meam ]

Non uirtutes suas prædicat his uerbis, aut iustitiam iactat apud Deum, quem appellans alio loco ait, Ne intres in iudicium cum seruo tuo, quia non iustificabitur in conspectu tuo omnis uiuens, sed significat, se in eo, in quo accusatur, omni culpa uacare, quippe qui neque re, neque uerbo Saulem uiolarit.

Nisi conuersus ] Nisi (inquit) Saulem suorum scelerum poenituerit, prædico, illum gladio, & sagittis Dei interiturum. nec falsus uates fuit Dauid, nam legimus in libris Regum, Saulem & sagittis hostium fuisse uulneratum, & suo se gladio traiecisse. hæc autem poena illi à Domino irrogata fuit, itaque recte dicit, cum gladio, & sagittis Domini interfectum iri.

Et ipsi parauit uasa mortis ] Id est, in ipsum Saulem arma mortifera præparauit. sic apud Ezechielem, Vnusquisque uas interfectionis habet in manu sua.

Ecce parturiuit ] Exaggerat improbitatem Saulis pulcherrima allegoria. Est autem וָסֶגֶוֹר נֶגֶוֹ רֶגֶוֹ, conceptus enim parturiendi tempus antecedit, concepit autem Saul dolorem ex inuidia, cum uideret Dauidem sibi rerum gestarum gloria præferri, parturiuit autem iniustitiam, cum dissimulato odio perniciem illi machinabatur, peperit autem mendacium, cum odium suum patefecit, & ficto insidiarum crimine innocentem bello persecutus est, tunc enim eius improbitas, quæ prius animo coelabatur, tanquam foetus ex utero in apertum prodijt. uel ait,

# EXPLANATIO

saulem concepisse dolorem, propterea quod machinabatur ipsi calamitatem, & mortem. cui sententiae respondet id, quod paulo infra subiungitur, conuertetur dolor eius in caput eius, id est dolor, & perniciēs, quam mihi moliebatur, in eius caput redundabit.

Lacum aperuit ] Alia est allegoria, quae significat fore, ut Saul in ea mala incidat, quae parauerat ipsi Dauidi. Quod autem res futuras pronuntiat, perinde quasi earum rerum tempora iam praeterierint, id usu, & consuetudine linguae hebraeae facit, quae res futuras exprimere solet etiam uerbis tempus praeteritum significantibus.

## ARGVMENTVM PSAL. VIII.

Existimant omnes ferè interpretes graeci, & latini, Ecclesiam piorum induci hoc hymno uictoriam CHRISTI, & nomen ueri Dei toto orbe diffusum celebrantem, deinde beneficia eius in uniuersum genus humanum collata praedicantem.

Victori ad Githith Psalmus

Dauid VIII.

Domine Dominus noster quàm admirabile est nomen tuum in uniuersa terra,

Quoniam eleuata est magnificentia tua super coelos.

Ex ore infantium & lactentium perfecisti laudem propter inimicos tuos, ut destruas inimicum, &

ultorem.

Quoniam uidebo cœlos tuos opera digitorum tuorum, lunam, & stellas, quæ tu fundasti.

Quid est homo, quid memor es eius? aut filius hominis, quod uisitas eum?

Minuisti eum paulo minus ab Angelis, gloria, et honore coronasti eum, & constituisti eum super opera manuum tuarum.

Omnia subiecisti sub pedibus eius, oves, & boves uniuersas, insuper & pecora campi,

Volucres cœli, & pisces maris, & quicquid perambulat semitas maris.

Domine Dominus noster quàm admirabile est nomen tuum in uniuersa terra.

#### EXPLANATIO.

Ex ore infantium   Hoc (ait) in primis uim, & salutarem potentiam tuam declarauit, quod per Apostolos tuos, homines rudes, & indoctos, & simplicibus pueris similes, nomen tuum per cunctas nationes fama celebraſti, & asperſſimam Diaboli tyrannidem funditus euerſiſti. Vocat autem Diabolum inimicum, & ultorem, quoniam ille nos odio ſempiterno perſequitur, & ad peccata ſemper inſtigat, peccantes uero ulciſcitur, atque ad ſupplicium rapit. Theodoretus ſic explanat hunc uerſiculum.

Quoniam uidebo   Latatur eccleſia piorum, quod deniſto, ac deſeto hoſte ſempiterno generis humani, ſibi iam pateat aditus ad cœlum, ubi multa, & uaria ſpectacula ſit habitura, ſeq; ſcientiam re-

## E X P L A N A T I O

rum pulcherrimarum percepturam intelligat. Ita interpretatur hunc locum Gregorius Nazianzenus in libris de theologia. quidam uero sic explanant, ut existiment, cum David suspiceret lunam, & stellas, monumenta diuinitatis sempiterna, atque ex altera parte consideraret incredibilem amorem, quem habet erga humanum genus tantorum operum effector, & dominus, exclamare solitum, Domine quid est homo, quod memor es eius? aut filius hominis, quod uisitas eum?

### A R G V M E N T V M   P S A L. IX.

Hymnus est, quo celebrat uictoriam, quam ex bello formidolosissimo reportarat.

Victori super morte insipientis,  
psalmus David   IX.

Confitebor tibi Domine in toto corde meo, narrabo omnia mirabilia tua.

Letabor, & exultabo in te, psallam nomini tuo altissime,

Cum conuersi sint inimici mei retrorsum, & corruerint, & perierint à facie tua.

Quoniam fecisti iudicium meum, et causam meam, sedisti super thronum, qui iudicas iustitiam,

Increpasti gentes, & periit impius, nomen eorum delesti in aeternum, & in seculum seculi.

O inimice confectæ sunt uastitates in aeternum? ciuitates destruxisti?

Perijt memoria eorū cum ipsis ? Dominus autem  
in æternum permanet .

Parauit ad iudicandum thronum suum , & ipse  
iudicabit orbem terræ in æquitate , iudicabit populos  
in iustitia .

Et factus est Dominus refugium pauperi , adiutor  
in opportunitatibus , in tribulatione .

Et sperent in te , qui nouerunt nomen tuum , quo  
niam non dereliquisti quærentes te Domine .

Psalite Domino , qui habitat in Sion , annuntiate  
inter gentes opera eius .

Quoniam requirēs sanguinem eorum recordatus  
est , non est oblitus clamorem pauperum ,

Miserere mei Domine , uide afflictionem meam de  
inimicis meis ,

Qui exaltas me de portis mortis , ut annuntiem  
omnes laudes tuas in portis filie Sion .

Exultabo in salutari tuo , demersæ gentes in fo-  
ueam , quam fecerunt .

In laqueo quem absconderunt , comprehensus est  
pes eorum ,

Cognitus est Dominus iudicia faciens , in operibus  
manuum suarum comprehensus est peccator .

Conuertantur peccatores in infernum , omnes gen-  
tes , quæ obliuiscuntur Deum ,

Quoniam non in æternum obliuio erit pauperis ,  
spes pauperum non peribit in æternum .

Exurge Domine , ne præualeat homo : iudicentur  
gentes in conspectu tuo .

Incute Domine timorem illis , sciant gentes , quod

# EXPLANATIO.

homines sunt.

## EXPLANATIO.

Super morte insipientis ] Plerique Hebræorum hunc insipientem existimant esse Goliathum illum Palæstinum, quem David singulari certamine superauit.

Cum conuersi sint ] Ita quoque uertit hunc uersiculum Symmachus, ut refert Theodoretus.

O inimice ] Multæ sunt explanationes huius loci, nos secuti sumus eos, qui existimant, interrogationem esse, qua uir sanctus insultet in hostem barbarum, & immanem, qui minatus fuerat, se uastaturum terram Iudæam, & nomen Hebræorum ad internecionem redacturum, & eo quidem libentius hanc explanationem amplectimur, quod in uersiculo hebræo inest interrogationis nota.

Quoniam requirens sanguinem ] Id est ultus est iniurias, quas nobis finitimæ gentes intulerant: requirere enim sanguinem, in literis sanctis est eadem alicuius ulcisci, ut apud Ezechielem, sanguinem eius de manu tua requiram.

Miserere mei Domine ] Dixerat, Deum non esse oblitum clamorem miserorum: quid uero clamauerint illi, nunc ostendit.

Vt annunciem laudes tuas ] Miserere (inquit) mei, & incolumitati meæ consule, ut in conuentu piorum laudes tuas possim prædicare. Ex quo intelligitur, uitam & optandam, & petendam esse, non quo fruendis uoluptatibus, uel diuitijs cumulan-

dis nos dedamus, aut honoribus, & gloriæ inserviamus, sed ut Deum optimum maximum uerbis, & factis laudemus, atque homines ad religionem, & ueram pietatem cohortemur. Sciendum est autem, apud ueteres Hebræos portas urbium celeberrimam partem ciuitatis fuisse, & in ijs agitari iudicia, & populi cœtus celebrari consueſſe. itaque portæ appellantur in literis sanctis loca publica, & celebra. In portis igitur urbis, id est, in conuentu populi prædicaturus est laudes Dei.

Demersæ sunt gentes in foueam, quam fecerūt ] significat, quæ mala hostes Hebræis intentauerant, in ea ipsos mala nec opinantes incurriſſe.

Sciant gentes, quod homines sunt ] Id est, intelligant impij suo magno malo, se mortales esse, & caducos, & ea conditione natos, ut eorum res florentes possint fieri deteriores, & rebus asperis commutari.

#### ARGVMENTVM PSAL. X.

Inuehitur in homines impios, & crudeles: quorum secundæ res, & iniustitia aduersus Deum, atque homines saepe commouent animos piorum, ut ea querantur, quæ Dauid persequitur hoc psalmo.

#### PSALMVS X.

Ut quid Domine recessisti longe? abscondis (faciem) in opportunitatibus, in tribulatione?

Dum superbit impius, persequitur pauperem, com

# EXPLANATIO

prehendantur in consilijs, quæ cogitant.

Quoniam laudat peccator desiderium animæ suæ,  
& auarus benedicit

Blasphemanti Dominum. Impius propter superbiam, quam uultu præsefert, non querit Deum.

Non est Deus in ullis cogitationibus eius, molestæ sunt uia illius in omni tempore.

Procul iudicia tua sunt à facie eius, omnes inimicos suos flatu prosternit.

Dicit in corde suo, non mouëbor, à generatione in generationem ero sine malo.

Maledictione os eius plenum est, & dolis, & fraude, in lingua eius afflictio, & iniquitas.

Sedet in insidijs pagorum, & clam interficiet innocentem.

Oculi eius in pauperem respiciunt, insidiatur in abscondito quasi leo in spelunca sua,

Insidiatur, ut rapiat pauperem, rapiet pauperem dum attrahit eum

In rete suum. subsidit, & humiliat se, & cadet in fortitudine eius turba pauperum.

Dixit in corde suo, oblitus est Deus, abscondit faciem suam, ne uideat in æternum.

Exurge Domine, & exalta manum tuam, ne obliuiscaris pauperum.

Propter quid irritauit impius Deum? Dixit in corde suo, quòd non quæres?

Certe uides: tu enim afflictionem, & furorem intueris ut tradatur in manus tuas.

Tibi derelictus est pauper, orphano tu eris adiutor.



iutor .

Contere brachium peccatoris , & maligni , quæ-  
tur peccatum illius , & non inuenietur ,

Dominus regnabit in æternum , & in seculum se-  
culi , peribitis gentes de terra illius .

Desiderium pauperum audisti Domine , diriges  
cor eorum , auscultabit auris tua ,

Ut iudices pupillo , & humili , ne pergat eos con-  
terere homo de terra .

#### EXPLANATIO .

Capiantur in consilijs ] Id est , quos dolos  
bonis machinantur , ipsi dolis capiantur ipsi , & scele-  
rum pœnas luant .

Quoniam laudat ] Id est , quicquid libido  
imperat , quicquid suadet insatiabilis intemperantia ,  
rectum id ducit , & amplectendum .

Et auarus ] Id est , non desunt homines  
perditissimi , qui ob spem prædæ impijs adulentur , at-  
que ad scelera , & flagitia incitatos magis impellant .

Omnes inimicos ] Ita uertit etiã Aquila hunc  
locum , ut refert Theodoretus . Hæc autem hyperbo-  
le mire exprimit nimiam potetiam improborum , qua  
illi sublatis perpetuam sibi felicitatem pollicentur .

Subsidit , & humiliat se ] Aiunt nonnulli , hæc  
esse translationē sumptam à bestijs , quæ prædam in-  
uasuræ se se inclināt , ut maiore conatu impetū faciāt .  
sic improbi aliquando se demittūt , & summissius ge-  
rūt , quo facilius ea simulatione incautis perniciē ferāt .

Exalta manum tuā ] Tolle (inquit) ultricē  
manum , & sublimi flagello cade impium arrogantē ,

## E X P L A N A T I O

ut qui te iactat oblitū esse rerū humanarum, suo magno malo memorē experiatur, et nocētibus horribilē, & formidolosum. Deinde grauit̃r cōmotus nefanda oratione impij subiungit, Propter quid irritauit &c.

Orphano tu eris adiutor ] Orphanos uocat pios sic omni hominum ope destitutos, ut egenes pueri solent parentibus orbatī.

Quærat̃ur peccatum illius ] Translatio est sumpta à iudicijs. si quæstionem ( inquit ) habeas de perditis eius moribus, & factis, is certe nusquam comparebit: peribit enim condemnatus, & in æternas tenebras deijcietur. Ita hunc locum interpretantur Athanasius, Chrysostomus, Cyrillus, & Abrahamus Esdra explanator inter Hebræos clarus in primis.

Peribitis gentes ] Impios, & crudeles Hebræos appellat gētes, ut etiā alijs in locis, propterea quod impiarū nationū barbariā, & immanitatē imitabantur.

Diriges cor eorū ] Id est, morem illis gerēs, & facies, ut ipsi omnia ex sententia succedant.

Vt indices pupillo, & humili ] Hoc est, ut eorum iniurias ulciscaris, & pœnas ab impijs, qui illos opprimunt, iudicio persequare.

## A R G V M E N T V M P S A L. XI.

Colloquitur cū amicis, qui fugam ipsi suadebant, ne per insidias à Saule circūueniretur. quibus ille respondet, rerum omnium moderatorem, & dominum esse Deum, neque sine eius prouidentia quicquam gerī ab hominibus, quare innocentes bono animo esse debere, improbis autē certam perniciem expectādā esse.

Victori David, psalmus X I.

In Domino confido, quomodo dicitis animæ meæ,  
ut transmigret è monte uestro sicut passer?

Quoniam ecce peccatores intenderunt arcum, pa-  
rauerunt sagittas suas super neruum, ut sagittent in  
obscurò rectos corde.

Quoniam fundamenta dissipata sunt, iustus au-  
tem quid fecit?

Dominus in templo sancto suo, Dominus in cælo  
sedes eius,

Oculi eius respiciunt, palpebræ eius explorant fi-  
lios hominum.

Dominus examinat iustum, impium autem, &  
eum, qui diligit iniquitatem, odit anima eius.

Pluet super peccatores carbones, ignis, & sulphur,  
& spiritus procellarum pars calicis eorum.

Quoniam iustus Dominus, iustitias diligit, re-  
ctum aspicit uultus eius.

# EXPLANATIO.



Quoniam ecce ] Respondent amici, &  
demonstrant, quibus rationibus adducti fugam illi  
suadeant, quarum una est, quòd intelligant, iam  
iamq; illi imminere exitium ab hostibus, altera est,  
quòd extinctis legibus, & iudicijs nulla detur facul-  
tas resistendi potentie improborum.

Quoniam fundamenta dissipata sunt ]  
videtur fundamenta pro legibus appellasse: leges  
enim fundamèta sunt totius Reip. & salutis singulo-

# EXPLANATIO

rum, sine quibus ciuitas neque permanere potest, neque constitui. unde à poeta dictum est, Agnosco crines, incanaq; menta Regis Romani, primus qui legibus urbem Fundabit. Itaque Symmachus sententiam secutus non uerba, uertit ex Hebræo ad hunc modum, ut testatur Hesychius, Quoniam leges dissipatæ sunt. & Symmachum quidem secutus est Hieronymus.

Iustus autem quid fecit? ] At ( inquit uir sanctus ) quid commisi ego, quid' ue locutus sum, cur mihi uitam studeant eripere? Sed profecto Dominus in caelo regit terras, & humanum genus, & desuper intuetur, quid agat unusquisque, quid' ue patiat, ut bonos subleuet, ac puniat malos.

Oculi eius respiciunt ] Oculorum, & palpebrarum appellatione uim Dei cuncta intelligentem, & administrantem intelligit.

Dominus examinat iustum, impium autem ] Horum uerborum hæc uidetur esse sententia, quemadmodum aurum igne perspiciunt, sic Deum pios homines rebus aduersis explorare, quo eorum animi efficiantur puriores, & uirtus illustrior existat, impios autem & iniustos illi esse inuisos, tametsi ad piorum utilitatem eis secundiores aliquando res cõcedit, quæ mox tamen commutantur, & maiora illis supplicia pariunt.

*calix.* Pars calicis eorum ] Id est, merces, quæ illis pro meritis debetur. Calix enim sæpe in literis sanctis appellatur quicquid nobis aut boni, aut mali contingit à Deo. itaque hoc loco supplicia improbo-

rum significat, ut etiam apud Esaiam, & Hieremiam. uolens autem Dauid magnitudinem peccatorum sceleratis impendentium exaggerare, eis supplicia minatus est Sodomitarum, qui sulphure, & igne cœlesti deflagrauerunt.

Rectum aspiciunt   Sic Dominus in Leuitico, respiciam uos, inquit, & crescere faciam. contra, uultum dicitur auertere ab ijs, quos odit.

#### ARGVMENTVM PSAL. XII.

Queritur de moribus seculi sui deprauatis: Deo supplicat pro salute piorum, qui ab improbis uexantur: ipsum Deum inducit loquentem, & opem suam pollicentem.

#### Victori ad Scheminieth, Psalmus XII.

Saluum me fac Domine, quoniam defecit sanctus, quoniam defecerunt fideles inter filios hominum.

Vana loquuntur unusquisque ad proximum suum, fictæ blandiuntur, in corde & corde loquuntur.

Disperdat Dominus uniuersa labia fictæ blandientia, linguam magniloquam,

Qui dixerunt, linguis nostris magnificabimur, labia nostra penes nos sunt, quis noster Dominus est?

Propter uastitatem inopum, & gemitum pauperum nunc exurgam, dicit Dominus.

Saluabo illos ab ijs, qui laqueum ponunt ipsis.

## E X P L A N A T I O

Eloquia Domini eloquia munda , argentum igne  
examinatum in uase terreo , purgatum septies .

Tu Domine seruabis eos, & custodies nos à gene=  
ratione hac in æternum .

In circuitu impij ambulant, cum exaltata fuerint  
opprobria.

## E X P L A N A T I O .

In corde, & corde loquuntur ] Hæc uer=  
bi eiusdem duplicatio significat duplici corde eos lo=  
qui , quod quidem literæ sanctæ solent de ijs dicere ,  
qui alia sentiunt , alia loquuntur . quapropter Sym=  
machus sententiam secutus non uerba , dilucide hunc  
locum reddidit ex Hebræo , ut testatur Hieronymus ,  
ad hunc modum , In corde aliud est , atque aliud lo=  
quuntur .

Labia nostra penes nos sunt. ] Hoc est, libe=  
rum os habemus , neque nobis de dictis , aut factis  
alicui reddenda est ratio.

Saluabo illos ab ijs ] Hic uersiculus ex he=  
bræo ita conuersus est , ut illum explanat Chimis uir  
doctissimus inter Iudæos .

Eloquia Domini eloquia munda ] Signifi=  
cat , non esse dubitandum, quin Deus promissum ef=  
ficiat , quippe cuius uerba sint ab omni falsitatis labe  
integra , & pura .

In circuitu impij ambulant ] Hebræi sic  
explanant hunc locum , circumueniri , & oppugnari  
innocentes ab improbis, cum homines scelerati , ac per=  
diti principum obtinent .

## ARGVMENTVM PSAL. XIII.

Vir sanctus magnis, ac diuturnis calamitatibus  
uexatus uicem suam miseratur, & auxilium Dei  
queribundus implorat.

Victori, psalmus David XIII.

Vsquequo Domine obliuisceris me in perpetuum?  
usquequo auertis faciem tuam à me?

Quandiu ponam cōsilia in anima mea? dolorem  
in corde meo per diem?

Vsquequo exaltabitur inimicus meus super me? re  
spice, & exaudi me Domine Deus meus.

Illumina oculos meos, ne unquam obdormiam in  
morte, ne forte dicat inimicus meus, praualui ad  
uersus eum.

Qui tribulant me, exultabunt, si motus fuero,  
ego autem in misericordia tua speraui.

Exultabit cor meum in salutarì tuo, cantabo Do  
mino, qui bona tribuit mihi.

## EXPLANATIO.

Vsquequo ponam consilia ] Expressit mo  
rem calamitosorum, quorum animus nunquam quie  
scit, semper huc illuc impellitur, & in omnes partes  
deliberando distrahitur.

Illumina oculos ] Id est, ope tua tanquam  
splendidissimo candore solis dissipa noctem calamita  
tum mearum, ne crescentibus malorum tenebris du  
rissimo mortis somno consopiar.

# EXPLANATIO

Quoniam bona tribuit mihi   Id est, quoniam innocentiam meam tutatus est, meque incolumem conseruauit ab impetu inimicorum.

## ARGUMENTVM PSAL. XIII.

Inuehitur in homines impios, & contemptores Dei, qui pios acerbissime uexabant: & Deum inducit loquentem, & auxilium suum pollicentem.

### Victori, psalmus David XIII.

Dixit insipiens in corde suo, non est Deus.

Corrupti sunt, & abominabiles facti sunt in studiis suis. non est, qui faciat bonum.

Dominus de cælo prospexit super filios hominum, ut uideat, si est intelligens, aut requirens Deum.

Omnes declinauerunt, simul inutiles facti sunt. non est, qui faciat bonum, non est ne unus quidem.

Non ne cognoscent omnes, qui operantur iniquitatem, qui deuorant plebem meam sicut escam panis?

Dominum non inuocauerunt, illic trepidabunt timore,

Quoniam Dominus in generatione iustorum est, consilium inopis confudistis, quoniam Dominus spes eius est.

Quis dabit ex Sion salutare Israeli? cum conuerterit Dominus captiuitatem plebis suæ, exultabit Iacob, & lætabitur Israel.



## Explanatio .

Dominus de caelo prospexit super filios hominū ]  
 Sic appellat eos , qui nondum per fidem , & ueram  
 pietatem filij Dei euaserunt . quos uero iam Deus sibi  
 adoptauit , eos infra generationem iustorum uocat ,  
 quòd pater cœlestis iustitiam , & spiritum suum ipsis  
 ad salutem impertiuerit .

Non'ne cognoscent ] Hæc interrogatio cum  
 orationis præcisione demonstrat uehementem iram  
 Dei. Est autem horum uerborum sententia : Profecto  
 homines perditī , qui iactant , me non existere , &  
 hac opinione confisi lacerant gentem meam , eiusq; for-  
 tunas incredibili cupiditate deuorant , maximo suo  
 malo sentient uim , & potestatem meam .

Deum non inuocauerunt ] Deus inuocan-  
 dus , colendus , & suspiciendus erat , cætera omnia  
 pro nihilo ducenda : quod admirabile dictū est quā-  
 contra fiat ab istis , qui conculcata uirtute omni , ac  
 religione , honores , opes , potentiam , libidines in loco  
 numinis colunt , & colentes Deum summa crudelita-  
 te persequuntur .

Illic trepidabunt timore ] Vir sanctus præ-  
 sentiebat , atque animo tanquam oculis uidebat , quo  
 in loco supplicio afficiendi erant homines illi importu-  
 ni , atque ob eam causam dixit , illic trepidabunt ti-  
 more , tanquam digito locum illum indicaret . simile  
 est illud in psalmo XXXVI . ibi cadent , qui ope-  
 rantur iniquitatem .

Quoniam Dominus ] Trepidabunt inquam

timore, & grauissimas pœnas dabunt crudelitatis suæ, quoniam Deus apud iustos, & pios homines sedem, & domicilium habet, neque iniurias eorum ferret impunitas.

Consiliū inopis ] Vos (inquit) impij cōsiliū, & institutum piorum aspernamini, & stultum; ac ridiculum existimatis, quod ij spem suam ponant in Deo, quod eum colant, uenerentur; & omnes suas curas & aēiones ad eum referendas putent. Hoc uero impijs obijcit tanquam scelus grauissimum, & inextinguibile. cōmemoratis autē flagitijs impiorum, & piorū calamitatibus, implorat auxiliū à Deo, cū subiūgit;

Quis dabit ] Hæc interrogandi ratio apud Hebræos sæpe uim habet optandi, ut eo loco, Quis mihi dabit pennas columbæ? & in Numeris, Quis mihi tribuat, ut omnis populus prophetet? putabatur autem Sion esse domicilium Dei, & ex eo loco petentibus salutem dari. hinc illud, Mittat tibi auxiliū de sancto, & de Sion tueatur te. Itaque huius uersiculi ea est sententia, utinam Dominus ex monte sancto suo respiciat calamitates Israelis; & asperrimum seruitutis iugum ab eius ceruicibus repellat.

Cum conuerterit ] Eueniet (inquit) quod optamus, & populus seruitute liberatus recreabitur, & gaudio exultabit.

#### ARGVMENTVM PSAL. XV.

Præcipit genti suæ, quam uiuendi rationem sequi debeant, ut Deo chari sint, & sublato omni exterrum metu in finibus patriæ securi conquiescant.

## Psalmus David XV.

Domine quis peregrinabitur in tabernaculo tuo ?  
aut quis requiescet in monte sancto tuo ?

Qui ingreditur sine macula , & operatur iustitiam ,

Qui loquitur ueritatem in corde suo, qui non detraxit lingua sua ,

Nec fecit proximo suo malum , & opprobrium non tulit super proximo suo ,

Despicitur in oculis eius malignus, timentes autem Dominum glorificat ,

Qui iurat , ut se affligat , & non mutat , pecuniam suam non dedit ad usuram, & munera contra innocentem non accepit :

Qui facit hæc , non mouebitur in æternum .

## EXPLANATIO.

Domine quis peregrinabitur ] Cum David hoc uersiculo tabernaculum, & montem sanctum nominauit, potiore de parte totam regionem intellexit, ut in paraphrasi ostendimus. Quod autem uersum illud peregrinor posuit, significauit, Hebræos tanquam aduenas, & peregrinos terram iudeam possidere, uel potius, totam hanc nostram uitam peregrinationem quandam esse. Quibus de rebus in eadem paraphrasi explicatum est.

Qui ingreditur ] Dominus respondens ad ea, quæ rogauerat David, probat hominem ingredientem sine macula, id est, nullo scelere, aut flagitio

se contaminantem, & operantem iustitiam, id est, omnibus uirtutum officijs fungentem. iustitiæ enim nomen in literis sanctis latissime patet, & omnes honesti partes comprehendit.

Qui loquitur ] Quæ summam proposuerat, ea nunc singillatim persequitur.

Nec fecit proximo ] Ordine quidem progressa oratio cordis primum meminit, deinde lingua, postremo operis mentionem intulit: opus enim sermo, sermonem cogitatio antecedit.

Et opprobrium non tulit ] Id est, non modo non uiolat alterum, sed ne ab alio quidem patitur eum lædi, & opprobrijs, ac contumelijs affici.

Despicitur in oculis eius malignus ] Id est, improbos quamuis genere, opibus, & gratia florentes, pro nihilo ducit, colentes autem Deum ueretur, & obseruat, licet humiles, & obscuri sint, & apud homines abiecti, contemptiq;.

Qui iurat, ut se ] Horum uerborum hanc sententiam esse confirmant Hebræi, uirum bonum summa fide, summaq; constantia præstaturum, quod promiserit, & si quo uoto se obstrinxerit eorum, quæ ad incommodum, & macerationem corporis pertineant, non tamen mutaturum sententiam, aut contra religionem iurisurandi quicquam admissurum esse. De hoc genere uoti, & iurisurandi meminit Moyses in libro Numerorum.

Et munera contra innocentem ] Accipiunt dona aduersus innocentem non solum iudices auari, sed etiam qui pecuniam accipiunt ob falsum testimo-

nium dicendum, aut lites iniquo patrocinio extrahendas, & tuendas.

## ARGVMENTVM PSAL. XVI.

Inducit IESVM CHRISTVM loquentem, & mortem suam reditumq; ad uitam, & piorum salutem prædicentem.

## Michtan David psalmus XVI.

Conserua me Domine, quoniam speravi in te. dixi Domino, Dominus meus es tu, bonum meum nihil tibi confert.

Erga sanctos, qui sunt in terra, & præclaros omnis uoluntas mea est.

Multiplicata sunt idola eorum, post alium accelerauerunt.

Non libabo libamina eorum de sanguine, nec assumam nomina eorum in labijs meis.

Dominus pars hereditatis meæ, & calicis mei, tu sustentabis sortem meam.

Funes ceciderunt mihi in præclaris, etiam hereditas pulchra contigit mihi.

Benedicam Dominum, qui dedit mihi consilium, etiam per noctes erudiunt me renes mei.

Posui Dominum in conspectu meo semper, quoniam à dextris est mihi, ne commouear.

Propter hoc lætatum est cor meum, & exultauit lingua mea, insuper & caro mea requiescet in spe,

Quoniam non derelinques animam meam in ina-

## E X P L A N A T I O

*ferno, nec dabis sanctum tuum uidere corruptionem.*

*Notas fecisti mihi uias uitæ, satietas lætitiarum est cum uultu tuo, delectationes in dextera tua in æternum.*

## E X P L A N A T I O .

*Conserua me Deus* ] Filius Dei omnibus in rebus extra culpam, & peccatum nobis par, & similis redditus, & nostris malis, & incommodis tenetatus, imminente iam morte uerba humanæ imbecillitati conuenientia pronuntiat, Deoq; salutem suam suppliciter commendat.

*Erga sanctos* ] Cum dixisset, Deum nulla in re egere opera sua, subiungit, se nullum officij genus erga homines illi charos prætermisurum, quod sciret, hæc studia Deo perinde grata esse, quasi ipsius numini tributa forent.

*Multiplicata sunt idola* ] Hæc uidentur dici de perfidis Iudæis, qui relicto Deo alterum secuti sunt, uidelicet Diabolum, cuius etiam filij appellantur in Euangelio Ioannis, & propterea idola eorum multiplicata sunt: ut enim boni unum habent Deum, quem colant, sic improbi multos habent falsos deos, quibus seruiant: ambitio nanque, & libido, & luxuria, & pecuniæ cupiditas, & reliqua flagitia sunt eorum idola: qua enim quisque in re summum bonum constituit, ea res cuique Deus est. Huius igitur impiæ nationis sacrificia CHRISTVS repudiavit, & eorum nomina deleuit ex libro uiuentium.

tium, neque iam digni sunt Iudæi, qui ab ipso nominentur, aut agnoscantur.

Dominus pars hereditatis ] Felix (inquit) hereditas mea, id est, ecclesia piorum, cuius hereditas æterna erit Deus. uos item felices labores, & cruciatus mei, quos eadem merces manet. sic Athanasius, & Theodoretus, & quidam alij explanant hunc locum.

Tu sustentabis ] Id est, ecclesia mea magnis impiorum conatibus oppugnata, tuo præsidio tuta erit, & firma, & immobilis permanebit. glorians autem Dominus fide, & uirtutibus suorum subiungit,

Funes ceciderunt mihi in præclaris ] Id est, luculenta planè, & præclara mihi uenit hereditas. est autem hoc sumptum ex historia Iosue, qui funibus agros metitus est, quos populo diuidebat.

Etiā per noctes ] Non solū (inquit) perfecit Dominus, ut in me ratio, & mens animi uigeret, sed etiam affectiones ipsas, quæ solent ab honesto reuocare, tam castas, tamq; rationi obediētes effecit, ut etiam illæ ad studia pietatis, & uirtutum dies noctesq; me impellerent.

Quoniam non derelinques ] Nam triduo post reuertetur ad corpus suum non iam patibile, & caducum, sed inuiolabile, & immortale. Hæc autem uerba esse CHRISTI, Petrus, & Paulus testantur in actis Apostolorum.

Nec dabis sanctum ] Id est, quem tibi consecrasti, atque omnium gentium regē, & dominum designasti, haudquaquam feres tam diu uita ca-

rere, quoad corpus eius corrumpatur.

Satietas latitiarum ] Id est, tum demum animus expletur omnibus latitijs, cum te præsens præsentem intuetur: sunt enim delectationes in dextera tua, id est, semper in promptu habes, semper munifica manu largiris hilaritates, latitias, iucunditates. simile uidetur illud ex prouerbijs Salomonis, longitudo dierum in dextera eius, & in sinistra illius diuitia, & gloria. quibus uerbis significat, sapientiam suppeditare suis amatoribus longinquitatem uitæ, & opes, & honores. In hanc sententiam theologi Græci, & Latini interpretantur hunc hymnum. Illud autem scire oportet, Dauidem unum ex ijs fuisse, qui moribus, & factis uenturum CHRISTVM multis in rebus repræsentarunt suorum temporū hominibus, atque ob hanc causam non nullos existimare, & illos quidem rerum diuinarum peritissimos, ipsum etiam in ijs psalmis, in quibus de se, ac suis rebus scriberet, solitum inferere multa, quæ non tam sibi conuenirēt, quàm ei, quæ repræsentabat, nēpe CHRISTO. qua quidē scribendi ratione ostēdunt ipsum esse usum etiam in eo carmine, quod de Salomone condidit: in illo enim cum de regno filij semper loqui uideatur, non nulla tamen dicit, quæ regno CHRISTI congruunt, præterea nullius. Sic autem ferebat illorum temporum ratio, ut mysteria CHRISTI umbris eiusmodi, & imaginibus uelarentur, in quæ possent introspicere quorum mens à Deo illuminata foret, ceteri præter ipsas umbras nihil penitus uiderent. His rationibus inducti fatentur illi quidem,  
cum



cum uir sanctus diceret, animam suam ab inferis cito reuocandam, neque Deum permissurum, ut corpus ipsius in sepulcro corrumperetur, istæ sub persona CHRISTI locutum esse, sed idem, illum omnia superiora de se ipso scribere, non dubitant. Itaque horum sententiæ hic hymnus ita explanandus erit, ut David in secundo uersu prædicet beneuolentiam, & studium suum erga homines pios, in tertio autem accuset impios, qui non contenti religione, & cultu ueri Dei à finitimis nationibus caeremonias, & sacra falsorum Deorum accipiebant, quibus sacris proficetur se nunquam interfuturum, aut quicquam libaturum, quod ad ea pertineat, neque uero se commissurum, ut inuocet illos Deos, aut nomina eorum ad iusiurandum adhibeat. Eius autem rei causam subiungere uidetur, cum ait, Dominum esse partem hereditatis suæ, & calicis sui, ac funes sibi cecidisse in rebus præclaris. quibus uerbis gloriatur, Deum sibi esse hereditatem, opes, & omnia bona. nam quod addit, sortem suam ab illo sustentatum iri, nimis mirum significat, sibi non esse dubitandum, ne hanc luculentam hereditatem amittat, quando Deus, qui se ipsi possidendum, ac fruendum dedit, non sit passurus, ut illa res eum de hac possessione deturbet. Nomen uero calicis consuetudine linguæ hebrææ significare quicquid hominibus aut boni, aut mali contingit à Deo, alio in loco dictum est à nobis.

## ARGVMENTVM PSAL. XVII.

Vir sanctus summa crudelitate uexatus à saule

# EXPLANATIO

salutem suam Deo commendat uitæ suæ innocentiam commemorans, & inimicorum immanitatem, atque intemperantiam exaggerans.

Oratio David Psalmus XVII.

Exaudi Domine iustitiam meam, intende deprecationem meam,

Auribus percipe orationem meam absque labijs dolosis.

A' uultu tuo iudicium meum prodeat, oculi tui uideant æquitatem.

Probasti cor meum, & uisitasti nocte, examinasti me, & non inuenisti.

Quod cogitavi, non transiit os meum, propter opera hominum, ob uerbum labiorum tuorum ego obseruavi uias peruersorum.

Sustenta gressus meos in semitis tuis, ut non labantur uestigia mea.

Ego clamaui ad te, quoniam exaudisti me Deus, inclina aurem tuam mihi, & exaudi uerba mea.

Mirifica misericordias tuas, qui saluos facis sperantes in te.

A' resistentibus dexterae tuæ custodi me ut pupillam oculi.

Sub umbra alarum tuarum protege me à facie impiorum, qui me affligunt.

Inimici mei animam meam circumdederunt, adipe suo clauserunt ( corpus suum ) os eorum locutum est superbiam.

Gressus nostros nunc obsederunt, oculos suos po=

fuerunt ad prosternendum me humi .

Similitudo eius quasi leonis desiderantis prædam ,  
& quasi catuli leonis habitantis in abditis .

Exurge Domine , præueni faciem eius , prosterne  
eum , cripe animam meam ab impio , qui est gladius  
tuus , ab hominibus , qui sunt manus tua ,

Domine ab hominibus mundo addictis , quorum  
portio est in uita , quorum uentrem de absconditis  
tuis imples ,

Saturantur filijs , & dimittunt reliquias suas par  
uulis suis ,

Ego autem in iustitia contemplanor faciem tuam ,  
satiabor , cum euigilauero , specie tua .

## EXPLANATIO .

Exaudi Domine iustitiam meam ] Sic ap=  
pellat iustam petitionem suam .

Absque labijs dolosis ] Audi (inquit) propi  
tius uoces , quas ego puris labijs pronuntio , non ali-  
ter sentiens , atque loquor .

A uultu tuo ] Id est tu Domine discepta  
causam meam , qui solus æquus es iudex .

Visitasti nocte ] Tu ( inquit ) rebus ada-  
uersis sæpe , ac sæpius explorasti animum meum ,  
meq; ingentibus tenebris calamitatum circumfudisti  
& quæadmodum aurum igne exploratur , sic mentem  
meam facibus ærumnarum incendisti , neque tamen  
me unquam uidisti à recta uia declinare , aut ini-  
quum aliquod facinus admittere uel salutis tuende  
causa , uel ut grauissimas iniurias ulciscerer , tamen si

# EXPLANATIO

non semel acerbissimi hostis opprimendi facultas mihi oblata est.

Quod cogitavi non transiit os meum ] Cri-  
minabantur, Davidem esse malitiosum, & fallacē,  
illumq; prodicionis insimulabant, contra ipse fretus  
innocentia sua prædicat corā Deo, se animo simpli-  
ci esse, & ab omni simulatione alieno, quippe qui  
nunquam aliter loquatur ac sentit. sic interpretantur  
hunc locum peritissimi linguæ hebrææ. Ego uero di-  
ligentius considerandum puto.

Propter opera ] Non solum ( inquit ) me  
ab omni scelere integrum seruavi, sed etiam animad-  
uertens, homines uulgo se uitij contaminare, ob  
amorem, & reuerentiam præceptionum tuarum eo-  
rum uitam diligenter obseruabam, ut eos à malefi-  
cio deterrerem, & ad leges tuas seruandos, & co-  
lendas incitarem. sic ferè explanant hunc locum  
Chimis, & Abrahamus Esdra, & eleganter quidem,  
ni fallor.

Sustenta gressus meos in semitis tuis ] Præ-  
dicauerat innocentiam, & pietatem suam, itaque  
ne uideretur quicquam harum rerum uirtuti suæ  
insolenter arrogare, precatur Deum, ut uires, &  
appetitiones animi sui ita corroboraret, ac confirmet,  
ut constantissime perseveret in obseruatione legum di-  
uinarum, quibus omnis pulchritudo uirtutis contine-  
tur, significans, si quid ab ipso antea uel recte cogi-  
tatum est, uel honeste administratum, totum id at-  
tribuendum misericordiæ Dei, qui mentem bonam  
donauit, ut recta conaretur, & uires, ut conata per-

ficeret.

*d* Mirifica misericordias tuas ] Fac (inquit) omnes admirentur magnitudinem misericordiæ, ac benignitatis tuæ, conseruando me ab impetu, & ui tyranni potentissimi.

*c* Similitudo eius ] Duæ sunt similitudines, quarum altera referenda est ad studium Saulis Dauidem cupidissime quærentis ad necem, altera ad insidias, quas homo tcterrimus illi comparabat.

*a* A resistētibz dextera tuæ ] Videbantur enim Deum impugnare, qui Dauidem impugnabant, propterea quod is erat carissimus Deo, & ab eo constitutus fuerat rex Hebræorum.

*c* Adipe suo ] Sagina (inquit) os, & totum corpus oppluerunt. Hæc uero est allegoria, qua literæ sanctæ uti solent ad significandam opum affluentiam, & uitæ prosperitatem, res autem secundas plerunque sequitur arrogantia, & Dei, hominumq; contemptus, quamobrem subiungit, os eorum locutum est superbiam. simile est illud Moysi in Deuteronomio, incrassatus est dilectus, & recalcitrauit, incrassatus, impinguatus, dilatatus, dereliquit Deum factorem suum, et recessit à Deo salutari suo.

Qui est gladius tuus ] Hoc ea ratione dicitur, quod Deus impijs hominibus pro armis utatur ad puniēda scelera improborum, & ad uirtutem piorum exercendam. Itaque apud Esaiam rex Assyriorum, uirga furoris Dei nominatur. eadem ratione eosdem appellat manum Dei, lobum imitatus, qui dicit, se manu Domini uapulasse, cum tamen Dia-

# EXPLANATIO

bolus cum cecidisset, Sed Deus eo usus erat tanquam manu ad uerberandum seruum suum.

Ab hominibus mundo ] Eripe me inquam Domine ab hominibus impijs, quorum cura omnis, & cogitatio infixæ est in bonis huius uitæ fallacibus, & temporarijs, quibus abundant, in altera illa uita summam omnium rerum egestatem perpassuri.

De absconditis tuis ] Amplificatione utitur ad demonstrandam prosperitatem impiorum, itaque dicit, eos circumfluere gemmis, auro, atque argento, quæ abscondita uocauit, quod terræ uenis occultentur. Addit præterea, eorum domos florere liberis, quibus relicturi sint opes, quæ libidini suæ, atque in temperantiæ supererint. Sic Eusebius Cæsariensis explanat hunc locum.

Ego autem in iustitia ] Expleantur isti fallacibus bonis & celeriter interituri, ego certe iustitiam, & pietatem colens, ac solida illa & uera, atque æterna bona consecrans contemplabor aliquando beatissimam faciem tuam, & tunc denique omnibus gaudijs, & uoluptatibus cumulatus ero, cum te coram intuebor, & in suauissima pulcherrimi numinis tui contemplatione conquiescam, quod mihi tandem tua benignitate continget, cum animus meus euolauerit è uinculis corporis, in quo tanquam consopitus iacet, & in æternam illam domum tuam migrauerit.

## ARGVMENTVM PSAL. XVIII.

Inscriptio Psalmi continet argumentum ipsius.

Victori, David serui Domini, qui locutus est  
Domino uerba cantici huius in die, quā li-  
berauit eū Dominus de manu omnium  
inimicorum suorum, & de manu  
Saul, & dixit. Psal. XVIII.

Diligam te Domine fortitudo mea, Dominus  
firmamentum meum, & refugium meum, & li-  
berator meus.

Deus meus adiutor meus, & sperabo in eum.

Protektor meus, & cornu salutis meæ, & susce-  
ptor meus.

Laudans inuocaui Dominum, & ab inimicis meis  
saluus fui.

Circundederunt me dolores mortis, & torrentes  
iniquitatis conturbauerunt me.

Dolores inferni circundederunt me, præoccupaue-  
runt me laquei mortis.

In tribulatione mea inuocaui Dominum, & ad  
Deum meum clamaui.

Et exaudiuit de templo sancto suo uocem meam,  
& clamor meus in conspectu eius introiuit in aures  
eius.

Et commota est, & contremuit terra, fundamen-  
ta montium conturbata sunt, & commota sunt, quo-  
niam ipse iratus erat.

# EXPLANATIO

Ascendit fumus è naribus eius, & ignis ex ore  
eius deuorans, carbones succensi sunt ab eo.

Inclinauit cœlos, & descendit, & caligo sub pe-  
dibus eius,

Et equitauit super Cherub, & uolauit, uolauit  
super pennas uentorum,

Et posuit tenebras latibulum suum, in circuitu ta-  
bernaculi eius erat obscuritas aquarum, & densitas  
nubium.

Præ fulgore in conspectu eius nubes transierunt,  
grando, & carbones ignis.

Et innotuit de cœlo Dominus, & altissimus de-  
dit uocem suam, grandis, & carbones ignis.

Et misit sagittas suas, & dissipauit eos, fulgura  
multiplicauit, & conturbauit eos.

Et apparuerunt profunda aquarum, & reuela-  
ta sunt fundamenta orbis terrarum.

Ab increpatione tua Domine, d' flatu spiritus iræ  
tue.

Misit de alto, & accepit me, & assumpsit me  
de aquis multis.

Eripuit me de inimicis meis fortissimis, & ab ijs,  
qui oderunt me, quoniam robustiores erant me.

Præuenerant me in die afflictionis meæ, & factus  
est Dominus protector meus.

Et duxit me in latitudinem, saluum me fecit,  
quoniam diligit me.

Et retribuit mihi Dominus secundum iustitiam  
meam, & secundum puritatem manuum mearum  
retribuit mihi.



Quia custodiui uias Domini, neque impius defeci  
à Deo meo.

Quoniam omnia iudicia eius in conspectu meo,  
Et praecepta eius non reppuli à me.

Et ero immaculatus cum eo, Et obseruabo me ab  
iniquitate mea,

Et retribuet mihi Dominus secundum iustitiam  
meam, Et secundum puritatem manuum mearum  
in conspectu oculorum eius.

Cum sancto sanctus eris, Et cum uiro innocente  
innocens eris,

Et cum electo electus eris, Et cum peruerso per-  
uerteris.

Quoniam tu populum humilem saluum facies, Et  
oculos superborum humiliabis.

Quoniam tu illuminas lucernam meam Domine,  
Deus meus illuminauit tenebras meas.

Quoniam per te acies hostium fregi, Et per Deum  
meum transiui murum.

Deus meus impolluta uia eius, eloquia Domini  
igne examinata, protector est omnium sperantium  
in se.

Quoniam quis Deus praeter Dominum? aut quis  
est fortis praeter Deum nostrum?

Deus, qui praecinxit me fortitudine, Et posuit im-  
maculatam uiam meam.

Qui effecit pedes meos tanquam ceruorum, Et su-  
per excelsa statuit me.

Qui docet manus meas ad praelium, cōtritus est ar-  
cus arcus brachijs meis.

# EXPLANATIO

Et dedisti mihi protectionem salutis tuæ, & dextera tua sustentauit me.

Et benignitas tua auxit me.

Dilatasti gressus meos subtus me, & non sunt infirmata uestigia mea.

Persecutus sum inimicos meos, & comprehendi illos, & non reuersus sum, donec consumerem eos.

Vulneraui illos, nec potuerunt surgere, ceciderunt subtus pedes meos.

Et præcinxisti me uirtute ad bellum, & supplantasti insurgentes in me subtus me.

Et inimicos meos dedisti mihi dorsum, & odientes me disperdisti.

Clamauerunt, nec erat, qui saluos faceret, ad Dominum, nec exaudiuit eos.

Et comminui eos ut puluerem ante faciem uentis, ut lutum platearum attriui eos.

Eripuisti me de contradictionibus populi, constituisti me in caput gentium.

Populus, quem non cognoui, seruiuit mihi, in auditu auris obediuit mihi.

Filij alieni mentiti sunt mihi, filij alieni inueterati sunt, & expauerunt inclusi munitionibus suis.

Viuat Dominus, & benedictus Deus meus, & exaltet Deus salutis meæ.

Deus, qui dat uindictas mihi, & subdit populos sub me, liberator meus de inimicis meis.

Et ab insurgentibus in me exaltauit me, a uiro iniquo eripuit me.

Propterea confitebor tibi in nationibus Domine, et

nomini tuo psalmum dicam.

Deus magnam salutem fecit regi suo, & fecit misericordiam CHRISTO suo David, & semini eius usque in seculum.

## EXPLANATIO.

Cornu salutis meæ ] Sic appellat Deum, propterea quod ipsius ope, atque auxilio salutem retinuerat. Translatio sumpta est ab ijs animalibus, quæ cornibus se se tuentur.

Et torrentes iniquitatis ] Id est, incursiones hostium more torrentium incitatae.

Dolores inferni ] Qui scilicet uitam auferunt, & ad inferos trahunt.

Præoccupauerunt me laquei mortis ] Ita uocat insidias inimicorum, quibus tam subito opprimebatur, ut spatium deliberandi, & euadendi non haberet.

Commota est, & contremuit terra ] Quod ait, montes intremuisse, & terra desidente aquarum profunda, id est, intimas uenas apparuisse, & reuicta esse fundamenta orbis terrarum, eam esse hyperbolen intelligito, qua utitur ad uim, & impetum iræ diuinæ exprimendum, atque amplificandum. Cum uero Deum de coelo descendente facit, ea res ad prouidentiam eius referenda est, bonos tuentem, & improbos ulciscen-tem. Quid illum uolantē inducit, & pennigeris coelitibus, alisque uentorum insidentem, id quidem incredibilem diuinæ mentis celeritatem significat, hoc est, uim omnia penetrantē,

# EXPLANATIO

uim ubique praesentem, & cuncta caelo, terra, mariq; perlustrantem. Cum uero grandinem, & sagittas, & ignem commemorat, intelligi uult poenas, & supplicia, quae Deus infligit hominibus sceleratis, & impijs. Haec autem nunc strictim attingimus, propterea quod satis fuisse in nostra paraphrasi ea omnia persecuti sumus.

Posuit tenebras ] Deus habitat lucem inaccessam, ut ait diuus Paulus. Itaque recte lux tabernaculum eius intelligitur, ut sentiunt Theodoretus, et Theodorus Antiochenus. Huic quidem tabernaculo circumfundit Deus tenebras, & caliginem descensurus in terras. quod, quidem significat, nullam mentis aciem esse tam acutam, aut perspicacem, quae Deum possit intueri, eiusq; naturam nulla ratione, aut cogitatione comprehendi posse.

Præ fulgore ] Præ fulgore (inquit) fulgurum micantium obscuritas nebularum dissoluebatur.

Misit de alto ] Demissa (inquit) manu extraxit me ex profundis gurgitibus calamitatum, quae me iam obruerant. scimus enim aquas in literis sanctis pro periculis & rebus aduersis appellari.

Præuenerant me ] Id est, incautum oppresserant temporibus difficilissimis, ut nulla elabendi spes ostenderetur.

Et secundum puritatem manuum mearum ] Ita uocat innocentiam uitae, manus enim in literis sanctis pro actionibus saepe appellantur. Quod uero in praedicandis benefactis suis nonnihil commoratur, non id profecto uir sanctus facit cupiditate gloriae elatus,

sed ut ceteros accendat ad studium religionis, & honestatis, cum uideant tanta præmia proposita esse uirtuti. Verum illud animaduertere oportet, hæc omnia, quæ David commemorat de iustitia, & integritate sua, referenda esse ad conatum, & studium mentis uicia, & peccata summo opere detestantis, atque omni cogitatione in eam curam incumbentis, ut se se castam, & ab omni labæ integram, puramq; seruaret. licet autem uir sanctus & ipse per imprudentiã, & infirmitatem animi multa committeret, quæ minus recta forent, non tamen ob eam causam iustus esse desinebat, nam humilis, & mœrens confugiebat ad misericordiam Dei, qui ueniam poenitenti dabit, summa benignitate illi cuncta errata condonans.

Et cauebo ab iniquitate mea ] Id est, ab ijs peccatis, quæ olim admissi. peccauerat autem grauissime, cum & Bersabeæ stuprum, & eius marito mortem obtulisset. Quid uero, si iniquitatem appellet peccatum illud, quod (ut uerbis utar Pauli) in carne ipsius habitabat? id est, uim illam natiuæ corruptelæ, à qua nisi summa diligentia caueant etiam uiri sancti, in maxima scelera, & flagitia impelluntur, cuius rei testis est cædes teterrima Uriæ, & stuprum uxori eius illatum, de quibus maleficijs paulo ante mentionem fecimus.

Cum sancto sanctus eris ] Dixerat, Deum remuneraturum esse iustitiam suam. ad id confirmandum hanc sententiam interponit, quæ eam uim habet, ut diuus Athanasius, & Theodoretus sentiunt, qualem quisque se gesserit, talem aduersus quenque

# EXPLANATIO.

Deum futurum . qui igitur iustitiam , & pietatem coluerit , eum maximis muneribus afficiet Deus , quæ uero peruersitas morum , & opinionum à recta uiuendi ratione auerterit , in eum Deus seuerus , atque acerbus existet , eumq; , nisi resipuerit , omni iudicio ueri spoliatum , amentem , & cæcum permittet potestati turpissimarum libidinum , & cupiditatum , ut qui pulchritudinem uirtutis adamare noluit , in sordibus , & luto uitiorum uoluetur . qua quidem de re multa diuus Paulus in epistola , quam scribit ad Romanos . Illud item scire oportet , qualis quisque sit , talem cuique Deum uideri , ut enim de illo uir bonus bene sentit , ita improbus male . Alter existimat , humanum genus à Deo summa iustitia regi , gubernariq; , nihil ab illo non rite , non sancte , non sapienter administrari , alter aut Deum res humanas curare non credit , aut illius administrationem iniustitiæ , ac temeritatis nomine condemnat . Ita fit , ut Deus sancto sanctus , & peruerso peruersus existat , id est , ut qualis cuiusque animus est , talis cuique de diuino numine sensus sit . Quod si de illo recte , ac pie sentias , simul cœlestem instinctum , afflatumq; salutarem sentis animum tuum ad omnia pietatis officia impellentem , sin autem peruerse ac impie , uiam ulteriorem experiris oculos mentis excecantem , teq; præcipientem in scelera , & flagitia pro eo , ac tua meretur impietas , agentem . ex qua quidem re fit , ut quemadmodum sanctitas , & innocentia piorum crescit in dies , ita impiorum animus quotidie magis , ac magis inquinetur , ac sordeat , & quem locum Deus apud

unumquenque obtinet, eo loco, & numero apud Deū unusquisque sit. At qui summum rectorem, ac Dominum rite ueneratur, & colit, deq; eius ui, & numine uera sentit, is gratias immortales agat misericordie ipsius, qui solus ex omnibus rectas opiniones animis inserit, illosq; desiderio, atque amore pietatis accendit. Ex ijs quæ breuiter à nobis dicta sunt, facile, ut arbitror, intelligi potest, quibus rationibus adductus Dauid pronuntiauerit, Deum cum sancta sanctum, cum peruerso peruersum existere.

Quoniam tu illuminas ] Tenebræ sunt calamitates, lux accensa est periculorum depulsio, & malorum finis, quæ quidem translatio est frequens in literis sanctis, sed etiam sua cuique mens lucerna est, quam nisi lux cœlestis illuminet, semper in maximis errorum tenebris uita uersatur.

Quoniam per te ] Id est, auxilio tuo & copias hostium deleui, & eorum oppida, & urbes expugnaui.

Deus meus impolluta uia eius ] Id est, quicquid agit Dominus, rectum, simplex, iustum, & sanctum est. sic alio loco, Deus in sanctitate uia tua, item, iustus Dominus in omnibus uijs suis.

Eloquia Domini igne examinata ] Id est, sincera, & ab omni admisione falsitatis pura. hæc enim est orationis exornatio ducta ab auro, & argento, quæ igne purgantur.

Et super excelsa ] Significat, se diuino auxilio quamlibet prærupta loca, & castella munita expugnauisse.

# EXPLANATIO

Et contritus est ] Id est, uiribus meis fractæ sunt opes inimicorum, qui uix ulla ratione superari posse uidebantur.

Et inimicos dedisti mihi dorsum ] Id est, per te factum est, ut hostes mihi terga darent, seq̃ fugæ perterriti mandarent.

Eripuisti me de contradictionibus ] Id est, de seditionibus, & rebellionē popularium meorum, à quibus acerbissime exagitatus fui.

Constituisti me ] Deus enim eius imperio subiecit Ammonitas, Syros, Moabitas, Palæstinos, aliasque nationes.

Populus, quem non cognoui ] Id est extræ gentes, & alienigenæ.

In auditu auris ] Id est fama nominis meo permotus ad fidem meam confugit.

Filij alieni mentiti sunt mihi ] Vir sanctius in Psal. LXVI. ait, Dicite Deo, quæm terribilia sunt opera tua Domine, propter multitudinem uirtutis tuæ mentientur tibi inimici tui. quem locum græci sic explanant, falsorum Deorum cultores magnitudine operum diuinorum territos pietatem, & cultum ueri Dci simulaturos, à quo maxime abhorreant. Eodem modo David hoc loco dicit, alienigenas sibi mentitos esse, propterea quod bello domiti coacti sunt speciem præ se ferre beneuolentiæ, & uoluntariæ seruitutis, cum tamen inimicissimos animos gererent.

Filij alieni inueterati sunt ] Id est debilitati, & fracti, ut iam nobis obistere non possint.

Et expauerunt ]



Et expauerunt ] Id est, quamvis mœnibus,  
 & munitionibus septi formidauerunt opes meas.

Viuat Dominus ] Hæc est tanquam ora-  
 tionis conclusio, quæ summam totius hymni breuiter  
 colligit. Quod autem dixit, uiuat Dominus, uide-  
 tur esse ea uox gratias agentis, & ob uictoriæ gra-  
 tulationem more militum ouantis. Neque tamẽ igno-  
 ramus, plerosque ex hebræo uertisse, Viuit Dominus,  
 quæ quidem est formula iurandi apud Hebræos.

Propterea confitebor ] Id est, cum igitur  
 tanta sint tua erga me beneficia, & merita, immor-  
 tales tibi gratias semper agam, quin etiam tempus  
 erit, cum laudes tuas inter omnes exterarum nationes  
 prædicabo. quod sanè perfectum uidemus, cum mul-  
 ta iam secula hymni Dauidis toto terrarum orbe de-  
 cantentur.

Deus magnam salutem ] Deus (inquit) non  
 solum me conseruat, & ab omnibus inimicorum in-  
 iurijs tuetur, ac defendit, uerum etiam illustrem, et  
 apud omnes gloriosam hanc salutem efficit, neque sa-  
 lutis, & laudis meæ tantum rationem habet, sed etiam  
 posteris meis pro sua singulari misericordia consulit,  
 & prouidet, ut eorum decus, & gloria sit immor-  
 talis. quod planè falsum esset, nisi hoc ad IESVM  
 Deum referremus, qui in Dauidis familia natus est,  
 & regnat in perpetuum.

#### ARGVMENTVM PSAL. XIX.

Celebrat cognitionem Dei, quæ percipitur ex con-

E X P L A N A T I O

templatione rerum cœlestium, & ex studio sanctarum literarum.

Victori, Psalmus David XIX.

Coeli enarrant gloriam Dei, & opera manuum eius annuntiat firmamentum.

Dies diei eructat uerbum, & nox nocti indicat scientiam.

Non sunt loquelæ, neque sermones, quibus non audiantur uoces eorum.

In omnem terram exiit sonus eorum, & in fines orbis terræ uerba eorum.

Soli posuit tabernaculum in eis, & ipse tanquam sponsus procedens de thalamo suo.

Exultauit ut gigas ad currendam uiam, ab extremo cœlo egressio eius;

Et recursus eius usque ad extremum eius, nec est qui se abscondat à calore eius.

Lex Domini immaculata, conuertens animas, testimonium Domini fidele, sapientiam præstans paruulis.

Mandata Domini recta, lætificantia cor, præceptum Domini lucidum, illuminans oculos.

Timor Domini sanctus, permanens in seculum seculi, iudicia Domini uera, iustificata simul.

Desiderabilia super aurum, & lapidem pretiosum multum, & dulciora super mel, & fauim.

Etiam seruis tuis admonetur per ea, in custodiendis illis retributio multa.

Delicta quis intelligit? ab occultis munda me, &

d' superbis prohibe seruum tuum,

Ne dominantur mihi, tunc immaculatus ero, & purus à scelere grandi.

Sint accepta eloquia oris mei, & meditatio cordis mei in conspectu tuo semper

Domine adiutor meus, & redemptor meus.

## EXPLANATIO.

Coeli enarrant ] Significat ijs uerbis, unūquenque ex coelestium rerum cōtemplatione facile peruenire ad notitiam Dei.

Dies diei ] Si quis diem diei compareret, & noctem nocti, eorumq; uicissitudines, ac certum ordinem, perpetuamq; constantiam animaduertat, facile perspicit, tantorum operum laudem fortunæ, ac temeritati non esse tribuendam, sed aliquem præesse, qui hæc omnia summa sapientia moderetur, atque cōseruet. Hoc modo interpretantur hunc uersiculum apud nostros Eusebius Cæsariensis, & apud Hebræos Salomon explanator illustris.

Non sunt loquelæ ] Significat ijs uerbis, nullam nationem esse tam immanem, & barbaram, quæ coelestium rerum excellentiam contemplans non possit ad notitiam Dei cogitatione perducī. Sed Symmachus, ut refert Theodoretus, ita uertit hunc uersiculum ex Hebræo, Non sunt loquelæ, neque sermones, quorum non audiuntur uoces. neque dissentit à Symmacho apud græcos illa, quæ nominatur editio uulgata. Quod uero subiungitur, In omnem terram exiuit sonus eorum, fidelius Aquila uertit ex Hebræo,

# EXPLANATIO

ὁ κανὼν αὐτῶν, id est, regula eorum, est autem sensus, hæc opera mirabilia nequaquam ritu mortaliū loqui, aut ullam uocem humanam emittere, quæ ad omnes terrarum oras peruenire non potest, sed orationem eorum uel grauissimam esse immutabilem ordinem, & dispositionem, & structuram tanquam ad regulam factam, & ad lineam respondentem, quæ eorum oratio cunctis terrarum finibus exauditur, & uniuersos mortales ad cultum, & uenerationem Dei mirabiliter accendit. & quoniam earum rerum, quæ aspectu sentiuntur, nihil est tam præclarum, tamq; diuinum, quodq; homines tanta admiratione afficiat, quàm sol, propterea eius uim, & naturam potissimum considerandam proponit, quo magis eluceat sapientia Dei tanti operis, & muneris effectrix.

Et ipse tanquam sponsus ] Pulchritudinem solis comparat sponso, uim, & impetum giganti.

Ab extremo cælo ] Egreditur enim sol ab extremo oriente, & incitatissima cæli stelliferi conuersione fertur ad extremum occidentem.

Læx Domini ] Satis erat tantarum rerum aspectus, & contemplatio, ut earum effectorem, & moderatorem agnosceremus Deum, ea tamen fuit benignitas Dei, ut ad hanc præclaram intelligendi rationem adderet etiam leges suis manibus scriptas, quibus homines errantes ad uiam ueritatis reuocaret, atque animos à praua consuetudine ad honestas uitæ rationes conuerteret. Eas leges uir sanctus uarijs nominibus uocat, ut etiam Moses facit.

Testimonia Domini ] Leges Dei sic appellat ex eo, quod ille per has testificatus est, quid exigat a nobis. Easdem ait cognitionem rerum diuinarum tradere paruulis, id est, animis simplicibus, seq; sume misse gerentibus, quoniam nullus est sapientiæ locus in hominibus impijs, & superbis.

Timor Domini sanctus ] Sic nominat leges diuinas, propterea quod illæ mentes religione sancta imbuunt, atque in hominibus pijs timorem pariunt castum, & sincerum, qualis solet esse optimi filij aduersus optimos parentes. cum græci uocant, *ὁμολογία*, nos reuerentiam possumus rite nominare.

Iustificata simul ] Id est, omnia sunt pariter æqua, & iusta.

Delicta quis intelliget? ) Dixi(inquit) obseruantibus leges diuinas magna præmia, & dona esse proposita, sed quis attendens infirmitatem humanam, & quàm multa peccemus inscientes, quorum tamen luenda pœna sit, nisi Deus illa condonet imbecillitati nostræ, quis hæc animaduertens audeat affirmare, se nulla in re uiolare præcepta Domini? An est aliquis, qui possit errata cuncta animaduertere? qui in tantis tenebris nihil offendat? quem uitium specie uirtutis aliquando non fallat?

Et a superbis prohibe seruum tuum. ] Illa uero in primis est detestabilis, atque intoleranda superbia, & importunitas, si quis existimat, seipsum ita obseruantem esse legum diuinarum, ut se se ab omni peccato temperet, neque aliquid committat, quod aliquo supplicio uindicandum sit.

# EXPLANATIO

Et purus à scelere grandi ] Superbia enim  
 fons, & origo est omnium scelerum, & flagitiorum,  
 ut si quis Deo fauente ab illius dominatu liber sit, ni-  
 tam ab omni grauiori delicto puram agere possit.

## ARGUMENTVM PSAL. XX.

Populus Regem ad bellum difficile proficiscentem  
 uotis, & faustis ominibus prosequitur.

### Victori, Psalmus David XX.

Exaudiat te Dominus in Die tribulationis, protegat  
 te nomen Dei Iacob.

Mittat tibi auxilium de sanctuario, & de sion  
 tueatur te.

Memor sit omnis sacrificij tui, & holocaustum  
 tuum in cinerem conuertat.

Tribuat tibi secundum cor tuum, & omne consi-  
 lium tuum impleat.

Letabimur de salutari tuo, & in nomine Dei no-  
 stri uexilla extollemus.

Impleat Dominus omnes petitiones tuas, Nunc coe-  
 gnoui, quòd saluum fecit Dominus CHRISTVM  
 suum.

Exaudiet illum de coelo sancto suo in potentia salu-  
 tari dexteræ suæ.

Hi in curribus, & ij in equis, nos autem nomen  
 Domini Dei nostri inuocabimus.

Ipsi succubuerunt, & ceciderunt, nos autem sur-  
 reximus, & erecti sumus.

Domine salua nos, Rex exaudiet nos in die, qua inuocauerimus.

## EXPLANATIO.

In cinere conuertat ] Id est uictima, quam pro uictoria adipiscenda immolas, illi sit grata, & accepta. Hæc orationis exornatio sumpta est ex historia Mosi, cuius hostiam coelestis ignis absumpsit.

Letabimur de salutari ] Nunc quidem uniuersam ciuitatem periculum tuum sollicitam habet, at cum incolumis, & uictor è bello reuerteris, omnia plausu, letitiâq; & gratulatione personabunt. id enim significat, cum ait, uexilla extollemus.

Nunc cognoui ] Populus inter pias, & castas preces diuino spiritu afflatus uaticinatur, regem suum bello superiorem fore.

Hi in curribus ] Hostes nostri curribus, & equorum ui, ac multitudine confidunt, nos autem salutem nostram sanctissimi numinis imploratione muniemus.

Rex exaudiet nos ] Sic appellat Deum, significans, non Dauidem, sed illum esse uerum populi regem.

## ARGVMENTVM PSAL. XXI.

Celebratur hoc hymno uictoria, & regnum CHRISTI sempiternum; ut etiam Iudæi confirmant, sed hunc illi uenturum sperant, nos uenisse non ambigimus.

Victori, Psalmus David XXI.

Domine in uirtute tua letabitur Rex, & in salu-  
tari tuo exultabit uehementer.

Desiderium cordis eius tribuisti ei, & uoluntate  
labiorum eius non fraudasti eum.

Quoniam præuenisti eum in benedictionibus boni-  
tatis, posuisti in capite eius coronā de lapide pretioso.

Vitam petijt à te, & tribuisti ei longitudinem die-  
rum in seculum seculi.

Magna est gloria eius ob salutare tuum, gloriam,  
& magnum decorem impones super eum.

Quoniam pones eum benedictiones in seculum se-  
culi, lætificabis eum in gaudio cum uultu tuo.

Quoniam Rex sperat in Domino, & in miseri-  
cordia altissimi, non commouebitur.

Inueniet manus tua omnes inimicos tuos, dextera  
tua inueniet omnes, qui te oderunt.

Pones eos ut clibanum ignis in tempore iræ tuæ,  
Dominus in ira sua disperdet eos, & deuorabit eos  
ignis.

Fructum eorum de terra perdes, & semen eorum  
à filiis hominum.

Quoniam intenderunt tibi mala, cogitauerunt cō-  
silia, quæ non potuerunt stabilire.

Quoniam pones eos dorsum, & funes tuos diri-  
ges contra facies eorum.

Exaltare Domine in uirtute tua, cantabimus, &  
psallemus uirtutes tuas.



## EXPLANATIO.

Domine in uirtute tua ] Tua ( inquit )  
ope rex frangat potentiam inimicorum, & per te con-  
seruatus uita fruatur immortalis.

Voluntate labiorum ] Hoc est, nihil ille un-  
quam à te petijt, quin impetraret, & amplissimis  
ultero beneficijs auctus, & ornatus est. hoc enim si-  
gnificat, cum subiungit, prænuntiasti cum in benedi-  
ctionibus bonitatis.

Posuisti in capite eius ] Id est cum consti-  
tuisti Regem cœli, ac terrarum.

Vitam petijt à te ] Ut scilicet à morte re-  
uocaretur ad uitam immortalem.

Quoniam pones eum benedictiones ] Id est bo-  
nis omnibus, & illis quidem sempiternis eum cumu-  
labis: simili locutione utitur etiam Moses in Genesi,  
cum Deus Abrahamo dicit, benedixi tibi, & magni-  
ficauit nomen tuum, & esto benedictio: sic enim uer-  
tendum est ex hebræo. & Esaias, erit ( inquit )  
Israel in medio terræ benedictio, id est omni bonorum  
genere circumfluct.

Letificabis eum ] Quo enim C H R I S-  
T V S homo est diuinitati coniunctior ceteris  
omnibus, hoc eam clarius intuetur, & maiorem ex  
ea re iucunditatem, & letitiam capit.

Inueniet manus tua ] Hactenus imperium,  
& immortalitatem C H R I S T I celebravit,  
nunc prædicat poenas impendentes inimicis eius.

Fructum eorum ] Nec solum ( inquit )

absumentur ipsi, sed etiam stirps eorum impia funditus tollitur. Hunc enim fructum, & semen appellat, ut sentit Theodoretus.

Pones eos dorsum ] Id est precipites in fugam conijcies, & terga dare coges.

Et funes tuos ] Vertent illi quidem terga tuis sagittis vulnerati, sed tu fugientibus te re obijcies, & in ora illorum mortifera tela torquebis. Funes autem pro arcu appellauit. ea est orationis exornatio, qua res tota aliqua de parte cognoscitur. Sagittas autem & ignem consuetudine literarum sanctarum poenas interpretamur, quibus impios afficit Deus.

Exaltare Domine ] Id est declara uim, & potestatem tuam imperio CHRISTI dilatando, & aduersarijs eius opprimendis. Ceterum si quis ea, quae continentur in uersibus, non solum ad CHRISTVM, sed etiam ad ipsum Dauidem, qui illum in se ipso adumbrauit, accommodare uelit, cum hoc ego non contemdero; Nam Deus Dauidem ad regiam extulit dignitatem, & omni bonorum genere cumulauit, & grauissime ultus est omnes, qui domi, uel foris contra ipsum arma ferre conati sunt. Hec autem de rege praedicantur hoc hymno, quanquam uersiculus ille nequaquam Dauidi conuenire uidetur; Vitam petijt a te, & tribuisti ei longitudinem dierum in seculum seculi: sed nonnulli interpretantur, hanc esse hyperbolem, quae significet, regem usque ad extremam senectutem suam perducturum. Ego uero libentius crediderim, his uersibus descriptam esse perpetuitatem aui, quo

beati fruuntur in cœlo, qui in corporibus humanis uitam diuinam coluerunt.

ARGVMENTVM PSAL. XXII.

IESVM CHRISTVM inducit loquentem, ac tormenta, & cruciatus acerbissimos, quos ille salutis nostræ causa pertulit, ita persequitur, ut non multis ante seculis uaticinari, sed rem gestam se præsentem uideatur exponere. prædicit etiam eius ad uitam reuocationem, & omnium gentium salutem.

Victori pro cerua matutina, Canticum David  
uid Psalmus XXII.

Deus meus, Deus meus quare me dereliquisti?  
longe à salute mea uerba rugitus mei.

Deus meus clamabo per diem, & non exaudies,  
& nocte, & non est silentium mihi.

Et tu sanctus, habitator, hymnus Israelis.

In te sperauerunt patres nostri, sperauerunt, &  
liberasti eos.

Ad te clamauerunt, & salui facti sunt, in te  
sperauerunt, & non sunt confusi.

Ego autem sum uermis, & non homo, opprobrium hominum, & abiectio plebis.

Omnes uidentes me deriserunt me, distenderunt  
labia, & mouerunt caput.

Sperauit in Domino, eripiat eum, saluum faciat  
eum, quoniam diligit eum.

# EXPLANATIO

Quoniam tu es, qui extraxisti me de uentre, spes mea ab uberibus matris meae, in te proiectus sum ex utero.

De uentre matris meae Deus meus es tu, ne disceseris à me,

Quoniam tribulatio proxima est, quoniam non est, qui adiuuet.

Circumdederunt me uituli multi, tauri pingues obsederunt me.

Aperuerunt super me os suum, sicut leo rapiens, & rugiens.

Sicut aqua effusus sum, & dispersa sunt omnia ossa mea.

Factum est cor meum tanquam cera liquefcens in medio uentris mei.

Aruit tanquam testa uirtus mea, & lingua mea adhaesit faucibus meis, & in puluerem mortis deduxisti me.

Quoniam circumdederunt me canes multi, consilium malignantium obsedit me.

Foderunt manus meas, & pedes meos, dirimerunt omnia ossa mea.

Ipsi uero considerauerunt, & inspexerunt me, diuiserunt sibi uestimenta mea, & super uestem meam miserunt sortem.

Tu autem Domine ne elongaueris te, fortitudo mea in auxilium meum festina.

Erue à phramea Deus animam meam, & de manu canis unicam meam.

Salua me ex ore leonis, & à cornibus unicornium.

libera me .

Narrabo nomen tuum fratribus meis , in medio ecclesiæ laudabo te .

Qui timetis Dominum , laudate eum , uniuersum semen Iacob glorificate eum .

Timeat eum omne semen Israel , quoniam non spreuit , neque despexit deprecationem pauperis .

Nec auertit faciem suam à me , & cum clama- rem ad eum , exaudiuit me .

De te hymnus meus in ecclesia magna , uota mea reddam in conspectu timentium eum .

Edent pauperes , & saturabuntur , & laudabunt Dominum : qui requirunt eum , uiuent corda eorum in seculum seculi .

Reminiscantur , & conuertentur ad Dominum uniuersi fines terræ .

Et adorabunt in conspectu eius uniuersæ familie gentium .

Quoniam Domini est regnum , & ipse dominabitur gentium .

Manducauerunt , & adorauerunt omnes pingues terræ , in conspectu eius genua flectent omnes , qui descendunt in terram ,

Quoniam animam suam non uiuificauit , semen seruiet ipsi ,

Annumerabitur Domino in generationem , ueniente , & annuntiabunt iustitiam eius populo , qui nascetur , quoniam fecit .

## Explanatio.

Pro cerua matutina ] Inſcribitur ad hunc modum hymnus, propterea quod ut cerua canum ui exagitur, ſic Ieſus matutino tempore à rabioſis hominibus dilaniatus, & in crucem aëtus fuit, quo circa ſemel, atque iterum queritur in his uerſibus, ſe à canibus circunſideri.

Deus meus, Deus meus quare me dereliſti? ] Cum IESVS CHRISTVS duplici natura ſit, nemini mirandum accidere debet, ſi multa eius tum dicta, tum facta referantur tanquam hominis, & mortalis. Hos autem clamores, & lamentabiles uoces incredibilis magnitudo cruciatuſ expreſſit. cum enim innocentiffimus dominus peccata, & ſcelera uniuerſi generis humani pro ſuis agnoſceret, eaq; ſupplicio, ac ſanguine ſuo lueret, & quæ tormenta nos commeriti eramus, ea tormenta omnia ipſe pro infinita bonitate ſua ſuſtineret, tantas acerbitates, tantosq; dolores perpeſſus eſt, quantos nemo unquam cogitatione complecti, ne dum uerbis explicare poſſit, ut non immerito mortalitas ipſius à Deo ſe dereliētam exclamaret, quippe quæ angoribus intolerandis nulla conſolatione adhibita conficeretur.

Longe à ſalute ] Id eſt, preces meæ magnis clamoribus effuſæ nullam mihi ſalutem afferunt, neque iam quicquam proficio præſidium Dei implorando.

Et tu ſanctus ] Promiſerat Deus, ſe commoraturum apud gentem hebraeam, & bonis perpe-

tuo praesidio, ac ornamento futurum. Itaque illum promissi admonens ait, Tu certe custos huius sanctae civitatis es, tu eiusdem habitator, eiusdem hymnus, te coetus piorum semper cantat, tibi semper gratias agit adiutus, & conservatus, & omnibus bonis auctus, & ornatus, utere igitur solita misericordia, succurre laboranti, & querelas laudatoris, & cultoris tui supplices exaudi.

Speravit in Domino ] Haec pronuntiabant principes sacerdotum illudentes, ut est in Euangelio Matthaei.

Tauri pingues ] Ita vocat Iudaeos homines instar taurorum. pinguium petulantes, & efferratos.

Sicut aqua. ] Hoc ait ob effusionem sanguinis, qui confosso multis vulneribus corpore totus iam effluxerat.

Factum est cor meum ] Simile est illud ex libro Iosue, pertimuit cor populi, & instar aquae liquefactum est.

Aruit tanquam testa virtus mea ] Id est, vis membrorum defecta sanguine, & omni succo vitali.

Unicam meam ] Meam inquam animam solitariam, ut uertit Hieronymus, & omni ope destitutam.

Et à cornibus unicornium. ] Sic appellat homines immanes, & feros, Monoceros enim animal est asperum, & uiolentum, quod assuescere ad homines, & mansuescieri non potest.

Narrabo ] Cum me (inquit) liberaueris, & ad uitam reuocaris immortalem, memor ero tanti beneficii, & de tuum sanctissimum nomen celebrabo inter omnes nationes. fratres enim uocat christianos, utpote filios Dei, & coheredes suos, unde illud Pauli, ut sit ipse primogenitus inter multos fratres. & ipse Dominus in Euangelio Ioannis Mariae Magdalene dicit, uade ad fratres meos, & dic eis, ascendo ad patrem meum, & patrem uestrum. Hunc autem uersiculum sub persona Christi dictum esse, testis est Apostolus in epistola, quam scribit ad Hebraeos.

Qui timetis ] Intelligens se liberatum iri, iam fratres suos excitat ad canendos hymnos, & gratias agendas patri rerum omnium prepotenti. & quoniam ecclesia ex iudeis, & reliquis nationibus constituta est, utrosque nominatim adhortatur, alteros se men Iacobi appellans, à quo prognati sunt, alteros ab animi uirtute, & religione denominans, timentes enim Deum appellabantur à iudeis, qui relictis falsis Dijs religioni pie, & sancte adhaerebant, unde legimus Psal. CXIII. Benedixit domui Israel, benedixit Domui Aaron, benedixit omnibus, qui timeant Dominum. & Petrus in actis Apostolorum, uiri (inquit) Israelitae, & qui in uobis timeant Deum.

Vota mea reddam ] Hymnos significat, quos Deo uouerat, si uita restitutus esset. laudatur autem à CHRISTO Deus continenter per ecclesiam sanctam, cuius ipse caput est.



Edent pauperes ] . Prædicat explicatius salutem gentium , quæ falsos & commentitios Deos colebant , eas quidem pauperes appellat , utpote religione , & bonis animi carentes , quæ uera , certaq; diuitiæ sunt habenda , sed etiam beati pauperes spiritu , & qui esuriunt iustitiam , quoniam ipsi saturabuntur , saturabuntur autem doctrina Dei , & pane illo uiuo ; qui è coelo descendit , quo nescientes uiuent in perpetuum .

Remiscentur ] Mortales obliuii erant Dei , dum falsis opinionibus induciti diuinitatem tribuunt rebus creatis , sed doctrina Dei , & Apostolorum monitis excitabuntur ad pietatem , & ueram religionem amplectendam .

Et adorabunt omnes pingues terræ ] Sic uidetur appellare reges , & principes , qui & ipsi Deum agnouerunt , & imperio CHRISTI se se ultro subiecerunt .

In conspectu eius genua flectent ] Id est , eum colent , ac uenerabuntur uniuersi mortales , qui in terram , & puluerem dilabuntur , & iure quidem hunc illi honorem habebunt , quando ipse mortem acerbissimam non dubitauit oppetere , ut eos uita afficeret beata , & sempiterna .

Semen seruiet ipsi ] Semen ( inquit ) meum Deo se se in seruitutem pie sancteq; dicabit , & in eius familia , & genæ numerabitur . semen autem suum uocat filios per Euangelium conceptos , & generatos .

Venient , & annuntiabunt ] Nascentur ,  
F

# EXPLANATIO

qui posteritati prædicent beneficia, & iustitiam Dei  
 usus est enim ille iustitia, id est infinita bonitate, ac  
 misericordia, eripiens humanum genus è manibus  
 Diaboli, qui miseros crudelissime uexabat, & om-  
 nibus iniurijs, & ignominijs afficiebat. Illud autem  
 scire oportet, & hoc loco, & ferè semper in literis san-  
 ctis iustitiam Dei appellari pro beneficentia, & boni-  
 tate, qua ille munifice, prolixè, large utitur in ge-  
 nus humanum: seueritas enim illa iuris, quæ oppo-  
 nitur misericordiae, non tam iustitia Dei quàm iudi-  
 cium nominari solet.

## ARGUMENTVM PSAL. XXIII.

Gloriatur se, ac sua omnia Deo curæ esse, & de-  
 monstrat, quàm beati sint ij, qui iuste cum fide, ac  
 pietate uitam degunt, & se se in seruitutem Deo di-  
 cant.

### Psalmus David XXIII.

Dominus pascit me, nihil mihi deerit, in loco pa-  
 scuæ me collocauit.

Iuxta aquas refrigerij ducit me, animam meam  
 conuertit.

Deduxit me super semitas iustitiæ propter nomen  
 suum.

Etiam si ambulauero per uallem umbræ mortis,  
 non timebo mala, quoniam tu mecum es.

Virga tua, & baculus tuus, ipsa me consolata  
 sunt.

Parasti in conspectu meo mensam aduersus eos ,  
qui tribulant me .

Impinguaſti in oleo caput meum , & calix meus  
exuberans est . Sed & bonitas ,

Et misericordia tua subsequenter me omnibus die  
bus uitæ meæ ,

Et habitabo in domo Domini in longitudine die-  
rum .

### EXPLANATIO .

Dominus pascit me ] Allegoria est elegan-  
tissima , qua Deum pastorem , seq; ouem facit . et  
frequentissima est in literis sanctis .

In loco pascuæ ] Ita uocat pascua uberri-  
ma contemplationis rerum diuinarum , quibus rebus  
mentes incredibili cum uoluptate pascuntur . Hinc il-  
lud apud Hieremiam , Dabo uobis pastores iuxta cor  
meum , & pascunt uos scientia , & doctrina .

Iuxta aquas refrigerij ] Hi nimirum sunt  
fontes uberrimi spiritus sancti , & amœnissima flu-  
mina literarum sanctarum . Huius aquæ mentio fit  
ab Esaia , & cæteris uatibus sanctis , & in primis a  
Domino in euangelio Ioannis .

Animam meam ] Errabat ( inquit ) ani-  
mus meus , seq; a recta uiuendi uia auerterat . cum  
Dominus conuertit ab erroribus turbulentis , & tra-  
duxit ad obseruationem sanctissimarum legum sua-  
rum , idq; fecit propter nomen suum , id est , nullis me-  
ritis meis , sed propter infinitam bonitatem suam .

Etiam si ambulauero per uallē umbræ mortis ]

# EXPLANATIO

Sic appellat, loca infesta, & periculosa, in quibus obuersatur ante oculos imago mortis. Itaque significat, se tutela, & praesidio Dei fretum uel in media morte erecto, & tranquillo animo fore.

Virga tua, & baculus tuus ] Virga Domini corrigit peccantes, bacillum sustentat imbecillos, utraque certe res animis piorum utilis pariter & iucunda.

Paraſti in conſpectu meo menſam ] Repetie ſententiam primi uerſiculi, & altera allegoria illam exornat, id quod ſape fit à ſcriptoribus noſtris, ſemiliter atque ab externis. quam igitur menſam paraſtam ſibi gloriatur à Deo, ea eſt menſa ſanctorum uoluminum, & contemplatio rerum diuinarum, qui eſt unus ſaluberrimus, ſuauiſſimusq; paſtus animorum. Sed Didymus luculentus theologus hunc locum explanans, fortasſe, inquit, dum ſumus in corporibus humanis, & ueritatem per umbras, & caliginem cernimus, oues Dei ſumus, herbisq; ſaluberrimis doctrinae ipſius alimur ad aeternitatem, ac cum exuti corporibus in caelum migramus, & ueritatis ſpeciem formoſiſſimam liquido intuemur, itaq; ſummum illum Deum cognoscimus, ut ab eo cogniti ſumus, non iam oues, ſed conuiuiae ſanctiſſimi numinis ſumus, atque ad menſam animorum coeleſtium accumbimus delicatiſſimis epulis extructam: de qua Dominus in Euangelio inquit, Ego diſpono uobis, ſicut diſpoſuit mihi pater meus, regnum, ut edatis, & bibatis ſuper menſam meam in regno meo. Hanc igitur menſam uiri ſancti ſemper in conſpectu ha-

bent, & delicias illas coelestes pura mentis cogitatione præsumunt: ex qua quidem re tantum roboris animis accedit, ut nullis rerum aduersarum fulminibus terreantur, nullis impiorum oppugnationibus frangantur, aut debilitentur. propterea uir sanctus ait, hanc mensam à Deo paratam in conspectu suo tanquam inexpugnabile propugnaculum impijs oppositum, obiectumq;.

Impinguasti in oleo caput meum ] Didymus ait, caput pro mente appellatum esse, oleum pro afflatu spiritus sancti: ut enim oleum lucem nutrit, laborem leuat, faciem exhilarat, sic ille lucem animi fouet, mentem reficit, cor hominis letificat, quapropter oleum latitiæ nominatur psalmo XLV.

Et calix meus ] Calix, ut supra dictum est, sæpe appellatur in literis sanctis quicquid nobis aut boni, aut mali contingit a Deo. itaque calix hoc loco significat scientiam rerum diuinarum, quam uir sanctus pie, ac honeste uiuendo consecutus erat. Sic Origenes interpretatur hunc locum in commentarijs Matthæi. Caterum si loquatur ecclesia in hoc psalmo, ut nonnulli ueterum arbitrantur, non minus commodam explanationem adhibere poteris, atque adeo simpliciore: habemus enim C H R I S T V M Deum pastorem, qui suas oues uocat nominatim, & educit eas ad pascua uberrima, & propter aquam amoenissimam educat nos, à qua etiam renascimur ad uitam coelestem, & beatam. Habemus & oleum latitiæ, & calicem Domini, & mensam illam mysticam, ad quam accumbentes pa-

# EXPLANATIO

ne coelesti, & uiculo saginato saturamur. quæ quidem omnia diligentius persequeretur, si mihi uiderentur explanationis indigere, ac non potius tam perspicua esse, ut à quouis uel imperito possint facile intelligi.

## ARGUMENTVM PSAL. XXIIII.

Est quidem Domini quicquid omnibus terrarum finibus continetur, non tamen omnes mortales apud ipsum pari conditione sunt, aut æque in cælum recipiuntur: illa enim sedes ijs duntaxat parata est, qui uitam coelestem in terris imitantur. id monet uir sanctus his uersibus, & simul celebrat ascensum IESU Domini in cælum, apposite id quidem, quando ille nobis iter in ea loca patefecit, & princeps immortalis corpore penetravit in conciliū beatorum.

## Psalmus David XXIIII.

Domini est terra, & plenitudo eius, orbis terrarum, & uniuerſi, qui habitant in eo.

Quia ipse super maria fundauit eum, & super flumina præparauit eum.

Quis ascendet in montem Domini? aut quis stabit in loco sancto eius?

Innocens manibus, & mundo corde, qui non accepit in uanum animam suam, nec iurauit in dolo proximo suo.

Hic accipiet benedictionem à Domino, & iustitiam à Deo salutari suo.

Hæc est generatio quærentium eum, quærentium  
faciem Dei Iacob.

Attollite portæ capita uestra, & eleuamini por-  
tæ æternales, & introibit Rex gloriæ.

Quis est iste Rex gloriæ? Dominus fortis & po-  
tens, dominus potens in prælio.

Attollite portæ capita uestra, & eleuamini por-  
tæ æternales, & introibit Rex gloriæ.

Quis est iste Rex gloriæ? Dominus exercituum  
ipse est Rex gloriæ.

#### EXPLANATIO.

Quis ascendet ] Dixerat, Deum terras  
rum, & cunctarum rerum Dominum, & creato-  
rem esse, nunc demonstrat, qua ratione possimus ad  
eum peruenire, quando ob eam causam creati su-  
mus, ut in terris iuste cum fide, & pietate uiuentes  
in cælum migraremus, & cum Deo beati æuū age-  
remus sempiternum.

Qui non accepit in uanum animam suam ]  
Id est qui non contemnit eas res, quarum rerum cau-  
sa animus illi datus est à Deo. datus est autem omni-  
bus, ut iustitiam, & pietatem colamus, atque om-  
nem operam, curam, & studium ponamus in iu-  
uandis hominibus. Sed Chiniis existimat eum com-  
mendari, qui falsum non iurat per animam suam.  
uerum uerba hæc possunt ex hebræo conuerti etiam  
ad hunc modum, qui non extulit ad uanitatem ani-  
mam suam, id est qui animum suum ita refrenat,  
tamq; studiosus est simplicis ueritatis, ut ab omni men-

datio sibi temperet, neque ulla in re uanitatē orationis adhibeat.

*Iustitia* Et iustitiam à Deo ] Dictum est à nobis alio loco, iustitiam in literis sanctis saepe appellari pro bonitate, & beneficentia, qua utitur Deus in eos, qui cum fide, & uirtute uiuunt.

*Dionysius* Attollite portæ ] Coelites, qui IESVM in superas sedes ascendentem comitantur, his uerbis portas cœli, portarumq; custodes affantur. sed hunc locum diligenter explanat Dionysius in eo libro, qui inscribitur de cœlesti Hierarchia. Quod reliquum est, scire oportet, nonnullos existimare, Dauidem, cum is templum Hierosolymis ædificare constituisset, atque omnia, quæ ad eam ædificationem erant necessaria, summo studio comparasset, hunc hymnum composuisse, itaque istorum sententia is ad hunc modum explanandus est. Cum uir sanctus ait, Domini esse terram, & quicquid in ea continetur, intelligi uult fortunatissimam esse nationem Hebræam, quam Deus, qui omnium terrarum Dominus est, præcipue tuendam, atque ornandam suscepit, & suum apud eam domicilium collocare uoluerit. Cum uero infert, Quis ascendet in montem Domini? de Sione loquitur, qui mons templo destinatus erat, tū exponit, quæ uita quæue mores deceant eos, qui locum illum sanctissimum frequentare uelint. Quod autem hortatur fores templi, ut se se tollant, atque assurgant, regem enim gloriæ ingressurum, significat, perfecto edificio arcam fœderis in ædem à sacerdotibus introferendam, cui arcæ Deum inter cheru-



binos insidere prædicant literæ sanctæ; propterea quod ex eo loco responsa dare, & precibus populi benignas aures adhibere consueverat. Denique fores templi æternas uocat ad significandam eius diuturnitatem, cum etiam quod Deus id certum, & stabile domicilium habiturus erat, cum superiori tempore arca sæpius locum, & sedem mutauisset: itaque alio loco dicitur, elegit Dominus Sion, desiderauit eam in habitationem sibi, Hæc requies mea in seculum seculi, hic habitabo, quoniam elegi eam.

## ARGVMENTVM PSAL. XXV.

Precatio est hominis in maximo uitæ periculo uersantis, in qua precatione & sibi peccata remitti, ac condonari deprecatur, & misericordiam Dei laudibus prosequitur.

## Psalmus David XXV.

Ad te Domine leuaui animam meam, Deus meus in te confido ne erubescam.

Neque letentur de me inimici mei, etenim uniuersi, qui expectant te, non confundentur,

Confundantur omnes iniqui agentes superuacue.

Vias tuas Domine demonstra mihi, & semitas tuas edoce me,

Dirige me in ueritate tua, & doce me, quia tu es Deus saluator meus, & te expectaui tota die.

Reminiscere miserationum tuarum Domine, & misericordiarum tuarum, quæ à seculo sunt.

# EXPLANATIO

Delicta iuuentutis meae, & transgressiones meas  
ne memineris,

Secundum misericordiam tuam memento mei tua  
propter bonitatem tuam Domine.

Bonus, & rectus Dominus, propter hoc docebit  
peccatores uiam.

Diriget mansuetos in iudicio, docebit mites uias  
suas.

Vniuersae uiae Domini misericordia, & ueritas cu  
studientibus testamentum eius, & testimonia eius.

Propter nomen tuum Domine propitiaberis pecca  
to meo, multum est enim.

Quis est homo, qui timet Dominum? legem sta  
tuit ei in uia, quam elegit.

Anima eius in bonis demorabitur, & semen eius  
hereditabit terram.

Arcanum Domini timentibus illum, & testamen  
tum suum manifestabit illis.

Oculi mei semper ad Dominum, quoniam ipse  
euellet de laqueo pedes meos.

Respice in me, & misereere mei, quia unicus, &  
pauper sum ego.

Tribulationes cordis mei multiplicatae sunt, de ne  
cessitatibus meis erue me.

Vide afflictionem meam, & laborem meum, &  
dimitte uniuersa delicta mea.

Respice inimicos meos, quoniam multiplicati sunt,  
& odio iniquo oderunt me.

Custodi animam meam, & erue me, ne erube  
scam, quoniam speraui in te.

Simplicitas, & rectitudo custodiant me, quia ex-  
pectavi te.

Libera Deus Israel ex omnibus tribulationibus suis.

## EXPLANATIO.

Ne erubescam ] Id est, ne, quæso, ea spes  
me fallat, quam in tua clementia fixam, & locatam  
habeo.

Iniqua agentes supervacue ] His uerbis de-  
signat eos, qui neque errore labuntur, neque ob ani-  
mi infirmitatem, atque inconstantiam, sed turpitu-  
dine, ac maleficijs delectantur, atque ipsi, qui nihil  
meruerunt, infesti sunt.

Vniuersæ uiæ Domini ] Quicquid agit De-  
us, quicquid præcipit, ac loquitur, plenum est mise-  
ricordia, ueritate, & iustitia, sed quibus? ipsi nimi-  
rum, qui obseruant sanctissimi fœderis leges, quas  
ipse monumentis librorum diuinorum uoluit esse testa-  
tas. hoc si geratur, in omnibus consilijs, & factis,  
& uerbis Dei perspicitur incredibilis misericordia, &  
ueritas, atque iustitia, quarum speciem non intue-  
tur animus impiorum caligine uitiorum & cupidita-  
tum occæcatus. Misericordia pertinet ad beneficia,  
quæ nobis tribuit Deus gratuito, id est, nullis meri-  
tis nostris prouocatus. ueritas referenda est in primis  
ad fidem, dictorumq; constantiam. Misericordia  
Dei gratis pollicetur, ueritas summa fide promissum  
facit. Sic interpretatur ueritatem Dei diuus Paulus  
in epistola, quam scribit ad Romanos cap. XV.

Propter nomen tuum propitiaberis peccato meo ]

# EXPLANATIO

Id est, cum sis clemens, & misericors, ignosces Domine peccatis meis, quorum turpitudinem, & maculas ego sponte mea non possum eluere.

Legem statuit ei in uia, quam elegit ]  
Hoc est, habebit Deum magistrum, & doctorem, qui leges ipsi dabit salutare, & accommodatas ad eam uiuendi rationem, quam is sibi constituerit: neque enim omnes, qui pietatem colunt, eandem uitæ sequuntur uiam. Sed potius hoc ad ipsum Deum referendum est, ut sit sensus, illum fore magistrum hominibus pijs in eo uitæ genere, atque instituto, quod ipse probat.

Arcanum Domini ] Pollicetur, Deum hominibus pijs, & religiosis aperiturum mysteria sua, & scientiam fœderis, quod monumentis legum diuinarum continetur, traditurum. quo munere nihil excellentius, nihil salutaris, aut iucundius excogitari potest.

## ARGVMENTVM PSAL. XXVI.

Exponit uitæ suæ rationem, seq; omnibus proponit imitandum. uidetur autem hæc scripsisse, cum falsis criminibus uocaretur ab inimicis in inuidiam, itaque causam suam à Deo disceptari optat.

### Psalmus David XXVI.

Iudica me Domine, quoniam ego in innocentia mea ingressus sum, & in Domino sperans non infirmabor.

Proba me Domine , & tenta me , ure renes meos ,  
& cor meum ,

Quoniam misericordia tua ante oculos meos est ,  
& ambulavi in ueritate tua .

Non sedi cum concilio uanitatis , & cum iniqua  
gerentibus non introibo .

Odiui cœtum malignantium , & cum impijs non  
sedebo .

Lauabo in innocentia manus meas , & circunda-  
bo alta re tuum Domine ,

Vt audire faciam uocem laudis , & enarrem uni-  
uersa mirabilia tua .

Domine dilexi decorem domus tue , & locum ha-  
bitationis gloriæ tue .

Ne perdas cum impijs Deus animam meam , &  
cum uiris sanguinum uitam meam .

In quorum manibus iniquitates sunt , dextera eor-  
um repleta est muneribus .

Ego autem in innocentia mea ingressus sum , redi-  
me me , & miserere mei .

Pes meus stetit in rectitudine , in cōgregationibus  
benedicam te Domine .

#### EXPLANATIO.

Et in Domino sperans non infirmabor ]  
Deus enim fortitudinem , & firmitatem animi præ-  
stat ijs , qui spem habent in misericordia ipsius , atque  
illos ita corroborat , ut summa constantia perseuerent  
in recta , & pia uiuendi ratione .

Proba me Domine ] Fac ( inquit ) periculū

# EXPLANATIO

innocentiæ meæ, atque ut aurum, & argentum igne  
perspiciunt, sic tu intimos sensus, & affectiones ani-  
mi mei diligenter explora.

Quoniam misericordiâ tuâ ] Hæc sunt,  
quæ Deus requirit à nobis, primum scilicet, ut o-  
mnē salutis fiduciam in eius misericordia collocemus,  
deinde ut nostras actiones ad normam ueritatis suæ  
dirigamus. ueritatem autē diuinam hoc loco inter-  
pretor, quicquid Deus suis legibus sanxit, quibus ni-  
hil uerius, nihil iustius, ac rectius fieri potest. Quid  
uero, si huius uersiculi hæc sit sententia? Mihi sem-  
per ob oculos uersata est misericordia tua, in qua o-  
mnem meam spem fixam, & locatam habeo: tota ul-  
tæ meæ ratio semper nixa est ueritate numinis tui: te  
enim promissa facturum, & summa fide præstatu-  
rum, quæ pollicitus es, nunquam dubitauī: promisi-  
sti autem, colentibus pie tuum sanctissimum numen  
te presidio, & ornamento, salutiq; futurum. Hæc  
proponit uir sanctus tanquam certissima signa inno-  
centiæ suæ, & rectissime quidem: nemo enim mise-  
ricordiæ, & promissionibus Dei potest confidere, quin  
pietatem, & iustitiam, & temperantiam colat, ip-  
sumq; Deum propitium, & fauentem habeat.

Lauabo in innocentia manus meas ] Id est,  
incumbam toto pectore in eam curā, ut omnes actio-  
nes meas ab omni labe integras, & castas exhibeam.

Ne perdas cum impijs ] Theodoretus existi-  
mat, Dauidem fecisse hunc psalmum, cum uersaretur  
apud Palæstinos, ad quos perfugerat expulsus à  
Saul. optat igitur in patriam redire, ne cum homi-

nibus impijs, & humano sanguine cruentis pereat, quibus certa perniciēs impendet. uel potius significat, ijs uerbis, se non ita confidere innocentiae suae, quin intelligat, se unā cum impijs periturum, si iudex ille summus iure magis uti uelit, quā misericordia.

In quorum manibus ] Qui semper in praeputio habent scelera, quae edant in aliquem innocentē.

Dextera eorum ] Accipiunt enim pecuniam ob ius, dicendum, & insontes condemnandos.

Pes meus ] Ait, se uirtutis, & pietatis uiam semper secutum esse. intelligens autem, & bonam mentem, & omne studiū recti existere donum Dei, profitetur, se gratum, ac memorem tanti beneficij futurum, & laudes sanctissimi numinis, in conuentibus piorum celebraturum.

#### ARGVMENTVM PSAL. XXVII.

Fiduciam suam exponit, quam in misericordia Dei collocatam habebat, ut iam nullam uim hostium potentissimorum extimesceret.

#### Psalmus David XXVII.

Dominus illuminatio mea, & salus mea, quem timebo?

Dominus protector uitae meae, à quo trepidabo?

Dum appropinquant contra me nocentes, ut edant carnes meas,

Tribulantes me, & inimici mei, ipsi impegerunt, & ceciderunt.

# EXPLANATIO

Si consistant aduersum me castra, non timebit cor meum.

Si exurgat aduersum me praelium, in hoc ego sperabo.

Vnum petij à Domino, hoc requiram, ut inhabitem in domo domini omnibus diebus uitæ meæ.

Vt uideam iucunditatem Domini, & uisitem templum eius.

Quoniam abscondit me in tabernaculo suo, in die malorum protexit me in abscondito tabernaculi sui.

In petra exaltauit me, & nunc exaltabit caput meum super inimicos meos,

Qui in circuitu meo sunt, & immolabo in tabernaculo eius hostiam iubilationis, cantabo, & psallam dicam Domino.

Exaudi Domine uocem meam, cum clamaui, miserere mei, & exaudi me.

Tibi dixit cor meum, exquisiuit te facies mea, faciem tuam Domine requiram.

Ne auertas faciem tuam à me, & ne labi sinas ira seruum tuum.

Adiutor meus esto, ne derelinquas me, neque deseras me Deus saluator meus.

Quoniam pater meus, & mater mea dereliquerunt me, Dominus autem assumpsit me.

Docce me Domine uiam tuam, & deduc me in semita recta propter inimicos meos.

Ne tradideris me in animas tribulantium me, quoniam insurrexerunt in me testes iniqui, & loquens mendacium.



Nisi credidissem, me uisurum bona Domini in  
terra uiuentium.

Expecta Dominum, uiriliter age, & ille roborabit  
cor tuum, & expecta Dominum.

## EXPLANATIO.

Dominus illuminatio mea. ] Alio loco dictum fuit, pericula, & calamitates appellari tenebras in literis sanctis, itaque Dominum malorum depulsorem rite uocat illuminationem suam, à quo et mens illustratur, ut possit aspicere pulchritudinem uirtutis, & pietatis, quarum gradibus ascenditur in cælum.

Vnum petij à Domino. ] Tantis ego beneficijs affectus à Deo, tam propitium, & salutare nomen expertus, unum quero, unum uotis omnibus expeto, ut pace parta conquiescam in sanctissimo templo Dei mei, & canendis eius laudibus, rebusq; diuinis contemplandis reliquam uitam consumam.

Quoniam abscondit. ] Allegoria est, quæ significat præsentem tutelam Dei, quæ quidem allegoria ducta est ab historia Mosi, qui tutus fuit ab impetu populi, cum fugisset in tabernaculum Dei.

In petra exaltauit me. ] Hec quoque est allegoria ducta ab ijs, qui persequentibus inimicis se recipiunt in rupem aliquam excelsam, & præruptam, & omnibus ex partibus natura munitam.

Hosiam iubilationis. ] Sic appellat genus illud sacrificij, quod fiebat pro adepta uictoria, in eo enim tubarum clangor adhibebatur, ut scriptum

est in Numeris .

Tibi dixit cor meum ] Id est , te precor ex animo .

Ne tradideris me in animas tribulantium me . ]  
Ne salutem (inquit) meam dede potestati , ac libidini hominum perditorum , qui me capite , & fortunis acerbissime oppugnant . Anima pro desiderio , & cupiditate saepenumero usurpatur in literis sanctis .

Quoniam insurrexerunt in me testes iniqui ]  
Queritur de ijs , qui ipsum prodicionis insimulabant , & criminibus falsis in inuidiam , & uitae periculum uocabant .

Nisi credidissem me uisurum bona Domini in terra uiuentium ] Non male sentire uidentur & nostri , & quidam ex Hebraeis explanatoribus , qui terram uiuentium interpretantur coelestem illam regionem , quam incolunt animi piorum , qui tum denique uere uiuunt , cum è corporum uinculis euolauerunt ; nostra enim haec , quae dicitur uita , mors potius est . Veruntamen negare non possumus , quin literae sanctae uiuentium terram appellare soleant hunc medium mundi globum , ubi degitur uita haec breuissima , & caduca , sicut inferos nominant terram obliuionis . id ita esse , uel ille uersiculus psalmi LII . confirmare potest , propterea Deus destruet te in aeternum , tollet te , & euellet te de tabernaculo , & radicem tuam de terra uiuentium . Quin etiam Esaias IESVM CHRISTVM abscissum esse dixit de terra uiuentium , cum dicere uellet , illum à iudaeis è medio sublatum , & crudelissime interfectum esse . Itaque

uidetur oratio huius uersiculi, quæ quidem præcisa,  
 & imperfecta est, hanc continere sententiam, profe-  
 cto de uita iampridem desperassem, tanta uero ab in-  
 micis potentissimis undique oppugnor, nisi fidem ha-  
 buissem uerbis Dei, qui pollicitus est, post exilium lō-  
 gum, & grauissimas calamitates se mihi & regnū;  
 & uitam placidissimam, omniumq; bonorum plenissi-  
 simam concessurum. cum itaque scias o anima mea  
 tibi tanta bona esse promissa ab illo, qui fallere non  
 potest, ne dubita, sed Dominum patienter expecta,  
 teq; uiriliter gere, ille roborabit animum tuum, con-  
 fide misericordiæ Domini, & illum patienter expecta.

## ARGVMENTVM PSAL.

## XXVIII.

Precatio est, quæ usus fuerat, cum in magno pe-  
 riculo uersaretur.

## Psalmus David. XXVIII.

Ad te Domine clamabo, protector meus ne fileas  
 à me, nequando taceas à me, & assimilabor descen-  
 dentibus in foueam.

Exaudi Domine uocem deprecationis meæ, dum  
 oro ad te, dum extollo manus meas ad templum san-  
 ctum tuum.

Ne simul trahas me cum peccatoribus, & cum  
 operantibus iniquitatem ne perdas me.

Qui loquuntur pacem cum proximo suo, mala au-  
 tem in cordibus eorum.

Da illis secundum opera eorum; & secundum nequitiam studiorum suorum.

Secundum opera manuum eorum tribue illis; redde retributionem suam eis.

Quoniam non intellexerunt in opera Domini, & in opus manuum eius, destruet illos, & non edificabit eos.

Benedictus Dominus, quoniam exaudivit vocem deprecationis meae.

Dominus fortitudo mea, & clypeus meus est, & in ipsum speravit cor meum; & adiutus sum.

Et exultavit cor meum, & in cantico meo confitebor ei.

Dominus fortitudo plebis suae, & robur saluatum CHRISTI sui est.

Saluum fac populum tuum Domine, & benedic hereditati tuae, & pascere eos, & extolle illos usque in aeternum.

E X P L A N A T I O

Ne fileas a me] id est, ne, queso, repudies preces meas; ne ue deseras me in tantis malis; si enim mihi non subuenis, similis ero descendentibus in foveam; id est mortuis, qui sepultura afficiuntur.

Ne simul trahas me] Ne trahas me ad supplicium und cum impijs hominibus, quorum utor consuetudine coactus, & inuitus.

Qui loquuntur pacem] Eos designat, qui insidias ipsi comparabant, cum tamen speciem praeferrerent amicitiae.

Quoniam non intellexerunt ] Quoniam isti animum adijcere nolunt ijs considerandis, quæ geruntur à providentia Dei, neque intelligere volunt, me consilio, ac numine diuino constitutum esse Regem, & qui fortunas meas conuellat, illum Dei uoluntati repugnare, propterea Deus illos unâ cum stirpe, & nomine funditus delebit.

Et robur saluationum Christi sui est ] Maxima pericula adierat Dauid, ex ijs omnibus, se ereptum a Deo, significat ijs uerbis, illumq; pro salute, ac dignitate sua propugnare gloriatur.

# ARGVMENTVM PSAL. XXIX.

Celebrat potentiam Dei, simulq; docet, uim imbrium, & uentorum, & fulminum non casu, & fortuito existere, sed providentia Dei.

## Psalmus Dauid XXIX.

Afferte Domino filij Dei,

Afferte Domino gloriam, & fortitudinem, afferre Domino gloriam nomini eius, adorete Dominum, in atrio sancto eius.

Vox Domini super aquas, Deus gloriæ intonuit, Dominus super aquas muleas.

Vox Domini in uirtute, Vox Domini in magnificentia.

Vox Domini confringens cedros, & confringit Dominus cedros Libani,

Et saltare facit eas tanquam uitulum, Libanum

quoque, & Sirion, quemadmodum exilit filius Vnicornium.

Vox Domini intercidens flammam ignis, Vox Domini concutiens desertum, & commouet Dominus desertum Cades.

Vox Domini parere facit ceruas, & detegit salus, & in templo eius omnes ipsi dicent gloriam.

Dominus in diluuiis sedet, & sedebit Dominus rex in aeternum.

Dominus uirtutem populo suo dabit, Dominus benedicet populo suo in pace.

EXPLANATIO.

Afferte Domino ] Solet uir sanctus celebrare uim, & providentiam Dei tum describendis rebus coelestibus, tum etiam commemorandis ijs, quæ magna cum admiratione omnium in regione aeris fiunt, cuiusmodi sunt horrida illa tonitrua, & uis incredibilis fulminum, ac uentorum obuia quæque disturbans. Hoc genere utitur in hoc hymno materiam fortasse naetus ex aliqua turbulenta tempestate, quam elegantissime describit. His similia leguntur in libro, qui inscribitur Iob.

Filij Dei ] Filios Dei nominare solent literæ sanctæ homines uirtute præcellentes, quique imperio, & potestate præditi sunt, quæ quidem de re in explanatione Psalmi LXXXII explicatius dicemus.

Vox Domini in uirtute ] Vox (inquit) Dei præpotens est, quippe quæ maria, & terras tremefacit, & infinitam imbrium uim profundit.

Libanum quoque & Sirion ] Hi sunt montes terræ Iudææ, quos ait ui uocis diuinæ, & magnitudine tempestatis tremefieri.

Vox Domini intercidens flammās ignis ]  
Ad fulmina conficienda, & iacienda.

Desertum Cades ] Ea est solitudo Arabiæ, quæ pertinet usque ad Idumæam.

Parere facit ceruas ] Aiunt, partus ceruarum esse difficillimos, itaque magnitudo terroris significatur, quod illæ metu percussæ fœtus eijciant.

Et in templo eius omnes dicent gloriam ]  
Id est, homines his rebus excitantur ad uim diuinam colendam, & uenerandam, atque hymnis, & laudibus prosequendam.

Dominus in diluuio sedit ] Regnabat (inquit) Deus, cum immensa illa ui aquæ obrutus est orbis terrarum, neque temere, ac fortuito existunt eiusmodi eluiones, nimbi, procellæ, cæteraq; immoderate tempestates, sed ijs supplicijs delicta mortalium persequitur Deus.

## ARGVMENTVM PSAL. XXX.

Gratias agit Deo grauissimo morbo liberatus.

Psalmus Cantici dedicationis Domus  
Dauid, X X X.

Exaltabo te Domine, quoniam exaltasti me, nec delecasti inimicos meos super me.

Domine Deus meus clamaui ad te, & sanasti me.

Domine eduxisti ab inferno animam meam, saluasti me à descendētibz in foueam.

Psallite Domine sancti eius, & confitemini memorie sanctitatis eius.

Quoniam momentum est in ira eius, & uita in beneuolentia eius.

Vespere demorabitur fletus, & ad matutinum tempus letitia.

Ego autem dixi in prosperitate mea, non mouebor in æternum.

Domine in uoluntate tua præstiteras monti meo fortitudinem.

Auertisti faciem tuam à me, & factus sum conturbatus.

Ad te Domine clamaui, & ad Deum meum deprecatus sum.

Quæ utilitas in sanguine meo, si descendero in corruptionem?

Nunquid confitebitur tibi puluis, aut annuntiabit ueritatem tuam?

Audi Domine, & misere mei, Domine esto adiutor meus.

Conuertisti planctum meum in gaudium mihi, cōscidisti saccum meum, & circūdedisti me letitia.

Propterea cantabit tibi gloria mea, & non silebit, domine Deus meus in æternum confitebor tibi.

E X P L A N A T I O .

Dedicationis domus Dauid ] Suspicantur nonnulli, dedicationem domus magnificentissime, de



qua mentio fit in libro secundo Regum, incidisse in cap 7  
 id tempus, quo emerferat uir sanctus è morbo, ita-  
 que illum gratias agere Deo, qui ualetudine confir-  
 mata facultatem sibi dedisset dedicandæ, atque habi-  
 tandæ domus, quam nuper exædificarat.

Saluasti me à descenditibus in foveam ]  
 Clarius uertèrunt quidam ex Hebræo ad hunc mo-  
 dum, uiuificasti me, ne descenderem in foveam, id  
 est, in sepulchrum.

Quoniam momentum ] Significare uide-  
 tur, iram Dei aduersus pios breuissimam existere, be-  
 neuolentiam uero esse æqualem uitæ.

Vespere ] Id est, si quid aduersi acciderit  
 hominibus pijs, celeriter omne incòmodum uertit in  
 bonum, & aduersa rebus secundis commutantur.

Ego autem dixi ] Cum deletis hostibus, &  
 regno constituto omnia mihi secunda cederent, ego  
 demens cum animo meo loquebar ad hunc modum,  
 certe nulla uis me deiciet de hoc florenti rerum sta-  
 tu, semper potens, ac beatus ero. Et sanè tu Do-  
 mine fortunas meas ita stabilieras, ut firmissimi mon-  
 tis instar haberent, uerum id mihi contigerat nulla  
 uirtute mea, sed infinita liberalitate tua, quod qui-  
 dem ut planè cognoscerem, ac stultam illam super-  
 biam, & arrogantiam ex animo deponerem, auer-  
 tisti paulisper oculos tuos, atque illico incredibilis om-  
 nium rerum mearum facta est commutatio.

Ad te Domine ] Exponit precationem, qua  
 est usus, cum salutem à Domino precaretur.

Nunquid confitebitur ] His uerbis demon-

EXPLANATIO

strat uir sanctus, uitam sibi iucundam, atque optatam fuisse, quo posset maiestatem numinis præstantissimi laudibus efferre, atque homines ad eius cultum, & uenerationem cohortari.

ARGVMENTVM PSAL. XXXI.

Orat Deum pro salute sua, commemorat in quanto periculo sit, prædicat benignitatem Dei erga homines pios.

Victori, Psalmus Dauid XXXI.

In te Domine speravi, ne confundar in æternum, in iustitia tua libera me.

Inclina ad me aurem tuam, accelera, ut eruas me.

Esto mihi in petram fortitudinis, & in domum re fugij, ut saluum me facias.

Quoniam firmamentum, & refugium meum es tu, & propter nomen tuum deduces me, & enutries me.

Educes me de laqueo hoc, quem absconderunt mihi, quoniam tu es fortitudo mea.

In manus tuas comendo spiritum meum, redemisti me Domine Deus ueritatis.

Odi obseruantes uanitates superuacue.

Ego autem in Domino speravi, exultabo, & letabor in misericordia tua.

Quoniam respexisti afflictionem meam, saluasti ex necessitatibus animam meam.

Nec conclusisti me in manus inimici, statuisti in

loco spatioſo pedes meos .

Miferere mei Domine , quoniam tribulor , contabuit præ inœrore oculus meus , anima mea & uenter meus .

Quoniam defecit in dolore uita mea , & anni mei in gemitibus .

Infirmata eſt propter iniquitatem meam uirtus mea , & oſſa mea contabuerunt .

Supra omnes inimicos meos factus ſum opprobrium , & uicinis meis ualde , & timor notis meis .

Qui uidebant me ; foras fugerunt à me , obliuiſoni datus ſum tanquam mortuus à corde .

Factus ſum tanquam uas perditum ; quoniam audiui uituperationem multorum , formido me circumſtetit ,

Dum conuenirent ſimul aduerſus me , capere animam meam conſiliati ſunt .

Ego autem in te ſperaui Domine , dixi , Deus meus es tu ; in manibus tuis ſunt tempora mea .

Eripe me de manu inimicorum meorum , & à perſequentibus me .

Illustra faciem tuam ſuper ſeruum tuum , ſaluum me fac in miſericordia tua Domine , ne confundar , quoniam inuocaui te .

Erubescant impij , & deducantur in infernum , muta fiant labia doſa .

Quæ loquuntur aduerſus iuſtum dura cum ſuperbia ; & deſpectione .

Quam magna multitudo bonitatis tuæ Domine , quam abſcondiſti timentibus te .

# EXPLANATIO

Quamq; operatus es pro eis, qui sperant in te, in conspectu filiorum hominum.

Abscondes eos in abscondito faciei tue, a conturbatione hominum.

Proteges eos in tabernaculo tuo, a contradictione linguarum.

Benedictus Dominus, quoniam mirificauit misericordiam suam mihi in ciuitate munita.

Ego autem dixi in festinatione mea, proiectus sum a facie oculorum tuorum.

Ideo exaudisti uocem orationis mee, dum clama-  
rem ad te.

Diligite Dominum omnes sancti eius, fideles custodit Dominus, & retribuit abundanter facientibus superbiam.

Viriliter agite, & ille roborabit cor uestrum omnes, qui speratis in Dominum.

## EXPLANATIO.

In iustitia tua libera me. ] Id est pro bonitate tua ex tantis periculis eripe me.

Redemisti me. ] Ob eam causam. Domine misericordiam tuam fidenter imploro, quod saepe aliis mihi in periculis auxilio, salutiq; fuisti.

Odi obseruantes uanitates. ] Odi (inquit) illos, & stultissimos iudico, qui spes suas collocauerunt in superstitione, ac rebus uanis, & fallacibus, quae illis neque decori, neque ulli emolumento erunt.

Quoniam respexisti. ] Confirmat animum recordatione temporis superioris, quo maximis pericu-

lis illum liberauerat Deus.

Supra omnes inimicos ] Iam (inquit) maiore sum opprobrio quam aduersarii mei, homines omnibus notis turpitudinis insignes, idque mihi euenit quoque in uicinitate mea, quae testis esse debuerat innocentiae meae.

Qui uidebant ] Metuebant enim, ne quod periculum sibi per amicitiam Davidis crearetur, & ob eam causam omnes eius aditum, congregationem, colloquiumque fugiebant.

Tanquam mortuus à corde ] Effluxi ex animo meorum perinde atque homines, quorum memoria simul cum uita iam pridem extincta est.

Tanquam uas perditum ] Comparat se uasi confraeto, quia quidem re uilius esse nihil potest aut contemptius.

In manibus tuis ] Id est in tua unius potestate mors, & uita mea posita est.

Quam magna ] Sensus est, talia sunt Domine ac tanta illa praemia, quae in coelo parasti colentibus te, ut eorum magnitudo, & praestantia neque oculis cerni, neque aurium sensu percipi, neque animo queant comprehendi. Quin etiam de ea bonitate Dei loquitur uir sanctus, quam pii sentire solent uel in medijs calamitatibus, ea uero saepe talis, & tanta est, ut dum miseri existimantur ab alijs, ipsi se beatos ducant. Expositurus autem beneficium, quod acceperat à Deo, exorditur ab hac exclamatione admirationis plena, qua laudat infinitam beneficentiam Dei.

Quamq; operatus es pro eis ] Significat ,  
Deum saepenumero tam illustria suae aduersus pios be-  
nevolentiae documenta constituere , ut omnes perspi-  
ciant , ipsi maximae curae esse eos , qui pietatem , &  
iustitiam colunt .

Abscondes eos ] Hae elegantissima allego-  
ria exprimit uir sanctus , quantae curae sit Deo piorum  
salus , quamq; securi , & ab omni periculo tuti sint ,  
quicumque se , ac sua omnia tutelae , ac misericordiae  
ipsius commiserunt . est autem sumpta haec orationis  
exornatio ex similitudine regis , qui eum , quem secu-  
rissimum esse uelit ab impetu , & insidijs inimicorum ,  
in suum cubiculum recipiat , ut non solum parietes re-  
giae , sed etiam oculi regis salutem ipsius custodiant ,  
qua quidem tutela nihil securius , aut amantius exco-  
gitari potest . hinc saepe uidemus , homines pios nulla  
ui , aut uexatione improborum de tranquillitate men-  
tis depelli posse . Hunc locum Dauidis imitari uide-  
tur Asaphus in Psalmo LXXXIII , cum He-  
braeos uocat absconditos Dei , nimirum significans ,  
eam nationem Deo carissimam , atque in praecipua  
ipsius esse tutela .

Benedictus Dominus ] Immortales Deo  
gratias ago , qui mirabili misericordia persecutus  
est calamitates meas , ut salus mea perinde tuta esset ,  
quasi moenibus , & firmissimo praesidio munita foret .

Ego autem dixi ] Cum ( inquit ) in fuga  
essem , iam iamq; hostes in caedem meam imminerent ,  
salutem penè desperaueram , meq; abiectum , & au-  
xilium tuo spoliatum arbitrabar .

Ideo exaudisti uocem orationis meæ, cum e' amarem ad te   Tamen si uir sanctus in eas angustias uenerat, ut suspicari cogeretur, se à Deo derelictum esse, nequaquam tamen precandi finem faciebat, qua quidem re ostendebat, spem cum desperatione contendere, neque fiduciam, quam in Deo locatam habebat, periculi magnitudine funditus extingui posse, ideo preces illius audiuit misericordiæ parens, qui solet aliquando pios, etiam cum minus sperant, è maximis calamitatum angustijs eripere, quo benignitas ipsius fiat illustrior.

## ARGVMENTVM PSAL. XXXII.

Docet exemplo suo, si quid turpiter, aut nefarie commissum fuerit, id non esse celandum, sed ad Domini misericordiam confugiendum esse, quod erranti salutaris sit medicina confessio.

## David Eruditio Psalmus XXXII.

Beati quorum remissæ sunt iniquitates, & quorum te'cta sunt peccata:

Beatus uir, cui non imputauit Dominus peccatū, nec est in spiritu eius dolus.

Quoniam tacui, inueterauerunt ossa mea, dum clamarem tota die.

Quoniam die, ac nocte grauata est super me manus tua, conuersus est humor meus in siccitates æstatis.

Delictum meum cognitum tibi feci, & iniustitia

# EXPLANATIO

tiam meam non abscondi.

Dixi, confitebor aduersum me iniquitatem meam Domino; & tu remisisti impietatem peccati mei.

Propterea orabit ad te omnis sanctus, in tempore opportuno.

Utique in diluuiis aquarum multarum, ad eum non approximabunt.

Tu es refugium meum, a tribulatione defendes me, canticis liberationis circundabis me.

Intellectum tibi dabo, & instruam te in uia, qua gradieris, firmabo super te oculos meos.

Nolite fieri sicut equus & mulus, quibus non est intellectus,

Quorum maxillas freno constringere oportet, ne approximant ad te.

Multa flagella peccatoris, sperantem autem in Domino misericordia circundabit.

Letamini in Domino, & exultate iusti, & iubilate omnes recti corde.

## EXPLANATIO.

Beati quorum remisse sunt iniquitates. Illud animaduersione dignum est, in his uerbis, quod beatos appellat, non qui ab omni peccatorum labe puri, & integri sunt, nemo enim talis est, dum uiuit in terris, sed illos, quibus misericordia Dei peccata condonat, condonat autem ipsi, qui confitentur peccata sua, & ex animo credunt, sanguinem Domini nostri IESU CHRISTI omnium delictorum, & scelerum expiationem esse.

Diuus Paulus



Paulus in Epistola ad Romanos scripta explanat hos primos uersiculos ad hunc modum : Ei uero , qui operatur , merces non imputatur secundum gratiam , sed secundum debitum : Ei uero , qui non operatur , sed credit in eum , qui iustificat impium , imputatur fides eius ad iustitiam , quemadmodum & David explicat beatitudinem hominis , cui Deus imputat iustitiam absque operibus , Beati quorum remissæ sunt iniquitates , & quorum tecta sunt peccata , Beatus uir , cui non imputauit Dominus peccatum .

Nec est in spiritu eius dolus ] Significat his uerbis , eam beatitudinem , quam celebrat his uersibus , ad eos pertinere , qui cognoscunt , & sincere confitentur & ex animo , se impuros , & multis peccatorum maculis contaminatos esse : his enim remissio peccatorum contingit à Deo , præterea nullis . Nimirum maximus est dolus , & maxime quidem perniciosus in mente illius , qui se aliquid putat , cum nihil sit , eamq; animi puritatem sibi arrogat , ut condonatione delictorum , quam prædicat hoc loco uir sanctus , se egere non existimet . qua quidem arrogantia nihil est detestabilius , miseriùs nihil , contraq; beati , qui esuriunt , & sitiunt iustitiam : Deus enim esurientes implet bonis , & diuites dimittit inanes .

Quoniam tacui ] Propterea quòd delicta mea coelabam , neque illa , ut par erat , agnoscebam , iracundiam , & poenam mihi non remittebat Deus , itaque ob eam causam in tantas incideram calamitates , ut confectus animi , corporisq; doloribus , incredibili macie extabescerem .

# E X P L A N A T I O

**Delictum meum ]** Cum animaduverterem, silentium, & dissimulationem meam tantas mihi calamitates importasse, ad extremum tibi confessus sum de peccatis & malefactis meis; & tam magnis uulneribus salutaris fuit medicina confessio: nulla enim interposita mora mihi omnem animi impietatem condonasti: itaque exemplo meo, & hac tua singulari benignitate adducti homines pii ueniam erratis suis postulabunt tempore opportuno, ne scilicet in diem ex die differendo grauiores poenas pendant. quin etiam si quis maiore aliquo delicto commissso se in hunc tutum, ac tranquillum confessionis portum receperit, is profecto, cum magna aliqua tempestas, atque eluuiò calamitatum extiterit, incolumis ab omni detrimento, saluusq; permanebit.

**Canticis liberationis circundabis me ]** Intelligit hymnos, quibus ipse, liberatus aliquo periculo, & calamitate, Deo gratias agere consueuerat.

**Intellectum tibi dabo ]** Deum inducit respondentem, & aperte docet, quòd homines pii mentem bonam habeant, quodq; de recto uitæ curriculo non declinent, id attribuendum misericordie Dei, non uirtuti, aut uiribus ipsorum.

**Nolite fieri ]** Nolite ( inquit ) animos uestros libidinum, & cupiditatum imperio permittere, atque equos, & mulos imitari, qui sunt rationis expertes, & frenorum duritia cohiberi solent, ne ferocitate exultantes aliquem ledant.

## ARGVMENTVM PSAL. XXXIII.

Hoc hymno pulcherrimò differit de immensa ui,  
ac sapientia, & misericordia Dei.

## Psalmus XXXIII.

Exultate iusti in Domino, rectos decet laudatio.  
Confitemini Domino in cithara, in psalterio, &  
decachordo psallite illi.

Cantate ei canticum nouum, bene psallite cum in  
bilatione.

Quia rectum est uerbum Domini, & omnia ope  
ra eius in fide.

Diligit iustitiam, & iudicium, misericordiæ Do-  
mini plena est terra.

Verbo Domini cæli facti sunt, & spiritu oris eius  
omnis ornatus eorum.

Congregans sicut in utre aquas maris, ponens in  
thesauris abyssos.

Timeat Dominum omnis terra, ab eo paueant om-  
nes inhabitantes orbem.

Quoniam ipse dixit, & factum est, ipse manda-  
uit, & extitit.

Dominus dissipat consilia gentium, irritas facit co-  
gitationes populorum,

Consilium autem Domini in æternum manet, co-  
gitationes cordis eius in generatione, & generatio-  
nem.

Beata gens, cuius Deus est Dominus, & populus,  
quem elegit in hæreditatem sibi.

## E X P L A N A T I O

De coelo respexit Dominus, & uidit omnes filios hominum.

Ex stabili habitaculo suo respexit super omnes habitantes terram.

Qui finxit pariter corda eorum, qui intelligit omnia opera eorum.

Non saluatur Rex in multitudine exercitus, & gigas non saluabitur in multitudine roboris sui.

Fallax equus ad salutem, & in multitudine roboris sui (sefforem) non saluabit.

Ecce oculi Domini super metuentes eum, super eos, qui sperant in misericordia eius.

Vt eruat a morte animas eorum, & alat eos in fame.

Anima nostra sperat in Domino, quoniam adiutor, & protector noster est.

Quia in eo letabitur cor nostrum, propterea quod in nomine sancto eius sperauimus.

Fiat misericordia tua Domine super nos, quem admodum sperauimus in te.

## E X P L A N A T I O.

Quia rectum est uerbum Domini, & omnia opera eius in fide. Verbum consuetudine linguae Hebraeae non solum significat uoces illas, quibus certae aliquae sententiae subiectae sunt, sed etiam res ipsas, & facta, itaque sensus est huius uersiculi, quicquid loquitur, & praecipit Dominus, quicquid ille gerit, rectum, sanctum, & cum summa fide, & aequitate coniunctum esse.

Diligit iustitiam, & iudicium ] Quoties  
litera sancta hæc duo uerba inter se coniungunt, si-  
gnificare solent optimam administrandarum rerum  
uiam, & rationem, cum scilicet omnia recte, atque  
ordine geruntur, ac fiunt. Hæc autem laus est maxi-  
me propria summi moderatoris, & cunctarum re-  
rum domini, cuius consilio, & providentia natura  
omnis, & hæc omnis mundi pulchritudo optime re-  
gitur, conservaturq;.

Omnis ornatus eorum ] Sic appellat so-  
lem, & lunam, & reliquorum uagantium syderum  
fulgorem, tum innumerabilem illam uim stellarum  
inerrantium, quibus cæli species undique ornata in-  
satiabile spectaculum mortalibus præbet.

Quoniam ipse dixit ] Nihil (inquit) est  
dictu tam inopinatum, atque mirabile, nihil a cogi-  
tatione hominis tam remotum, & in omni memoria  
inauditum, quin ad Dei uoluntatem, nutumq; sta-  
tim existat.

Non saluatur Rex ] Significat, neque ui-  
res corporis, neque opes, & copias hominibus pro-  
desse, sed in sola Dei misericordia sitam esse uitam,  
& salutem omnium.

Ecce oculi Domini ] Ex altera parte iudi-  
cium Dei metuendum est, ut licentiam peccandi, &  
omnem importunitatem, atque arrogantiam fugia-  
mus: ex altera, misericordiæ illius confidere oportet,  
ne peccantes ueniam desperemus, præsertim cum nul-  
la scelera, aut maleficia tam magna esse possint,  
quin clementia Dei infinitis partibus maior existat.

# EXPLANATIO

## ARGUMENTVM PSAL. XXXIIII.

Celebrat hoc cœlesti hymno providentiam, & liberalitatem Dei erga eos, qui ad eius misericordiam confugiunt, atque omnes ad innocentiam, ac pietatis studium adhortatur.

David, cum immutavit rationem suam coram  
Abimelech, & eiecit eum, & abiit.

Psalmus XXXIIII.

Benedicam Dominum in omni tempore, semper  
laus eius in ore meo.

In Domino gloriabitur anima mea, audiant mansueti, & latentur.

Magnificate Dominum mecum, & exaltemus nomen eius simul.

Exquisivi Dominum, & exaudivit me, & ex omnibus pavoribus meis eripuit me.

Aspicite ad eum, & illuminabimini, & facies uestre non confundentur.

Iste pauper clamavit, & Dominus exaudivit eum, & de omnibus tribulationibus eius salva vit eum.

Castrametatur Angelus Domini in circuitu timentium eum, & eripiet eos.

Gustate, & videte, quod suavis est Dominus, beatus uir, qui sperat in eum.

Timete Dominum omnes sancti eius, quoniam non est inopia timentibus eum.

Leones inopes sunt, & esuriunt, inquirentes au-

tem Dominum nullum deficiet bonum.

Venite filij, audite me, timorem Domini docebo uos.

Quis est homo, qui uult uitam, diligit dies uidere bonos?

Prohibe linguam tuam à malo, & labia tua ne loquantur dolum.

Diuerte à malo, & fac bonum, inquire pacem, & persequere eam.

Oculi Domini super iustos, & aures eius in preces eorum.

Vultus Domini super facientes mala, ut perdat de terra memoriam eorum.

Clamauerunt iusti, & Dominus exaudivit eos, & ex omnibus tribulationibus eorum liberauit eos.

Iuxta est Dominus ijs, qui tribulato sunt corde, & coneritos spiritu saluabit.

Multa tribulationes iustorum, & de omnibus ijs liberauit eos Dominus.

Custodit Dominus omnia ossa eorum, unum ex his non conteretur.

Occidet impium malitia, & qui oderunt iustum, deuastabuntur.

Redimit Dominus animas seruorum suorum, & non deuastabuntur, quicunque sperant in eo.

# EXPLANATIO.

Cum immutauit rationem suam ] Id est, cum simulauit, se inclidisse in insaniam, ut ex periculo capitis euaderet. Ea historia scripta est in libris

regum. Neque aliquem moueat, quod eo loco Rex Palaestinarum appellatur Achis, quem David nominat Abimelechum, ut enim ueteres Aegyptiorum reges uocabantur Pharaones, ita uerisimile est, principibus Palaestinarum Abimelechi cognomentum fuisse.

Benedicam Dominum in omni tempore ]

Id est, non minus rebus aduersis quam secundis. semper uero est, cur homines pii maximas Deo gratias agant, quando nihil ipsis euenire potest, quod non magnum afferat adiumentum ad salutem.

Accedite ad eum ]

Hoc est summa cum fiducia ad eius misericordiam confugite, & ille uos omni periculo & calamitate liberabit, neque sinet uos in tenebris errorum, & ignorantiae uersari.

Castametatur Angelus Domini in circuitu timen-  
tium eum ]

Hoc ita esse, Elisaei uatis praestantissimi factum comprobauit: cum enim illius capiendi gratia magna Syrorum copiae urbem Dotham obsedissent, & ob eam causam minister eius fractus, & debilitatus metu esset, uir sanctus a Deo precatus est, ut quae ipse cernebat, minister quoque cerneret, tum ille circumcirca prospiciens, montem curribus igneis plenum uidit atque equitibus, qui pro salute Elisaei propugnabant, & ipsum tanquam muro firmissimo undique sepiebant.

Gustate, & uidete, quod suauis est Dominus ]

Qualis enim & quanta sit bonitas Dei, nemo intelligere potest nisi expertus, & qui beneficia ab eius liberalitate sibi tributa diligenter attendit.

Timeate Dominum omnes sancti eius ]

Ti-



morem Dei solent appellare uates sancti reuerentiam  
aduersus Deum, & uerum ipsius cultum, & uitam  
legum diuinarum studiosam, atque amantem.

Leonēs. ] Sic appellare uidetur homines po-  
tentes, ac uolentos, qui infirmiores prædæ loco ha-  
bent, atque opprimere per uim solent. Hoc capitale,  
& pestiferum genus hominum uir sanctus comparat  
leonibus etiam in Psalmo X.

Venite filij. ] Hortatus fuerat ad religionē,  
& pietatem, nunc docet, quibus in rebus illa con-  
sistat.

Inquire pacem, & persequere eam. ] Illud  
quidem in primis Deus ab hominibus pijs requirit, ut  
mansuetudinem, & lenitatē animi colant, & quan-  
tum in ipsis est, pacem cum omnibus hominibus om-  
nium generum habeant: sed, hoc præstare, arduum,  
& difficillimum est, tot causæ dissidiorum, & offen-  
sionum ferè semper existunt. Itaque primum summa  
diligentia uestiganda est uia, & ratio, quemadmo-  
dum possimus hunc pulcherrimum, & dulcissimum  
pietatis fructum capere, deinde non minore studio cō-  
tendendum est, ut ipsum capiamus: illud est, pacem  
querere: hoc est, ipsam persequi. Sed cum omnia co-  
gitatione, animoq; lustraueris, una duntaxat ratio  
inueniri potest huiusce diuini boni consequendi, si di-  
uitias, honorem, uitam, & humana omnia con-  
temnas, teq; in seruitutem Deo pie, sancteq; dices,  
atque illius gratia, tutelāq; contentus reliqua ceteris  
æquo, ac libenti animo concedas. Hæc autem ab ijs  
effici possunt, quibus spiritum suum Deus impertiue-

rit; ceteri neque ea exequi, neque cum Deo, neque cum hominibus, neque secum ipsi pacem habere possunt. Itaque hoc præstantissimum donum à Deo petere debemus, qui solus ex omnibus & pacem, & cetera bona liberaliter, munifice, prolixèq; largitur.

Iuxta est Dominus ijs, qui tribulato sunt corde, et contritos spiritu saluabit. Sic appellat homines fractos, atque afflictos calamitate, & mœrore, qui misericordiam Dei suppliciter implorant. is uero libentissime solet miseris opitulari, & suscipere defensores, quos homines deseruerunt.

# ARGVMENTVM PSAL.

## XXXV.

Implorat auxilium Dei aduersus inimicos, in quorum scelera, & crudelitatem magno impetu orationis inuehitur.

## Psalmus Dauid XXXV.

Iudica Domine iniuriam facientes mihi, impugna impugnantes me.

Apprehende arma, & scutum, & exurge in adiutorium mihi.

Profer frameam, & conclude (uiam) aduersus eos, qui persequuntur me, dic animæ meæ, salus tua ego sum.

Confundantur, & erubescant querentes animam meam.

Auertantur retrorsum, & confundantur cogi-

tantes mihi mala .

Fiant tanquam pulvis ante faciem uenti , & Angelus impellat eos .

Fiant uia illorum tenebrae , & lubricum , & Angelus Domini persequatur eos ,

Quoniam sine causa absconderunt mihi foueam laquei sui , sine causa fecerunt foueam anime meae .

Veniat illi calamitas , quam ignorat , & captio , quam abscondit , apprehendat eum , & in calamitatem ipsam cadat .

Anima autem mea exultabit in Domino , & letabitur super salutari suo .

Omnia ossa mea dicent , Domine quis similis tibi ?

Qui eripis inopem de manu fortiorum illo , egenum , & pauperem a diripientibus eum .

Surgentes testes iniqui , quae ignorabam , interrogabant me .

Retribuebant mihi mala pro bonis , solitudinem anime meae .

Ego autem , cum ipsi infirmarentur , induabar sacco .

Affligebam in ieiunio animam meam , & oratio mea in sinum meum reuertetur .

Quasi amicus , & quasi frater meus esset , sic incedebam , quasi lugens matrem , contristatus incuruabar .

Et ipsi in calamitate mea letati sunt , & conuerunt , congregati sunt contra me abiecti homines , & ego nesciebam .

Sciderunt , & non siluerunt cum assentatoribus derisores parasi , fredebant contra me dentibus suis .

## E X P L A N A T I O

Domine quando respicies? restitue animam meam  
à malignitate eorum; à leonibus unicam meam.

Confitebor tibi in ecclesia magna, in populo multo  
laudabo te.

Ne gaudeant de me, qui aduersantur mihi inique,  
qui oderunt me gratis, ne annuant oculis.

Quoniam pacifice non loquuntur, & contra man-  
suetos terræ cogitant dolos.

Et dilatauerunt super me os suum, dixerunt, eu-  
ge, euge, uiderunt oculi nostri.

Vidisti Domine, ne silcas, Domine ne discedas  
à me.

Exurge, & intende iudicio meo, Deus meus &  
Domine meus in causam meam.

Iudica me secundum iustitiam tuam Domine Deus  
meus, & non gaudeant de me.

Non dicant in cordibus suis, euge, euge animæ  
nostræ, nec dicant, deuorabimus eum.

Erubescant, & confundantur simul, qui letan-  
tur malis meis.

Induantur confusione, & pudore, qui se erigunt  
contra me.

Exultent, & letentur, qui uolunt iustitiam meam,  
& dicant semper, magnificetur Dominus, qui uo-  
luit pacem serui sui.

Et lingua mea prædicabit iustitiam tuam, tota die  
laudem tuam.

## E X P L A N A T I O .

Et concludit uiam aduersus eos ]

Hostis im

manis furore incitatus supplicem tuum insequitur ,  
at tu Domine te te illi armatus obijce , atque iter in-  
terclude , ne me consequi possit .

Veniat illi calamitas ] Subita (inquit) nec  
opinata calamitas aduersarium meum opprimat , &  
quas insidias mihi comparauit , ijs insidijs capiatur  
ipse . Hæc autem mala precatur Sauli homini perdi-  
tissimo , atque impio , a quo iniuste capite , & fortu-  
nis oppugnabatur .

Surgentes testes ] Queritur de hominibus  
nefarijs , qui falsis criminibus ipsum onerabant , per  
inde quasi regnum appeteret , & insidias uitæ Saulis  
pararet .

Solitudinem animæ meæ ] Queritur se in  
calamitate ab ijs proiectum , & derelictum , qui per  
fugium ipsi & solatium præbere debebant .

Et oratio mea in sinum meum reuertetur ]  
Id est , ad meum fructum redundabit , si enim huma-  
nitas mea mihi nulli usui fuit apud inimicos , at certe  
proderit apud Deum .

Quasi amicus ] Cum illi in calamitate ali-  
qua uersarentur , similiter eorum uicem dolebam , &  
incommodis comouebar , ac si arētissimo necessitudi-  
nis uinculo inter nos copulati essemus , neque aliter af-  
ficiētabar , & in squalore , luctuq; iacebam , quàm si  
carissimam mihi parentem amisissem .

Et ipsi in calamitate ] Narrat , quàm præ-  
claram sibi gratiam retulerint pro tanta humanita-  
te , & beneficio .

Sciderunt , & non siluerunt ] Id est , uer-

borum contumelijs me lacerarunt: sic explanat hunc locum Abrahamus Esdra.

Derisores parafiti ] Ita expreffimus ex Hebræo, ſententiam ſecuti, ſi enim uerbum uerbo reddere uoluiffemus, uertendum erat, derisores placentæ, uerum hoc ut apud Hebræos eſt elegans, ita apud nos ineptum fuiſſet atque obſcurum.

qñ respiciet. Domine quouſque ] Quouſque ſines homines perditos in meas miſerias tam crudeliter inſultare? quouſque illorum ſcelera impunita, atque inuicta pati? iam quaſo adhibe miſericordiam in calamitate ſupplicis tui, iam propulſa iniurias, & perniciem, quam mihi dies, noctesq; machinantur, & ſalutem meam ab omnibus dereliſtam prohibe ab impetu, & feritate hominum immanium, & barbarorum.

Ne annuant oculis. ] Id eſt, ne miſeri fortunis illudant.

Viderunt oculi ] Quod ſcilicet diu, multumq; optauimus, nimirum te afflictum, calamitoſum, lachrimis, & mœrore perditum.

Vidiſti Domine ] Vidiſti certe, quàm acerbè, quàm late, & inſolenter inſultent in fortunas meas, ne quaſo diſſimula, hanc crudelitatem tibi diſplicere, ne ue me deſeras in tantis malis.

Euge, euge, animæ noſtræ ] Id eſt, iam bene habet, nunc exultamus gaudio, nunc triumphamus, quando hunc afflictum, & perditum uidemus.

Exultent, & letentur ] Libera me tandem ijs calamitatibus, ut homines p̃i, qui fauent innocen-

riæ meæ, exultent, & lætentur, & tibi gratias agât,  
quòd tuo beneficio reliquam uitam in pace, atque otio  
dulci colere possim.

## ARGVMENTVM PSAL.

## XXXVI.

Describit cogitationes, & facta improborum, de-  
inde clementiam, & misericordiam Dei laudibus pro-  
sequitur.

## Psalmus XXXVI.

Dicit iniquitas impij in medio cordis mei, quòd  
non est timor Dei ante oculos eius.

Quoniam blanditur sibi ipsi in oculis suis, ut in-  
ueniatur iniquitas eius ad odium.

Verba oris eius iniquitas, & dolus, noluit intelli-  
gere, ut bene ageret.

Iniquitatem meditatus est in cubili suo, astitit o-  
mni viæ non bonæ, malitiam autem non odiuit.

Domine usque ad coelos misericordia tua, & ve-  
ritas tua usque ad nubes.

Iustitia tua sicut montes Dei, iudicia tua abyssus  
multa.

Homines, & iumenta saluabis Domine. quàm  
pretiosa est misericordia tua Deus.

Filij autem hominum in tegmine alarum tuarum  
sperabunt.

Saturabuntur ab ubertate Domus tue, & corren-  
te uoluptatum tuarum potabis eos.

## EXPLANATIO

Quoniam apud te est fons uitæ, & in lumine tuo  
uidebimus lumen.

Extende Domine misericordiam scientibus te, & iu-  
stitiam tuam ijs, qui recto sunt corde.

Ne ueniat mihi pes superbiæ, & manus peccatoris  
ne moueat me.

Ibi cadent, qui operantur iniquitatem, expellen-  
tur, nec poterunt stare.

## EXPLANATIO.

Dicit iniquitas ] Scelera ( inquit ) impio-  
rum tanquam pro testimonio dicunt animo meo, nul-  
lo illos metu diuini numinis tangi.

Quoniam blanditur. ] Dum impij in scele-  
ribus sibi blandiuntur, & placent, id consequuntur,  
ut incurrant in odium, offensionemq; Dei; atque ho-  
minum.

Iniquitatem meditatus ] Id est, noctu cum  
animo suo cogitat, quid in Deum, atque homines pec-  
care possit interdum.

Domine usque ad coelos ] Cum tanta sit in  
hominibus improbitas, infinitis tamen partibus am-  
plior est misericordia tua, quæ illorum scelera, & fla-  
gitia tanta lenitudine tolerat.

Iustitia tua sicut montes Dei ] Id est, par  
est altitudine montibus excelsissimis. Hebræa enim  
lingua diuinum solet appellare; quicquid aliquo in  
genere excellit. sic uocat paradisum Dei hortos amœ-  
nissimos; exercitum Dei copias maximas, item cedros  
Dei arbores proceras, & formosas.

Iudicia



Iudicia tua abyssus multa ] Id est, profun-  
dissimo mari sunt similia. cum autem iustitiam Dei,  
& iudicia dicit, intelligi uult consilium, & prouis-  
dentiā ipsius summa sapientia, summaq; bonitate  
res humanas, & omnem mundum gubernantis. qua  
de re dictum est in explanatione psalmi XXXIII.  
De misericordia, & ueritate eiusdem explicauimus  
in explanatione psalmi XXVI.

Homines & iumenta ] Tu (inquit) Do-  
mine homines, & bestias incredibili bonitate susten-  
tas, & omni animantium generi spiritum, uitamq;  
largiris.

Filij autem hominum ] Dixerat, Deum  
non solum humano generi, sed etiam bestias amanter  
consulere, ac providere: nunc ostendit, beneficentiam  
eius potissimum illustrem, & salutarem erga homi-  
nes existere, quippe qui ad cognoscendum, & colen-  
dum Deum, & beatam uitam ab eo consequendam  
nati, aptiq; sint.

Saturabuntur ] Intelligit his uerbis, eos,  
qui se fidei, ac tutelæ Dei commiserunt, maximis be-  
neficijs, & muneribus ab illo affici, neque id solum *et benefi-*  
in altera illa uita, quæ sempiterna est, sed etiam in *cijjs & mu-*  
hac breuissima, & fugaci: euadunt enim filij Dei, *maximè &*  
atque omnium rerum domini, & Spiritu sancto *af-uit pntis.*  
flati uitam coelestem in corporibus humanis imitan-  
tur, & maximis, purissimisq; ac perpetuis uolupta-  
tibus fruuntur.

Et in lumine tuo ] Id est, cum splendor co-  
gnitionis tuæ uberior nobis illuxerit, tunc demum

# EXPLANATIO

omnium malorum tenebræ faceffent, & clariffimam, pulcherrimamq; summi boni lucem intuebimur, eaq; in perpetuum fruemur.

Extende misericordiam ] Vitæ tu quidem bonitate tua aduerfus omne hominum genus, sed tamē illa largius, et profuētius manet ad homines pios, & iustitiæ amantes.

Non ueniat mihi ] Ne pedes superborum, & uiolentorum hominum mihi propinquent, sed illorum quaeso uim, & furorem a me prohibe, ut post maximas erumnas, & calamitates aliquando quæta, & tranquilla mente consistam.

Ibi cadent ] Hunc uersiculum in explanatione psalmi XXXIII interpretati sumus.

## ARGUMENTVM PSAL.

### XXXVII.

Hortatur pios, ne grauius commoueantur rebus secundis improborum, quippe quæ sint breues, & fugaces, & maiora illis supplicia pariant, cum è contrario hominibus uitam cum fide, iustitiâq; colentibus nihil mali possit euenire nec uiuis, nec mortuis.

### Psalmus David XXXVII.

Noli irritari propter malignantes, neque æmularis facientes iniquitatem,

Quoniam tanquam gramen uelociter succidentur, & quemadmodum olcra herbarum cito decident.

Spera in Domino, & fac bonitatem, & inhabita terram, & pasce fidem.

Delectare in Domino, & dabit tibi petitiones cordis tui.

Volue super Dominum viam tuam, & spera in eum, & ipse faciet.

Et educet quasi lumen iustitiam tuam, & iudicia tua tanquam meridiem. tace Domino, & expecta eum.

Noli irritari propter eum, qui prosperatur in via sua, propter hominem facientem iniustitias.

Desine ab ira, & derelinque furorem; noli irritari, ut maligneris.

Quoniam qui malignantur, exterminabuntur; expectantes autem Dominum ipsi hereditabunt terram.

Adhuc pusillum, & non erit peccator, contemplanberis locum eius, & ipsum non inuenies.

Mansueti autem hereditabunt terram, & delectabuntur in multitudine pacis.

Cogitat impius contra iustum, & stridet contra eum dentibus suis.

Dominus autem irridebit eum, quoniam prospicit quod ueniet dies eius.

Gladium euaginauerunt peccatores, intenderunt arcum suum,

ut prosternant pauperem, & inopem, ut trucident rectos corde.

Gladius eorum introibit in corda ipsorum, & arcus eorum confringetur.

Melius est modicum iusto, quam diuitie peccatorum multe,

Quoniam brachia peccatorum conterentur, sustentat autem iustos Dominus.

Notit Dominus dies immaculatum, & hereditas eorum in aeternum erit.

Non confundentur in tempore malo, & in diebus famis saturabuntur, quia peccatores peribunt.

Et inimici Domini uelut adeps agnorum absumentur, cum fumo deficient.

Mutuabitur peccator, & non soluet, iustus autem miseretur, & tribuit.

Quia benedicentes ei hereditabunt terram, maledicentes autem ei disperibunt.

A Domino gressus hominis dirigetur, & uiam eius uolet.

Cum ceciderit non collidetur, quia Dominus sustentat manum eius.

Iunior fui, etiam senui, & non uidi iustum derelictum, nec semen eius querens panem.

Tota die miseretur, & commodat, & semen illius in benedictione erit.

Declina a malo, & fac bonum, & inhabita in seculum seculi.

Quia Dominus amat iudicium, & non derelinquet sanctos suos, in aeternum conseruabuntur,

Iniusti punientur, & semen eorum peribit.

Iusti autem hereditabunt terram, & inhabita bunt in seculum seculi super eam.

Os iusti loquetur sapientiam, & lingua eius lo-

quetur iudicium .

Lex Dei eius in corde ipsius , & non uacillabunt gressus eius .

Considerat peccator iustum , & querit mortificare eum ,

Dominus autem non derelinquet eum in manibus eius , nec damnabit eum , cum iudicabitur ipse .

Expecta Dominum , & custodi uiam eius , & exaltabit te , ut hereditate capias terram , exterminationem peccatorum uidebis .

Vidi impium superexaltatum , & eleuatum sicut cedros Libani ,

Et transiui , & ecce non erat , quasiui eum , & non est inuentus .

Obserua innocentem , & attende iustum , quoniam ad extremum erit huic uiro pax ,

Inuesti autem disperibunt , ad extremum impij exterminabuntur ,

Salus autem iustorum à Domino , & fortitudo est eorum in tempore tribulationis .

Et adiunabit eos Dominus , & liberabit eos , & eruet eos à peccatoribus , & saluabit eos , quia sperauerunt in eum .

#### EXPLANATIO .

Fac bonitatem , & inhabita terram ]  
Id est , si cum uirtute , & pietate uixeris , certum habeto , te domi tuæ uitam placide , & tranquille ad senectutem perducturum : hoc enim promittit Deus in legibus fœderis sui . Quod uero sequitur , &

pasce fidem , multæ sunt huius loci interpretationes .  
 explanatores Hebræi , alij quidem legunt ita ut nos ,  
 & Dauidem aiunt ijs uerbis adhortari homines , ut  
 animum intendant potissimum ad eas res , quibus ali-  
 tur , augeſcitq; fiducia , & pietas aduersus Deum :  
 alij uero legunt , pasce fide , idq; interpretantur in  
 hanc sententiam , non esse putandum satis , si uirtu-  
 tem , ac pietatem ipse colas , nisi diligenter operam  
 des , ut harum rerum disciplina , & institutione alios  
 etiam alas , qui est unus salutaris , & proprius , sua-  
 uissimusq; pastus animorum .

Volue super Dominũ uiam tuam ] Id est ,  
 commenda illius fidei te , ac tua omnia , atque ex eius  
 bonitate pendeto .

Et educet quasi ] Id est , reddet clarissi-  
 mam , & maxime illustrem probitatem tuam apud  
 omnes .

Tace Domino , & expecta eum ] Hoc est ,  
 in rebus aduersis quietus esto , atque æquo animo ex-  
 pecta , usque dum ipse Dominus tibi subueniat . Simi-  
 lis est illa diuina Esaie sententia , In silentio , & spe  
 erit fortitudo uestra .

Novit Dominus dies immaculatorum ] Id  
 est , illorum uitæ consulit , & providet .

Velut adeps absumentur ] Hostiarum  
 adeps uoraci flamma consumitur , & penè in nihili-  
 um it : similiter impij , & hostes Dei funditus inter-  
 ibunt .

Mutuatur peccator . ] Pulcherrima collatio ,  
 qua uir sanctus demonstrat , etiam in ijs , quæ popu-

Lariter bona fortunæ nominantur, uirum iustum, & probum longe meliori conditione esse, quam improbum, & iniustum. Hic enim quamuis copiosus, & diues; ob intemperantiam ferè semper ære alieno obstrictus est, neque eo se liberare potest, aut ault, illi nunquam ferè deest, quod alteri de re familiari liberaliter impertiat. Alter uel in maximis diuitijs eget, alter etiam in paupertate diues est. Improbis ne reddit quidem, quod debet amicis, probus, & pius largitur, quod non debet, egenti quamuis inimico. denique ille plerunque ex opulento pauper fit; huic fauente Deo semper omnia, quæ sunt ad uitum, & cultum necessaria, suppeditant.

Quia benedicentes ei ] Ea(inquit)est beneuolentia Dei erga homines pios, & sanctos, ut etiam fautores, & amantes eorum maximis muneribus afficiat. quod si quis inimicitias cum ijs gerat, grauissimas odij pœnas dabit.

A Domino gressus hominis dirigitur ] Sensus est, Deum hominibus pijs in hoc periculoso uitæ cursu ducem, & comitem esse, ut recto, ac tuto itinere perueniant ad uitam beatam, & immortalē. Nam quod subiungit, Deum hominis iusti uiam uel le, hoc intelligit, illum incoëptis piorum fauere, & prosperos exitus concedere.

Cum ceciderit, non collidetur ] Id est, si quid aduersi accadat, calamitati non succumbet, quia Dominus sustentat, & corroborat animū eius. quin etiam uir pius peccat ille quidem, & aliquando grauius offendit, sed Deo adiuuante celeriter respiscit.

# EXPLANATIO

Lex Dei eius in corde ipsius ] Id est, illam ex animo, uereq; diligit, quippe qui nihil antiquius habet, quàm ut intelligat, quid iubeat Deus, quid'ne prohibeat, ut ad normam uoluntatis diuinæ possit omnes uitæ suæ rationes dirigere, propterea (inquit) non uacillant pedes eius, sed forti, & constanti animo in iustitia, & pietate perseuerat.

Nec damnabit illum ] Id est, nec sinet illum calumnijs inimicorum opprimi, si quando in iudicium uocetur.

Expecta Dominum ] Consolatur animos imbecillos, qui grāuiter ferre solent, quòd Deus sæpe bonos opprimi, malis uero omnia ad uoluntatem fluere permittat.

Obserua innocentem ] Obserua (inquit) euentus piorum, impiorumq; animaduertes enim, illos tandem exitus prosperos consequi, hos uero ex illustri, & florenti rerum statu in maximas misérias, & illas quidem perpetuas præcipitari.

## ARGVMENTVM PSALMI

XXXVIIII.

Deplorat peccata sua, & calamitates, in quas ob illa inciderat.

Psalmus David ad memorandum,

XXXVIIII.

Domine ne in furore tuo arguas me, neque in ira tua corripas me,



Quoniam sagittæ tuæ infixæ sunt mihi, & confirmasti super me manum tuam.

Non est sanitas in carne mea à facie iræ tuæ, non est pax ossibus meis à facie peccatorum meorum.

Quoniam iniquitates meæ supergressæ sunt caput meum, & sicut onus graue grauata sunt super me.

Putruerunt, & corruptæ sunt cicatrices meæ à facie insipientiæ meæ.

Miser factus sum, & curuatus sum uehementer, tota die contristatus ingrediebar.

Quoniam lumbi mei impleti sunt ardore, & non est sanitas in carne mea.

Afflictus sum, & humiliatus sum nimis, rugiebam propter turbationem cordis mei.

Domine ante te omne desiderium meum, & gemitus meus à te non est absconditus.

Cor meum conturbatum est, dereliquit me uirtus mea, & lumen oculorum meorum, & ipsum non est mecum.

Amici mei & proximi mei è regione plagæ meæ steterunt.

Et propinqui mei à longe steterunt, et laqueos tendiderunt, qui quærebant animam meam,

Et qui inquirebant mala mihi, locuti sunt prauitates, & dolos tota die meditabantur.

Ego autem tanquam surdus non audiebam, & sicut mutus non aperiens os suum.

Et factus sum sicut homo non audiens, & non habens in ore suo redargutiones.

Quoniam in te Domine speraui, tu exaudies me

# EXPLANATIO

domine Deus meus .

Quia dixi , ne forte latentur de me inimici mei ,  
& dum comouebantur pedes mei , insultauerunt mihi .

Quoniam ego ad flagella paratus sum , & dolor  
meus in conspectu meo semper .

Quoniam iniquitatem meam annuntiabo , & an-  
xius ero pro peccato meo .

Inimici autem mei uiuunt , & roborati sunt , &  
multiplicati sunt , qui oderunt me inique .

Qui retribunt mala pro bonis , aduersabantur  
mihi , quoniam sequor bonitatem .

Ne derelinquas me domine Deus meus , ne discesse-  
ris a me .

Festina in adiutorium meum domine Deus salus  
mea .

## EXPLANATIO.

Domine ne in furore tuo ] Describit acri ,  
& uehementi oratione angustias , & terrores conscien-  
tia iudicium Dei atque iram formidantis .

Quoniam iniquitates meae ] Dicit se ui ,  
& multitudine peccatorum ita obrui , ut uires tanto  
oneri ferendo pares non existant . Nimirum hac sui  
cognitio tam ingentem rietum , & terrorem affert ,  
ut animus fractus , & debilitatus succumbat , deq;  
omni spe salutis deturbetur , nisi ad misericordiam  
Dei fortiter adnitatur . Sed maxima pars hominum  
ita caeca est , & ipsa sibi tam libenter assentatur , ut  
neque turpitudinem suam , & foedissimas laves cerne-  
re possit , neque quam longe distet ab illa excellentia ,

præstantiaq; pietatis, & iustitiæ, quam Deus requirit a nobis. ex ea re fit, ut tam securo animo simus, nostrisq; uirtutibus, & benefactis tanta cum temeritate confidamus.

Putruerunt, & corruptæ sunt cicatrices meæ ] Sic appellat peccata, & noxias affectiones, quæ sunt animi uulnera. ea cum sanata esse existimamus, & cicatrices uidentur obduetæ, sæpenumero ita putrida, & corrupta repente apparent, ut peiore loco salutem nostram esse uideamus, quàm erat antea. scilicet animi nostri crassissimis circumfusi sunt tenebris, & in maxima sui ignorance uersantur, nisi ab illo sole illuminentur, quem diuus Iacobus patrem luminum appellat ex eo, quòd ipse omnibus, quæ lucent, & fons, & principium est lucendi. sed quo quisque maiorem sibi sanitatem arrogat, hoc se magis insanire certo sciat, magisq; pestifero morbo laborare.

Lumbi mei impleti sunt ardore ] Vocabulum Hebræum significat etiam foeditatem: sed siue foeditatem dicas, siue ardorem, utrunque uerbum significat cupiditates, & libidines, quæ & foedissimæ res sunt, & maximos ardores in animis nostris excitare solent.

Et non est sanitas in carne mea ] Hoc loco uerbum carnis in eam sententiam accipere uidetur, in quam diuus Paulus illud accipit, cum etiam ipse queritur, non habitare in carne sua bonum, sic reliquias ueteris hominis appellans. sunt tamen, qui hæc intelligenda putent de corporis morbo: quibus ego non assentior.

# EXPLANATIO

Dereliquit me uirtus mea, & lumen oculorum meorum ] Iam(inquit)uires animi, & corporis me defecerunt, & propter assiduas lacrimas penè iam oculos amisi . uel potius de oculis animi loquitur, & hoc intelligit, se propter magnitudinem perturbationis lumine mentis defectum esse .

Amici mei, & proximi mei ] Necessary mei recusarunt propius ad me accedere, & mecum sermone, & congressione coniungi, qui tamen officijs suis leuare debuissent mœrorem, & calamitates meas .

Quia dixi, ne forte ] Oraui(inquit)te Domine, ne sineres homines impios, & nefarios lætari malis meis : cum enim paulum modo offendissem, incredibile dictum est, quàm proterue, ac petulanter insultarint mihi . Commemorat autem plures causas, quibus adducitur, ut credat, se impetraturum à Deo, quod orat : primum, quoniã in eo uno spem omnem locauit omnium rerum suarum : deinde, quia honesta petit, dum ab illo deprecatur, ne se uirum pium ludibrio patiatur esse & despectui hominibus impijs : addit, se paratum esse ad quæuis supplicia pro peccatis suis sustinenda, seq; ea peccata & agnoscere, & confiteri, & maximum, atque continuum ex ijs dolorem capere : denique profitetur, se maximo studio in posterum sibi ab omni maleficio temperaturum . Hæc autem signa sunt euidentissima hominis ex animo pœnitentis, cui non potest Deus se non exorabilem, placidumq; præbere .

*signa pœnitentis animi.*

## ARGVMENTVM PSAL.

## X X X I X.

Existimant Davidem fecisse hos uersus, cum ipsi Absalonem fugienti Semeis occurrisset in uia, & calamitatem eius acerbissime conuiuijs exagitaret, quæ conuitia ipse sedate, ac patienter tulit. Deplorat autem, atque oratione flebili miseras, & incommoda humanæ uitæ lamentatur.

Victori pro Idithum, Psalmus David

## X X X I X.

Dixi custodiam uias meas, ut non delinquam in lingua mea.

Posui ori meo frenum, cum consisteret peccator aduersum me.

Obmutui silentio, & silui a bonis, & dolor meus exagitatus est.

Concaluit cor meum intra me, & in meditatione mea exarsit ignis.

Locutus sum lingua mea, notum fac mihi domine finem meum,

Et numerum dierum meorum, quis est, ut sciam, quanto tempore uiuam.

Ecce mensura pugillorum terminasti dies meos, & æuum meum tanquam nihilum coram te.

Certe uniuersa uanitas est omnis homo uiuens.

Certe in imagine pertransit homo, sed & frustra cumultuatur.

Theſaurizat, & ignorat, cui congregabit ea, & nunc quæ eſt expectatio mea Domine? certe in te ſpes mea eſt.

Ab omnibus iniquitatibus meis erue me, opprobrium inſipienti ne ponas me.

Obmutui, & non aperui os meum, quoniam tu feciſti, amoue à me plagas tuas.

A uerberatione manus tuæ ego deſeci, cum increpationibus propter iniquitatem corripis hominem,

Tabescere facis ſicut tinea (ueſtimentum) animam eius, certe uanitas eſt omnis homo.

Exaudi orationem meam Domine, & clamorem meum auribus percipe, & ad lachrymas meas.

Ne fileas, quoniam aduena ego ſum apud te & peregrinus, ſicut omnes patres mei.

Recede à me, ut refrigerer, priuſquam abeam, & amplius non ſum.

E X P L A N A T I O .

Obmutui ſilencio & ] Id eſt, uſque eò inimi- ci conuitia tuli ſilencio, ut linguam à bonis uerbis ſimiliter ac malis prohiberem, ſed cum improbus ille petulanter mihi malediceret, animo ſe ſe obiecit memoria ſceleris, quod admiſeram, eaq; res moerorem meum uehementer auxit, animumq; incenſum dolore, atque ira inflammauit, cum cogitarem, peccata mea mihi has calamitates peperiffe.

Locutus ſum ] His uerbis ſignificare uidetur, ſe calamitatum magnitudine fractum mortem optauiffe.

Ecce mensura pugillorum ] Intelligit his uerbis, uitam humanam breuissimam esse, immo nullam, præsertim si cum æuo illo sempiterno Dei conferatur.

In imagine pertransit homo ] Id est, homo tanquam imago quædam uana, & adumbrata, nihil solidi aut expressi habens uitam pertransit.

Sed & frustra tumultuatur ] Id est, accendit ad hæc incommoda, quod is nescit hoc pusillum temporis, quod illi est datum, placide, tranquille, leniterq; traducere, sed turbulentis, & concitatis animi per motionibus semper agitur, semper aut inani formidine, aut effrenata cupiditate torquetur, modo letitia temere exultat, modo ægritudine, ac dolore muliebriter debilitatur, animumq; demittit.

Et nunc quæ est expectatio mea Domine? ] Itaque cum omnia humana plena sint miseriorum, summæq; leuitatis, quid reliquum est mihi, nisi ut in misericordia tua omnem meam spem, omnem cogitationem, curamq; constituam? Iam Domine id ago, iam me ad tuum clementissimum numen totus conuerto, te solum intueor, in te uno nititur salus mea.

Ab omnibus iniquitatibus meis erue me ] Significat, peccata sua causam esse earum calamitatum, in quibus uersatur.

Opprobrium insipienti ] Ne, quæso, me scias esse ludibrio, & despectui hominibus stultis, & impuris.

Obmutui, & non aperui ] Cum semel

# EXPLANATIO

calamitatem meam petulantissima lingua uexaret, obmutui, & patienter tuli, propterea quod sciebam, hoc mihi non accidisse sine consilio, & uoluntate tua.

Et tabescere eum ] Tu ( inquit ) hominem peccantem aliquando tanta seueritate punis, ut illum lacrimis, mœrore, cruciatu conficias, similiter atque tineæ uestem consumere solet.

Quoniam aduena ego sum ] Id est, in terris ut hospes, & peregrinus ætatem ago, & in hac uita tanquam in diuersorio sum, non tanquam in domo, propediem discessurus ad mortem. Hanc eandem sententiam repetit in libro primo Paralip. his uerbis, peregrini sumus coram te & aduena, sicut omnes patres nostri, dies nostri quasi umbra super terram, & nulla est mora.

Recede à me ] Id est, hanc seueram animaduersionem tuam à me prohibe, ut anteaquam de uita exeo, aliquantulum temporis ad respirandum habeam. scilicet uir sanctus desiderabat, ante mortem Deum sentire propitium, quem tunc sentiebat iratum, ut cum bona, & certa spe ad alteram illam uitam proficisceretur.

## ARGUMENTVM PSAL. XL.

Christus agit gratias Deo pro reditu suo ad uitã.

Victori, psalmus David XL.

Expectans expectaui Dominum, & intēdit mihi.  
Et exaudiuit preces meas, & eduxit me de lacu  
strepente,



strepente, & de luto, & limo.

Et statuit supra petram pedes meos, & direxit gressus meos.

Et immisit in os meum canticum nouum, carmen Deo nostro.

Videbunt multi, & timebunt, & sperabunt in Domino.

Beatus uir, qui posuit Dominum spem suam, & non respexit ad superbos, & declinantes ad uanitates.

Multa sunt mirabilia tua domine Deus meus, quæ fecisti, sicut & cogitationes tuæ de nobis, non est qui similis sit tibi.

Annuntiaui, & locutus sum, multiplicata sunt supra numerum.

Sacrificium, & oblationem noluisti, aures autem aperuisti mihi,

Holocaustum & hostiam pro peccato non postula sti, tunc dixi, Ecce uenio.

In uolumine libri scriptum est de me, facere uoluntatem tuam Deus meus uolui, & lex tua in medio cordis mei.

Annuntiaui iustitiam tuam in ecclesia magna, ecce labia mea non prohibebo Domine, tu scisti.

Iustitiam tuam non abscondi in corde meo, & ueritatem tuam, & salutare tuum dixi.

Non abscondi misericordiam tuam, & ueritatem tuam à concilio multo.

Tu autem Domine ne longe facias miserationes tuas à me, misericordia tua, & ueritas tua semper custodiant me.

## E X P L A N A T I O

Quoniam circumdederunt me mala, quorum nō est numerus, comprehenderunt me iniquitates meae, & non potui uidere.

Multiplicatae sunt super capillos capitis mei, & cor meum dereliquit me.

Complaceat tibi Domine, ut eruas me, Domine ad adiuuandum me festina.

Confundantur, & ignominia afficiantur simul, qui quæruunt animam meam, ut auferant eam.

Conuertantur retrorsum, & ignominia afficiantur, qui uolunt mihi mala.

Desolentur pro retributione confusionis suae, qui dicunt mihi euge, euge.

Exultent, & latentur in te omnes quærentes te, & dicant semper, magnificetur Dominus, qui diligunt salutare tuum.

Ego autem mendicus sum & pauper, Dominus sollicitus est mei.

Adiutor meus, & liberator meus es tu, Deus meus ne tardaueris.

## E X P L A N A T I O.

Expectans expectaui Dominum ] Idem est argumentum huius hymni, & XXII. sed dispositio orationis non est eadem, nam utroque loco dominum nostrum IESVM CHRISTVM inducit loquentem de sua morte, & reuocatione ad uitam, sed in huius hymni principio is Deo gratias agit iam ab inferis excitatus, in fine autem exponit deprecationem, qua usus fuerat, cum in media iam morte uer

saretur, contra uero prima pars hymni XXII continet implorationem auxilij, ultima autem gratiarum actionem. Quod si quis Dauidem existimet, de se ipso scribere hos uersus, cum hoc ego non contendero, modo concedat nonnulla inseri, quæ non Dauidi conueniant, sed Christo, cuius ille imaginem gerebat. De hac uero scribendi ratione dictum est à nobis in explanatione psal. XVI. .. Expectans expectaui Dominum ] Hoc loquendi modo significat, se magna equitate animi tolerasse dilationem auxilij, quod tamen incredibili desiderio præstolabatur. Expectat autem hoc modo, qui neque locum, neque tempus, neque modum opitulandi Deo præscribit, sed omnia relinquit in illius arbitrio, persuasissimum habens, se tandem adiutum iri.

De lacu strepente ] Describit elegantissime magnitudinem perturbationis, & uim calamitatum, quibus penè obrutus fuerat.

Et limo ] Verbum Hebræum significat lutum densus.

Et statuit supra petram pedes meos ] Hærebam (inquit) in profunda, & difficili uoragine, neque licebat usquam pedibus consistere, at Dominus me erexit in eum locum, ubi & stare possum, & libere ingredi. Significat autem, se maxima calamitate liberatum, atque in tuto, & tranquillo collocatum esse.

Et immisit in os meum canticum nouum ] Id est, nouam mihi materiam suppeditauit celebrandæ providentiæ, ac misericordiæ suæ.

Videbunt multi, & timebunt ] Multi, qui antea Deum contemnebant, propterea quod illum res humanas curare non arbitrabantur, iam incipient

# EXPLANATIO

cum colere, & uenerari, atque eius bonitati, ac misericordiae confidere, cum intelligant ex hac mea liberatione, & penè oculis uideant, ipsum pietatis amantes amantissime tutari.

Beatus uir ] Monet sapientissime, nequam illorum opibus, & gratia nitendum, qui fortunis, & potentia florentes sibi temere praesidunt, & cogitationes suas abijciunt in res inanes, & fuitiles, sed deum summa cum fiducia inuocandum esse, atque illum omnium nostrarum rerum defensorem, adiutoremq; adoptandum. idq; confirmat ea sententia, quae sequitur, admirans bonitatem diuinam, quae iam inde ab ultima origine mundi tam multas res praclarissimas, & maxime admirabiles gesserit pro salute, ac incolumitate piorum.

Annuntiaui, & locutus sum ] Ego (inquit) semper occupatus fui in celebrandis consilijs, & mirabilibus facinoribus providentiae tuae, sed quis ea possit numero comprehendere, ne dum satis digne uerbis, & oratione persequi?

Sacrificium, & oblationem ] Qui Iudeorum literis, & doctrinae plus aequo dediti sunt, ut reliquas hymni partes, ita hanc conantur ad Dauidem accommodare, sed mea quidem sententia parum proficiunt. at explanatio diui Pauli, qui ad IESVM Christum haec refert in epistola, quam scribit ad Hebraeos, ita facilis, dilucida, & apta, concinnaq; est, ut nihil fieri possit elegantius. quamobrem ad eam te reijcio.

Aures autem aperuisti mihi ] Id est, per-

fecisti, ut dicto audiens essem, ac tuæ uoluntati libens obedirem.

In uolumine libri ] Me (inquit) è coelo in terras descensurum, & humanum genus miserrima seruitute Diaboli liberaturum, iampridem uaticinatus est Moses, idq; testatum reliquit in monumentis legum suarum. Hanc sententiam repetit Dominus in euangelio, cum ait, Si crederetis Mosi, crederetis etiam mihi, de me enim ille scripsit.

Facere uoluntatem tuam Deus meus uolui ] Id est, me summopere delectat, tuæ uoluntati obsequi, illamq; cæteris omnibus rebus antepono.

Annuntiaui iustitiam tuam ] Quæ sit hæc iustitia Dei, quam IESVS CHRISTVS prædicauit, diuus Paulus in epistola, quam scribit ad Romanos, docet his memorabilibus uerbis. Nunc autem sine lege iustitia Dei manifestata est, quæ comprobatur testimonio legis, & prophetarum, iustitia autem Dei per fidem IESV CHRISTI in omnes, & super omnes, qui credunt in eum: non enim est distinctio: omnes enim peccauerunt, & egent gloria Dei: iustificantur autem gratis per gratiam ipsius, per redemptionem, quæ est in CHRISTO IESV, quem proposuit Deus propitiatorem per fidem, interueniente sanguine ipsius, ad ostensionem iustitiæ suæ per remissionem præteritorum delictorum, quæ Deus tolerauit ad ostendendam iustitiam suam in hoc tempore, ut sit ipse iustus, & iustificans eum, qui est ex fide IESV CHRISTI.

Veritatem tuam ] Promiserat Deus multis.

# EXPLANATIO

ante seculis, se demissurum è cœlo unigenam filium suum, qui à tenebris, & potestate Diaboli mortales miseros ad beatissimam regni sui lucem, & libertatem traduceret. At CHRISTVS se uenisse ad hoc præstantissimum munus exequendum, & uerbis, & factis mirabilibus testificatus est. quæ cum ageret, ueritatem Dei optime, & honorificentissime prædicabat, illum in persoluendis promissis fidelissimum esse demonstrans.

Non abscondi misericordiam tuam. De infinita misericordia Dei aduersus humanum genus exat hoc clarissimum elogium CHRISTI in euangelio Ioannis. Sicut (inquit) Moses exaltauit serpētem in deserto, ita exaltari oportet filium hominis, ut omnis, qui credit in ipsum, non pereat, sed habeat uitam æternam: sic enim Deus dilexit mundum, ut filium suum unigenitum daret, ut omnis, qui credit in eum, non pereat, sed habeat uitam æternam: non enim misit Deus filium suū in mundum, ut condemnaret mundū, sed ut saluetur mundus per ipsum. Qui credit in eum, non condēnatur: qui autem non credit, iam condemnatus est, quia non credidit in nomen unigeniti filij Dei. Poterat ne misericordia Dei illustrioribus uerbis, & sententijs prædicari?

Tu autem Domine. Nunc exponit, quibus precibus salutem suam Deo commendauerit, cum sibi mors acerbissima immineret: solet enim uir sanctus aliquando sic orationem disponere, ut actionem gratiarum præponat, eiq; subijciat expositionem periculorum, quibus ipsum Deus liberarat: ut minime

mirum sit, illum hunc eundem ordinem seruare, dum loquitur sub persona IESV CHRISTI.

Comprehenderunt me iniquitates meae ] Delicta, & scelera generis humani innocentissimus Dominus & clementissimus appellat sua; ipse enim ille est, quem diuus Petrus ait peccata nostra pertulisse in corpore suo super lignum, ut peccatis mortui iustitiae uiueremus. Et Esaias, omnes (inquit) quasi oves errauimus; unusquisque in uia sua declinauit, & Dominus posuit in eo iniquitates omnium nostrum; nimirum ut quae supplicia nos pro illis comerebamur, ea supplicia ipse acerbissima nece persolueret, itaque delicta illum nostra comprehenderunt, & a patre postestati impiorum traditus pro nobis factus est execratio, ut nos ab execratione legis liberaret, execrabilis enim quisquis in patibulo pender.

Et non potui uidere ] Id est, tam multa sunt peccata, ut illa omnia cernere non possim.

Pro retributione confusionis suae ] Hoc est, ut poenas sustineant ignominiae, qua me afficere conati sunt.

# ARGVMENTVM PSAL. XLI.

Commendat eos, qui afflictos, & calamitosos miserantur: queritur de ijs, qui latitia exultauerant, cum ipse grauius aeger, ac propè depositus iaceret.

Victori, Psalmus XLI.

Beatus, qui intelligit super pauperem, in die ma

la liberabit eum Dominus .

Dominus conseruabit eum , & uiuificabit eum ,  
& beatum faciet eum in terra , & non tradet eum  
in animam inimicorum eius .

Dominus opem feret illi in lecto doloris eius , uni=  
uersum stratum eius uersasti in infirmitate eius .

Ego dixi , Domine miserere mei , sana animam  
meam , quia peccaui tibi .

Inimici mei dixerunt mala mihi , quando morie=  
tur , & peribit nomen eius .

Et si ingrediebatur , ut uideret , uana loquebatur  
cor eius , congregauit iniquitatem sibi .

Egrediebatur foras , & loquebatur simul .

Aduersum me susurrabant omnes inimici mei , ad  
uersum me cogitabant mala mihi .

Verbum iniquum diffusum est in isto , & qui de=  
cubuit , non adiciet , ut resurgat .

Etiam homo pacis meae , in quo sperabam , qui  
edebat panes meos , magnificauit contra me calca=  
neum .

Tu autem Domine , miserere mei , & resuscita  
me , & retribuam eis .

In hoc cognoui , quod uoluisti me , quoniam non  
gaudebit inimicus meus super me .

Me autem propter innocentiam adiuuisti , & col=  
locasti me in conspectu tuo in aeternum .

Benedictus Dominus Deus Israël a seculo , & us=  
que in seculum , fiat fiat .



## EXPLANATIO.

Beatus, qui intelligit super pauperem. ] Affirmat, beatum illum esse, qui miseretur afflictorum, & quibuscunque rebus potest, illos iuvat, misericordiam enim Deus misericordiam impartitur, sine qua nulla potest salus existere.

In die mala liberabit eum Dominus. ] Diem malam appellat tempus asperam, & calamitosum.

Et non tradet eum. ] Id est, neque patietur, ut in arbitrium, & potestatem inimicorum ueniat.

Vniuersum stratum eius. ] Tu. ( inquit ) Domine tuis manibus lectū eius uersabis, quo is suauis, ac mollius cubet. Significat autem hac elegantissima allegoria, cum uir pius, & misericors aliquo morbo laborarit, Deum illi omnia officia uel indulgentissimæ matris præstaturum, & quamuis aliam calamitatem magnis solatijs leuaturum.

Ego dixi. ] Narrat, se, cum grauitè, ac periculose agrotaret, & ab omnibus fere derelictus fuisset, ad Dei misericordiam confugisse.

Sana animam meam. ] Nimirum intelligebat Dauid, se uitio animi in morbum corporis incidisse: itaque conualecente illo non dubitabat, corpori quoque rectius futurum.

Et si ingrediebatur. ] Si quis eorum ( inquit ) per simulationem amicitie me inuiseret, id consequebatur, ut officio ficto, simulataq; sedulitate

# EXPLANATIO

scelus scelere cumularet, idemq; egressus domo ad socios fraudum, & insidiarum aduolabat.

Verbum iniquum ] Profecto, aiebant, iste aliquo inexpiabili scelere se contaminauit, quod Deus morte multare constituit. itaque fieri non potest, ut qui mortifero morbo oppressus iacet, refeētis uiribus surgat. Verbum autem in literis sanctis pro re, & facto appellari, notissimum est.

Magnificauit contra me calcaneum ] Id est, magnas mihi fecit insidias. calcaneus enim in literis sanctis saepe appellatur pro fraude, & dolo, quæ quidem translatio sumpta est ab ijs, qui in cursu aliquem supplantant.

In hoc cognoui ] Exultat lætitia, quod Deus audierit preces suas, neque permiserit, inimicos letari morte sua, qua quidem in re magnam Dei erga se beneuolentiam dicit agnoscere.

Et collocaſti me in conſpectu tuo in æternum ] Id est, nunquam oculos a me auertis, quem iuandum, tuendum, atque ornandum perpetuo suscepisti.

## ARGUMENTVM PSAL. XLII.

Exponit, in quanta sollicitudine, ac dolore esset, cum Hierosolymis eieētus a Saule neque templum augustissimum cum reliquis ciuibus celebrare, neque sacrificijs solemnibus interesse posset.

Victori, erudicens Canticum filiorum Coræ,  
Psal. XLII.

Quemadmodū desiderat ceruus ad fontes aquarum.

rum, ita desiderat anima mea ad te Deus.

Sitiuit anima mea ad Deum fortem, uiuum: quando ueniam, & apparebo ante faciem Dei?

Fuerunt mihi lacrimæ meæ panes die, ac nocte, dum dicitur mihi quotidie, ubi est Deus tuus?

Hæc recordatus sum, & effudi in me animam meam, quod transibo cum multitudine, adducens illos usque ad domum Dei

In uoce exultationis, & confessionis, multitudine tripudiante.

Quare tristis es anima mea, & quare conturbas me?

Spera in Deum, quoniam adhuc confitebor illi propter salutare uultus sui.

In me anima mea conturbata est, propterea memor ero tui de terra Iordanis, & Hermonij, & de monte Mizaar.

Abyssus abyssum aduocat in uoce cataractarum tuarum.

Omnes fluctus tui, atque procellæ tuæ super me transierunt.

In die mandabit Dominus misericordiam suam, & nocte canticum eius apud me,

Oratio Deo uitæ meæ, dicam Deo, rupes mea.

Quare oblitus es mei, & quare contristatus incedo, dum affligit me inimicus?

Quasi gladio concidunt ossa mea, dum exprobrat mihi inimici mei,

Dicentes mihi per singulos dies, ubi est Deus tuus?

Quare tristis es anima mea, & quare contur-

# EXPLANATIO

bas me ?

Spera in Deum , quoniam adhuc confitebor illi ,  
qui est salutare uultus mei , & Deus meus .

## EXPLANATIO.

Erudiens Canticum   Sic inscribitur psal-  
mus , quoniam docet, etiam cum nihil ad spem osten-  
ditur , sperandum tamen esse , & misericordiae Dei  
confidendum .

Dum dicitur mihi   Id est, dum mihi impij .  
insultant interrogantes , ubi nam sit Deus , cuius ego  
praesidio confido . Cum enim homines perditii uiderent  
Dauidem exulem , egentem , & magnis calamitati-  
bus oppressum , irridebant eius religionem , & pieta-  
tem aduersus Deum . id uero ad dolorem accidebat  
acerbissimum homini pio , qui nihil tam ualde expe-  
tebat , quam omnibus persuasum esse de bonitate , &  
providentia Dei , sed ingrauescente rerum aduersa-  
rum mole ita debilitatur , & frangitur aliquando  
piorum animus , ut etiam ipsi dicant sibi , ubi est Deus  
tuus ? quippe qui se derelictos esse atque abiectos ab  
illo suspicentur : asperrimum profecto certamen , in  
quo spes cum desperatione confligit , & omnino suc-  
cumberet , nisi ad promissiones Dei tenaciter adnitere-  
tur , id quod agebat uir sanctus , ut uerba sequentia  
testantur , cum homines impij fiduciam eius acerrime  
oppugnarent , atque illum penè cogerent de salu-  
te sua , & misericordia Dei desperare .

Hac recordatus sum   Cum essem (inquit)  
in his angoribus , spes rerum futurarum , quae pro-

missione Dei nititur, me consolata est, & animum doloris magnitudine contractum quodammodo effudit, ac dilatauit. hæc nempe recordabar, tempus fore, cum me ciues mei summa omnium uoluntate ab exilio reuocarent. tunc ego ab innumerabili gratulantium multitudine deducar ad augustissimum templum Dei, tunc omnia plausu, letitia, & faustis acclamationibus personabunt, tunc libentissimis omnibus regnum, & imperium obtinebo. Cum itaque scias o anima mea Deum tibi tanta bona promississe, cur nullum dolendi finem facis? cur me respirare nunquam finis?

Propter salutare uultus sui ] Id est, illi gratias agam de salute, quam mihi dabit respiciens uultu placido calamitates meas.

Propterea memor ] Cum (inquit) acerbitate doloris, & nimio moerore conficiar, reliqua est una consolatio, ut animum labentem, & propè iacentem suauissimi numinis tui recordatione sustentem in hac solitudine Iordanis, & Hermonij, & Mizzaari, quibus in locis ego uitam inopem, & uagam persequor.

Abyssus abyssum ] Id est, calamitas calamitatem urget, neque ullus est miseriarum finis. Est autem elegans allegoria, qua inducitur Deus excitis tonitruis, & ingenti tempestate Dauidem obruere infinita copia imbrium. Aquas autem in literis sanctis appellari pro calamitatibus, nemo est, qui nesciat.

In die mandauit ] Aliquando (inquit)

# EXPLANATIO

placabitur Deus, & illo iubente optatissima lux prosperitatum illucescet: interim manente hac horribili calamitatum nocte nunquam intermittam Deum meum colere, & uenerari, dulcissimum ipsius nomen, laudesq; dies, ac noctes in animo mihi atque ore uersabuntur.

## ARGUMENTVM PSAL. XLIII.

Habet idem argumentum hic psalmus, atque superior.

### Psalmus XLIII.

Iudica me Deus, & discerne causam meam de gente non sancta, ab homine iniquo, & dolo serue me.

Quia tu es Deus fortitudo mea? quare me repperisti? & quare tristis incedo, dum affligit me inimicus?

Emitte lucem tuam, & ueritatem tuam, ipsa me deducunt, & adducunt in montem sanctum tuum, & in tabernacula tua.

Et introibo ad altare Dei, ad Deum letitiae, & exultationis meae.

Confitebor tibi in cythara Deus, Deus meus, quare tristis es anima mea? & quare conturbas me?

Spera in Deum, quoniam adhuc confitebor illi, qui est salutare uultus mei, & Deus meus.

## EXPLANATIO.

Iudica me Deus ] Vir sanctus in periculum uitæ falsis criminibus uocatus à Saule, optat Deum disceptare causam suam.

Et discerne causam ] Quidam uertunt clarius ex Hebræo in hunc modum, & defende causam meam à gente non sancta.

Emitte lucem tuam ] Lucem, & ueritatem appellat fauorem, & auxilium hominibus pijs promissum à Deo, quibus rebus pelluntur tenebræ calamitatum, sed lux Dei splendidissima spiritus sanctus est, cuius sempiterna comes est ueritas. hanc lucem, & hanc ueritatem è cælo demittit Deus, ut filiis suis duces sint ad montem sanctum suum, atque ad illud templum immortale, ubi numen ipsius augustissimum perpetuis hymnis celebrant mentes beatæ. Nimirum nisi cœlestis hæc lux in hoc difficili, & periculoso uitæ cursu præluceat, & nobis iter ueræ pietatis ostendat, semper in maximis tenebris uersamur, & falsa pro ueris amplectentes longissime aberramus à uia, quæ ducit in cœlum.

## ARGVMENTVM PSAL. XLIIII.

Queritur gēs Dei se ab impijs cultoribus Deorum crudelissime uexari, neque tamen Deum sibi opitulari, qui maiores suos benignissime tutatus sit, ac illustris, & commemorandis beneficijs illos ornauerit, & precatur ab illo, ut tandem numen suum propitium ostendat.

Victori. filiorum Coræ Eruditio Psal. XLIIII.

Deus auribus nostris audiuimus, patres nostri annuntiauerunt nobis.

Opus, quod operatus es in diebus eorum, in diebus antiquis.

Manus tua gentes disperdidit, & plantasti eos, afflixisti populos, & expulisti eos.

Nec enim in gladio suo possederunt terram, & brachium eorum non saluauit eos,

Sed dextera tua, & brachium tuum, & illuminatio uultus tui, quoniam complacuisti in eis.

Tu es ipse Rex meus, & Deus meus, qui mandas salutes Iacob.

In te inimicos nostros uentilabimus cornu, & in nomine tuo conculcabitur insurgentes in nos.

Non enim in arcu meo sperabo, & gladius meus non saluabit me,

Saluasti enim nos de affligentibus nos, & odientes nos confudisti,

Deum laudabimus tota die, & nomini tuo confitebimur in seculum.

Nunc autem repulisti, & confudisti nos, & non egressus es cum exercitibus nostris.

Fecisti nos dare terga inimicis, & qui oderunt nos diripiebant sibi.

Dedisti nos tanquam oues escarum, & in gentibus dispersisti nos.

Vendidisti populum tuum sine diuitijs, & non multiplicasti



*multiplicasti in commutationibus eorum .*

*Posuisti nos opprobrium vicinis nostris , subsannationem , & derisum ips , qui sunt in circuitu nostro .*

*Posuisti nos in prouerbiū gentibus , commotionem capitis in populis .*

*Tota die uerecundia mea corā me est , & confusio faciei meae cooperuit me .*

*A uoce exprobrantis , & obloquentis , à facie inimici , & persequentis .*

*Hec omnia uenerunt super nos , & non oblitusumus te , & inique non agimus in testamento tuo .*

*Et non recessit retro cor nostrum , neque declinauerunt gressus nostri à semita tua .*

*Certe afflixisti nos in loco draconum , & operuisti nos umbra mortis .*

*Si oblitusumus nomē Dei nostri , et si expandimus manus nostras ad Deum alienum ,*

*Nōne Deus requireret ista ? ipse enim nouit abscondita cordis .*

*Quoniam propter te mortificamur tota die , aestimati sumus sicut oues occisionis .*

*Exurge , quare obdormis Domine ? & ne repellas in perpetuum .*

*Quare faciem tuam auertis ? obliuisceris afflictionis nostrae , & tribulationis nostrae ?*

*Quoniam humiliata est usque ad puluerē anima nostra , adhæsit terræ uenter noster .*

*Exurge Domine , adiuua nos , & redime nos propter misericordiam tuam .*

Explanatio.

Gentes disperdidit ) Id est ; Canaanicos, & cetera finitimas nationes.

Non enim in gladio suo ] Plenissima pietas est sententia ; qua docet , quicquid belli , domiq; feliciter administratur ; attribuendum misericordiae diuinae , non prudentiae , aut uiribus humanis .

Et illuminatio uultus tui ] Id est , tuus fauor illos illustrans .

Non enim in arcu ] In numine inquam tuo , non in armis , & uiribus nostris spem uictoriae ponimus , quoties enim seruati sumus in bello , & periculis , tuo tantum numine seruati sumus , quamobrem de tanta tua erga nos benignitate semper tibi gratias agemus ; & nomen tuum sempiternis laudibus prosequemur .

Dedisti nos tanquam ] Dedisti (inquit) nos hostibus tanquam pecudes caedi destinatas .

Vendidisti populū tuum ] Id est , tam paruo populum tuum uendidisti , ut nullas inde diuitias tibi compararis . Quod uero sequitur , & non multiplicasti in commutationibus eorum , uerbum illud multiplicasti referendum esse uidetur ad diuitias , ut sensus sit , illum non esse factum ditiores ob uenditionem populi . sed quidam reddiderunt ex hebraeo ad hunc modum , neque auxisti pretia eorum . hi cum Symmachi interpretatione consentiunt .

Posuisti nos in prouerbiū gentibus ] Ut scilicet , qui alicui mala precari uelit , nostram illi cae

laminatam precetur.

Commotionem capitis ] Id est, sumus apud  
impias nationes ioco, & derisui. simile est illud in  
psalmo XXII. distenderunt labia, & mouerunt  
caput.

Neque declinauerunt ] Id est, nulla tor-  
menta, nulla uis calamitatum potuit nos impellere ad  
uiolandas leges, & præcepta tua. Hunc locum uertit  
etiam diuus Hieronymus ad hunc modum.

In loco Draconum ] Dracones appellant ge-  
tes impias, & immanes, quibus seruebant.

Vmbra mortis ] Vmbra mortis uocant  
seruitutem acerbissimam, & tenebris mortis compa-  
randam.

Si obliti sumus ] Dixerant, se nulla ui ca-  
lamitatum potuisse cogi, ut deficerent ad Deos falsos,  
& commentitios. ad id confirmandum hæc subiun-  
gunt, si ( inquit ) abalienati fuissetus à Deo no-  
stro, non ne ipse, qui nouit intimos sensus animorū,  
hoc nostrum scelus animaduertisset? auderemus ne  
igitur apud illum mentiri, & falsa prædicatione ia-  
ctare innocentiam, & pietatem nostram erga ipsum?  
Sed quid opus est plura? Non ne quotidianæ cædes,  
& asperissima supplicia, quibus afficimur nominis tui  
causa, testantur, nos esse pietatis, & sanctæ religio-  
nis amantissimos?

Quoniam propter te ] Hoc uerbum, quo-  
niam, apud Hebræos sæpe habet uim ornandi tantum,  
aut asseuerandi, ut apud Latinos quidem, mehercu-  
le, profecto.

# EXPLANATIO

Quoniam humiliata est ] Id est, ad terrā  
abieci sumus pondere calamitatum, & ad miserrimam,  
atque infimam fortunam depressi.

## ARGUMENTVM PSAL. XLV.

Est carmen nuptiale, quo celebratur IESVS  
CHRISTVS uerus Deus, & uerus homo, &  
ecclesia ipsius sponsa.

Victori super Lilijs, filiorum Coræ erudiens canticum  
amorum, Psal. XLV.

Eruclauit cor meum uerbum bonum, dico ego  
opera mea regi.

Lingua mea calamus scribæ uelociter scribentis.

Speciosus forma præ filijs hominum, diffusa est  
gratia in labijs tuis, propterea benedixit te Deus in  
æternum.

Accingere gladio tuo super femur tuum potentis-  
sime,

Gloria tua, & splendore tuo, & cum splendore  
tuo prospere procede, equita

Super uerbum ueritatis, & mansuetudinis, &  
iustitiæ, & docebit te mirabilia dextera tua.

Sagittæ tuæ acutæ, populi sub te cadent, in cor-  
da inimicorum regis.

Sedes tua Deus in seculum seculi, uirga rectitudi-  
nis uirga regni tui.

Dilexisti iustitiam, & odisti iniquitatem, propte-  
rea unxit te Deus Deus tuus oleo lætitiæ præ con-

sortibus tuis .

Myrrha , & stacte , & casia ab omnibus uesti-  
mentis tuis , ex domibus eburneis , ex quibus latifica-  
uerunt te , filia regum inter honoratis tuas .

Astitit regina a dextris tuis in uestitu deaurato .

Audi filia , & uide , & inclina aurem tuam , &  
obliuiscere populum tuum , & domum patris tui ,

Et concupiscet rex decorem tuum , quoniam ipse  
est Dominus tuus , & adorabis eum .

Et filia Tyri cum muneribus , uultum tuum de-  
precabuntur omnes diuites plebis .

Omnis gloria filia regis ab intus , ex intertexto  
auro uestimentum eius , in uestibus acu pictis

Adducetur regi , uirgines post eam , proxima eius  
adducentur ,

Adducentur in letitia , & exultatione , adducen-  
tur in templum regis .

Pro patribus tuis erunt tibi filij , cōstitues eos prin-  
cipes super omnem terram .

Memor ero nominis tui Domine in omni genera-  
tione & generationem .

Propterea populi confitebuntur tibi in aeternum ,  
& in seculum seculi .

#### EXPLANATIO .

Super Lilijs ] Vocabulum Hebræum sine  
dubio significat Lilium , neque in aliam sententiam id  
acceperunt Aquila , & Theodotio interpretes luculen-  
ti in primis , sed plerique Hebræorum suspicantur ,  
hoc in loco significari eo nomine instrumentum musice

## E X P L A N A T I O

cum, ad quod sacerdotes huius hymni uerba modulantur. mihi uero Liliorum inscriptio uidetur ad materiam carminis aptissime conuenire, quo carmine Christi, & ecclesie nuptiæ celebrantur. Quis autem studiosus literarum diuinarum nescit, hunc sponsum de se dicere in Canticis, Ego flos campi, & Liliū conuallium: & de sua sponsa, Sicut liliū inter spinas, sic amica mea inter filias? Quin etiam ipsa sponsa in eodem libro loquens de hominibus pijs, ex quibus corpus suum constituitur, ait dilectum suum inter Lilia pasci.

Eruēt aut cor meum. ] Animus (inquit) meus suauissimis epulis spiritus sancti saturatus eruat carmen bonum, & hos ego uersus addēdus, & laudem sempiterni regis canto.

Lingua mea calamus. ] Ut enim calamus ed mouetur, quod manus scriptoris illum ducit, sic linguam Davidis spiritus sanctus mouebat, & moderabatur.

Speciosus forma præ filiis hominū. ] Quid enim tam pulchrum, tam elegans, tam uel formosum, quam IESVS CHRISTVS Opt. max? qui ab omni labe, & macula peccati purissimus fuit, & omnibus uirtutum numeris absolutissimus. Quæ species tam amabilis, tam suauis, & iucunda, quam huius mansuetissimi regis aspectus? qui neminem poenitentem, quamuis improbum, & impium, aspernatur, atque adeo omnes laborantes, & afflictos in suum sinum ultro uocat dulcissimis uerbis eos ad hunc modum appellans. Confugite ad me omnes, qui la-

boratis, & grauati estis, & ego reficiam, & recreabo uos.

Diffusa est gratia in labijs tuis ] Id est, tū grata, tam suauis, & plena auctoritatis est oratio tua, ut omnis persuadendi uis labris tuis insedisse uideatur. Itaque nonnulli in euangelio Ioannis hanc loquendi diuinitatem admirantes asseuerant, neminem ex omnibus mortalibus unquam ita locutum esse, ut IESVM CHRISTVM.

Accingere gladio tuo ] CHRISTI gladius est uis illa spiritus, & uerborum efficacissima, & penetrabilior omni gladio ancipiti, ut inquit diuus Paulus. qua quidem ut, & gladio ille usus, crudelissima tyrannide hostis sempiterni humanum genus liberauit, & sub potestatem, ac ditionem suam omnes nationes, terrasq; subiunxit. Eum gladium appellat gloriam, & splendorem CHRISTI, propterea quod is ea re sibi decus, & imperium comparauit.

Equita super uerbum ] Tu(inquit) tanquā equo uectus euangelio totum orbem terrarum peragrabis, dextera diuinitatis tuæ commemoranda, & inaudita facinora edens. Est autem animaduersione dignissimum, quod euangelium uates sanctus appellat uerbum ueritatis, & mansuetudinis, & iustitiæ: quibus nominibus illius uis, & proprietates ita describitur, ut nihil ad eam explicandam excogitari possit magis accommodatum: si quidem euangelio traditur uera cognitio Dei, rerumq; diuinarum, & poenitentibus omnium peccatorum condonatio promittitur, & iustitia Dei patefit, ut inquit diuus Paulus. quaz

# EXPLANATIO

lis autem sit hæc iustitia Dei, & quibus impertiatur, quo' ue modo, dictum est in explanatione psal. XL.

Sagittæ tuæ ] Id est, sagittis euangelij, & charitatis feries animos mortalium, qui te oderunt, & illorum innatam impietatem interficies, atque omnes gentes ad terram se se abijcentes numen tuum suppliciter uenerabuntur. Sed sagittæ significant etiam poenas, & supplicia, quibus plectitur eorum pertinacia, qui salutare imperium CHRISTI repudiant: Euangelium enim alijs est odor mortis ad mortem, alijs odor uitæ ad uitã, ut inquit diuus Paulus.

Sedes tua Deus ] Pronuntiat, imperium CHRISTI sempiternum fore, propterea quod ille & Deus sit, & summa iustitia, & æquitate regnum administret.

Propterea unxit ] Te ð CHRISTE Deus, Deus tuus unxit Spiritu sancto uberrimo fonte lætitiæ, unxit autem hoc oleo pretiosissimo. longe uberius te, quàm cæteros filios suos, qui sunt consortes, & coheredes tui: ijs enim spiritus sancti uis finitè communicatur, in te uero copiosissime, largissimèq; effusa totum tota repleuit. Sed paulo fusius hæc explicanda sunt, quo facilius intelligantur. Deus instituerat apud Hebræos, ut qui regis honore, ac nomine afficerentur, aut sacerdotium inirent, oleo sacro ungerentur, de cuius compositione mentio fit in eo libro, qui inscribitur Leuiticus. itaque cum is IESVM illius gentis, cæterarumq; nationum & regem, & pontificem constitueret, antiquo more ipsum oleo perunxit, non illo quidem manu, atque opere



hominum factō, sed eo, cuius efficacitate, ac ui crea-  
ta, & effecta sunt omnia; nempe Spiritu sancto.  
Hoc cœleste oleum ē CHRISTO defluens in  
uniuersa ipsius membra, id est; in omnes, qui non fi-  
ete, sed uere Christiani sunt; eos quoque reges, sa-  
cerdotesq; constituit. sed inter hanc nostram, &  
CHRISTI unctionem plurimum interest: hic  
enim spiritum accepit nulla mensura, ut inquit Ioan-  
nes Baptista, nobis eius accipiendi certus definitus est  
modus, isq; pro eo quantum metitur unicuique libe-  
ralitas CHRISTI; ex quo tanquam ex fonte  
plenissimo ad nos omnia bona permanent. Ex his,  
quæ breuiter attigimus, satis perspicuū esse uidetur,  
quare uates sanctus cecinerit, CHRISTVM  
oleo lætitiæ delibutum esse uberius quàm consortes  
suos.

Mirrha & stacte ] Vestimenta Christi  
sunt anima, & corpus, quibus eius diuinitas induta  
est, quæ diuus quoque Paulus in epistola ad Hebræos  
scripta nominat uelamen: unguenta suauissima sunt  
excellentiſsimæ uirtutes, quæ diuinum afflant odorem  
ex ea natura, quam ille assumpsit.

Ex domibus eburneis ] Aedes eburneæ, id  
est, ornatissimæ, ac magnificentiſsimæ, sunt mentes  
piorum, quas incolit Christus, ut ait diuus Paulus  
in epistola ad Ephesios scripta. Harum mentium puri-  
tate mirandum in modum p̄ Christum exhilarant  
gaudentem uirtutibus, & religione suorum.

Filiæ regum inter honoratas tuas ] Etiam  
filie principum, & regum ( inquit ) se tibi in serui-

# EXPLANATIO

tutem pie, sancteq; dicabunt.

Adstitit regina à dextris tuis ] Hactenus sponsum laudibus celebravit, nunc ipsam sponsam elegantissime describit; id est, ecclesiam sanctā, quā dicit assidere sponso: id quod etiam diuus Paulus affirmat his uerbis, Deus, qui diues est in misericordia, propter multam charitatem suam, qua dilexit nos, etiam cum mortui essemus per delicta, conuiuificauit nos una cum CHRISTO (per gratiam seruati estis) simulq; cum eo resuscitauit, & simul cum eo sedere fecit in cœlestibus in CHRISTO IESU.

Obluiscere populum tuum ] Monet sponsam, si uelit amore sui sponsum incendere, necesse esse, ut ipsa in illum omnem amorem suum transfundat, atque omnia obliuiscatur, quæ antea charissima habebat. Hæc est illa præstantissima animi affectio, hominis Christiani maxime propria, quam nostri abnegationem sui, & mortificationem carnis usurpare, atque appellare solent. de ea sponsus ipse, & ipsius discipuli præclarissima, & uere diuina præcepta nobis reliquerunt.

Filia Tyri ] Significat, nationes, quæ falsos Deos colebant, dona ecclesiæ sanctæ allaturas, & primarios uiros illam suppliciter ueneraturos.

Omnis gloria ] Ne quis existimaret, decorem, & ornatum reginæ constare ex rebus externis, & ijs, quæ oculis cermuntur, dicit, omnem pulchritudinem, omniaq; eius ornamenta constituta esse in animo illius, ut intelligamus, & aurum, & uestes elegantissimas nihil aliud esse quàm præclaras

abnegationem  
sui

Et diuinas Ecclesiæ uirtutes.

Virgines post eam ] Virgines ( inquit ) eam deducunt , & proxima eius , id est , quæ moribus , & pietate coniunctiores illi sunt , adiucentur ad te. uirgines autem nominari intelligo non solum fœminas uiri expertes , atque intactas , sed promiscue omnes , qui animos gerunt incorrupta doctrinæ , & morum integritate præstantes . in quam sententiam diuinus quoque Paulus accipit hoc nomen uirginitatis , cum scribens ad Corinthios ait , despondi uos uni uiro uirginem castam exhibere Christo .

Pro patribus tuis ] Monuerat ecclesiam , ut obliuisceretur domum paternam : nunc eam consolatur promittens , loco parentum nascituros ipsi filios , qui potiantur imperio orbis terrarum. ij filij fuerunt Apostoli , & qui ab eorum disciplina profecti omnes nationes religione sancta imbuerunt , & illas dicto obediens habuerunt .

Memor ero ] Inducit Ecclesiam gratias agentem sponso suo , qui eam tantis beneficijs affecterit .

# ARGVMENTVM PSAL. XLVI.

Superiore hymno prædixerat coniunctionem ecclesiæ cum CHRISTO : at hoc exponit , quot bella , quotq; oppugnationes sit illa perpassura , maxime primis temporibus : quam ob causam inscriptus esse uidetur ipse hymnus , pro iuueniculis . Describit item magnifica oratione , quanta sit fortitudo , fidu-

# EXPLANATIO

cia, & securitas piorum ob tutelam Dei. Inducit autem ipsam Ecclesiam loquentem.

Victori, filiorum Coræ, pro iuuenclis

Psal. XLVI.

Deus noster refugium, & uirtus, adiutor in tribulationibus, quæ inuenerunt nos nimis.

Propterea non timebimus, dum turbabitur terra, & transferentur montes in cor maris.

Sonuerunt, & intumuerunt aquæ eius, concussi sunt montes in fortitudine eius.

Fluminis riuuli lætificant ciuitatem Dei, sacrarium habitaculorum altissimi.

Deus in medio eius, non commouebitur, adiuuabit eam Deus mane, diluculo.

Conturbatæ sunt gentes, & inclinata sunt regna, dedit uocem suam, & mota est terra.

Dominus exercituum nobiscum, adiutor noster Deus Iacob.

Venite, & uidete opera Domini, qui posuit prodigia super terram auferens bella usque ad finem terræ.

Arcum conteret, & confringet arma, & scuta comburet igni.

Vacate, & uidete, quid ego sum Deus, exaltabor in gentibus, & exaltabor in terra.

Dominus exercituum nobiscum, adiutor noster Deus Iacob.

## EXPLANATIO.

Pro iuuentulis ] Cur existimem, ita inscriptum esse hunc hymnum, supra dixi, sed multi suspicantur, uocabulo hebræo, quod est Alamoth, hoc in loco significari instrumentum musicum, ad quod huius hymni uersiculi canerentur.

Propterea non timebimus ] Nos ( inquit ) freti presidio summi Dei animo quieto, & tranquillo erimus, etiam si horrificis terræ motibus orbis terrarum conquassetur, & præcipitent montes in medium mare.

Sonuerunt, & intumuerunt ] Tanta ( inquit ) hostium uis concitata est contra gentem Dei, ut tempestuoso mari, & undarum impetu montes concutienti comparari queat: sed nihil minæ, nihil impetus ingruentium malorum obfuit ciuitati, & sacrario Dei, id est, ecclesiæ piorum, in qua ueri Dei cultus uiget: quam etiam ob causam cœlestis fauor, & spiritus sancti gratia illam tutam, & incolumem reddit, ac perpetuis gaudijs exhilarat. fontes autem & flumina in literis sanctis appellari pro affluenti gratia spiritus sancti, nemo illarum studiosus est, qui nesciat.

Conturbatae sunt gentes ] Omnes nationes, & omnia regna trepidauerunt, & tandem ultro succubuerunt, cum uox euangelij insonuisset, & miraculorum fulgura coruscarent.

Venite, & uidete ] Considerate ( inquit ) quàm commemoranda, & omnem naturæ uim lon-

ge superantia facinora ediderit Deus, dum homines rudes, & idiota superant philosophos, pauci numero nationes uniuersas, homines infima fortuna summorum principum potentiam, mortales Diabolum, & eius satellites immortales.

Auferens bella usque ad finem terræ ] De hac cœlesti, & dulcissima pace, quam terris attulit CHRISTVS, Esaias quoque similia uaticinatur: sed qualis ea pax sit, pijs soli ex omnibus hominibus intelligunt, eaq; fruuntur etiam tum, cum omni scelere, ac crudelitate uexantur ab impijs. eam significabat magna illa tranquillitas pacis, & otij, quæ omnibus ferè gentibus data est, dum CHRISTVS uersabatur in terris.

Vacate, & uidete ] Desinite (inquit CHRISTVS) iam oppugnare gentem meam, & animo sedato cognoscite, me esse uerum Deum: id enim uel cæcis apparere potest ex innumerabilibus miraculis, quæ ui euangelij, & nominis mei passim eduntur. Sed sententia diuina huius uersiculi semper suam uim habet: est enim necesse, nos ab omnibus nostris operibus quiescere, & sapientiam hominum pro summa stultitia putare, ut spiritus Dei regnet, atque omnia administret in nobis. quo quisque magis hoc modo quiescit, & cessat, eo clarius uidet, IESVM CHRISTVM uim salutarem, & præpotentem, atque adeo ipsam Dei sapientiam existere, quem Iudæi, & Græci tanquam rem maxime imbecillam, & stultam pro nihilo ducunt: Græcos autem & Iudæos cum dico, eos intelligi uolo, qui stul-

tis opinionibus inflati sapientiam ueram, ueramq; iustitiam humano labore, atque industria comparari posse confidunt.

Exaltabor in gentibus ] Notissima ( inquit ) est potentia, & maiestas mea in coelo, sed iam nota erit etiam in terris, & omnes nationes abiecta superstitione ueram, & sanctam religionem amplectentur.

Domínus exercituum ] His uocibus CHRISTI confirmata ecclesia piorum exultat gaudio, ac repetit uersiculum superius cantatum.

Illud tamen scire oportet, non improbandos esse, qui existimant, his uersibus etiam insignem aliquam uictoriam celebrari, quam ciuitas Hierosolymitana consecuta fuerat. & quia non sine prodigijs res gesta memoratur, uerisimile est, hunc hymnum fuisse compositum, cum Deus eam urbem obsidione liberauisset Assyriorum, regnante Ezechia, maximis copijs una nocte ad internecionem cæsis. post eã uictoriam pax omnibus finibus terræ iudææ data est, ut scriptum est in libro Paralip. propterea gloriatur populus, Deum abstulisse bellum usque ad fines terræ. Urbem uero Hierosolyma, appellat sacrarium Dei propter augustissimum templum, in quod gens Hebræa ex omnibus locis ad statas, solemnesq; ceremonias conueeniebat.

#### ARGUMENTVM PSAL. XLVII.

Superiore Psalmo descripserat tumultus, & bella concitata contra Ecclesiam CHRISTI, hoc

# EXPLANATIO

autem inducit ipsam Ecclesiam letitia exultantem ob  
uictoriam adeptam, & religionem ueram toto terra-  
rum orbe propagatam. Est autem chorus Apostolo-  
rum, qui omnes nationes hortatur ad plausum, &  
gratias agendas Deo, cuius misericordia repudiane-  
runt superstitionem, & religioni sanctæ, & inuiola-  
tæ adhaeserunt.

Victori, filiorum Coræ Psal. XLVII.

Omnes gentes plaudite manibus, iubilate Deo in  
uoce exultationis.

Quoniam Dominus excelsus, terribilis, & rex  
magnus super omnem terram.

Subiecit populos nobis, & gentes sub pedibus no-  
stris.

Elegit nobis hereditatem nostram, pulchritudinem  
Iacob, quem dilexit.

Ascendit Deus in iubilo, Dominus in uoce tubæ.  
Psallite Deo nostro, psallite, psallite regi nostro,  
psallite.

Quoniam rex omnis terræ Deus, psallite sa-  
pienter.

Regnavit Deus super gentes, Deus sedet super se-  
dem sanctam suam.

Principes populorum congregati sunt cum Deo  
Abraham, quoniam Deo adhaeserunt scuta terræ, ue-  
hementer eleuatus est.

Explicatio.



## EXPLANATIO.

Et rex magnus ] Plausu inquam letitiam  
uestram declarate, quoniam CHRISTVS im-  
perio omnium terrarum potitus est, & apud omnes  
mortales diuinitatem, & potentiam suam declarauit.

Subiecit populos ] Subiecit nostræ potestati,  
ac religioni sanctæ nationes, quæ falsis Dijs ser-  
uiebant, & selegit, ac nobis pro hereditate assigna-  
uit quicquid speciosum, & excellens erat in familia  
Iacob, quem perpetuo dilexit.

Ascendit Deus ] Celebrat ascensum Domini  
in coelum, quoniam ex ea re tanquam ex uberri-  
mo fonte dona Spiritus sancti in animos hominum  
profluxerunt, & Apostoli uim illam, & robur in-  
credibile consecuti sunt, quo omnia superarunt.  
Quod uero dicit, Dominum ascendisse in iubilo, &  
in uoce tubæ, uidetur innuere gratulationem illam  
coelitem cum letitia clamantium, Dominus fortis,  
& potens in pralio. quæ quidem uerba sunt tãquam  
militum gratulantium, & triumphum sui ducis cla-  
moribus faustis prosequentium.

Psallete sapienter ] Id est, non lingua tan-  
tum, sed etiam animo; considerantes scilicet, quàm  
sint admirabilia CHRISTI facta, quæ carmi-  
nibus uestris celebratis.

Regnauit Deus ] Imperabat quidem antea  
Deus omnibus gentibus, sed inuitis, ac rebellibus, nunc  
autem uolentibus, ac libentibus illis dominatur.

Principes populorum ] Id est principes o-

mnium nationum relicto cultu falsorum Deorum se  
se cum uero Deo coniunxerunt; atque ita una ex Iu-  
daeis, & ceteris gentibus ecclesia conflata est; nam  
Deo adhaerunt scuta terrae; id est reges, ac guber-  
natores ciuitatum; quos etiam Oseas appellat clypeos,  
propterea quod populi eorum uirtuti; ac tutela com-  
mendati sunt.

Vehementer eleuatus est. Concludunt hy-  
mnium exclamatione plena letitiae; gratulantes cul-  
tum, & uenerationem ueri Dei in omnes terrarum  
fines propagata esse.

ARGVMENTVM PSAL.

XLV. Id est: 2. mod. 3. 1. 1. 1.

Ciuitas sancta gratias agit Deo propter uictoriam  
adeptam, & commemorat, quam tuti, & beati sint;  
qui se illius fidei, ac tutela commiserunt. quae autem  
continentur hoc psalmo, non tam conueniunt Hiero-  
solyms quam ecclesiae sanctae, cuius imaginem illa ci-  
uitas gerebat.

Psalmus Cantici filiorum Corae XLVIII.

Magnus Dominus; & laudabilis nimis in ciuitate  
Dei nostri; in monte sancto eius.

Pulcher locus, gaudium uniuersae terrae est mons  
Sion, latera aquilonis; ciuitas regis magni.

Deus in domibus eius cognitus est esse tutum re-  
fugium.

Quoniam ecce reges congregati sunt; transie-

runt simul.

Ipsi uiderunt, sic admirati sunt, conturbati sunt,  
in fugā præcípites dati sunt, tremor apprehendit eos.  
Ibi dolores ut parturientis, uento orientali contri-  
uisti naues Tharsis.

Sicut audiuiimus, sic uidimus in ciuitate Domini  
exercituum, in ciuitate Dei nostri, Deus fundauit  
eam in æternum.

Expectauimus Deus misericordiam tuam in me-  
dio templi tui.

Secundum nomen tuum Deus, sic & laus tua us-  
que ad fines terræ, iustitia plena est dextera tua.

Letetur mons Sion, & exultent filię Iudæ propter  
iudicia tua Domine.

Circundate Sion, & circumite eam, numerate  
turres eius.

Ponite corda uestra ad moenia eius, & exaltate  
palatia eius, ut enarretis in progenie altera.

Quoniam hic Deus Deus noster in æternum, &  
in seculum seculi, ipse reget nos usque ad mortem.

#### EXPLANATIO.

Et laudabilis   Laudibus (inquit) efferendus  
est Deus præcipue in urbe nostra ob summa, & com-  
memoranda beneficia, quibus nos quotidie ornat.

Pulcher locus, gaudium   Montem Sionē,  
& urbē Hierosolyma appellat uaticinando gaudium  
uniuersæ terræ, quoniam uera cognitio Dei, uerāq;  
religio ex ijs locis manarūt in omnes terrarum oras.  
quæ quidem res & salutem, & lætitiā mortalibus

# EXPLANATIO

attulit immortalē. Sionem uero appellat latera aquilonis, propterea quod is mons situs est in aquilonali urbis parte, ut etiam meminit Esaias.

Transierunt simul □ Venerant (inquit) multi principes ad obsidendam ciuitatem nostram, sed ad internecionem cæsi profligatiq; sunt. Sæpe autem legimus in libris Regum, & Paralip. reges coniuratione facta Iudeis bellum intulisse, & temeritatis suæ poenas grauissimas dedisse. Sed tamen hoc hymno ea uictoria celebrari uidetur, quam reportauit Iosaphat à Moabitis, & Ammonitis, & Syris, ac etiam gentibus transmarinis.

Ipsi uiderunt □ Viderunt (inquit) hostes, & senserunt suo maximo malo, Deum propugnare pro ciuitate sua.

Vento orientali □ Hanc esse allegoriam facientur etiam Hebræi, quæ significat, hostes uinumini ita disiectos, & fractos fuisse, ut naues impetu uentorum dissipari ac deprimi solent. Hac eadem allegoria nauis fractæ usus est Ezechiel, cum describeret excisionē Tyri. naues autem Tharsis appellat nauigia Cilicum, si fides est adhibenda Iosepho. Eas naues fuisse maximas significat etiam Ezechiel.

Sicut audiuiimus □ Audieramus (inquit populus sanctus) Deum custodem esse & defensorem ciuitatis nostræ: id uerum esse, nosmet ipsi uidimus, & re ipsa experti sumus.

Deus fundauit eam □ Et hoc, & quedam alia, quæ continentur hoc hymno, falsa essent, nisi referrentur ad nostra Hierosolyma, id est ad ecclesiā

piorum, nā urbs illa Iudaorū iam pridem eversa est.

Expectauimus Deus ] Cum uersaremur in maximis periculis, confugiebamus ad tēplum tuū sanctissimum, opem tuā implorātes, & summa cū fiducia illam expectantes, neque nos expectatio nostra fefellit.

Secundum nomen tuū ] Quemadmodum nominis tui fama ad ultimas terrarum oras penetrauit, ita & laudes tuæ omnibus locis celebrabuntur, teq; iustissimum atque optimum esse cunctæ nationes prædicabunt.

Circundate Sion ] Contemplamini (inquit) diligenter urbis sanctæ mœnia, turres, domos, ceteraq; magnificentissima monumenta, quo possitis eius laudes memoriæ posterorum commendare.

Quoniam hic Deus ] Hic Deus erit Deus noster in perpetuum; nosq; ac nostra omnia usque gubernabit, ac tuebitur, dū uitæ istius usura fruemur.

#### ARGVMENTVM PSAL. XLIX.

Hortatur ad contēnendas opes, & honores, & iustitiam, ac pietatem colendam, ostendens, stultissimos, & miseros esse eos, qui cupiditati rerū caducarū seruiunt, contrāq; sapientes, ac beatos, qui rebus omnibus humanis cōtemptis cœlestia tantū bona cōsectantur.

Viētori, filiorum Coræ, Psal. XLIX.

Audite hæc omnes gentes, auribus percipite qui habitatis orbem,

Tam filij hominis, quā filij uiri, simul diues,

Et pauper.

Os meum loquetur sapientiam, & meditatio cordis mei prudentiam.

Inclinabo in parabolam aurem meam, aperiam in psalterio ænigma meum.

Cur timebo in die mala? iniquitas calcanei mei circundabit me?

Qui confidunt in potentia sua, & in multitudine diuitiarum suarum gloriantur,

Fratrem redimendo redimere non potest aliquis, neque dare Deo redemptionem eius,

Si quidem pretiosa est redemptio animæ illorum, ut aliquis scilicet uitet mortem, & uiuat adhuc in æternum,

Et non uideat sepulcrum, certe uident etiam sapientes mori, simul insipiens, & stultus pereunt,

Et relinquunt alienis diuitias suas, & intimum eorum domus sue in æternum.

Et tabernacula sua in progeniem & progeniem uocauerunt nominibus suis terras.

Et homo in honore non perdurabit, similis erit iumentis, quæ intereunt.

Hæc uia illorum stultitia est eorum, & posteri eorum iuxta os illorum current.

Sicut oues in inferno positi sunt, mors pascet eos.

Et dominabuntur eis iusti in matutino, & fortitudo eorum ueterascet, infernus erit domiciliū eorum.

At Deus redimet animam meam de manu inferi, quoniam suscipiet me.

Ne timueris, cum diues factus fuerit homo, &

cum multiplicata fuerit gloria domus eius.

Quoniam cum interibit, non sumet omnia, neque descendet cum eo gloria eius.

Quoniam animæ suæ benedixit in uita sua, et laudabunt te, cum benefeceris tibi,

Introibit usque ad progenies patrum suorum, et usque in æternum non uidebit lumen.

Homo cum in honore est, si non sit intelligens, similis erit iumentis, quæ intereunt.

## EXPLANATIO.

Audite hæc ] Reprehensus avaritiam, et cupiditatem honoris, et potentiae, uocat omnes mortales ad audiendam orationem suam, propterea quod nullum hominum genus est, quod his uitijs, et grauissimis animi perturbationibus non laboret.

Tam filij hominis, quam filij uiri ] Id est; tam obscuro, quam claro genere orti, nam ea uerba in hanc sententiam accipiunt Hebræi.

Inclinabo in parabolam ] Ego quoque attentis animo audiam, quæ sum expositurus, neque magis uos, quam me ipsum admonebo. sententias grauissimas huius carminis uocat consuetudine lingue hebrææ parabolæ, easdè uero appellat ænigmata, propterea quod cognitio earum rerum, quæ in ipsis continètur, capi non potest, neque approbari, nisi spiritu Dei mens illustrata sit.

Cur timebo ] Videtur hæc esse oratio hominis, qui secum cogitauerit de diuitijs comparandis, quique multis ante seculis animaduernerit ea, quæ po-

stea monuit sapientissime diuus Paulus his uerbis, Habentes alimenta, & quibus tegamur, his contenti simus, nam qui uolunt diuites fieri, incidunt in tentationem, & in laqueum, & desideria multa inutilia, & nocua, quæ mergunt homines in interitum, & perditionem, radix enim omnium malorum est auaritia, quam quidam appetentes errauerunt a fide, & inseruerunt se doloribus multis. Hac igitur cum animo suo considerans etiam sanctus uates, cur (inquit) pecuniæ causa uelim committere, ut mihi timendum sit, cum dies ille formidolosus aduenerit, quo die uniuersi mortales uocabuntur in iudicium totius uitæ rationem reddituri? Cur inquam ob diuitias coaceruandas animum scelere, & fraudibus implicem? Diem uero illum extremum ea ratione malum appellauit, qua ratione alius uates eundem uocat diem iræ, calamitatis, & miseriæ: talis enim erit ille improbis, & impijs, at ijs, qui iuste cum fide uixerunt, lætissimus, & faustus illucescet. Calcaneum uero appellari pro fraudibus, & dolis, alio loco explicatum est a nobis.

Qui confidunt ] Audiant ea, quæ dictum sum, ij, qui potentia, & magnitudine opum suarum confidunt, & gloriantur. nemo sferet, se uel infinita uel pecuniæ comparaturum sibi, aut suis huius uitæ perpetuitatem, cum præsertim uideat, etiam homines bonos, & sapientes mori. Quod uero dicit, pretiosam esse redemptionem animæ ipsorum, id significat, nulla ratione mortem euitari posse. si- milem loquendi modum animaduertimus in libro pri-



mo Regum; ait enim scriptor illius historiae, Oraculum Domini erat in diebus illis pretiosum, id est, Deus is temporibus oracula non eadebat.

[ Intimum eorum ] Deridet stultitiam, & arrogantiam diuitum, & potentum, sed oratio est praecisa, atque imperfecta, & ob eam rem obscura. Est autem sententia horum uerborum, in animis istorum uersatur haec cogitatio, adei illas magnificentissimas; quas aedificant, fore sempiternas una cum fama suorum nominum, sed profecto falluntur, nam simul cum ipsis & nomen, & tituli, & insana illa aedificia celeriter incribunt. Haec quidem uia, & ratio uiuendi plena est stultitiae, nihilo minus tamen potest fieri eorum ad has opiniones, & praecepta uitae suae cursum accommodant, opes, & honores ceteris quam omnibus rebus anteponentes.

[ Sicut oues ] Describit diuitum arrogantium miserabilem exitum, qui tandem à uita excedentes ad inferos deiciuntur, ubi sempiternis cruciatibus afficientur. At cum dies ille pulcherrimus illuxerit; quo die hominum corpora à somno mortis ad lucem alterius uitae excitabuntur, tunc dominabuntur diuitibus impijs pij, qui nunc ab illis acerbissime uexantur.

[ At Deus ] Significat tempus illud optatissimum, quo Deus ab inferis excitabit pios, ad uitam beatam, & immortalem.

[ Ne timueris ] Ne perturberis (inquit) animo, ne ue te conditionis tuae poeniteat, quisquis cum fide, ac pietate uitam colis, cum uideris improbum

# EXPLANATIO

aliquem diuitijs, & honoribus florentem, celeriter enim his inanibus honorum simulacris spoliabitur, & nudus, atque egens detrudetur ad inferos.

Quoniam animæ suæ ] Quia (inquit) suauiter, ac delicate uixit diues insipiens, nihil animo suo libidinibus, & insanis cupiditatibus ardentem negans, quin etiam ceteros ad eandem luxuriam, & intemperantiam adhortatus est, nam eiusmodi homines te commendare solent, si uoluptatibus seruias, & tibi (ut ipsi loquuntur) benefacias, quoniam inquam male sibi, ac ceteris consuluit diues stultus, propterea aggregabitur ad maiores suos, quorum stultitiam, & intemperantiam imitabatur in uita, & in tenebris inferorum una cum illis cruciabitur in perpetuum.

Homo cum in honore est ] Concluditur carmen saluberrima sententia, hominem scilicet, cui contingunt amplæ fortunæ sine prudentia, & pietate, perinde atque bestias extincto corpore omnibus bonis in perpetuum spoliari.

## ARGUMENTVM PSAL. L.

Prædicit, ritus, & ceremonias à Mose institutas repudiandas esse, & excellentiorem colendi Dei rationem introductum iri.

Psalmus Asaph. L.

Deus Deorum Dominus loquetur, & uocabit terram

A solis ortu usque ad occasum . Ex Sion perfecta  
pulchritudine Deus resplendet .

Veniet Deus noster , & non silebit .

Ignis in conspectu eius exardescet , & in circuitu  
eius tempestas ualida .

Aduocabit coelum de sursum , & terram , ut iu-  
dicet populum suum ,

Congregate mihi sanctos meos , qui fecerunt fœ-  
dus mecum super sacrificijs .

Et annuntiabunt cœli iustitiam eius , quoniam  
Deus iudex est .

Audi populus meus , & loquar Israel , & testifi-  
cabor tibi , Deus Deus tuus ego sum .

Non in sacrificijs tuis arguam te , holocausta au-  
tem tua in conspectu meo sunt semper .

Non accipiam de domo tua vitulos , neque de gre-  
gibus tuis hircos .

Quoniam meæ sunt omnes feræ sylvarum , &  
quadrupedes , quæ in mille montibus pascuntur .

Cognoui omnia uolatilia montium , & bestie cam-  
pestres mecum sunt .

Si esuriero , non dicam tibi , meus enim est orbis  
terræ , & plenitudo eius .

Nunquid manducabo carnes taurorum ? aut san-  
guinem hircorum potabo ?

Immola Deo sacrificium laudis , & redde altissi-  
mo uota tua .

Et inuoca me in die tribulationis , eruam te , &  
honorificabis me .

Peccatori autem dixit Deus , quare tu enarras iu-

## E X P L A N A T I O

stittas meas, & assumis testamentum meum per o-  
tuum?

Tu uero odisti disciplinam, & proiecisti sermo-  
nes meos retrorsum.

Si uidebas furem, currebas cum eo, & cum adul-  
teris portionem tuam ponebas.

Os tuum abundauit malitia, & lingua tua con-  
cinnabat dolos.

Sedens aduersus fratrem tuum loquebaris, & ad-  
uersus filium matris tue ponebas opprobrium, hæc  
fecisti, & tacui.

Existimasti inique, quod ero tui similis, arguam  
te, & statuam contra faciem tuam.

Intelligite hæc, qui obliuiscimini Deum, ne quan-  
do rapiat, & non sit, qui eripiat.

Sacrificans laudem honorificabit me, & ei, qui  
ordinat uiam, ostendam salutare Dei.

## E X P L A N A T I O.

Deus Deorum Dominus ] Id est iudicium,  
& principum, ut alio loco explicatum est: tamen si  
Dionysius in libro de diuinis nominibus ostendit, etiam  
Deos uocari mentes illas cœlestes ab omni concretionem  
materiæ segregatas, quos Angelos nostri uocabulo  
græco appellant, quod hæc mentes sint internuntie,  
atque interpretes Dei.

Loquetur, & uocabit terram ] Deus (in-  
quit) locuturus aduocabit testem ipsam terram. in-  
fra ait, cœlum quoque aduocatum iri. His autem lo-  
quendi modis uti solent scriptores sancti, cum decla-

rare uolunt magnitudinem rerum dicendarum . uel ait , Deum à solis ortu usque ad occasum terram aduocaturum , propterea quòd CHRISTVS ad omnes terrarum oras Apostolos suos misit , qui filios Dei dispersos , & dissipatos unum in locum congregarent .

Veniet Deus noster , & non silebit ] Deus (inquit) noster aderit , & nobiscum loquetur , ut nos à ceremonijs , & legibus antiquis traducat ad longe præstantiorem sui colendi rationem , sed caueat , ne eius consilia , & admonitiones repudietis : ignis enim in conspectu eius exardescet , & in circuitu eius tempestas ualida , id est , habebit in promptu grauissima supplicia , quibus rebelles , ac dicto non audientis afficiat . Hæc autem omnia , perinde ut prædicta sunt , ad uerbum euenerunt : uenit enim Deus assumpto corpore humano , & ex Sione splendidissimam diuinitatis suæ lucem emisit , qua cæcos animos mortalium illustrauit , sed cum impia gens illum docentem , & saluberrima præcepta edentem crudelissime interemisset , & discipulos eius non minore odio persequeretur , diuinæ iræ ignis exarsit , & horrida bellorum tempestas excitata est , quæ cæta urbis , & mœnia disturbauit , & gentem impiam ferro , fame , ac peste consumpsit , & reliquias omnium rerum egestate , atque exilio perpetuo multauit .

Congregate mihi ] Cogite (inquit Deus) cultores meos , qui ritus , & ceremonias à me olim pro rudi populo institutas religiose obseruant , cogite inquam illos , ut orationi meæ intersunt , & intelli-

gant, uenisse iam tempus, cum mihi non iam uitulos, aut hircos immolari, sed hostias sanctas, puras, & uiuentes afferri uelim.

Et annuntiabunt cœli ] Cum (inquit) allocutus fuerit Deus populum suum, orbis cœlestes, quos uoluit esse testes orationis suæ, prædicabunt, cum omnia summa cum iustitia decreuisse. sunt, qui cœlos hoc loco appellari existimēt pro cœlitibus ipsis, quos angelos appellamus.

Audi populus meus ] Iam Deum inducit loquentem, & sacrificia d' Mose instituta repudiandam.

Non in sacrificijs ] Non (inquit) hanc accusationem institui, ut te reprehenderem de sacrificijs neglectis; nam ea nunquam intermittis, sed nolo te in eiusmodi rebus pietatem constituere.

Cognoui omnia uolatilia ] Id est, in mea potestate sunt. est hæc forma loquendi Hebræa.

Si esuriero ] Repudiatis sacrificijs antiquis ritum, sacrificandi nouum, & christianæ religionis proprium introducit. Deum enim laudare, id est, eius infinitam bonitatem in omnibus rebus prædicare, ei semper gratias agere, & quicquid cogitamus, loquimur, agimus, ad eius gloriā dirigere, hoc est dignum sacrificium Christiano. itaque Paulus in epistola ad Hebræos scripta nos monet, ut per Christum immolemus hostiam laudis semper Deo.

Et redde altissimo uota tua ] Et solue (inquit) Deo, quæ uouisti. uouemus autem omnes, qui ueram pietatem profitemur, nos gloriā Dei re-

bus omnibus antelatueros, & sanctissimum eius nomen pie, sancteq; ueneratueros.

Et inuoca me ] Sacrifica (inquit) hoc modo, & Deo persolue, quod debes, & in rebus aduersis me presentem, & propitium senties.

Peccatori autem dixit Deus ] Quoniam dixerat supra, non in sacrificijs tuis arguam te, nunc exponit, quibus in rebus arguendi sint. Itaque damnat simulationem uirtutis, ac pietatis, eos uidelicet, qui Deum uerbis confitentur, factis negant, ut ait Apostolus, & quæ præcepta Dei semper in ore habent, ea minime obseruant.

Cum adulteris portionem tuam ponebas ] Id est, cum ijs societatem coibas.

Hac fecisti, & tacui ] Cum tot, ac tanta scelera in te admitteres, ego dissimulabam, si qua forte resipisceres, at tu ad cætera scelera nefaria id etiam addidisti, quod lenitatem meam sic interpretatus es, quasi ego tui similis essem, & maleficis delictarer, sed profecto erras, nam arguam te, & poenam tibi ante oculos omnia scelera, quæ unquam edidisti.

Sacrificans laudem ] Iterum præcipit de sacrificio, quod ab omnibus pijs requirit, & pollicetur, uiam suam ordinanti, id est, uitæ cursu impie, sancteq; instituenti, se donaturum salutem Dei, id est, salutem certam, singularem, & diuinam: Hebræa enim lingua Deo attribuit, quicquid est maximum, & præstantissimum,

ARGVMENTVM PSALMI.

Hoc carmen deprecationem continet hominis peccata sua uere agnoscentis, & sibi illa remitti, ac condonari deprecantis. ea usus est Dauid, cum stuprum Bersabeæ, & marito eius mortem obtulisset, illumq; Nathan uir singulari sanctitate prædictus uerhementer accusasset, ac minaretur, Deum tam graui scelera nequaquam impunita, atque inulta relinquiturum.

Victori; Psalmus Dauid, cum uenit ad eum

Nathan propheta, postquam intrauerat ad Bersabeæ.

Psalm. LI.

Miserere mei Deus secundum magnam misericordiam tuam;

Et secundum multitudinem miserationum tuarum dele iniquitatem meam.

Multum laua me ab iniquitate mea, & a peccato meo munda me.

Quoniam iniquitatem meam ego cognosco, & peccatum meum contra me est semper.

Tibi soli peccaui, & malum coram te feci, ut iustificeris in sermonibus tuis, & uincas cum iudicaris.

Ecce enim in iniquitate conceptus sum, & in peccato concepit me mater mea.

Ecce ueritatem cordis dilexisti, & occulta sapientie tue



tia tua manifestasti mihi .

Asperges me Domine hyssopo , & mundabor , la-  
uabis me , & super niuem dealbabor .

Audire me facies gaudium , & lætitiā , & exul-  
tabunt ossa , quæ contriuiſti .

Auerte faciem tuam a peccatis meis , & omnes ini-  
quitates meas dele .

Cor mundum crea in me Deus , & spiritū rectum  
innoua in uisceribus meis .

Ne proicias me a facie tua , & spiritum sanctum  
tuum ne auferas a me .

Redde mihi lætitiā salutaris tui , & spiritu prin-  
cipali confirma me .

Docebo iniquos uias tuas , & impij ad te conuer-  
tentur .

Libera me de sanguinibus Deus Deus salutis meæ ,  
& exultabit lingua mea de iustitia tua .

Domine labia mea aperies , & os meum annun-  
tiabit laudem tuam .

Quoniam si uoluisses , sacrificium dedissem , utique  
holocaustis non delectaberis .

Sacrificium Deo spiritus contribulatus , cor contri-  
tum , & humiliatum Deus non despicies .

Benigne fac Domine in bona uoluntate tua Sion ,  
ut ædificentur muri Hierusalem .

Tunc acceptabis sacrificia iustitiæ , oblationes , &  
holocausta , tunc imponent super altare tuum ui-  
tulos .

## Explanatio.

Miserere mei Deus ] Maxima quidem, & gravissima sunt scelera; & flagitia mea; sed infinitis partibus maior est clementia tua: hac ego fretus veniam maleficijs meis suppliciter peto.

Et secundum ] Gravissime quidem peccat in Deum; seq; inexpiabili scelere obstringit, quisquis ob eam causam de salute desperat; quod peccata sua maiorem vim ad perdendum habere censeat, quam misericordiam Dei ad servandum: sed & ille culpis suis maximum cumulum adiungit; seq; reddit uenia prorsus indignum, qui tanta inflatus est arrogantia, ut sponte sua, id est, viribus proprijs animi labes, & maculas eluere se posse confidat. utrumque vitium vir sapientissimus euitat misericordiam Dei fidenter implorans, & ab illo turpitudinem scelerum suorum deleri postulans.

Quoniam iniquitatem ] Nullum locum prætermittit ad misericordiam excitandam: tria uero hæc potissimum requiruntur, primum ut impunitatem animi tui uere agnoscas; deinde ut illam ex animo detesteris, tum præterea ut spem omnem illius abstergenda in sola Dei misericordia ponas.

Tibi soli peccaui ] Peccauerat quidem in Vriam quoque fortissimum, & fidelissimum militem; sed cum animo suo cogitans, quantum hoc nefario scelere Deum offendisset, tanto animi dolore cruciabatur, ut hoc unum malum sentiret, & hoc unum quereretur, præsertim cum uerba hæc à viro sancto

dicta secum recordaretur, hæc dicit Dominus Deus Israel, Ego unxi te in regem Israel, & ego erui te de manu Saul, & dedi tibi domum Domini tui, & uxores Domini tui in sinum tuum, dediq; tibi domum Israel, & Iuda, & si parua sunt ista, adijciam tibi multo maiora, quare ergo contempsisti uerbum Domini, ut faceres malum in conspectu eius?

¶ *Vt iustificeris.* Confiteor Domine, me te terrimum, & maxime detestandum facinus fecisse, idq; libentissime confiteor, ut me peruulgante maleficia mea, teq; summa benignitate illa condonante clarissimus tue ueritatis splendor eluceat, tuamq; omnes prestantissimam in seruandis promissis fidem, constantiamq; perspiciant: promissisti autem, poenitenti omnia peccata uel grauissima te condonaturum. Quod nos iustitiam hoc loco interpretamur appellari pro ueritate, dictorumq; constantia, id uerum esse facile intelliget, qui epistolam diui Pauli ad Romanos scriptam legerit: in qua cum is uellet confirmare, Deum esse ueracem, & in faciendis promissis fidelissimum, contraq; omnes mortales esse uanos, & mendaces, hunc uersiculum in ea re testem citauit. sunt alie multe huius loci explanationes omnibus iam nota, & peruulgatae.

¶ *Ecce enim in iniquitate.* Ad commouendam misericordiam commemorat miseriam naturæ humanæ, quæ quidem Adami uitio ita deprauata fuit, ut eius corruptela in omnem posteritatem sic propagata. ex qua quidem re fit, ut in ipsa conceptione contrahamus labem, & procliuatatem incredi-

runt, quæ testabatur, ipsum omni sceleris contagio  
ne liberatum esse.

Et exultabunt ossa, quæ contrivisti ]

Cum primum spiritus Dei patefecit Dauidi turpitudi-  
nem peccati, quam prius ipso peccato obcæcatus non  
cernebat, is metu iudicii diuini ita percussus, atque  
exanimatus est, ut propter magnitudinem angoris vi-  
res animi, & corporis amitteret.

Auerte faciem tuam à peccatis meis. ]

Hoc  
fecisse Deum tunc scimus, cum spiritus ipsius ani-  
mum nostrum conscientia peccatorum exagitatum,  
iam quietum, & pacatum reddidit.

Cor mundum crea in me Deus ]

Id est,  
impartire mihi puritatem animi, & vim illam, per  
quam nihil nisi rectum, honestum, & sanctum ex-  
petitur. huius diuinæ affectionis eo magis efficimur  
participes, quo magis spiritus noster à spiritu sancto  
ad effigiem Dei renouatur. quæ quidem renouatio si  
absit, semper animus noster impurus, & contami-  
natus manet, tametsi aliquando hominibus, qui non  
possunt in sensus intimos alterius introspicere, purissi-  
mi, & integerrimi uidemur.

Ne proijcias me à facie tua ]

Abijcit Deus,  
quos spiritus sui lumine spoliât, excæcatisq; patitur  
à uia ueritatis aberrare, ac seruire cupiditatibus no-  
xijs nullo iam metu iudicii diuini à scelere, & male-  
ficio deterritos.

Redde mihi letitiam salutaris tui ]

Quam  
scilicet mihi solebat afferre spes certissima salutis tua  
liberalitate consequendæ.

# EXPLANATIO

Et spiritu principali ] Spiritum principalem appellare uidetur uim illam spiritus sancti, per quam animus noster cupiditatibus, & reliquis perturbationibus imperat, & liber rationem rectam, & praecepta Dei sequitur: quod si legas, spiritu munifico, uel, ut alij uerterunt ex Hebraeo, spiritu spontaneo, eadem tamen sententia manebit, si quidem uis illa spiritus sancti facit, ut animo prompto, alacri, & libero legibus diuinis obtemperemus.

Docebo iniquos uias tuas ] Vniuersae uiae Domini misericordia, & ueritas. quis igitur aptior ad docendas has uias, quam ille, qui usu ipso, & experientia didicit, quam Deus sit misericors, quam lenis, & facilis ad ignoscendum, & quam uerax, & fidelis in promissis persoluentis? Quis uero promptiore animo erranti uiam salutis ostendat, quam is, qui suo maximo dolore, & malo didicit, quam res misera, & miseranda sit, ab ea uia deerrare? Itaque uera poenitentia facit, ut non solum summa diligentia caueas, ne declines ipse de semita, quae ducit in coelum, sed etiam ut uehementer auideas, atque enitescere, ut omnes eadem ingrediantur uia.

Libera me de sanguinibus ] Sic appellat coedis scelus detestabile, quod commiserat Vria crudeliter trucidato.

Et exultabit ] Si haec tanta scelera expiaris, atque ex animo meo sordes istas foedissimas elucris, memoriam tanti beneficii nulla unquam delebit obliuio, nunquam lingua mea satiari poterit gratijs agendis, semper illa uersibus incunditatis, & laetitiae

plenis prædicabit infinitam bonitatem tuam, quæ tanta facilitate poenitentibus delicta condonat, afflictos, & iacentes erigit, cæcis lumen impartit, errantes deducit in viam.

Domine labia mea aperies ] Silebat enim conscius sceleris sui, ne & ipse hoc audiret à Deo, quare tu enarras iustitias meas, & assumis testamentum meum per os tuum? quin etiam cum dixisset, se prædicatorem iustitiæ diuinæ, ac doctorem pietatis futurum, iure, ac merito subiunxit hunc versiculum: quis enim digne possit hoc exequi, nisi Deus aperiat os locuturo, & uerba, & uim in dicendo suppediret?

Quoniam si uoluisses ] Hoc propterea dicere uidetur, quòd peccata illa maxima per leges Moysi non sacrificijs, sed morte luebantur. uel potius significat idem, quod diuus Paulus in epistola ad Hebræos scripta, sanguinem uidelicet taurorum, & hircorum non ablueret labes peccatorum, & scelerum.

Sacrificium Deo ] Spiritu contritum, & cor contritum, ac humiliatum uocat affectionem animi, qui propter agnitionem, & sensum acrem peccati fractus, afflictus, & prostratus, in sola Dei misericordia spem salutis collocet. Hanc animi affectionem affirmat esse sacrificium Deo acceptissimum, itaque IESVS CHRISTVS beatos uocat eos, qui lugent, propterea quòd Deus illos sit consolaturus.

Benigne fac Domine ]

Hoc precatur mea

tuens, ne maleficia principis noceant civitati.

Ve ædificentur muri Hierusalem ] Ego in  
eam opinionem facile adducor, ut credam, uatem  
sanctum non tam loqui de ædificatione moenium ur=  
bis, quàm de recta, & pia institutione ipsius ciuita=  
tis, quæ tunc firmissimis muris, & propugnaculis  
munitur contra impetum, & insidias Diaboli, cum  
fauente Deo doctores, & magistros habet eius doctri=  
næ, quæ continetur hoc psalmo, in quo de miseria, et  
ingenita corruptela hominis, de misericordia Dei, de  
uera poenitentia, & fructibus illius, deq; remissione  
peccatorum explicata, grauissimèq; differitur. Neque  
mirum alicui uideri debet, si uerbum ædificandi ad  
doctrinam, & institutionem significandam transla=  
tum sit, quandoquidem in hanc sententiam sæpissime  
id uerbum accipitur in literis sanctis.

Tunc acceptabis sacrificia iustitiæ ] Sacri=  
ficia inquam ab animo facta, qui ab omni iam scele=  
re expiatus, & purus sit: quæ nunc repudiare fa=  
cta ab homine adulterio, & cæde foedissima conta=  
minato. quin etiam sacrificia popularium meorum  
acceptissima tibi erunt tum, cum pie, ac recte insti=  
tuti didicerint uictimas immolandas esse, non ut illæ  
cruore suo eluant maculas delictorum, sed ut testen=  
tur, eas esse deletas clementia tua, cui pro sacrificio  
gratissimo est animus peccata sua lugens, & demis=  
se, ac humiliter misericordiam tuam sanctissimi numi=  
nis implorans. Verum illud scire oportet, clausulam  
huius psalmi uulgo ita explanari, tanquam David  
oret ædificationem ecclesiæ, quæ ipsa quoque sua sa=



crificia habet longe illa quidem dissimilia ijs, quæ instituta sunt à Mose, sed etiam Deo longe acceptiora. Hanc explanationem nos quoque libenter amplectimur.

## ARGVMENTVM PSAL. LII.

Inuehitur in Doegum hominem sceleratum, & nefarium, & comparat studia contraria piorum, im piorumq; , quorum alteri uanitate, malitia, & rebus fluxis, atque inanibus nituntur, alteri sola Dei misericordia confidunt.

Victori, eruditio David, cum uenisset Doeg Iduæus, & annuntiasset Sauli, & dixisset, uenit David ad domum Achimelech, psal. LII.

Quid gloriaris in malitia potens? misericordia Dei

Tota Die. Iniustitiam cogitauit lingua tua, sicut nouacula acuta fecisti dolum.

Dilexisti malitiam super bonitatem, iniquitatem loqui magis quàm æquitatem.

Dilexisti omnia uerba perditionis lingua dolosa.

Propterea Deus destruet te in æternum, tollet te, & euellet te de tabernaculo, & radicem tuam de terra uiuentium.

Videbunt iusti, & timebunt, & super eum ridebunt, & dicent, ecce homo, qui non posuit Deum fortitudinem suam,

Sed sperauit in multitudine diuitiarum suarum,





## E X P L A N A T I O

*Et corroborauit se dolis suis.*

Ego autem sicut oliua uirens in domo Dei, speraui in misericordia Dei in eternum, Et in seculum seculi.

Confitebor tibi in seculum, quia fecisti, Et expectabo nomen tuum, quoniam bonum est in conspectu sanctorum tuorum.

## E X P L A N A T I O.

Cum uenisset Doeg ] Cum David Saulis uim fugeret, ad Achimelechum pontificem uenit, qui ei Et gladium præbuit, Et panes sacros edendos concessit ignarus inimicitiarum, quæ inter illum, Et regem intercedebant. eam rem detulit ad Saulem Doeg pastor regius, homo gratia, Et auctoritate apud illum florens. Saul autem factum potificis tam egre tulit, ut LXXXV sacerdotes ipsi Doego trucidandos dederit, Et in totam ciuitatem sacerdotum eo ministro omnia crudelitatis exempla ediderit. Tanto igitur scelere commotus David hos uersus in Doegum composuit.

Quid gloriaris in malitia potens? ] Quidnam o potens te iactas de nefarijs sceleribus, quæ impune in homines innocentes edis? gloriabatur autem de cæde sacerdotum, Et ciuitate illorum crudelissime uexata.

Misericordia Dei tota Die ] Tu quid gloriaris maleficijs, Et impietate, nos contra gloriamur de bonitate, Et misericordia Dei, qua ille continenter utitur erga homines pios.

Sicut nouacula acuta ] Comparat illum  
nouaculae, propterea quòd lingua petulantissima bo-  
num quenque uulnerabat.

Dilexisti omnia uerba perditionis ] Id est,  
quæ bonis perniciem afferunt.

Euellet te de tabernaculo ] Non te diutius  
sinet Deus polluere sanctissimum templum suum,  
quod corpore illo tuo sanguine sacerdotum inquinato  
ingredi audes.

Et radicem tuam de terra uiuentium ] De  
terra uiuentium dictum est in explanatione Psalmi  
XXVII.

videbunt iusti ] Scilicet exitium Doegi, &  
Deum uenerabuntur, qui tam illustria iustitiæ suæ  
documenta constituit, & magnam animo capient uo-  
luptatem, cum uiderint, hominem impium sangui-  
nem sacerdotum acerbo supplicio luentem.

Ego autem sicut oliua ] Ipse quidem Doe-  
gus ob impietate suam tanquam arbor pestifera euel-  
letur ex tabernaculo Dei, ego uero in templo sanctis-  
simo tanquam olea uiridis florebo, propterea quòd  
non uiribus meis, aut dolis, sed misericordia Dei  
confido.

Quia fecisti ] Quoniam perfecisti, quæ his  
uersibus euentura prædixi.

Et expectabo nomen tuum ] Id est, omne  
meam spem locabo in numine tuo, quoniam id est  
amabile, propitium; & præsens hominibus pijs. uel  
ait, se expectaturum nomen Domini, quoniam id ex-  
pectare est utile, ac salutare iudicio piorum, nam

# EXPLANATIO

cæteris ea res stultitiæ plena uidetur .

## ARGUMENTVM PSAL. LIII.

Hic Psalmus ferè est idem atque decimus quartus.

Victori ad Mahelath eruditio Dauid ,  
Psalmus LIII.

Dixit insipiens in corde suo , non est Deus .

Corrupti sunt , & abominabiles facti sunt in iniquitatibus : non est , qui faciat bonum .

Deus de coelo prospexit super filios hominum , ut uideat , an sit intelligens , aut requirens Deum .

Omnes declinauerunt , simul inutiles facti sunt , non est qui faciat bonum , non est ne unus quidem .

Non ne cognoscent omnes , qui operantur iniquitatem , qui deuorant plebem meâ sicut escam panis ?

Deum non inuocauerunt : illic trepidabunt timore , ubi non erit timor :

Quoniam Deus dissipabit ossa eorum , qui te obsident : confundentur , quoniam Deus spreuit eos .

Quis dabit ex Sion salutare Israeli ? cum conuerterit Dominus captiuitatem plebis suæ , exultabit Iacob , & letabitur Israel .

## EXPLANATIO .

Illic trepidabunt timore , ubi non erit timor ]  
Id est , ubi nulla erit timendi causa . Simile est illud Moyses , fugient , ut à gladio homines fugere solent , et cadent nemine persequente .

## ARGVMENTVM PSAL. LIIII.

Commendat salutem suam Deo undique circum-  
uentus insidijs inimicorum.

Victori in Neginoth, eruditio David, cum ueni-  
rent Ziphæi, & dicerent Sauli, non ne David  
absconditus est apud nos? psal. LIIII.

Deus in nomine tuo saluum me fac, & in fortitu-  
dine tua uindica me.

Deus exaudi orationem meam, auribus percipe  
uerba oris mei,

Quoniam alieni insurrexerunt aduersum me, &  
fortes quæsierunt animam meam, & non proposue-  
runt Deum ante conspectum suum.

Ecce Deus adiuuat me, & Dominus est cum ijs,  
qui sustentant animam meam.

Auerte mala ad inimicos meos, & in ueritate tua  
disperde illos.

Voluntarie sacrificabo tibi, & confitebor nomini  
tuo Domine, quoniam bonum est,

Quoniam ex omni tribulatione eripuisti me, &  
in inimicis meis uidit oculus meus.

## EXPLANATIO.

Cum uenirent Ziphæi ] Hæc historia scri-  
pta est in libro primo Regum.

Quoniam alieni ] Vates sancti aliquando

alienos, & alienigenas appellare solent Hebræos im-  
pios, qui uirtutem, & religionem negligebant.

Et non proposuerunt ] Id est nullo metu  
iustitiæ diuinæ deterrentur à maleficio.

Dominus est cū ijs, qui sustentant animā meā ]  
Id est, fauet paucis illis, qui meorum discriminum,  
& periculorum comites sunt.

Auerte mala ] Id est fac recidant in aduer-  
sarios meos mala, quæ mihi machinantur.

Voluntarie sacrificabo tibi ] Significat ijs  
uerbis id genus sacrificij, quod sponte fiebat: id enim  
pertinebat ad actionem gratiarum. de eo mentio fit  
in Leuitico.

Et in inimicis meis ] Oratio est præcisa,  
quam ita explet paraphrasis Chaldaea, Et in meis ini-  
micis uidit oculus meus ultionem.

#### ARGUMENTVM PSAL. LV.

Queritur, se nusquam tutum esse, præcipue ue-  
ro dolet insidias sibi esse factas ab homine secum sum-  
ma familiaritate coniuncto.

Victori in Neginoth. Eruditio David,

Psalm. LV.

Exaudi Deus orationem meam, & ne desfexeris  
deprecationem meam, intende mihi, & exaudi me.

Vociferor in oratione mea, & conturbatus sum  
à uoce inimici, & à tribulatione peccatoris.

Quoniam inclinauerunt in me iniquitates, & in

ira molesti sunt mihi .

Cor meum conturbatum est in me , & formido  
mortis cecidit super me .

Timor , & tremor uenerunt super me , & coope  
ruit me horror .

Et dixi , quis dabit mihi pennas sicut columbæ ? uo  
larem , & requiescerem .

Ecce elongarem me fugiens , & manerem in soli  
tudine ,

Festinarem saluum me facere à spiritu turbinis ,  
& tempestatis .

Disperde Domine , diuide linguas eorū , quoniam  
nidi iniquitatem , & contradictionem in ciuitate .

Die , ac nocte circundant eam in muris eius , inia  
quitas , & afflictio in medio eius , & prauitates in  
tra ipsam .

Et non recedit de plateis eius fraus , & dolus .

Quoniam si inimicus meus maledixisset mihi , su  
stinuissem utique ,

Et si is , qui oderat me , erexisset se contra me , abs  
condissem me forsitan ab eo ,

Sed tu homo unanims , dux meus , & notus meus .

Dulce nobis erat secreta nostra inuicem communi  
care , in domo Dei deambulabamus cum consensu .

Veniat mors super illos , & descendant in infernū  
uiuentes .

Quoniam nequitia in habitaculis eorum , in me  
dio eorum .

Ego autem ad Deum clamabo , & Dominus sal  
uabit me .

## E X P L A N A T I O

Vespere, & mane, & meridie precabor, & uociferabor, & exaudiet uocem meam.

Redimet in pace animam meam à pralio, quod est contra me, quoniam cum multis sunt aduersum me.

Exaudiet Deus, & affliget illos, qui est ante secula.

Non enim est illis commutatio, & non timuerunt Deum, misit manus suas in pacificos suos.

Contaminauit foedus suum, leniora sunt butyro uerba oris eius, & in corde eius est bellum.

Molliti sunt sermones eius super oleum, & ipsi sunt iacula.

Reijce in Dominum onus tuum, & ipse te sustentabit, non dabit in æternum fluctuationem iusto.

Tu uero Deus deduces eos in puteum interitus.

Viri sanguinum, & dolosi non dimidiabunt dies suos, ego autem sperabo in te Domine.

## E X P L A N A T I O.

Quoniam inclinauerunt in me iniquitates ]

Id est, me falsis criminibus onerant, atque in inuidiam uocant.

Pennas sicut columbae ] Pennas columbae optat, quoniam ea avis celerrime uolat.

A spiritu turbinis ] Sic appellat uim & impetum Saulis, aut Absalonis.

Divide linguas eorum ] Fac (inquit) subito existat inter eos linguarum uarietas, ne possit alter alterius uerba intelligere, dum de me prodendo consulant. Hoc modo Deus fregit conatus eorum, qui tur-

rim

rim Babelis edificabant, ut est in Genesi.

Tu uero homo unanims ] Significat Architoſelem, ſi fides eſt habenda paraphraſi Chaldaea.

Quoniam cum multis ſunt aduerſum me ] Id eſt, quo plures ſunt aduerſarij mei, hoc maiori cura erit Deo ſalus mea. ſic interpretatur hunc locu David Chimis ſcriptor apud Hebraeos clarus in primis.

Non eſt illis commutatio ] Significat ijs uerbis, illos obſtinato animo in uitijs, & maleficijs perſeuerare.

Reſce in Dominum onus tuum ] Depone (inquit) in ſinu Dei omnes curas, moleſtias, & ſolitudines tuas, teq; ac tua omnia ipſius fidei, & miſericordiae committe. hoc ſi feceris, ille ſic animum tuum corroborabit, ut te nulla uis calamitatum de gradu conſtancia depellere poſſit. Hanc ſententiam ſaluberrimam repetit diuus Petrus his uerbis. Omne ſolicitudinem projcite in Deum, quoniam ipſi cura eſt de uobis. & diuus Paulus, Dominus (inquit) prope eſt, nihil ſoliciti ſitis.

Non dabit in æternum ] Id eſt, non ſinet pios ab impijs ſemper opprimi, & uexari.

Viri ſanguinum, & doſoſi non dimidiabunt dies ſuos ] Immatura mors homini pio nunquam poteſt accidere: integritas enim uitae uel in prima adoleſcentia tempus maturum mortis affert, neque dicens eſt aliquis parum diu uiſſe, qui pure, ſancteq; uiuit. quin etiã uir pius, ſiue ſenex, ſiue iuuenis mortem obeat, expleuit tempus ſuum, quippe qui ſemper paratus ſit ad diſcedendum, & bene maturum cen-



seat, quacunque die ipsum Deus istis corporis uinculis liberare uoluerit. Contra impius uitam sibi longam semper pollicetur, immo, perinde ac sit immortalis, ita uiuit. quo quidem fit, ut nunquam is expleat tempus suum, atque excessus è uita semper ipsi tanquam iuueni immaturus est, etiam si centum confecerit annos. Quamquam igitur homines uiciosi, & improbi aliquando ad extremam senectutem perueniant, tamen uerissima est hæc sententia, Viri sanguinum, & dolosi non dimidiabunt dies suos.

## A R G V M E N T V M P S A L. L V I.

Auxilium Dei implorat in maximo periculo uersans, queritur de Saulis, & affeclarum eius iniuria seq; diuinæ misericordiæ spe consolatur.

Victori pro columba muta, quæ procul auolauerat. Michtan David, cum tenuerunt eum Philistæi in Geth, Psal. L V I.

Miserere mei Deus, quoniam conculcauit me homo, tota die impugnans tribulauit me.

Conculcauerunt me inimici mei tota die, quoniam multi bellantes aduersum me à excelsè.

In die, qua timor inuasit me, ego in te sperabo.

In Deo laudabo uerbum eius, in Deo speraui, non timebo quid faciat mihi caro.

Tota die uerba mea calumniabantur, aduersum me omnes cogitationes eorum in malum.

Congregati sunt, insidiantur, ipsi calcaneos meos

obseruant

Expectantes animam meam . propter iniquitatem  
eufio erit illis ? in ira populos confringes Deus .

Fugas meas tu numeratas habes , lachrimas meas  
repones in utrem tuum .

Nonne in libro tuo (hæc scripta sunt ?) tunc con-  
uertentur inimici mei retrorsum .

In quacunque die inuocauero te , ecce cognoui ;  
quod Deus meus es tu .

In Deo laudabo uerbum , in Domino laudabo ser-  
monem , in Deo speraui , non timebo , quid faciat  
mihi homo .

In me sunt Deus uota tua , reddam laudationes  
tibi :

Quoniam eripuisti animam meam de morte , &  
pedes meos de lapsu , ut ambulem coram Deo in lu-  
mine uiuentium .

#### EXPLANATIO .

Pro columba muta ] Hæc inscriptio signi-  
ficare uidetur , hos uersus esse factos pro Dauide ho-  
mine simplici , & innocente , qui causam suam Deo  
committens nihil aduersariis suis respondit , sed pro-  
cul fugiens ad Palestinos se contulit . quæ quidem his-  
toria scripta est in libro primo Regum .

Conculeauit me homo ] Saulem significat.

Quacunque die ] Quoties (inquit) mihi ali-  
quis metus iniectus erit , ego me muniam contra illum  
spe certissima auxiliij tui .

In Deo laudabo uerbum eius ] Ego (inquit)

# EXPLANATIO

fretus benignitate Dei in bonam partem accipiam, quicquid eius uoluntate, & permissu acciderit mihi. uerbum autem apud Hebræos appellari pro re, & facto, sæpe iam dictum est. ita non nulli explanant hunc locum. Nos uero diligentius uerba Davidis expendentibus sic interpretamur, cum nihil in Deo existat, quod satis digne laudari possit ab hominibus, tamen uir pius in periculum aliquod adductus uerba ipsius laudat in primis, quo animum suum corroboraret, ac confirmet, laudat uero ad hunc modum, Eloquia Domini, eloquia munda, argentum igne examinatum in uase terreo, purgatum septies, id est uerba Dei uera, sinceraq; sunt, nihil ijs purius, aut sanctius, nihil ab omni falsitate magis alienum. Hæc cum animo suo cogitans uir pius, simulq; reputans, Deum promississe, se misericordia sua tanquam firmissimo scuto protecturum omnes, qui sese in tutelam ipsi tradiderunt, incredibile dictu est, quantum fiduciæ, ac firmitatis ex ea re comparet in rebus aduersis. Hoc ita esse, ex uerbis ipsius Davidis intelligi potest, qui cum dixisset, in Deo laudabo uerbum eius, statim subiungit, se Deo confidere, eamq; fiduciam esse tantam, & tantam, ut neque uim, neque insidias potentissimi regis extimescat, quippe qui non dubitet, Deum pro salute sua propugnare, cuius rei certissimum pignus habet uerbu ipsius, id est promissionem.

Propter iniquitatem   Erit ne hoc eorum scelus impunitum? Non erit certe, sed tu Domine hanc magnam uim hostium meorum ulcisceris. Sic interpretatur hunc locu Chimis Hebræus explanator.

**Fugas meas** ] Tu Domine (inquit) optime nosti, quàm saepe coaëctus sim fugere impetû hostium meorum, lachrimas, quæ quotidie fluunt ex oculis meis, repone quæso in utrem tuum, ut uideas, quàm illæ sint abundantes, immo uero in libro providentiæ tuæ scriptæ sunt & lachrimæ, & fugæ meæ, & omnes iniuriæ, quas innocens perfero. Nimirum efficacissima est consolatio in rebus aduersis, cum uir pius cogitat, nihil sibi euenire posse, quod Deus nõ animaduertat, quem sibi patrem esse non dubitat.

**Tunc conuertentur** ] Videtur certum tem-  
pus significare, quo tempore intelligebat aduersarios suos opprimendos esse.

**In me sunt** ] In mea (inquit) memoria sunt uota, quæ tibi nuncupauì, eaq; religiose persoluam. quæ uero sint ea uota, ipsemet declarat subiungens, reddam laudationes tibi.

**Quoniam eripuisti** ] Gratias inquam im-  
mortales agam tibi, propterea quòd me ex maximis periculis eripuisti, ut in lumine uiuentium, id est ui-  
tam, & salutem retinens ambulem coràm te, hoc est uirtutem, & pietatem colam, atque ita me geram, tanquam omnibus meis cogitationibus, & uerbis, & actionibus intersis. Sed hæc gratiarum actio perti-  
net ad omnes pios, quorum animos, & pedes liberat Deus, alteros à morte sempiterna, alteros à lapsu, ut ui spiritus corroborati, atque eo lumine, quo cœlites in perpetuum fruuntur, illustrati, sine graui aliqua offensione hoc difficile uiuendi curriculum conficiant, Deum semper ante oculos habentes, ut nihil animo

# EXPLANATIO

agitare, nihil aut loqui, aut gerere possint, quin illum presentem adesse persuasum habeant.

## ARGUMENTVM PSAL. LVII.

Gratias agit Deo, cuius misericordia è maximo periculo euaserat.

Victori, ne perdas David Michtan, quando fugit a facie Saul in speluncam, Psal. LVII.

Miserere mei Deus, miserere mei, quoniam in te cōfidit anima mea.

Et in umbra alarum tuarum sperabo, donec transeat iniquitas.

Clamabo ad Deum altissimum, ad Deum, qui perficit mihi.

Mittet de cœlo, & liberabit me, dabit in opprobrium conculcantes me.

Mittet Deus misericordiam suam, & ueritatem suam, anima mea in medio leonum est, iaceo inter ardentes,

Inter filios hominum, quorum dentes sunt lanceæ, & sagittæ, & lingua eorum gladius acutus.

Exaltare super cœlos Deus, super omnem terram gloria tua.

Laqueum parauerunt pedibus meis, incurruauit ille animam meam.

Foderunt ante faciem meam foveam, & ipsi inciderunt in eam.

Paratum cor meum Deus, paratum cor meum

cantabo, & psalmum dicam.

Exurge gloria mea, exurge psalterium, & cythara, auroram excitabo.

Confitebor tibi in populis Domine, & psalmum dicam tibi in gentibus:

Quoniam magnificata est usque ad cœlos misericordia tua, & usque ad nubes ueritas tua.

Exaltare super cœlos Deus, & super omnem terram gloria tua.

## EXPLANATIO.

Quando fugit à saule ] Hæc historia scripta est in libro primo Regum. quod uero in eodem titulo dicitur, ne perdas, Hebræi putant id significare, quod suos ad occidendum saulem inflammati cohibuerit. nimirum cum Abisais illum dormientem interficere uellet, legimus Dauidem illi dixisse, ne perdas eum. Verum haud satis scio, an hæc interpretatio conuenire possit reliquis inscriptionibus, quæ hæc eadem uerba continent.

Qui perficit mihi ] Omnia, quæ opto. est enim oratio imperfecta.

Mitter Deus ] Deus & misericors, & uerax est. misericordia facit, ut opem afflictiis & laborantibus promittat: ueritas facit, ut promissa persoluat.

Iaceo inter ardentes ] Odio mei.

Exaltare super ] Id est, declara uim & potestatem tuam in homines impios, & nefarios, ut omnes ad uenerationem tui excitentur, & in omnes

terras se dilatat gloria tua .

Laqueum parauerunt ] Nunc exponit, auxilium sibi allatum esse, quod expectauerat .

Incurruuit ille animam meam ] Significat his uerbis magnitudinem periculi; & timoris, quo debilitabatur, animumq; demittebat, cum Saul ipsi immineret, & in eum locum uentum esset, ut ex eius manibus elabi posse non uideretur .

Et ipsi inciderunt in eam ] Machinati erant mihi periculum, in quod ipsi incurrerunt, cum incauti in manus meas incidissent.

Paratum cor meum ] Symmachus uertit clarius ad hunc modum, stabile cor meum Deus, stabile cor meum . Nihil uero est, quod magis stabiliat, & confirmet animum in religione, ac pietatis amore, quam observatio diligens earum rerum, quae res quotidie geruntur a providentia Dei bonis tuendis, & improbis ulciscendis .

Excitabo auroram ] Non expectabo, dum aurora me excitet è lecto, quin potius illam ego cunctantem excitabo antelucanis horis surgens ad hymnos canendos . Simile est illud Virgilij, Aestatem increpitans seram, Zephyrosq; morantes .

Quoniam magnificata est ] Id est, omnia plena sunt misericordia, bonitate, & iustitia tua .

ARGUMENTVM PSAL. LVIII.

Inuehitur in saulem, & eius consiliarios, & assecclas, quos praedicat grauissimas poenas scelerum daturus .

Victori, ne perdas David Michtan. Psal. LVIII.

Num uere ò congregatio iustitiam loquimini? re=  
Ete iudicatis filij hominum?

Etiam in corde iniquitates operamini in terra, in=  
iustitias manus uestre appendunt.

Alienati sunt peccatores à uulua, errauerunt ab  
utero, loquentes falsa.

Venenum illis secundum similitudinem serpentis,  
sicut aspidis surdæ obturantibus aures suas,

Quæ non exaudiet uocem incantantium, & ues=  
nesfci incantantis sapienter.

Deus contere dentes eorum in ore ipsorum, molas  
leonum confringe Domine.

Diffuant tanquam aqua decurrens, dirigant sa=  
gittas suas, sed sint, ac si confractæ essent.

Instar limacis colliquefcentis dilabatur, fiat uelut  
abortiuum mulieris, quod non uidit solem.

Priusquam crescât spinæ uestre in rhamnum, si=  
cut crudum quid sic ira turbine rapiet eum.

Letabitur iustus cum uiderit uindictam, pedes  
suos lauabit in sanguine peccatoris.

Et dicet homo, utique est fructus iusto, utique est  
Deus iudicans in terra.

#### EXPLANATIO.

Num uere ò congregatio   Num (inquit)  
ò iudices, & consiliarij, qui Saulem ab iniuria mili=  
facienda dehortari debueratis, uera, & æqua con=



# EXPLANATIO

sultis, aut pronuntiatis? quin potius nihil nisi maleficia, & scelera cogitatis, eaq; impotenti animo perficitis, pro æquitate, & iustitia iniurias, & uim iudiciali statera appendentes.

Alienati sunt ] Non est (inquit) quod miremur, hos homines esse tam sceleratos, quippe qui iam inde ab ipsis incunabulis abalienauerunt se a Deo, & a recta uiuendi ratione aberrauerunt.

Sicut assidis surdæ ] Comparat eos assidi obturanti aures, quoniam nolbant audire monitiones salutares.

Sed sint, ac si confractæ essent ] Id est, conatus eorum irriti sint.

Priusquam crescant spinæ uestre in rhamnum ] Verba hæc conuertit etiam Symmachus hoc modo. Sed uocabula Hebræa sunt ambigua, & totus uersiculus mihi uidetur admodum difficilis ad intelligendum: consideret tamen pius lector, num ex eo elici possit sententia, quam subiiciam. quemadmodum uis uenti poma ex arboribus cruda auellere solet, ita uis iræ diuinæ ducem uestrum immatura morte de medio tollet, antequam scelera, & uitia uestra maiora fiant, & corroborentur. Est autem rhamnus spina maxima, quæ speciem arboris ferè gerit.

Letabitur iustus ] Letabitur, non quod insultet illorum calamitati, sed quod uideat gloriam Dei illustrari, & homines a maleficio deterri, dum improbi poenas luunt.

Pedes suos lauabit ] Hyperbole est, quæ significat ingentem lætitiā piorum. sed uulgo aliter

hunc locum interpretantur, nempe homines pios supplicio impiorum fieri cautiore, & quo clarius certant, Deum cuique, pro eo ac quisque se gerit, aut pœnas irrogare, aut prœmia persolvere, hoc enixius contendere, ut omnem impuritatem ex animo eluant.

## ARGVMENTVM PSAL. LIX.

Implorat auxilium Dei contra aduersarios.

Victori. ne perdas, Michtan David, quando misit Saul, & custodiuit domum eius, ut eum interficeret, Psal. LIX.

Eripe me de inimicis meis Deus meus, & ab insurgentibus in me libera me.

Eripe me de operantibus iniquitatem, & de uiris sanguinum salua me.

Quia ecce insidiatur animæ meæ, congregantur aduersum me.

Non propter iniquitatem meam, neque ob peccatum meum Domine, sine iniquitate (mea) illi currunt, & se instruunt.

Exurge in occursum meum, & uide, & tu Domine Deus exercituum, Deus Israël.

Intende ad uisitandas omnes gentes, non miserearis omnium, qui operantur iniquitatem.

Reuertuntur ad uesperam, & fremunt ut canes, & circumeunt ciuitatem.

Ecce loquuntur in ore suo, & gladij sunt in labijs

# EXPLANATIO

eorum, quoniam quis audit?

Tu autem Domine deridebis eos, subsannabis omnes gentes.

Fortitudinem eius tibi reseruabo, quia tu Deus adiutor meus es, Deus meus misericordia eius praeueniet me.

Deus ostendet mihi in inimicis meis, ne occidas eos, ne forte obliuiscatur populus meus.

Disperge illos in uirtute tua, & deijce eos protector noster Domine,

Propter delictum oris eorum, & sermonem labiorum ipsorum, & comprehendantur in superbia sua.

Propter periurium, & mendacium, quod loquuntur, consume in furore, consume, & non sint.

Et sciant, quod Deus dominatur in Iacob, & usque ad fines terrae.

Reuertuntur ad uesperam, fremunt ut canes, & circumeunt ciuitatem.

Ipsi dispergentur ad manducandum, sed dormient non saturati.

Ego autem cantabo fortitudinem tuam, & exaltabo mane misericordiam tuam.

Quia factus es adiutor meus, & refugium meum in die tribulationis meae.

Fortitudo mea tibi psallam, quia Deus adiutor meus es, Deus meus misericordia mea.

# EXPLANATIO.

Quando misit Saul ] Historia haec scripta

est in libro primo Regum .

Intende ad uisitandas omnes gentes ] Alio loco ostendimus , hoc uerbo gentis sæpenumero in literis sanctis significari homines sceleratos , & impios . Visitatio autem improborum significat eorum supplicia , ut apud Esaïam , uisitabo super orbis mala , & in Psalmo LXXXIX . Visitabo in uirga iniquitates eorum . Itaque orat , ut Deus , qui pro sua singulari lenitate diuturnam sæpe nocentibus concedit impunitatem , aliquando tandem animum intendat ad iudicia exercenda , atque ad uim seueritatis sue declarandam contra importunitatem hominum perditorum .

Reuertuntur ad uesperam ] Describit sedulitatem sicariorum , qui iussu saulis obsidebant de nocte domum suam , & tota ciuitate insidias locabant , ne posset elabi .

Ecce loquuntur in ore suo ] Figura est , quam rhetores appellant reticentiam . hac exprimit atrocitatem uerborum , quæ iactabant ij , qui obsidebant domum suam . En (inquit) loquuntur ore suo nihil scilicet nisi cædem , & sanguinem , & immanitatem , itaque subiungit , gladij sunt in labijs eorum .

Quoniam quis audit ] Quis (inquiunt illi) nos audit ? id est , hæc nefaria loquuntur , propterea quod existimant , audire neminem , cum tamen ego , immo uero Deus audiat omnia . Symmachus sententiam exprimens non uerba , clarius uertit ad hunc modum . Gladij sunt in labijs eorum , tan-

# EXPLANATIO

quam nemo audiat .

Tu autem Domine deridebis eos ] Tu Domine conatus istorum irritos facies , & omnium impiorum consilia franges .

Fortitudinem eius ] Non possum ego potentiae regis obsistere , itaque certamen hoc tibi referuabo , & uiribus illius vires tuas obijciam . O fortunatum , & uere beatum illum , qui tantos progressus habet in cognitione imbecillitatis suae , ut deposita omni temeritate , & propriarum uirium confidentia , toto animo acquiescat in praesidio misericordiae Dei .

Misericordia eius praeueniet me ] Tam benignus est ( inquit ) Deus meus , ut sua misericordia praeuenire soleat preces meas , & opem ferre , antequam illam implorem . Deus hac benignitate se usurum aduersus pios pollicetur apud Esaiam his uerbis , Antequam clament , ego exaudiam , adhuc illis loquentibus audiam .

Ostendet mihi in inimicis meis ] Ea uidelicet , quae opto . oratio est praecisa , & imperfecta .

Ne occidas eos ] Ne subito illos de medio tolle , ne forte hoc exemplum iustitiae tuae effluat e memoria populi mei , sed uagi , exules , omnium rerum egentes diu secum ferant monumenta iustitiae tuae , illaq; mortalibus inuiti ostendent .

Disserge illos in uirtute tua ] Hunc uersiculum , & sequentem Symmachus etiam uertit eodem modo .

Et comprehendantur in superbia sua ] id

est, fac, arrogantiae suae laqueis irretiti poenas scelerum pendant.

Propter periurium ] Quoniam uocabula Hebraea sunt ambigua, potest hic locus etiam hoc modo uerti, & de maledictione, & tunc narrent, id est, ut quidam ex Hebraeis explanant, Deus illos excretur, & tunc tam dira consumat, ut omnes ea de re tanquam portentosa loquantur.

Ipsi dispergentur ad manducandum ] Nunc tota ciuitate discursant, quo me per insidias opprimant; at ydem isti pro hoc scelere cogentur mortuo Saule discursare querendi uictus causa, quo non inuento somnum capient fame enecli.

#### ARGVMENTVM PSAL. LX.

Scripsit hunc psalmum Dauid, cum bellum difficillimum gereret cum Ammonitis, & Idumaeis, & Syris inter se foederatis. quae quidem historia scripta est in secundo libro Regum, & in primo Paralip. Rogat autem Deum, ut populo calamitatibus bellorum uexato opem ferat, deinde confirmatus oraculo uictoriam de hostibus sibi pollicetur, & regni stabilitatem.

Victori, pro Lilijs pulchritudinis. Michtan Dauid ad docendum, quando pugnauit aduersus Syriam Mesopotamiae, & aduersus Syriam Sobal, & reuersus est Ioab, & percussit Edon in ualle Salinarum XII millia, Psal. LX.

## E X P L A N A T I O

Deus repulisti nos , & dissipasti nos , iratus es ,  
conuertere te ad nos .

Commouisti terram , & confregisti eam , sana  
contritiones eius , quia commota est .

Ostendisti populo tuo dura , potasti nos uino mor-  
tifero .

Dedisti metuentibus te signum ad extollendum  
propter ueritatem ,

Ut liberarentur dilecti tui , saluum fac dextera  
tua , & exaudi me .

Deus locutus est in sanctuario suo , exultabo , di-  
uidam Sichem , & conuallem Succoth dimetiar ,

Meus est Galaad , & meus est Manasses , &  
Ephraim fortitudo capitis mei ,

Iuda legifer meus , Moab olla lotionis meae ,  
super Idumaeam proieci calceamentum meum ,  
super me Philistaea iubila .

Quis deducet me in ciuitatem munitam , quis de-  
ducet me usque in Idumaeam ?

Non' ne tu Deus , qui repulisti nos ? & non egre-  
dieris Deus cum exercitibus nostris ?

Da nobis auxilium de tribulatione , quia uana sa-  
lus hominis .

In Deo faciemus uirtutem , & ipse ad nihilum de-  
ducet tribulantes nos .

## E X P L A N A T I O .

Pro' Lily's pulchritudinis ] Alij aliter hæc  
uerba ex Hebræo uertunt , sed omnia sunt adeo ob-  
scura , ut nullam explanationem certam asserre pos-  
simus .

simus .

Commonuisti terram ] Hæc translatio significat , populum impetu bellorum uexatum esse . Simile est illud poetæ ueteris , Africa terribili tremuit horrida terra tumultu .

Ostendisti populo tuo dura ] Acerbissima spectacula præbuisi populo tuo , & mortifera pocula calamitatum nobis ministrasti .

Dedisti metuentibus ] At olim ( inquit ) solitus eras dare cultoribus tuis uexillum , quod erigerent in prælijs , & felicissime pugnarent , idq; faciebas propter ueritatem , ut scilicet , quæ promiseras illis , obseruares . Vtære igitur solita misericordia , & dextera tua saluari populum tuum ab imminetibus periculis incolumem serua . Quod uero dicit , Deum dedisse uexillum populo ; id significat , Hebræos olim auspicijs , & ductu Dei bella feliciter administrare consueuisse .

Deus locutus est ] Confirmat animum oraculo , quod acceperat , fore , ut non modo regno Hebræorum potiretur , sed etiam exteras gentes sub imperium suum subiungeret : Deus ( inquit ) omnia secunda mihi pollicitus est , propterea animo lato , & tranquillo ero , nam diuidam Sichem , & metiar conuallem Succoth , id est , in ditione , & potestate mea erunt agri , & oppida , quæ assignata fuerant olim familiæ Ephraïni . sed quoniam hæc iam possidebat , uidentur probandi , qui uerterunt hunc locum uerbis tempus præteritum significantibus ad hunc modum , Sichem iam diuise , & metitus sum uallem Succoth .



# EXPLANATIO

Meus est Galaad, & meus est Manasses ]

His uerbis significat partē illam terræ Iudææ, quæ sita est trans fluvium Iordanem.

Et Ephraim fortitudo capitis mei ] Sic appellat tribum Ephraim, propterea quod illa & potentia, & militum numero præstabat ceteris tribubus.

Iuda legisfer meus ] Etiam legisfer Iuda est sub imperio meo. Ad tribum Iudæ pertinebat regnū, & legum ferendarum potestas, propterea cum legisferum appellat imitatus Moysen, qui in Genesi inquit, Non auferetur sceptrum de Iuda, & legisfer de medio pedum eius.

Moab olla lotionis mee ] Allegoria est, quæ significat, arrogantiam Moabitæ ad id seruitutis, & humilitatis esse perducendam, ut possint comparari fictilibus, in quibus pedes lauant. Idē quoque significat allegoria quam subiungit.

Super me Philistæa iubila ] Id est, prosequere me faustis acclamationibus, utpote regem tuū, neque recusa imperium meum.

Quis deducet? ] Quis (inquit) eas vires, & copias mihi suppeditet, quibus expugnare possim urbem illam munitissimam, quam tanto iam tempore obsessam teneo? Ea urbs appellabatur Rabbatha.

Quis deducet me usque in Idumæam? ] Meminit Idumææ, quoniam illa quoque eo bello dormita est.

Non'ne tu Deus ] Deduces me usque in Idumæā? qui tādīu nos auxilio tuo spoliasti, Non'ne inquam tu Deus eris dux copiarum nostrarum?

Quia uana salus hominis ] Salus uidelicet,  
 cet, quæ ab hominibus expectatur.

In Deo faciemus uirtutem ] Id est, freti  
 auxilio Dei rempublicam fortiter, ac feliciter admini-  
 strabimus.

## ARGVMENTVM PSAL. LXI.

Implorat auxilium Dei in periculo uersans, deinceps  
 prædicat, se, ac familiam suam imperio Iudæorum  
 potituram, & regnum CHRISTI sempiternum  
 canit.

Victori in Neginoth, David LXI.

Exaudi Deus deprecationem meam, intende ora-  
 tioni meæ.

Ab extremo terræ ad te clamabo, dum anxiatur  
 cor meum, in petram, quæ altior me est, duc me.

Quia factus es spes mea, turris fortitudinis à fa-  
 cie inimici.

Inhabitabo in tabernaculo tuo in secula, protegar  
 in uelamento alarum tuarum.

Quoniam tu Deus meus exaudisti orationes meas,  
 dedisti hereditatem timentibus nomen tuum.

Dies super dies regis adijcies, annos eius usque in  
 diem generationis, & generationis.

Sedebit in æternum in conspectu Dei, misericor-  
 diam & ueritatem præpara, quæ custodiant eum.

Sic psalmum dicam nomini tuo in seculum seculi,  
 ut reddam uota mea de die in diem.

Explanatio.

Ab extremo terræ ] Id est, ab extrema Iudæa, ubi exul uitam inopem, & uagam perse= quor.

In petram, quæ altior ] Id est, duc me in aliquem locum tutum, ac munitum, quò ego sponte mea conscendere non possum.

Inhabitabo in tabernaculo ] Quanquam uideor exilio perpetuo multatus, tamen te fauente in sanctam ciuitatem reuertar, & sanctissimum tem= plum tuum assidue uenerabor. hoc autem Dauid in primis optabat. hinc illud, Vnum petij à Domino, hoc requiram, ut inhabitem in domo Domini omni= bus diebus uitæ meæ. Quod uero ait, se habitaturum in secula, significat, se cum sua posteritate in urbe sancta regnaturum. sunt tamen, qui existiment, hanc esse allegoriam, qua significet, Deum sibi per= petuo præsidio, salutiq; futurum. de quo genere als legoriæ explicatum est in psal. XXVII.

Dedisti hæreditatem ] Sic appellat regnū, quod Deus sibi, ac familiæ suæ concesserat. sed etiam hæreditas piorum est sempiterna bonorum coelestium possessio. Hanc uero hæreditatem adire incipimus tū, cum Deus spiritum suum nobis impartitur, à quo fe licissime regimur, & gubernamur, tantisq; bonis afficimur, ut in hac uita fragili, & caduca immor talium uitam, & uoluptates purissimas gustare inct= piamus.

Dies super dies ] Hic aperte sempiternam

uitam, & imperium CHRISTI canit, per quem familia Davidis in perpetuum regnat, neque aliter hunc uersiculum interpretatur paraphrasis Chaldaea.

Misericordiam, & ueritatem para ] Si-  
gnificat, regnum CHRISTI esse regnum mi-  
sericordiae, & ueritatis, quibus custodibus non solum  
tuti, sed etiam beati sumus.

Vt reddam uota mea ] Id est, hymnos, &  
gratiarum actionem: quae quidem uota pñ perpetuo  
reddere debent, quando etiam bona, quorum haere-  
des instituti sunt à Deo, perpetua sunt.

#### ARGVMENTVM PSAL. LXII.

Docet, in solo Deo spem locandam esse, & nihil  
esse inanius, aut fallacius hominibus.

Victori pro Idithum, psal. David LXII.

Vtique ad Deum silet anima mea, ab ipso enim  
salutare meum.

Vtique ipse est propugnaculum meum, & salus  
mea, ipse arx mea, non uacillabo multum.

Quousque irruitis in hominem? interficiemini  
uniuersi uos tanquam paries inclinatus, & maceries  
impulsa.

Vtique propter exaltationem eius interunt consi-  
lium, ut expellant, diligunt mendacium, ore suo be-  
nedicunt, & corde suo maledicunt.

Veruntamen Deo sile anima mea, quoniam ab ip-

## E X P L A N A T I O .

so expectatio mea .

Utique ipse est propugnaculum meum , & salus mea , arx mea , non uacillabo .

In Deo salutare meum , & gloria mea , robur fortitudinis meae , & spes mea in Deo est .

Sperate in eum omni tempore ò popule , effundite cordm illo corda uestra , Deus spes nostra est .

Certe uani filij hominis , mendaces filij uiri , in stateras si ascendam , ipsi pariter leuiiores sunt uanitate .

Nolite sperare in iniquitate , & rapina , nolite fieri uanitas : diuitiae si affluant , nolite cor apponere .

Semel locutus est Deus , duo haec audiui , quod potestas Deo est , & tibi Domine misericordia , & quod tu reddes unicuique iuxta opera sua .

## E X P L A N A T I O .

Utique ad Deum silet anima mea ] Tunc animus noster ad Deum silet ; cum rebus aduersis auxilium eius patienter expectat uacuu ab omni sollicitudine , & angore , neque se lamentis ; aut querimonijs dedens .

Non uacillabo multum ] Animus noster natura usque eò imbecillis est , ut uel leui ictu facile concutiat , & cadat : quòd si fiducia , & spe ad misericordiam Dei adnitatur , uacillat ille quidem saepe ob ingentem infirmitatem , sed de gradu constantia non dimouetur .

Tanquam paries ] His similibus ostendit ;

quàm facile sit illos perditurus Deus .

Propter exaltationem eius ] Insidiantur  
mihî coniuratione facta , propterea quòd uident ad  
magnam nominis celebritatem & gloriam me à Deo  
perductum esse .

Ab ipso expectatio mea ] Ex eo pendet o-  
mnis spes salutis meae .

Utique ipse est propugnaculum meum ]  
Qui hæc dicit ex animo , uere pius est , neque uim ul-  
lam Diaboli , uel impiorum reformidat . qui non cre-  
dit Deum talem sibi esse , is à Deo alienus est , atque  
in hominibus spem suam ponat necesse est , id quod  
execrandum , ac detestabile est .

Sperate in eum ] Hortatur populum , ut  
exemplum suum secutus omnes spes , & cogitationes  
suas in misericordia Dei collocet , qui solus ex omnia-  
bus seruare , solus omnibus bonis ornare , & cumu-  
lare nos potest .

Effundite coram illo corda uestra ] Id est ,  
omnes curas , & molestias uestras , atque ab eo solo  
auxilium expectate .

Certe uani filij hominis ] Ostendit , neque  
ab hominum potentia metuendum esse , neque illorum  
opibus , & gratia nitendum . Appellat autem consue-  
tudine linguae Hebrae homines ignobiles , & obscu-  
ros , filios hominis , contraq; uiros claros , & nobiles  
uocat filios uiri , & pronuntiat tam hos quàm illos  
futiles , uanos , & mendaces esse . Sed hæc sententia in  
homines conuenit , quatenus diuini spiritus afflatu nõ-  
dum renouati sunt .

In stateras si ascendant ] Est Hyperbole elegantissima, qua exaggerat stultitiam, & leuitatem mortalium. si ponas (inquit) in altera libra lance inanitatem, in altera uero uniuersum genus humanum, profecto inanitas ipsa præponderabit.

Nolite sperare in iniquitate, & rapina ] Monet, cauendum esse, ne tanti pecuniam aestimemus, ut cupiditate cæca illius incitati suum alteri detrahamus, atque alieno incommodo nostris commodis consulamus: ita enim ex filiis Dei filij hominis efficeremur, id est, ipsa inanitate inaniore. Eos uero, qui diuitijs sine alterius iniuria quasitis affluunt, monet, ut illis ne adiuciant animum, sed perinde affecti sint, quasi nihil possideant. transit enim celerrime imago huius uitæ inanis, & adumbrata, atque hæc, quæ bona fortune nominantur, sunt caduca, fluxa, & pro nihilo putanda.

Semel locutus est Deus ] Hoc loquendi modo significat, id, quod Deus dixit, ita firmum, & ratum esse, ut irritum fieri non possit. In eandem sententiam accipitur illud apud Iobum, Semel loquitur Deus, & secundo id ipsum non repetit. Quid uero locutus ille sit, subiungit inquit, se duo hæc audisse, uidelicet Deum & potentia, & misericordia longe plurimum excellere, & unicuique gratiam referre pro eo ac quisque se gerit: nam bonis amplissima præmia persoluit, nocentibus supplicia debita constituit. hoc ad potentiam spectat, illud ad misericordiam. sed sciendum est, interpretes recentiores ita exprimere ex Hebræo, Semel locutus est Deus, atque

iterum, hoc audiui. significant autem uerba hæc, Deum sæpe locutum esse ore Moſis, & cæterorum uatum ea, quæ ſequuntur.

## ARGVMENTVM PSAL. LXIII.

Declarat deſiderium incredibile, quo tenebatur adeundi ad templum Dei, à quo longe aberat propter inimicitias Saulis. Declarat item, quantam uoluptatem capiat ex contemplatione rerum diuinarum. prædicit etiam, ſe regno potiturum ſublatis inimicis.

Psalmus Dauid, cum eſſet in deſerto Iuda,

## LXIII.

Deus, Deus meus ad te de ſummo mane uigilo. Sitiuit te anima mea, deſiderauit te caro mea. In terra deſerta, ſitibunda, & inaquoſa, ſic in ſancto contemplatus ſum te, ut uideam fortitudinem tuam, & gloriam tuam.

Quoniam melior eſt miſericordia tua, quàm uita, labia mea laudabunt te.

Sic benedicam te in uita mea, & in nomine tuo leuabo manus meas.

Tanquam adipe, & pinguedine ſaturabitur anima mea, cum labijs exultationis laudabit os meum.

Certe memor fui tui ſuper ſtratum meum, in uigijs meditabor in te, quia fuiſti adiutor meus.

Et in uelamento alarum tuarum exultabo, adhæſit anima mea poſt te, me ſuſtentaui dextera tua.

Ipsi uero perdere quaſierunt animam meam, in



## E X P L A N A T I O

eribunt in inferiora terræ, tradentur in manus gladij, partes vulpium erunt.

Rex uero letabitur in Deo, laudabuntur omnes qui iurant per eum, quia obstruetur os loquentium iniqua.

## E X P L A N A T I O.

Desiderauit te caro mea ] Ex hoc intelligi potest, res incommodæ atque asperæ quàm sint hominibus pijs commodæ, ac salutare: siquidem caro, quæ suapte natura est spiritus aduersaria, & a consulendo Deo semper detertere solet, assiduus calamitatus fracta, & debilitata cum spiritu pacem facit, & una cum illo Deum cupide querit, propterea quòd extra ipsum non habet, ubi possit acquiescere.

Sic in sanctuario ] Id est, quanquam in hac uasta solitudine uitam ago, tamen quasi in templo tuo forem, & sacrificijs interessẽ, sic contemplanor sanctissimum numen tuum, atque oculis animi cerno fortitudinem tuam, & gloriam tuam. uidetur autem arcam foederis significare: his enim nominibus illa uulgo celebrabatur, quòd Deus ex eo loco oracula edere, atque uim, & numen suum insigniter ostendere solet. Hinc Asaphus in psalmo LXXVIII, cum dicere uellet, hanc arcam permissu Dei in potestatem hostium uenisse, dicit, illum fortitudinem suam, & suam gloriam in manus inimici tradidisse. quin etiam uxor Phineæ sacerdotis hanc calamitatem desens in libro primo Regum ait, gloriam Domini ab Israele translata esse ad Palaestinos. licet

hæc, quæ diximus, uera sint, tamen cum uir sanctus ait, se perinde, quasi in templo esset, contemplari gloriam Dei, & uim eius salutare, hoc intelligit in primis, quanquam longe abest à solenni cœtu piorum pulsus à Rege in desertas, & incultas solitudines, non tamen eam rem impedire, quo minus suauissima uoluptate potiatur, & pietatem suam alat potentia, & misericordia Dei contēplanda: quæ duæ res in maximis calamitatibus potissimum elucēt, dum uir pius undique premitur, sed non opprimitur; cadens robustior surgit; in luctu, & maxore gaudio triumphat; egentissimus est, & omnia possidet; quotidie in media morte uersatur, & tamen uiget, ac floret, quæ cum geruntur, ille bonitatem Dei, & uim eius prepotentem non cogitatione modo comprehendit, sed etiam, ut ita dicam, manibus attingit, atque ex ea re admirabilis quædam in animo ipsius exardescit amoris magnitudo aduersus clemētissimum numen: ut non male sentire uideantur, qui affirmant, Deum in rebus aduersis amabiliorem existere quàm in prosperis. quod ita esse, David quoque in maximis periculis uersans suo testimonio comprobat, cum subiungit, misericordiam Dei uita ipsa optabiliorem esse. quæ uerba ex animo dicere non potest, nisi expertus: experiundum autem est potissimum in ipsa calamitate.

Tanquam adipe ] Significat contemplationem diuinæ bonitatis esse salutare, & delicatissimum pastum animorum.

Rex uero ] De se loquitur, quem Deus

# EXPLANATIO

Regem constituerat.

Omnes qui iurant ] Solebant Hebræi iurare per salutem regis : Saule autem incolumi nemo ausus fuisset per salutem Davidis iurare.

## ARGUMENTVM PSAL.

### LXIIII.

Inuehitur in aduersarios suos, homines maledicos, & insidiosos, quos prædicat scelerum poenas persoluturos.

Victori, psalmus David LXIIII.

Exaudi Deus orationem meam, cum deprecor, & timore inimici eripe animam meam.

Protege me à consilio malignantium, à multitudine operantium iniquitatem :

Quia exacuerunt ut gladium linguas suas, teterunt sagittam suam uerbum amarum, ut sagittent in occultis immaculatum.

Subito sagittabunt eum, & non timebunt, firmauerunt sibi sermonem nequam.

Narrauerunt, ut absconderent laqueos, dixerunt, quis uidebit eos?

Scrutati sunt iniquitates, perfecerunt ea, quæ scrutati sunt,

Etiam intimum cuiusque, & cor profundum, & sagittabit eos Deus

Sagitta repentina, extabunt plagæ eorum, & impingere se ipsos lingua facient.

Commouebuntur omnes respicientes eos, & timebit omnis homo.

Et annuntiabunt opera Dei, & facta eius intelligent.

Lætabitur iustus in Domino, & sperabit in eo, & gloriabuntur omnes recti corde.

## EXPLANATIO.

Tetenderunt sagittam ] Comparat eorum uerba sagittis.

Firmauerunt sibi sermonē nequam ] Id est, decreuerunt omnino nefarium facinus facere, de quo inter se consultarunt.

Scrutati sunt iniquitates ] Id est, uestigant uarias nocendi uias, & artes.

Etiam intimum cuiusque, & cor profundum ] Etiam intimos animorum sensus scrutantur, adeo sunt callidi, & malitiosi.

Et impingere se ipsos ] Id est, perniciem ipsi sibi petulantissima lingua comparabunt.

Commouebuntur omnes ] Prædicat, Deum ea exempla editurum in suos aduersarios, ut ceteros omnes à maleficio sit deterriturus.

Et facta eius intelligent ] Intelligent inquam, hæc non casu, & fortuito euenire, neque consilio, atque opera hominum geri, sed providentiam Dei esse, quæ afflictis, & uiolenter oppressis auxilium ferat, atque homines importunos, & nefarios, perinde ut meretur eorū improbitas, ulciscatur. qui uero hæc sibi persuasit, à pietate alienus esse nō potest.

# EXPLANATIO

Letabitur iustus ] Homines p̄i hæc, quæ dicta sunt, considerantes, læticia exultabunt, & sp̄s suam, quam in Deo repositam habent, summopere confirmabunt, & gloriabuntur de tutela ipsius omnes recti corde, id est, quicumque animo puro, & simplici iustitiam, & pietatem colunt.

## ARGUMENTVM PSAL. LXV.

Gentem Hebræam, quæ apud Babylonios exulabat, inducit loquentem, & reditum suum ab exilio, tum etiam omnium gentium cōversionem ad verum Dei cultum uaticinantem.

### Victori psalmus & canticum David LXV.

Te manet hymnus Deus in Sion, & tibi reddetur uotum,

Qui exaudis orationem, ad te omnis caro ueniet.

Verba iniquitatum præualuerunt super nos, & impietatibus nostris tu propitiaberis.

Beatus quem elegisti, & assumpsisti, habitabit in atrijs tuis,

Replebitur bonis domus tuæ, & sancti templi tui, mirabilia in iustitia

Annues nobis Deus saluator noster, spes omnium finium terræ, & maris longinqui.

Stabiliens montes in uirtute tua, accinctus potentia, cōpescens fremitum maris, sonū fluctuum eius,

Et tumultum populorum, & timebunt qui habi-

tant in extremis à signis tuis, egressus matutini, & uesperæ laudantes facies.

Visitasti terram, & irrigasti eam, plurimum locupletasti eam.

Flumen Dei repletum est aquis, paras frumentum illis, quoniam ita præparas eam.

Sulcos eius inebrias, demitte (pluviâ) in liras eius, imbribus liquefac eam, germini eius benedic.

Coronabis annum benignitate tua, & uestigia tua stillabunt pinguedinem,

Stillabunt inhabitacula deserti, & exultatione colles accingentur,

Vestientur gregibus campi, & ualles operientur frumento, iubilabunt, atque hymnum dicent.

#### EXPLANATIO.

Te manet hymnus Deus in Sion ] Nullo enim loco præterquâ Hierosolymis fas erat templum ædificare, aut sacrificium facere. sed hic locus ecclesiæ CHRISTI significabat, extra quam neque Deus rite coli, neque ullum uotum reddi potest, quod ipsi gratum, acceptumq; sit.

Qui exaudis ] Quoniam te benignissimū præbes supplicibus tuis, omnes mortales relicta superstitione ad te confugient. id autem perfectum est, posteaquam filius Dei humanum corpus assumpsit.

Verba iniquitatum præualuerunt super nos ] Magna certe peccata commiseramus, & ob eam causam in has calamitates incidimus, sed tu pro tua incredibili misericordia nobis omnia delicta condonabis, &

populum tuum ab exilio reduces in patriam . Verbum apud Hebræos pro re ipsa usurpari , sæpe iam dictum est .

Beatus quem elegisti ] O fortunatam gentem Hebræam , quam ex omnibus nationibus selegisti , tuamq; appellari uoluisti . Nos certe domum reuertemur , & in atrijs sanctissimi templi tui maximam uitæ partem consumemus : sed in primis beati , quos Deus iam inde ab ipsa æternitate elegit ex innumerabili mortalium multitudine , & sibi filios adoptauit . scilicet illos in cœlesti , & sempiterna domo Dei talia , & tanta bona manent , ut ea neque aspectu oculorum comprehendere , neque auribus percipi , neque ulla cogitatione queant adumbrari . quin etiam ipsa piorum ecclesia adhuc in terris manens Dei domus est , & illa quidem bonis præstantissimis referta , qualis est uera , germanaq; iustitia , tranquillitas conscientie , lætitia sancta , spes certa uitæ sempiternæ , & cætera dona , & fructus Spiritus sancti , quorum sæpe mentionem facit diuus Paulus in suis epistolis .

Mirabilia in iustitia annues nobis ] Significare uidetur ea , quæ gesturus erat Deus pro salute , & incolumitate gentis suæ : de quibus rebus gestis etiam meminit in psalmo sequenti . Sed in primis admirabilia sunt ea , quæ Deus ijs concedit , quos suæ iustitiæ participes facit , atque in domum suam recipit , quæ est ecclesia CHRISTI .

Stabiliens montes ] Hæ sunt allegoriæ , quibus elegantissime describit prouidentiam Dei , ex qua pendet omnis auctoritas , & potestas principum , & tranquillitas

tranquillitas pacis, sed ego facile crediderim, has omnes esse uaticinationes ad mysteria CHRISTI pertinentes. Hæc si ita sint, montes significabunt Apostolorum inuictam animi magnitudinem, & constantiam in euangelio diuulgando, sonitum uero maris, & tumultum populorum intelligemus esse conuersionem contra ipsos à cunctis nationibus factam, quæ tandem magnitudine prodigiorum commota, & diuino spiritu afflata depositis odijs religioni sanctæ adhæserunt. Hæc profecto satis aperte significare uidetur uersiculus sequens, cum enim uir sanctus ait, Egressus matutini, & uesperæ laudantes facies, hoc intelligit, omnes nationes uerum Deum pie, sanctæque ueneraturas, id quod Apostolorum opera, & studio perfectum est, quibus hoc præstantissimum munus à Deo assignatum erat. cum autem partes orientis, & occidentis dicere uellet, dixit egressus auroræ, & uesperæ, quod ex altera parte dies, ex altera nox oriatur.

Visitasti terram ] Prædicat benignitatem Dei, qui res ad uictum, & cultum necessarias largitur, & prolixè suppeditet mortalibus. Sed Origenes, & Eusebius Cæsariensis, hæc omnia de terra Iudææ scripta esse, confirmant, quam Deus post reditum Hebræorum ex Babylone uberrimam, maximèque fecundam reddiderit, ut una cum libertate recuperata omnium rerum copia abundarent.

Flumen Dei ] Sic appellat Iordanem, ut sentit Origenes, & Eusebius Cæsariensis, quanquam sic uocare potest omnia flumina terræ Iudææ, quæ Deo consecrata erat.



# EXPLANATIO

Quoniam ita præparas eam ] Id est, quan-  
do terram ita irrigas, & fertilem reddis.

Coronabis annum ] Id est, omni genere  
frugum illum ornabis, & quacunque incedes, ferti-  
litem in agros instillabunt pedes tui. Simile est illud  
Virgilij, Implentur uallesq; canæ, saltusq; profundi  
& quacunque Deus circum caput egit honestum.

Exultatione colles accingentur ] Id est, gau-  
debunt omnium fructuum copia exornati. sed ut cæ-  
teras partes huius hymni, ita extremam hanc ego ar-  
bitror mysterijs CHRISTI aptissime conuenire,  
siquidem terræ fecunditas, quam uates sanctissimus  
tam eleganter, & copiose describit, significat uber-  
tatem uirtutum omnium, quibus humanum genus  
abundauit, posteaquam misericordiæ parens unige-  
nam filium suum è coelo demisit in terras, illasq; im-  
bribus, & saluari flumine sui spiritus irrigauit, op-  
tatiflimo tempore euangelij, quod tempus etiam  
CHRISTVS apud Esaïam annum diuinæ beni-  
gnitatis appellat. Tunc animi mortalium, qui steri-  
les, incultiq; squalebant, accepto semine euangelij red-  
diti sunt uberrimi, maximeq; feraces, & pulcherri-  
mos pietatis fructus ediderunt, tunc maxima lupo-  
rum uis in oues cōmutata est, seq; IESV CHRI-  
STO custodiendam, & pascendam credidit, tunc  
omnia plausu, gratulatione, & laudibus Dei perso-  
narunt.

## ARGVMENTVM PSAL. LXVI.

Inducit etiam hoc hymno gētem Hebræam loquen-

tem, & gratulantem, se longa illa seruitute Babylo-  
nica liberatam esse.

Victori Canticum Psalmi LXVI.

Jubilate Deo omnis terra, psalmum dicite gloriae  
nominis eius, date gloriam laudi eius.

Dicite Deo, quā terribilia sunt opera tua Domi-  
ne, in multitudine uirtutis tuae mentientur tibi ini-  
mici tui.

Omnis terra adoret te, & psallat tibi, psalmum  
dicat nomini tuo,

Venite, & uidete opera Dei, terribilis in consilijs  
super filios hominum,

Qui conuertit mare in aridam, in flumine trans-  
sierunt pede, ibi latati sumus in ipso.

Qui dominatur in uirtute sua in aeternum, ocu-  
li eius super gentes respiciunt, rebelles ne exalcentur  
in semet ipsis

Benedicite gentes Deum nostrum, & audiam fa-  
cite uocem laudis eius,

Qui posuit animam nostram ad uitam, & non  
dedit in commotionem pedes nostros.

Quoniam probasti nos Deus, igne nos examina-  
sti, sicut examinatur argentum.

Induxisti nos in laqueum, posuisti tribulationem  
in lumbis nostris, imposuisti homines super capita  
nostra.

Transiimus per ignem, & aquam, & eduxi-  
sti nos in refrigerium.

# EXPLANATIO

Introibo in domum tuam in holocaustis, reddam tibi uota mea, quæ distinxerunt labia mea.

Holocausta medullata offeram tibi cum incenso arietum, offeram tibi boves cum hircis.

Venite, audite, & narrabo uobis omnes, qui timetis Deum, quanta fecit animæ meæ.

Ad ipsum ore meo clamaui, & exaltaui sub lingua mea.

Iniquitatem si aspexi in corde meo, non exaudiet Dominus.

Certe exaudiuit Deus, & attendit uoci deprecationis meæ.

Benedictus Deus, qui non amouit orationem meam, & misericordiam suam à me.

# EXPLANATIO.

In multitudine uirtutis ] Hunc uersiculum interpretati sumus in explanatione Psalmi X V I I I.

Venite, & uidete ] Hortantur uniuersos mortales ad consideranda mirabilia facinora, quæ Deus effecit pro salute, ac incolumitate gētis Hebrææ, altius autem repetunt usque à rebus gestis ductu, & imperio Moysi. Nimirum harum rerum consideratio diligens, & cum fide coniuncta, incredibile dictu est, quantum animos excitet ad cultum, & uenerationem Dei, hic enim effigiem diuinæ benignitatis in pios, & seueritatis in improbos, tanquam in tabula pulcherrime expressam, & politam cernimus.

Rebelle ne exaltentur ] Qui deficiunt à Deo, eiusq; imperium repudiant, ne animos in altu

tollant, tanquam id impune sint laturi, quamuis ad tempus florere uideantur.

Benedicite gentes Deum nostrum ] Hortantur non solum Hebræos, sed etiam ceteras nationes ad canendas laudes ueri Dei, atque illis narrant beneficia sibi ab ipso tributa, in quo affectum exprimunt animi grati, & piæ, qui nihil æque cupit, atque misericordiam, & bonitatem Dei uniuersis mortalibus notissimam esse, ut unus omnium in colendo, & uenerando illo consensus existat.

Et non dedit in cōmotionem ] Id est, nos in maximis periculis, & calamitatibus saluos, & incolumes conseruauit, neque passus est, animos nostros à pietate deficere.

Ignem nos examinasti sicut examinatur argentū ] Exemplo suo docent, quid homines pietatis amantes de suis calamitatibus sentire debeant, nempe hoc, illas sibi consilio, & numine diuino accidere, ut quemadmodum aurum, atque argentum igne purgatur, ita illorum animi puriores fiant rebus aduersis, his enim rebus tanquam facibus & amor nostri, rerumq; fragilium, & caducarum exurit, & studia pietatis, ac innocentie mirabiliter accenduntur. At impiorum, quos Deus æterna morte multare constituit, longe dissimilis est ratio, non enim istorum labes, & uitia excoquit erumna, sed auget potius, & cumulat, illaq; crescente simul animorum crescit impietas. sic uno, eodemq; igne lutum durescere uidemus; ceramq; liquefcere.

Posuisti tribulationem in lumbis nostris ]

# EXPLANATIO

Cathenas significat, ut paraphrasis chaldaea interpretatur.

Et exaltaui sub lingua mea ] Id est, ipsum laudibus extuli. Monet autem exemplo suo, laudationem bonitatis diuinæ cum ipsius inuocatione coniungendam esse, ea enim res mirandum in modum fiduciam corroborat, atque animum inuocantis ad spem erigit impetrandi omnia, quæ postulat, eaq; spes minime fallit, animus enim sic affectus nullam à Deo accipere repulsam potest. Hæc omnia uno uersiculo complexus est David in psalmo XVIII, cum ait, laudans inuocaui Dominum, & ab inimicis meis saluus fui.

Iniquitatem si aspexi ] Quando (inquit) Deum precabar, si quod scelus animo conceptum habuissem, profecto illum non exorassem, neque id mirum, ut enim Deum exores, necesse est ipsum confiderenter ores, quod efficere non potes, si tibi alicuius sceleris, aut flagitij conscius sis.

Qui non amouit orationem meam ] Id est, qui non repudiavit meas preces, sed misericordiâ adhibuit in calamitate mea.

## ARGUMENTVM PSAL.

### L. XVII.

Orat Deum, ut Hebraeis, & ceteris gentibus salutem, & cognitionem sui impertiatur, idq; illum effecturum, prædicat.

Victori in Neginoth . Psalmus , & Canticum .

Psalmus LXVII.

Deus misereatur nostri , & benedicat nobis , illuminet uultum suum super nos ,

Ut cognoscatur in terra uia tua , in omnibus gentibus salutare tuum .

Confiteantur tibi populi Deus , confiteantur tibi populi omnes .

Latentur , & exultent gentes , quoniam iudicas populos in aequitate , & gentes in terra dirigis .

Confiteantur tibi populi Deus , confiteantur tibi populi omnes , terra dabit fructum suum .

Benedicat nos Deus , Deus noster , benedicat nos Deus , & metuant eum omnes fines terra .

Hic hymnus maxime insignis est , propterea quod magna breuitate maxima mysteria complectitur . itaque mihi uisum est faciendum , ut ipsum totum ea interpretandi ratione explanarem , quam Græci paraphrasim uocant .

Deus misereatur nostri , & benigne faciat nobis , respiciat ille placidis oculis calamitates nostras , & splendidissima luce sui uultus omnium errorum tenebras pellat ex animis . Misericordiæ parens mitte de coelo unigenam filium tuum , ut nota fiat omnibus in terris uia , quæ ducit ad sempiternam domum tuam : fac , uniuersæ gentes cognoscant , & uenerentur CHRISTVM tuum , per quem miseris mortu-

# EXPLANATIO

libus salutem, & beatam uitam donare promissisti. Immortales tibi gratias agant populi omnes; omnes populi sanctissimo numini tuo perpetuos hymnos canant, letentur, & gaudio exultent uniuersae gentes, quonia preces miserorum benignus exaudis. Tu Domine populos omnes tuo salutari spiritu amantissime gubernabis, tu nationes uage disiectas, & turbulentis erroribus implicitas ad ueritatis uiam reuocabis, tu filium tuum mortalibus ad uitam sempiternam ducē fidissimum dabis. Immortales tibi gratias agant populi omnes, omnes populi sanctissimo numini tuo perpetuos hymnos canant. scilicet tempus ueniet, cum terra, quae multa secula sterilis, incultaq; manserat, coelestes agricolas habebit, & suscepto semine euangelij foecundissima fiet, pulcherrimosq; omnium uirtutum fructus feret. Deus pater benigne faciat nobis filium mittens, Deus filius benigne faciat nobis patrem reconcilians, Deus spiritus sanctus benigne faciat nobis patrem filiumq; demonstrans. Utinam et Patrem, & Filium, & Spiritum sanctum, unum Deum indiuidue partitum, indiuidueq; coniunctum omnes terrarum fines pie, sancteq; uenerentur, & colant.

## ARGUMENTVM PSAL. LXVIII.

Videtur hunc pulcherrimum hymnum cecinisse, cum Syras, & Idumaeos, & Ammonitas bello superasset. Inducit autem populum praedicantem uerbis magnificentissimis potentiam Dei, & benignitatem eius erga se.

Victori, David Psalmus Cantici LXVIII.

Exurgat Deus, & dissipentur inimici eius, & fugiant, qui oderunt eum, à facie eius.

Sicut dispellitur fumus, ita dispellat eos. sicut fuit cera à facie ignis, sic pereant peccatores à facie Dei.

Et iusti latentur, & exultent in conspectu Dei, & delectentur in lætitia.

Cantate Deo, psalmum dicite nomini eius, extollite eum supremo coelo insidentem, lah nomen illi.

Exultate in conspectu eius patris orphanorum, & iudicis viduarum.

Deus in loco sancto suo, Deus qui inhabitare facit solitarios in familia.

Qui educit uinctos in compedibus, rebelles autem habitabunt terram uastam.

Deus cum egredereris in conspectu populi tui, cum pertransires in deserto,

Terra mota est; etiam coeli distillauerunt à facie Dei, ipse Sinai à facie Dei, Dei Israelis.

Pluuiam uoluntariam eleuasti Deus super hereditatem tuam, & eam laborantem recreasti.

Animalia tua habitabunt in ea, parasti in bonitatem tua pauperi Deus.

Dominus dedit sermonem laudatricibus exercitus magni.

Reges exercituum fugerunt, fugerunt, & familia domus diuisit spolia.



# EXPLANATIO

Si dormiatis inter ollas , pennæ columbæ deargen-  
tatae , & alæ eius in pallore auri .

Cum dispergeret omnipotens reges propter eam ,  
dealbatur ueluti nix in Zalmon . Mons Dei , mons  
Basan ,

Mons excelsus , mons Basan , ut quid exilitis mon-  
tes excelsi

Aduersus montem , in quo beneplacitum est Deo  
habitare ? etenim Dominus habitabit in æternum ,

Currus Dei uiginti millia , multa millia angelo-  
rum , Dominus in eis ( sicut ) in Sina , & in san-  
ctuario .

Ascendisti in altum , cepisti captiuitatem , accepisti  
dona in hominibus ,

Et etiam rebelles , propterea quòd inhabitat Domi-  
nus Deus .

Benedictus Dominus quotidie , oneret nos beneficijs  
suis Deus salutarium nostrorum .

Deus noster Deus saluos faciendi , & Dei Domini  
est exitus mortis .

Utique Deus cõfregit capita inimicorum suorum ,  
uerticem capilli perambulantis in delictis suis .

Dixit Dominus , ex Basan reducam , reducam de  
profundis maris ,

Ve intingatur pes tuus in sanguine , lingua canum  
tuorum ex inimicis , ab ipso ,

Viderunt incessus tuos Deus , incessus Dei mei , re-  
gis mei , qui est in sanctuario .

Præcedunt cantores , sequuntur psallentes in me-  
dio iuuenularum tympanistiarum .

In ecclesijs benedicite Deo Domino de fonte israel .

Ibi ex Benjamin paruulo dominans eis ,

Principes iuda in uestibus suis acu piētis, principes  
Zabulon , & principes Neptalim .

Mandauit Deus tuus fortitudinem tuam , confir-  
ma hoc Deus , quod operatus es in nobis

Propter templum tuum in Hierusalem . tibi offe-  
rent reges munera .

Incr. pa turbam lanceis armatam , congregatio-  
nem taurorum inter vitulos populorum , ut supplex  
ueniat cum fragmentis argenti .

Dissipa gentes, quæ bella uolunt, uenient optima-  
tes ex Aegypto, Aethiopia festinabit porrigere manus  
suas Deo .

Regna terræ cantate Deo , psallite Domino .

Psallite Deo insidenti cœlis cœlorum ab initio .

Ecce dabit uoci sue uocem fortitudinis, date forti-  
tudinem Deo. super israel magnificentia eius, & uir-  
tus eius in nubibus .

Terribilis Deus in sanctuarijs suis, Deus israel ipse  
dabit uirtutem , & fortitudinem plebi suæ , benedi-  
ctus Deus .

## EXPLANATIO .

Exurgat. ] Forma huius uocis, & earum,  
quæ proxime sequuntur, in uersiculis Hebræis tempus  
futurum indicat. diximus autem alio loco; Dauidem  
sæpenumero præsentia uerbis tempus futurum signifi-  
cantibus exprimere, id quod perspicuum esse potest  
uel ex illo uersiculo Psalmi XXXVI. Homines

# EXPLANATIO

Et iumenta saluabis Domine . Hoc cum ita sit , mihi maxime probandi uidentur , qui uerterunt ex Hebræo ad hunc modum , Exurgit Deus , Et dissipantur inimici eius , Et fugiunt , qui oderunt eum , a facie eius , Et quæ sequuntur , eodem modo . Hæ sententiæ sic expressæ longe plus ponderis , Et dignitatis habent , Et magis conueniunt tum argumento hymni , quo uictoria iam adepta celebratur , tum ipsius hymni proœmio , in quo locus communis de prouidentia Dei copiose , Et splendide tractatur , ut populus intelligat , quicquid domi , militiaq̃ feliciter administratur , tribuendum esse misericordiæ diuinæ . itaque horum uersiculorum hæc est sententia , Deum res humanas non negligere , sed piorum , impiorumq̃ habere rationem , atque alteros lætitia , Et uoluptate , alteros poenis grauissimis afficere .

Iah nomen illi ] Hebræi dicunt , hoc nomen Deo impositum esse ad significandam illius uim , omnium rerum creatricem .

Exultate in conspectu ] Prædicauerat potentiam Dei improbos euertentem , nunc prædicat eius benignitatem bonos maximis beneficijs afficientem .

Deus in loco ] Deus in summo quidem cœlo habitat , curat tamen humilia , Et res humanas pro infinita bonitate sua administrat .

Deus qui inhabitare ] Deus ( inquit ) facit , ut qui soli , Et sine liberis uitam debebant , habeant domum familiæ florentem .

Rebelle autem habitabunt ] Impij , Et

contemptores Dei eadem poenas luunt, atque incolunt loca uasta, & sterilia, at pii ducuntur à Deo ex locis desertis ad terras fertiles, & amœnas. Huius rei exemplum præclarissimum ponit uir sanctus, cum subiungit, Deus cum egredereris &c. Sed fac, impios, & contemptores Dei uel in florentissimis urbibus, atque in maxima rerum omnium affluentia uitam perducere ad extremam senectutem, tamen hæc sententia uerissima est, ut enim uir pius, quocunque loco ætatem agat, in cœlo est, sic impius ubique miser est, & tanquam relegatus in uastam, & desertissimam solitudinem, quæ ipsi omnem uitæ huius fructum auferat.

Etiam cœli distillauerunt ] Etiam (inquit) cœlum ipsum imbribus, & tempestatibus præsentiam Dei testatum est, & ipse mons Sina tremefactus est. Hæc eadem memorant Delbora, & Baracus in hymno, quem Deo cecinerunt cæsis ad internecionem Cananæorum copijs. Domine (inquiunt) cum exires de Seir, & transires per regiones Edom, terra mota est, cœliq; ac nubes distillauerunt aquis, Montes fluxerunt à facie Domini, & Sinai à facie Domini Dei Israel.

Pluuiam uoluntariam ] sic appellat pluuiam tempestiuam, & qualem homines optarent, sed possumus etiam uertere ex Hebræo, pluuiam copiosam. Hæreditatem uero Dei uocat, uel terram ipsam iudeam, uel potius gentem ipsam Hebræam, quam Deus tanquam agrum hæreditarium excolendum susceperat, & cum sterilis esset, & omnium

bonorum egens, salutaribus, & fecundis imbribus misericordiae suae irrigauit, & fertilem, & bonis omnibus abundantem reddidit.

Animalia tua ] Sic appellat homines pios, & ueri Dei cultores.

Dominus dedit sermonem ] Huc usque pertinet proœmiũ hymni, nunc celebrat populus uictoriã Davidis, Deus (inquit) suppeditauit materiam carminis mulieribus, quæ solent uictorias Ducum choris, & cantibus celebrare. Huius consuetudinis mentio fit in libris Regum, in quibus scriptum est, Mulieres Sauli redeunti è bello obuiam processisse cantantes, Saul occidit mille, David decem millia.

Si dormiatis inter ollas ] Sape iam diximus, linguam Hebræam admodum concisam esse, & orationibus imperfectis abundare: cuiusmodi est uersiculus iste, qui hanc sententiam continet: si tam atri, & sordidi sitis, quàm ij, qui iacent inter ollas fuliginosas, polliceor tamen, uos in posterum fore tan nitidos, & candidos, ut alis columbæ argenteis, & instar auri fulgentibus uos comparare possitis, id est, sic habetote, uos deposito luctu, & mœrore omni posthac lætos, & fortunatos fore. ut enim color ater luctum, & calamitatem, sic albus lætitiã, & res secundas significat.

Cum contereret omnipotens ] Hæc est altera allegoria similis superiori. Cum (inquit) Deus copias Regum aduersariorum cederet, ac profligaret, hæreditas ipsius, quæ antea nigra, & mœroris plena erat, candida tanquam nix effecta est, & dolo-

rem cantu, & lætitia commutauit. Sic explanat hunc locum Abrahamus Esdra. Est autem Zalmon Iudææ mons, quem aiunt ferè perpetuis niuibz albere.

Mons Dei, mons Basan ] Laudat urbem Hierosolyma, quam appellat montem Basanem, id est, fertilem, & pinguem, nam Basan regio est uberima.

Vt quid exilitis ] Quid ( inquit ) ò Reges bella inferitis ciuitati, quam Deus carissimam habet, & sua præsentia tuetur?

Curru Dei ] Nō desunt nobis curru cœlestes, non desunt acies ipsorum cœlitum, inter quas incedit Deus præsentiam suam nobis exhibens, ut eam olim in monte Sina exhibuit, & in sacrario suo sancto etiam nunc exhibere solet.

Ascendisti in altum ] Populus his uerbis appellat Dauidem, qui hostium mœnia expugnauerat, & rebelles nationes bello domuerat, & ab ijs præstantissima dona acceperat. Hæc autem uictoria illi contigit, propterea quòd Deus est custos Hebrææ gentis, & in eorum ciuitate domicilium habet. Sed hæc Dauidis uictoria CHRISTI uictoriam significabat, qui de peccato, & morte, & Diabolo triumphauit, ac rebelles nationes imperio suo subiecit, propterea diuus Paulus in Epistola ad Ephesios scripta hunc uersiculum ad ipsum refert.

Et Dei Domini est exitus mortis ] Id est, Deus est, qui misericordia sua facit, ut homines exeant è ianua mortis, & grauissimis peri-

culis liberentur .

Verticem capilli ] Id est , confregit caput capillatum eius , qui perseuerabat in peccatis . uidetur autem designare Ducem hostium , uel usus est numero singulari pro numero multitudinis .

Dixit Dominus ex Basan ] Cum ad bellum profisceremur , promisit Dominus , nos tali uictoria posituros , qualem olim reportauimus ex Basane , ubi regem , cui nomen erat Og , cum tota gente delcui-  
mus , qualem item adepti fuimus , cum mare rubrum pedibus transmitteremus , depresso Pharaone cum innumerabili exercitu . sic denique dixit Dominus , cædam , & trucidabo hostes tuos o gens mea , ut pedes laues sanguine illorum , & canes tui eodem ipso cruore saturentur .

Viderunt incessus tuos Deus ] Senserunt hostes uim , & potentiam tuam , ac penè oculis uiderunt te pro nobis propugnantem , & suas uires , opesq; frangentem .

Præcedunt cantores ] Describit pompam , & triumphum populi uictoris .

In ecclesijs benedicite ] Hæc sunt uerba cantorum , quibus hortantur populum ad hymnos canendos . In cœtu , & conuentu (inquiunt) sancto dicite hymnos Deo uos , qui prognati estis ex Iacob , & ex semine eius tanquam e fonte manatis . Hæc eadem orationis exornatione usus est Esaias , cum ait , Audi te domus Iacob , qui uocamini nomine Israel , & de aquis Iudæ existis .

Ex Benjamin ] Recenset principes tribuum ,  
qui

qui interfuerunt triumpho . Aderant(inquit)ex tribu Beniamini ij , qui præsunt ei familie . appellat autem eam tribum paruulam ob paucitatem hominum,quippe quæ penè funditus deleta fuerat ob scelus Gabaonitarum .

In uestibus suis acu pictis ] Diuus Hieronymus uertit , in purpura sua , sed eadem est sententia . Non nulli ex recentioribus uertunt hoc modo , principes Iuda lapis eorum , id est uis & robur .

Mandauit Deus tuus ] Deus(inquiunt)ò Israel suppeditauit tibi robur, quo hostes superasti .

Confirma hoc Deus, quod operatus es in nobis propter templum tuum in Hierusalem ] Sic etiam uertit ex Hebræo hunc locum Symmachus . perge(inquiunt)nos tueri,& tuis præstantissimis beneficijs ornare propter sanctissimum templum tuum, quod est Hierosolymis , hinc enim religio , & purissimus cultus numinis tui propagabitur , & reges externi magnificentissima dona tibi afferent .

Congregationem taurorum inter uitulos populorum ] Tauros appellare uidetur eos , qui opibus , & potentia excellebant inter hostium principes , & duces, quos uitulos populorum uocat . De hac orationis exornatione dictum est in explanatione psalmi XXII .

Venient legati ] Prædicat, omnes nationes cultum , & cognitionem ueri Dei esse accepturas .

Ecce dabit uoci suæ uocem uirtutis ] Alij existimant hanc sententiam generalem esse , ut sensus



ji, Deum tribuere uerbis suis uim, & pondus, ut uoci eius illico omnia obediāt. Hoc si ita sit, positum est hoc loco, ut etiam multis alijs, uerbu futuri temporis pro uerbo temporis instantis. Alij hanc uocem interpretantur esse uocem euangelij, quam uaticinetur summam uim habituram ad mouendos animos mortalium. Hæc sententia satis apte huic loco conuenire uidetur, in quo uates sanctus prædicit, omnes nationes relictis falsis Dijs religioni sanctæ adhesuras. hoc autem uim euangelij perfectum esse, nemo est qui nesciat: quam uim nisi Deus illi tribuisset, inanis sine dubio fuisset omnis Apostolorum labor.

Date fortitudinem Deo ] Id est, agnoscite, & prædicatē, omnem uim, robur, atque efficacitatem ita Dei propriam esse, ut omnia, quacunque in uniuersa rerum natura uigent, ac pollent, illico in nihilum interitura sint, nisi continenter illis ex augustissimo ipsius numine tanquam ex perenni, uberri-  
moq; fonte omnis existendi, permanendi, ac efficiendi uis munifice, prolixè, large suppeditetur.

Super Israel magnificentia eius ] Id est, in gente hebræa elucet in primis gloria, & maiestas ipsius, eiusq; potentia terra, cæloq; uiget, ac omnia moderatur.

ARGUMENTVM PSAL. LXIX.

Inducit loquentes homines sanctos, qui uastatis, & direptis Hierosolymis in seruitutem a Babylonijs abdu-  
cti fuerant, & in magnis calamitatibus uersabatur.

sed non nulla inferuntur, quæ ad anagogen relata  
pertinent ad Dominum nostrum IESVM CHRI-  
STVM.

Victori pro filiis, David Psalmus LXXIX.

Saluum me fac Deus, quoniam intrauerunt aquæ  
usque ad animam meam.

Infixus sum in limo profundi, & non est subsi-  
stentia.

Veni in profunda aquarum, & tempestas demer-  
sit me.

Laboravi clamans, raucae factæ sunt voces meæ,  
defecerunt oculi mei expectantes Deum meum.

Multiplicati sunt super capillos capitis mei, qui ode-  
runt me gratis.

Inualuerunt, qui persequuntur me inimici mei in-  
iuste. quæ non rapui, tunc exolvebam.

Deus tu scis insipientiam meam, & delicta mea a  
te non sunt abscondita.

Ne erubescant in me, qui expectant te Domine,  
Domine exercituum.

Ne confundantur in me, qui quærunt te Deus  
Israel.

Quoniam propter te sustinui opprobrium, ope-  
ruit confusio faciem meam.

Extraneus factus sum fratribus meis, & peregrin-  
us filiis matris meæ,

Quoniam Zelus domus tuæ comedit me, & op-  
probria exprobrantium tibi ceciderunt super me.

# EXPLANATIO

Et fleui, in ieiunio (affixi) animam meam, & factum est in opprobrium mihi,

Et posui uestimentum meum saccum, & factus sum illis in parabolam.

Aduersum me loquebantur, qui sedebant in porta, & in me psallebant, qui bibebant uinum.

Ego uero orationem meam ad te Domine, tempus beneplaciti Deus.

In multitudine misericordiae tuae exaudi me in ueritate salutis tuae.

Eripe me de luto, ut non infigar, libera me ab iis, qui oderunt me, & de profundis aquarum.

Non me demergat tempestas aquae, neque absorbeat me profundum, neque claudat super me puteus os suum.

Exaudi me Domine, quoniam benigna est misericordia tua, secundum multitudinem miserationum tuarum respice in me,

Et ne auertas faciem tuam a seruo tuo, quoniam tribulor, uelociter exaudi me,

Appropinqua animae meae, & libera eam, propter inimicos meos eripe me.

Tu scis improprium meum, & confusionem meam, & ignominiam meam,

In conspectu tuo sunt omnes, qui tribulant me, improprium contriuit cor meum, & mœrore confectus sum.

Et expectaui, qui simul contristaretur, & non fuit, & qui consolaretur, & non inueni.

Et dederunt in escam meam fel, & in siti mea po-

eduerunt me aceto .

Fiat mensa eorum coram ipsis in laqueum , & in retributionem , & in scandalum .

Obscurentur oculi eorum , ne uideant , & dorsum eorum semper incurua .

Effunde super eos iram tuam , & furor iræ tuæ comprehendat eos .

Fiat habitatio eorum deserta , & in tabernaculis eorum non sit qui inhabitet :

Quoniam quem tu percussisti , persecuti sunt , & de dolore uulneratorum tuorum locuti sunt .

Appone iniquitatem super iniquitatem eorum , & non intrent in iustitiam tuam .

Deleantur de libro uiuentium , & cum iustis non scribantur .

Ego sum pauper , & dolens , salus tua Deus protegat me .

Laudabo nomen Dei cum cantico , & magnificabo eum in laude .

Et placebit Deo super bouem , & uitulum cornua producentem & ungulas .

Videant pauperes , & latentur . querite Deum , & uiuet anima uestra ,

Quoniam exaudiuit pauperes Dominus , & uirtutes suos non despexit .

Laudent illum cœli , & terra , mare , & omnia reptilia in eis ,

Quoniam Deus saluum faciet Sion , & ædificabit ciuitates Iudæ ,

Et inhabitabunt ibi , & hereditate acquirent eam ,

Et semen seruorum eius possidebit eam, & qui diligunt nomen eius, habitabunt in ea.

## EXPLANATIO.

Saluum me fac Deus.] Explanatores Latini IESVM CHRISTVM, Græci gentem Hebræam in his uersibus loqui existimant, neque tamen hæc opinio Græcorum impedit, quo minus aliquæ sententiæ ad ipsum CHRISTVM commodissime referantur, nam & illud Osæ, Ex Aegypto uocaui filium meum, de gentis Hebrææ liberatione dictum est, quod tamen diuus Matthæus ad CHRISTVM uerissime transfert, usus ea interpretandi ratione, quâ theologi Græci ἀναγωγὴν uocant, cum scilicet apertum orationis argumentum ad sententias interiores, sanctioresq; traducitur. Hæc hominibus pijs nequaquam absurda uideri solent, quippe qui didicerint ex diuo Paulo, omnia, quæ Hebræis accidebant, rerum futurarum umbras, & imagines extitisse, corpus autem esse CHRISTI, cuius mysteria sub talium imaginum integumentis occultata sunt, ut ab ipsorum aspectu oculi profanæ multitudinis arcerentur: itaque illa hanc reconditam interpretandi rationem rem planè commentitiā, & maxime ridiculam putat, nos uero undè cum CHRISTO gratias agimus Deo, qui homines arrogantes, atque inani opinionem sapientiæ inflatos, de suis mysterijs, in quibus uera sapientia sita est, calatos esse uoluerit, eaq; cum hominibus idiotis, & maxime contemptis liberalissime communicarit.

Intraverūt aquæ) Sæpe iam diximus, aquas in literis sanctis aliquando significare pericula, & calamitates.

Non est subsistentia ] Id est, non possum pedibus consistere. de hac allegoria dictum est in explanatione Psalmi XL.

Defecerunt oculi mei ] Tam (inquit) oculi mei nimia lassitudine defecerunt, dū assidue cælum suspiciunt expectantes, ut Deus meus opem mihi ferat. Itaque proponitur nobis præclarum veræ pietatis exemplum, quæ neque spem abiicit, neque ab orandi studio deterretur, licet aures Dei à precibus abhorere videantur.

Quæ non rapui, tunc exolvebam ] Id est, eorum malefactorum poenas dabam, quæ non admiseram. Hoc nemo mortalium tam vere de se ipso affirmare potuit, quàm IESVS CHRISTVS, qui, cum ab omni macula peccati purissimus esset, tanquam insignis aliquis latro in crucem sublatus est, atque omnium delictorum, & scelerum, quæ humanum genus commiserat, acerbissimas poenas ipse persolvit.

Deus tu scis ] Accusant me stultitiæ, & improbitatis, at tu nosti Domine, num quicquam aut stulte, aut improbe admiserim.

Ne erubescant ] Ne quaeso Domine permittes, ut qui confidunt præsidio tuo, cadant animis, dū cernunt, me causa nominis tui tanta mala perpeti, nec proficere quicquam auxilium tuum implorando.

Extraneus factus sum ] Multi enim ex ca-

# EXPLANATIO

prius abducti reliquerant domi parentes, & fratres, & ab ijs diu abfuerant. uel significat, etiam suos fratres germanos animo abalienato esse, qui omni genere officij calamitatem, & moerorem fratris leuare debuerant.

Et opprobria exprobrantium tibi ceciderunt super me ] Id est, non minus, immo uero magis tangunt me probra, quibus te insectantur, quàm si mihi maledicerent, quippe cum & pietatem uiolent, & certam sibi perniciem ea re comparent. Hunc totum uersiculum Apostoli meritissimo sub persona CHRISTI prolatum esse iudicarunt, nemo enim alius unquam tanto studio defendendæ, ac propagandæ religionis inflammatus fuit, nemo æque mortalium peccata miseratus est, nemo denique præter ipsum illa omnia tanquam sua & agnouit, & proprio sanguine luit.

Aduersum me loquebantur ] Id est, maledicebant mihi in locis publicis, & celebribus, cuiusmodi erant apud ueteres urbium portæ, ad quas cõueniebant ciues, & iudicia agitabantur, ut alio loco dictũ fuit.

Et in me psallebant, qui bibebant uinum ] Id est, in suis compotationibus carmina in meum dedecus facta canebant. simile est illud Hieremiæ, Factus sum in derisum omni populo, canticum eorum tota die.

Ego uero orationem meam ] Id est, cum illi tam acerbe me uexarent, ego auxilium tuum asfiduis precibus implorabam. Hoc est unicum perfugium, & portus homini pio rerum aduersarum tem

pestate iactato.

Tempus beneplaciti Deus ] Clarius uertit Symmachus hoc modo, tempus reconciliationis Deus, satis (inquiunt) poenarum dedimus, iam tempus est, ut nos in gratiam recipias, & tantis calamitatibus libereres.

Et dederunt in escam meam fel, & in siti mea potauerunt me aceto ] Queruntur homines sancti, se, cum egerent consolatione, non modo non recreatos, & leuatos mœrore, sed etiam magis excitatos fuisse, ut si quis fame, sitiq; laboranti fel, acetumq; præberet. sed Dominus noster IESVS CHRISTVS non solum contumelijs, & maledictis iactatus est, cum afflicto, & mœrenti consolatio adhibenda foret, sed etiam, cum suspensus in patibulo sitiret, acetum pro uino gustare coactus est, itaque huius uersiculi uerba ipsi conueniunt in primis.

Fiat mensa eorum ] Id est, unde lætitiā, & iucunditatem sibi quærunt, ibi laqueum mortis inueniant, & qualem mensam mihi obtulerunt, talem habeant ipsi. sed hæc cum dicatur contra impios, atque hostes Dei, piorumq; omnium, in primis conueniunt in aduersarios CHRISTI, quibus mensa diuinorum uoluminum, & salutaria quæq; se uertunt in pestiferum uenenum, perinde ut eorum mereatur impietas. Itaque diuus Paulus de Iudæorum miseria, & excæcatione scribens, hos uersiculos in ea re testes citat.

Obscurentur oculi eorum ] Oculos mentis



significat, dorsi autem incuruatio significat seruitutis onus.

Quoniam quem tu percussisti ] Id est, quam gentem tu pro peccatis suis afflixisti, eam gentem isti crudeliter persecuti sunt, & calamitatem calamitati addiderunt.

Et de dolore uulneratorum ] Id est, consultarunt de ijs affligendis, quos tu uulneraueras. uel intelligit, impios de calamitatibus piorum iucunde narrare solitos.

Laudabo nomen Dei ] Nunc prædicit, Hebræos seruitute Chaldaeorum liberatum iri.

Et ædificabit ciuitates Iudæ ] Quas hostes euerterant. sed hæc omnia in primis uera euaserunt, cum Deus CHRISTO ab inferis excitato mortalium animos miserrima seruitute oppressos per euangelium redimeret, atque omnibus terrarum oris concilia, coetusq; hominum arctissimo religionis uinculo sociaret, qui coetus aptissime ciuitates Iudæ, id est, laudationis, & confessionis nominantur, quando ueri Christiani soli ex omnibus hominibus Deū uere laudant, & confitentur, id est, pie, sancteq; uenerantur, & colunt. Cur autem cælum, & terra, & mare, & reliquæ mundi partes latari debbant, & Deum laudibus extollere CHRISTO regnum ineunte, & humanum genus in libertatem uendicante, infra Deo fauente explicabimus.

## . ARGVMENTVM. PSAL. LXX. .

In maximo periculo uersans implorat auxilium  
Dei aduersus inimicos .

Victori , David ad recordandum  
Psal. LXX.

Deus in adiutorium meum intende , Domine ad  
adiuandum me festina.

Confundantur , & ignominia afficiantur , qui  
querunt animam meam.

Conuertantur retrorsum , & erubescant , qui uo-  
lunt mihi mala .

Conuertantur propter confusionem suam , qui di-  
cunt mihi Euge Euge .

Exultent , & letentur in te omnes , qui querunt  
te , & dicant semper , magnificetur Dominus , qui  
diligunt salutare tuum .

Ego uero egenus , & pauper sum , Deus festina  
ad me .

Adiutor meus , & liberator meus es tu , Domine  
ne moreris .

## EXPLANATIO.

Conuertantur propter confusionem suam ]  
Id est , qui mihi insultant dicentes , Euge , Euge , con-  
uertantur in fugam , & hæc sit merces ignominie ,  
qua conantur innocentes afficere .

# EXPLANATIO

## ARGVMENTVM PSAL. LXXI.

Etiam hoc pulcherrimo hymno implorat auxilium Dei, & eius erga se misericordiam predicat.

### Psalmus LXXI.

In te Domine speravi, ne confundar in aeternum,  
in iustitia tua libera me, & eripe me.

Inclina ad me aurem tuam, & salua me.

Esto mihi in petram fortitudinis, ad quam confu-  
giam iugiter. mandasti, ut saluum me faceres,

Quoniam petra mea, & arx mea es tu.

Deus meus eripe me de manu peccatoris, & de  
manu contra legem agentis, & uiolenti:

Quoniam tu es expectatio mea Domine, Domine  
spes mea à iuuentute mea.

A te sustentatus sum ex utero, de uentre matris  
meae tu eduxisti me.

De te laus mea semper. tanquam prodigium fa-  
ctus sum multis, & tu fiducia mea fortis.

Repleatur os meum laude tua, tota die gloria  
tua.

Ne proijcias me in tempore senectutis, cum dese-  
cerit uirtus mea, ne derelinquas me:

Quia locuti sunt inimici mei de me, & qui obser-  
uant animam meam, consilium fecerunt simul,

Dicentes, Deus dereliquit eum, persequimini, &  
comprehendite eum, quia non est, qui eripiat.

Deus ne elongeris à me, Deus meus in auxilium

meum festina .

Confundantur , & deficiant aduersantes animæ meæ , operiantur confusione , & ignominia , qui quæ runt mala mihi .

Ego autem semper sperabo , & adiuciam super omnem laudem tuam .

Os meum annuntiabit iustitiam tuam , tota die salutare tuum .

Quoniam non cognoui numerum , ingrediar in potentia Domini , Domine recordabor iustitiæ tuæ solidius .

Deus docuisti me à iuuentute mea , & usque nunc pronuntiabo mirabilia tua ,

Et usque in senectam , & canos , Deus ne derelin quas me ,

Donec annuntiem brachium tuum generationi ( præsentis ) & omni , quæ uentura est ,

Potentiam tuam , & iustitiam tuam . Deus usque ad altissima , quæ fecisti , magnalia , Deus quis similis tibi ?

Qui ostendisti mihi tribulationes multas , & malas , & conuersus uiuificasti me , & de abyssis terræ iterum reduxisti me .

Multiplicasti magnificentiam meam , & conuersus consolatus es me .

Et ego celebrabo te in uasis psalmi , ueritatem tuam Deus meus , psallam tibi in cithara ò sancte Israel .

Exultabunt labia mea , cum cantauero tibi , & anima mea , quam redemisti .

# EXPLANATIO

sed & lingua mea tota die loquetur iustitiam tuam, cum confusi, & pudore affecti fuerint, qui quærent mala mihi.

## EXPLANATIO.

Ne confundar ] Id est, ne quæso permittes, ut ea spes unquam fallat me, sed pro iustitia, & bonitate tua libera me.

Esto mihi in petram ] Esto mihi loco arcis munitissimæ, ad quam pateat mihi semper aditus, tibi certe semper curæ fuit salus mea.

Tanquam prodigium ] Ego quidem ob assiduas calamitates factus sum ueluti portentum hominibus, meq; omnes a te derelictum putant, at ego omnem meam spem in te locatam habeo.

Repleatur os meum ] Libera me eadem his periculis, & calamitatibus, ut possim læto, & tranquillo animo tuas laudes celebrare.

Ne proijcias me ] Ne spolia presidio tuo senectutem meam imbecillam, qui mihi ab ipsa infantiæ semper affuisti.

Qui obseruant animam meam ] Id est, qui uitæ meæ insidiantur.

Ego autem semper sperabo ] Iactant quidem aduersarij mei, me tuo penitus auxilio destitutum esse, sed nunquam animum meum deterrecerunt, quo minus confidat infinitæ misericordiæ tuæ.

Et adijciam super omnem ] Id est, nunquam intermittam cumulare laudibus laudes tuas.

Quoniam non cognoui numerum. ] Sic etiam uerit Symmachus, ut refert Theodoretus. est igitur sensus. Quotidie prædicabo iustitiam, & misericordiam tuam, & beneficia, quæ à te maxima accepi, nunquam intermittam commemorare, tot enim ac tanta sunt, ut eorum numerum ignorem.

Ingrediar in potentia Domini ] Quamquam innumerabilia sunt ea beneficia, quæ Deus in me contulit, neque mortalis aliquis potest pro dignitate prædicare iustitiam, & bonitatem eius, tamen ego fretus auxiliò ipsius suscipiam hoc negotium celebrandi sanctissimum numen, & cæteris omnibus rebus omiſſis memor ero Domine tantum iustitiæ tuæ.

Donec annuntiem brachium tuum ] Id est, robur ac potentiam tuam.

Deus usque ad altissima ] Id est, ò Deus præclara facinora, quæ effecisti, ad cælum usque pertinent, id est maxima sunt, & maxime admirabilia. Non ignoramus interpretes recentiores aliter hunc locum ex Hebræo conuertisse, sed nos secuti sumus Symmachum, & Aquilam, qui uerba huius uersiculi ita interpretati sunt, & distinxerunt, ut nos emendauimus.

Qui ostendisti mihi ] Id est, qui me multis, & illis quidem magnis calamitatibus affecisti, & conuersus ad clementiam perditum, & penè extinctum in lucem reuocaſti, & ab infimo loco ad altissimum dignitatis gradum perduxisti. Simile est illud Annæ, Dominus mortificat, & uiuificat, deducit

# EXPLANATIO

ad inferos, & reducit. Harum rerum altera nota fit nobis inanitas nostra, altera benignitas Dei. ex illa notitia nobis diffidere, ex hac Deo confidere discimus.

## ARGUMENTVM PSAL. LXXII.

Describit magnitudinem, iustitiam, & felicitatem regni Salomonis, sed multa inserit, quæ soli CHRISTO conueniunt, cuius imperij imago quædam fuit imperium regis istius.

### Salomoni, Psal. LXXII.

Deus iudicia tua regi da', & iustitiam tuam filio regis,

Ut iudicet populum tuum in iustitia, & pauperes tuos in iudicio.

Ferant montes pacem populo, & colles iustitiam.

Iudicabit pauperes populi, & saluos faciet filios pauperum, & conteret calumniatorem.

Timebunt te cum Sole, & coram luna in generationem, & generationem.

Descendet sicut pluuia in detonsum (pratum) & sicut imbres stillantes super terram.

Florebit in diebus eius iustus, & abundantia pacis, donec auferatur luna.

Et dominabitur à mari usque ad mare, & à flumine usque ad terminos terræ.

Coram illo procident Aethiopes, & inimici eius terram lingent.

Reges

Reges Tharsis, & insulæ munera offerent, reges Arabum, & Saba dona adducent.

Et adorabunt eum omnes reges, omnes gentes seruiant ei,

Quia liberabit pauperem clamantem, & pauperem, cui non erat adiutor.

Miserebitur pauperis & inopis, & animas pauperum saluas faciet.

Ex usuris, & iniquitate redimet animas eorum, & pretiosus erit sanguis eorum coram illo.

Et uiuet, & dabitur ei de auro Arabiæ, & orabunt pro ipso semper, tota die benedicent ei.

Erit pugillus frumenti in terra in summis montium (tam frugifer) ut concutiatu r uelut Libanus fructus eius, & flore bunt de ciuitate sicut herba terræ.

Extabit nomen eius in secula, coram sole propagabitur nomen eius,

Et benedicentur in ipso omnes gentes, & magnificabunt eum.

Benedictus Dominus Deus Israel, qui facit mirabilia solus,

Et benedictum nomen gloriæ eius in æternum, & replebitur gloria eius omnis terra. fiat, fiat.

Finium orationes Dauid filij Iesse.

#### EXPLANATIO.

Deus iudicia tua ] Id est, spiritum tuum illi impartire, ut omnia recte, atque ordine gerat, & iuste, ac sapienter regnum administret. His præ-



# EXPLANATIO

stantissimis donis, quæ populus optat Salomoni, Deus affecit in primis filium suum, qui natus est in familia Davidis, nam, ut scriptum est in euangelio Ioannis, & omnem iudicandi potestatem dedit illi, ut omnes honorent filium, sicut honorant patrem: & omnem suam iustitiam ita cum eodem communicauit, ut nemo ex iniusto fieri possit iustus nisi per **CHRISTVM**.

Ferant montes ] Id est, quemadmodum in magna fertilitate etiam montes, & colles solent frugibus abundare, ita omnia plena sint pacis, & iustitiæ. Quid si allegorias amplectamur, montes, & colles significabunt reges, & principes.

Iudicabit pauperes ] Id est, afflictos, & calamitosos subleuabit, ac tuebitur, neque permittet, illos calumnijs iniustorum hominum circumueniri. Hæc cum scriberet uates sanctus, non tam Salomonem, quam **IESVM CHRISTVM** oculis animi cernebat, qui extitit uindex, & parens nostræ libertatis, & calumniatorem, id est, Diabolum contudit, eueritq;.

Timebunt te ] Id est, mortales tantis beneficijs à te affecti ò Rex, tandiu numen tuum uenerabuntur, & colent, quandiu sol, & luna luce sua cuncta lustrabunt. Hoc Salomoni conuenire non potest, sed ei, quem ille significat, conuenit, id est, **CHRISTO**.

Descendet sicut pluuia ] Id est, similis erit pluuiæ rorantis, & terram sitientem irrigantis, unde manat agrorum fertilitas, & lætitia omnium

mortalium .

Florebit in diebus eius ] Hæc quoque adumbrata fuerunt in regno Salomonis , expressa uero , & perfecta sunt in regno CHRISTI , quam ob causam ipsum literæ sanctæ iustitiam , & pacem mortalium nominare solent . nam quod uates ait , pacē , quæ florebit temporibus huius regis , tandin duraturam , dum luna permanserit , quis non perspiciat , hoc ad regnum Salomonis accommodari nullo modo posse ?

Et dominabitur ] Salomonis imperium pertinebat à mari rubro usque ad mare Palæstinae , & fluuium Euphraten , & ultimos fines eius terra , quæ Deus promiserat Hebræis . in quo imperium CHRISTI adumbrabatur ; cui pater subiecit orbem terrarum ab Oceano Orientis , usque ad Oceanum Occidentis .

Et inimici eius terram lingent ] Id est , terram osculabuntur ad testificandam seruitutem . nam hodie quoque solent Asiatici , cum ad regem suū adeunt , terram coràm eo osculari .

Reges Arabum ] Hæc quidem contigisse Salomoni , narrat scriptor historiæ sacre in libro tertio Regum , & hunc regem dicit cunctis regibus auctoritate , ac sapientia plurimum præstitisse , ut non inimerito assenserent theologi , ipsum in sua persona CHRISTVM adumbrauisse , de quo Esaïas eadem ferè prædicit , quæ continentur hoc Dauidis uersiculo .

Et adorabūt eum omnes gentes ] Hoc ita pro-

# EXPLANATIO

prie conuenit CHRISTO, ut neque Salomoni, neque aly cuiquam ulla ratione congruere possit.

Quia liberabit pauperem ] Iure (inquit) ac merito omnes reges, & populi omnes sese CHRISTO in seruitutem pie, sancteq; dicabunt, quando ille erepturus est ipsos de manibus Diaboli, qui miseros omni ope destitutos crudelissime uexabat, & omnibus iniurijs, & contumelijs afficiebat.

Ex usuris, & iniquitate ] Alij uertunt ex Hebræo, ex fraude, & uiolentia.

Et pretiosus erit sanguis eorum coram illo ] Id est, magno uitam illorum aestimabit, neque impune feret, quisquis eorum sanguine sese cruentarit.

Et uiuet ] Et hæc in Salomone adumbrata fuerunt, at in CHRISTO politissime perfecta, quippe qui uitam uiuit beatissimam, & sempiternam, ei; mortales non aurum modo, sed etiam se ipsos donant, assidue precantes, ut regnum illius quotidie magis, magisq; dilatetur, neque unquam intermitunt gratias agere, quod ipsos non solum a morte sempiterna liberarit, sed etiam omnium bonorum suorum participes fecerit.

Erit pugillus frumenti ] Hyperbole est, qua exaggerat fertilitatem agrorum: dicit enim, ex paucis frumenti granis etiam in montibus tantas segetes, tamq; proceras esse prouenturas, ut agitante uento talem sonitum edant, qualem arbores Libani edere solent. Quin etiam dicit, incredibilem ciuium prouentum fore. quod quidem euenisse sub imperio Salomonis, scriptum est in libro tertio Regum. Iuda (in

quit) & Israel plurimi uelut arena maris erant edentes, & bibentes, & letantes. Regnante autem Christo incredibilis extitit prouentus hominum piorum, & bonorum cœlestium, quibus bonis aluntur animi ad aeternitatem, & crescunt incremento Dei.

Et benedicentur in ipso omnes gentes ] Hoc idem multis ante seculis Deus promiserat Abrahamo totidem penè uerbis, inquiring, benedicentur in semine tuo omnes gentes terræ. quæ uerba significant omnes nationes per CHRISTVM Deo reconciliandas esse, & salutem, ac beatam uitam consecuturos omnibus terrarum oris omnes, qui se, ac sua omnia ipsius potestati, fidei; commiserint.

Benedictus Dominus ] Nulla alia clausula poterat aptius conuenire huic hymno, in quo uates sanctus prædicit, Deum rem facturum tam admirabilem, tamq; inopinatam, ut ab ultima origine mundi nihil unquam ad aures mortalium tam incredibile perueniret.

Et replebitur gloria eius omnis terra ] Cum scilicet à CHRISTO omnes nationes ad cultum ueri Dei perducentur.

Finiunt orationes David ] Alij aliter hæc uerba interpretantur. ego quanquam non omnino improbare eos audeo, qui putant significari, in hoc hymno summam contineri earum rerum, quas David omnibus uotis expetebat, tamen libentius crediderim, hoc adscriptum esse propter aliquot psalmos, qui deinceps sequuntur: eos enim esse Asaphi, non Davidis, ipsæ inscriptiones indicant. Asaphum uero psalm

# EXPLANATIO

mos composuisse, testis est historia sacra: in secundo enim libro Paralip. scriptum est, Ezechiam regem Leuitis mandasse, ut laudarent Deum hymnis Davidis, & Asaphi uidentis. uidentes autem appellabant Hebraei eos, qui afflati spiritu diuino futura praeuidebant.

## ARGUMENTVM PSAL. LXXIII.

Scriptum est hoc carmen ad eos consolandos, qui angustiantur, cum uident improbos opibus, & potentia florere, bonos autem egestate, & uariis incommodis premi. uidetur autem inuochare in Saulem, & eius affeclas.

Canticum Asaph, psal. LXXIII.

Utique bonus est Deus Israel, ijs, qui mundo sunt corde.

Mei autem penè moti sunt pedes, penè effusi sunt gressus mei.

Quia zelauit super iniquos, pacem peccatorum uidens,

Quia non sunt ligamina in morte eorum, & uisum est robur eorum.

In labore hominum non sunt, & cum hominibus non flagellabuntur.

Ideo tenuit eos superbia, induti sunt iniquitate, & impietate sua.

Egrediuntur prae pinguedine oculi eorum, transierunt cogitationes cordis.

Diffoluerunt, locuti sunt de nequitia, contra excelsum locuti sunt.

Posuerunt in coelum os suum, & lingua eorum peruagatur terram.

Ideo conuertetur populus eius huc, aquæ (calicis) pleni sugentur eis.

Et dixerunt, quo modo scit Deus? & an est scientia in excelsis?

Ecce isti impij sunt, et felices in seculo obtinuerunt diuitias.

Ergo frustra mundavi cor meum, & laui in innocentia manus meas.

Et fui flagellatus tota die, & castigatio mea in matutinis.

Si, dixi, narrabo sic, ecce nationem filiorum tuorum reprobaui.

Et cogitavi, ut intelligerem hæc, sed labor est coram me,

Donec intrem in sanctuaria Dei, & intelligam nouissima eorum.

Certe in lubrico posuisti eos, deiecisti eos in desolationem.

Quo modo facti sunt in desolationem, subito defecerunt, consumpti sunt ab horroribus,

Velut somnium expergefacti. Domine in ciuitate imaginem ipsorum contemptibilem reddes.

Quoniam acescebat cor meum, & renes mei pungebantur, & insipiens eram, & non intelligebam.

Vt iumentum factus sum apud te, & ego semper tecum.

## E X P L A N A T I O

Tenuisti manum dexteram meam, & in consilio tuo deduxisti me, & cum gloria suscepisti me.

Quis mihi est in cælo? & tecum nil placet super terram.

Defecit caro mea, & cor meum, fortitudo cordis mei, & pars mea Deus in æternum.

Quia ecce, qui elongant se à te, peribunt, perdisti omnes, qui fornicantur abs te.

Mihi autem adherere Deo, bonum est, posui in Domino Deo spem meam,

Vt annuntiem omnia opera tua.

## E X P L A N A T I O.

Vtique bonus, ] Certe (inquit) Deus in Israellem beneficus est, & maxime benignus, est inquam talis in eos præcipue, qui puro sunt animo, id est, qui neque rebus piorum aduersis, neque prosperis impiorum adducuntur, ut de bonitate, & providentia Dei minus pie sentiant. at animus meus harum rerum specie tam vehementer commotus est, ut parum abfuerit, quin de recta sententia depellerer, atque in Deum grauissime peccarem.

Quia non sunt ligamina ] Non solum (inquit) improbi late, & iucunde uiuunt, sed etiam accidere solet, ut soluti omni dolore, & cruciatu placide, & tranquille moriantur. Ita hunc locum interpretantur Hebræi. Quin etiam Aquila interpres doctissimus in eandem sententiam uertit hoc modo, nulli cruciatus interueniunt morti eorum.

Et uiuidum est robur eorum ] Alij uertunt

ex Hebræo, & firma sunt palatia eorum, id est, accedit ad eorum felicitatem, quòd morientes relinquunt liberis magnificas ades, & luculentam hereditatem.

Egrediuntur præ pinguedine oculi eorum ] Diximus alio loco, pingues in literis sanctis appellari homines opibus, ac potentia florentes, opulentiam uero & prosperitatem uitæ plerumque sequitur importunitas, & superbia.

Transierunt cogitationes cordis ] Id est, etiam supra spem, & cogitationem illis omnia feliciter eueniunt.

Dissoluunt ] Id est, affligunt, & crudeliter uexant innocentes. sic explanant Hebræi.

Locati sunt de nequitia ] Hoc est, ad id furoris, & petulantia perducti sunt, ut non modo scelera, & flagitia sua non calent, sed etiam illa ostentare audeant, seq; in dedecore, ac turpitudine magnifice iactent.

Posuerunt in coelum ] Id est, neque Deo, neque hominibus maledicendo parcunt.

Ideo conuertetur ] Propterea populus Dei ad hæc studia nefaria se conuertit, & cum uideant, impios in magna potentia esse, atque omnium rerum copijs affluentibus florere, eorum uitam, & mores imitantur, & aquam pleni calicis bibunt, id est, opiones pestíferas istorum animo hauriunt, seq; in illas ingurgitant, ut sitientes aquam auidissime potare solent: quamobrem uulgo dicunt, qui fieri potest, ut Deus res humanas intelligat, aut gubernet? cum ho-



# EXPLANATIO

mines impij, & omnibus sceleribus contaminati opibus circumfluant & tranquillam, ac beatam vitam colant. Ego quoque hæc cum animo meo considerans in eam insaniam incideram, ut affirmarem, me frustra innocentie studuisse, quandoquidem assiduus calamitatibus uexor, neque ullus oritur dies, quin aliquam mihi molestiam portet. Hæc quidem ego temere effutiebam, sed rem diligentius expendens dixi, si ita loquor, & sentio, nonne improbo vitam, & studium omnium piorum? qui nullis incommodis, aut cruciatibus deterrentur ab innocentia, & uirtutis amore, neque existimant, se frustra pietatem coluisse, si uel maximis calamitatibus obruantur. itaque cum omni studio conarer rationem harum rerum inuestigare, ad extremum deterritus sum negotij magnitudine; & animaduerti, me ad cognitionem harum rerum peruenire non posse, nisi Deus aperiret mihi arcana providentie suæ, & uiderem, quem exitum habeant impij, qui uidentur in hac uita esse beati. uerū non ita diu in hac animi hæsitacione uersatus sum: uidi enim, istos homines sceleratos, & impios, quorum prosperitas me cruciabat, grauissimas poenas dare. Hanc sententiā tractat etiā in psalmo XCII.

Certe in lubrico ] Certe (inquit) lubrica sunt bona, quæ tuo permissu possidebant, lubrica inquam sunt, & qui per ea ingrediuntur, facillime labuntur.

Quo modo facti sunt ] Videtur designare Saulem, & eius familiam, quæ breui tempore funditus deleta est.

Velut somnium expergefati ] Euanuit ho

rum felicitas tanquam somnium hominis expergiscen-  
tis, similis inquam fuit somnio eius, qui iam sit ex-  
perrectus: somnium enim illud est inane, quanquam  
videtur delectare dormientem.

Imaginem ipsorum ] Imaginem appellat di-  
gnitatem, memoriam, & nominis claritatem, qui-  
bus rebus isti inflabantur, cū tamen eæ res nihil aliud  
essent nisi umbra quædam, & imago uana. sic etiā  
alio loco dixit, Certe in imagine pertransit homo, id  
est, uelut umbra quædam, & inanis imago uitam  
transit.

Quoniam acescebat ] Certe antequam ui-  
derem impios de suo florenti statu in maximas calami-  
tates præcipitari, mirandum in modum angebar. id  
autem mihi accidebat, propterea quod stultus, & in-  
sapiens eram. itaque uelut iumentum factus sum apud  
te: tu enim insipientem, & providentiæ tuæ rationes  
ignorantem duxisti quod nesciebam, duxisti inquam  
me per uarios casus, & discrimina ad maximum de-  
cus, & gloriam.

Quis mihi est in cœlo? ] Dum uir sanctus  
canit infinitam Dei bonitatem erga se, incredibili eius  
amore exardescens emittit has uoces: quis (inquit) mihi  
placeat in cœlo præter te? quem ego in terris amem,  
colam, suspiciam præter te? certe reliqua omnia mihi  
sordent, te unum ego amplector, te unum opto, te  
unum suspiro, atque ardeo, qui unus es amandus,  
& colendus, & toto animo desiderandus. tabescit  
desiderio tui animus, & corpus meum. tu Domine  
uis, & robur es mentis meæ, tu opes, tu copia, &

# EXPLANATIO

*sempiterna hereditas mea.*

*Qui fornicantur abs te* ] *Id est, qui te re-*  
*lieto aliud amant.*

*Vt annuntiem omnia opera tua* ] *Id est,*  
*ut benignitate tua seruatus, & omnibus bonis auctus,*  
*& ornatus perpetuis hymnis celebrem admirabilia fa-*  
*cinora bonitatis, & providentiæ tuæ.*

## ARGUMENTVM PSAL.

LXXIIII.

*Deplorat gens Hebræa incendium templi, & uas-*  
*tationem urbis sanctæ, & calamitates suas, orans*  
*Deum, ut aliquando tandem opem ferat.*

*Erudiens (Canticum) Asaph,*  
*psal. LXXIIII.*

*Vt quid Deus repulisti in perpetuum? iratus est*  
*furor tuus super oves pascuæ tuæ?*

*Memor esto congregationis tuæ, quam possedisti*  
*ab initio,*

*Virgæ hereditatis tuæ, quam redemisti, montis*  
*Sion istius, in quo habitasti.*

*Leua gressus tuos, ut uastes in perpetuum hostes*  
*uniuersos, qui mala intulerunt sanctuario tuo.*

*Rugierunt, qui oderunt te, in medio Synagoga-*  
*rum tuarum.*

*Posuerunt signa sua signa, cognitus est (inimicus)*  
*uelut in altum*

*Attollens in silua lignorum secures, & nunc scul-*

pturas eius simul bipenni, & malleis contriuerunt.

Incenderunt igni sanctuarium tuum, in terra pol-  
luerunt tabernaculum nominis tui.

Dixerunt in corde suo, depopulabimur simul. com-  
busserunt omnes synagogas Dei in terra.

Signa nostra non uidimus, iam non est propheta,  
& non est nobiscum, qui sciat, quousque.

Vsq̃ue quò Deus improp̃erabit inimicus? blasphemabit  
aduersarius nomen tuum in perpetuum?

Vt quid retrahis manum tuam, & dexterā tuā?  
de medio sinu tuo tolle (illam.)

Deus autem rex noster ab initio operatus est salu-  
tes in medio terræ.

Tu dissipasti in fortitudine tua mare, contriuisi  
capita draconum in aquis.

Tu confregisti capita Leniathan, dedisti eum escā  
populis Aethiopum.

Tu dirupisti fontem, & torrentem, tu siccasti flu-  
uios uehementes.

Tuus est dies, & tua est nox, tu fabricatus es lu-  
cem, & solem.

Tu statuisti omnes terminos terræ, astatem, &  
hyemem tu plasmasti.

Memor esto huius, quod inimicus improp̃erauit Do-  
mino, & populus insipiens blasphemauit nomen tuū.

Ne tradas bestis animā turturis tuæ, congregatio-  
nem pauperum tuorum ne obliuiscaris in perpetuum.

Respice ad fœdus, quia repleta sunt loca tenebro-  
sa terræ habitationibus uiolentorum.

Ne reuertatur pauper confusus, pauper, & inops

laudabunt nomen tuum.

Exurge Deus, iudica causam tuam, memor esto  
improperiorum tuorum, quæ ab insipiente sunt tota die.

Ne obliuiscaris uoces inimicorum tuorum, uociferatio eorum, qui te oderunt, ascendit semper.

E X P L A N A T I O.

Virgæ hereditatis tuæ ] Virgam appellat  
sceptrum, quo uocabulo usus est Aquila, cum uerteret hunc uersiculum ex hebræo. illud autem Deuteronomij explanat hunc locum, Ne disperdas populum tuum, & hereditatem tuam, quam redemisti in magnitudine tua ex Aegypto.

Leua gressus tuos ] Id est, huc ades tandem ad eos funditus perdendos, qui sanctissimum templum tuum manibus impijs euerterunt.

In medio synagogarum tuarum ] Erant in singulis Iudææ urbibus, & oppidis aedes publicæ, in quas ciues conueniebant, ut Deum simul precarentur, & doctrinam rerum diuinarum perciperent. Ea loca uocabulo græco Synagogæ nominantur.

Posuerunt signa sua ] Id est, erexerunt uexilla, & trophæa monumenta uictoriæ.

Cognitus est inimicus uelut in altum ] Vidimus (inquit) hostem debacchantem, & ornamenta templi sanctissimi disturbantem, quemadmodum lignator arbores cædit in sylua.

In terra polluerunt ] Id est, in terram deiectum contaminarunt.

Signa nostra non uidimus ] In tantis cala-

mitatibus nullum beneuolentiæ tuæ signum uidimus ,  
nullum extitit ex ijs prodigijs , quæ pro salute, ac glo-  
ria nostra olim edere solebas , neque ullum habemus  
uatem sanctum , qui nobis prædicat , quandiu hæc  
mala permansura sint .

De medio sinu tuo ] Profer (inquit) manū  
ultricem ex sinu tuo, et impios hostes funditus perde .

Deus autem Rex noster ] Consolantur se  
recordatione superiorum temporum : Deus enim gen-  
tem Hebræam iam inde ab ultima origine sibi tuen-  
dam , atque ornandam suscepit . quid si illam sæ-  
penumero ob peccata in maximas incidere calamitates  
passus fuerat, semper tamen auxilium tulerat oppres-  
sis , & crudelitatem hostium aliquo notabili supplicio  
uindicarat , ut facile perspicui possit , hanc nationem  
in præcipua ipsius esse tutela .

In medio terræ ] Id est, palam , & omni-  
bus mortalibus tanquam in theatro spectantibus nos  
sæpe seruauit in maximis periculis .

Tu dissipasti ] Commemorat miraculum  
maris rubri, & Aegyptiorum depressionem .

Lewiathan ] Pharaonem intelligit , quem  
etiam Esaias Lewiathan uocat . hoc nomen significat  
belluas uastas maris , qualia sunt Cete .

Dedisti eum escam populis Aethiopum ]  
Hoc intelligit , eos , qui littora maris rubri accolunt ,  
potitos fuisse spolijs Aegyptiorum . Sed alij ueniunt  
ex Hebræo , dedisti eum escam habitantibus in deser-  
to : quibus uerbis significare uidetur , cadauera Aegy-  
ptiorum ad licus eiecta prædam , & pastum fuisse

# EXPLANATIO

bestiarum.

Tu dirupisti fontes ] Id est, è silicibus rupis elicuisti uim maximam aquæ, cum populus siti conficeretur.

Fluuios uellementes ] Symmachus uertit fluuios antiquos. significat autem Iordanem.

Animam turturis tuæ ] Sic appellat gentē Hebræam ob innocentiam, & imbecillitatem.

Respice ad fœdus ] Quod scilicet cum maioribus nostris fecisti.

Quia repleta sunt loca ] Loca nostra, quæ sunt tenebrosa, id est plena luctus, & miseriarum, occuparunt homines uiolenti, & omnis humanitatis expertes.

Ne reuertatur ] Ne quæso miser populus, qui ad orandam opem tuam uenit, repulsam ferat.

Ne obliuiscaris uoces inimicorum ] Id est, maledicta impia, & contumelias, quas in te iacere audent.

Vociferatio eorum ] Id est, uoces impie, & conuitia inimicorum tuorum quotidie magis, ac magis crescunt.

## ARGVMENTVM PSAL.

### L X X V.

Plerique ex Græcis, & Latinis explanatoribus hunc psalmum ad CHRISTVM pertinere confirmant, qui inducitur loquens, & deterrens impios, & superbos ab arrogantia, & maleficio.

Victori

Victori, ne disperdas. Psalmus cantici  
Asaph, L X X V.

Confitebimur tibi Deus, confitebimur, & propinquum(erit)nomen tuum.

Narrabunt mirabilia tua. Cum accepero tempus, ego iustitias iudicabo.

Liquefiet terra, & omnes, qui habitant in ea, ego confirmaui columnas eius.

Dixi iniquis, nolite inique agere, & delinquentibus, nolite exaltare cornu.

Nolite extollere in altum cornu uestrum, nolite loqui ceruice dura,

Quia neque ab Oriente, neque ab Occidente, neque à deserto (uenit) exaltatio, quoniam Deus iudex est.

Hunc humiliat, & hunc exaltat, quia calix in manu Domini uini meri plenus misto,

Et effundit ex hoc. utique feces eius sugēt, bibentq; omnes peccatores terræ.

Ego autem annuntiabo in seculum, cantabo Deo Iacob,

Et omnia cornua peccatorum confringam, & exaltabuntur cornua iusti.

#### EXPLANATIO.

Confitebimur tibi Deus ] Id est, semper celebrabimus laudes tuas, tuq; nobis semper propitius



## E X P L A N A T I O

aderis . Videtur ecclesia piorum hæc loqui , quippe quæ ab impijs uexata ad implorandum auxilium Dei confugerit , & statim eius nûmen , & præsentiam senserit : quare ait , omnes pios narraturos ipsius facta illustria , & admirabilia .

Cum accepero tempus ] Hæc aiunt esse uerba CHRISTI affirmantis, se de omnibus improbis , & impijs hominibus supplicium sumpturû , cum tempus illud iudicij nouissimi uenerit . quo quidem tempore , ait , terram cum omnibus ijs , qui eam incolunt , dissolutum iri : qui enim illam stabiliiuit , eam potest etiam dissoluere .

Dixi iniquis ] Hæc omnia sæpiissime admonuit CHRISTVS , cum uitam ageret in terris , neque unquam intermittit eadem admonere ore piorum .

Nolite extollere in altum ] Id est , nolite uos efferre contra Deum .

Quia neque ab Oriente ] Rationem affert , cur debeant se se Deo subiicere : quoniam scilicet frustra quæritur in terris dignitas , & potentia : quarum rerum dispensatio pertinet ad solum Deum , qui æquissimus est iudex , & unicuique uel poenas , uel præmia constituit pro eo , ac quisque se gerit .

Neque à deserto uenit exaltatio ] Solitudo uastissima in Iudæa spectat ad meridiem , propterea desertum dixit , cum meridiem dicere uellet .

Quia calix ] Alio loco diximus , in literis sanctis calicem sæpe significare poenas , & supplicia improborum . Vini autem meraci mentionem fecit ad

significādam atrocitatem poenarum . Nam quod ait, hunc calicem plenum esse misto , significare uidetur , plurimum fecis uino admistum esse . Sed nonnulli sic uertunt ex Hebræo, Quia calix in manu Domini uini infusi , quod rubrum est . Hi sequuntur Chimim, qui affirmat, hoc genus uini esse in Iudæa generosum, & uehemens , & propterea uirum sanctum uti hac allegoria ad magnitudinem supplicij exaggerandam.

Ego autem annuntiabo ] CHRISTVS cum suis nūquam intermittit prædicare beneficia Dei, eiusq; laudes celebrare , quoad tempus illud iudicandi ueniat , de quo supra dictum est : tunc enim omnem uim , & potentiam impiorum infringet , & pios in partem sui regni sempiterni accipiet .

## ARGVMENTVM PSAL.

## LXXVI.

Celebrat insignem uictoriam , quam de hostibus reportauerant Hebræi . Videntur autem hæc scripta esse in Regem Senacheribum, qui cum maximo exercitu inuaserat terram Iudeam .

Victori in Neginoth , Psalmus canticum  
Asaph , LXXVI.

Notus in Iudæa Deus , in Israel magnum nomen eius .

Et est in Salem tabernaculum eius , & habitatio eius in Sion .

## E X P L A N A T I O

Ibi confregit sagittas, arcum, scutum, gladium,  
& bellum.

Apparuiſti maximus à montibus prædæ, in præ-  
dam dati ſunt ſuperbi corde.

Dormierunt ſomnum ſuum, & non inuenerunt  
omnes uiri fortes manus ſuas.

Ab increpatione tua Deus Iacob conſopitus eſt cur-  
rus, & equus.

Tu terribilis es, & quis coram te conſiſtat, ſi-  
mul atque exarſerit ira tua?

De cælo auditum feciſti iudicium, terra tremuit,  
& ſiluit,

Cum exurgeret ad iudicium Deus, ut ſaluos face-  
ret omnes manſuetos terræ.

Quoniam indignatio hominis conſitebitur tibi, &  
reliquiſ indignationis te accinges.

Vouete, & reddite Domino Deo ueſtro omnes qui  
in circuitu eius eſtis, afferte munera

Terribili, & auferenti ſpiritum principum, ter-  
ribili apud reges terræ.

## E X P L A N A T I O.

Notus in Iudæa Deus ] Celebris eſt in Iu-  
dæa Deus, in Iſraele glorioſum, & illuſtre eſt nomē  
eius propter inaudita miracula, & prodigia, quæ  
ſolet edere pro ſalute, & gloria gentis ſuæ.

In ſalem ] Sic appellat Hieroſolyma, ita  
enim olim uocabatur ea urbs, ut eſt in Geneſi.

Apparuiſti maximus à montibus prædæ ]  
Symmachus ita uertit hunc locum. Eſt autem ſenſus,

declarasti admirabilem potentiam tuam in montibus Iudææ, innumerabilibus copijs, quæ illos occupant, ad internecionem cæsis.

Dormierunt somnum ] Id est, mortem occubuerunt, & nihil uiribus suis profecerunt, quamuis bellicosi essent.

De cælo auditum ] Appellat stragem illam hostium iudiciũ cœleste, propterea quòd, illam à Deo editam fuisse, perspicuum est.

Terra tremuit, & siluit ] Id est, qui nos minis, & immani ferocitate territabant, ipsi incredibili terrore perculsi ne omnino quidem hiscere ausi sunt, cum Deus calamitates nostras miseratus poenas ab ipsis iudicio persequeretur.

Quoniam indignatio ] Ira (inquit) & crudelitas impiorum oppugnantium cultores tuos materiam præbebit tui numinis celebrandi, & potentiae, ac misericordiae prædicandæ, dum nos incolumes conseruas, illos autem sempiternis supplicijs mactas.

Reliquijs indignationis ] Id est, si quid minarum hostilium reliquum fuerit, ad id contundendum, & confringendum te accinges, & hostes piorum funditus euertes.

Vouete ] Hortatur populum ad vota nuncupanda, & gratias agendas Deo pro uictoria iam adeptæ.

## ARGVMENTVM PSAL.

## LXXVII.

Describit, quanto dolore confectus fuerit, cum

# EXPLANATIO

Hebræi maximis calamitatibus opprimerentur, & quemadmodum mœrorem suū leuauerit recordatione beneficiorum illustrium, quibus olim Deus affecerat gentem suam. sed, ut Græci existimant, populus ipse inducitur loquens.

Victori pro Idithum, Psalmus Asaph,

L X X V I I.

Voce mea ad Dominum clamaui, uoce mea ad Deum, & intendit mihi.

In die tribulationis meæ Deum exquisiui, manus mea nocte extensa fuit, sine intermissione.

Renuit consolari anima mea, memor fui Dei, & uociferabar loquebar, & deficiebat spiritus meus.

Apprehendisti palpebras oculorum meorum, turbatus sum & non sum locutus.

Cogitavi dies antiquos, & annos seculorum, recordabar

Carminum meorum, nocte cum corde meo meditabar, & scrutabatur spiritus meus,

Nunquid in æternum proijcet Deus? aut non apponet, ut se propitium adhuc exhibeat?

Nunquid defecit in perpetuum misericordia eius? consumptum est uerbū d generatione in generationē?

Nunquid oblitus est misereri Deus? aut continebit in ira sua misericordias suas?

Et dixi, mors mea hæc, annorum dextera excelsi (recordabor)

Memor ero operum Domini, nam memor ero mi

rabiliū tuorū , quæ usque ab initio fecisti ,

Et meditabor in omnibus operibus tuis, & de consilijs tuis loquar :

Deus in sanctitate via tua , quis Deus magnus sicut Deus noster ? tu es Deus , qui facis mirabilia .

Notam fecisti in populis uirtutem tuam , redemisti in brachio tuo populum tuum , filios iacob & ioseph .

Viderunt te aquæ Deus , uiderunt te aquæ , & timuerunt , & turbatæ sunt abyssi .

Effuderunt aquas nubila , uocem dederunt nubes . Etiam sagittæ tuæ discurrerunt , nox tonitruū tui in sphaera .

Illuxerunt coruscationes tuæ orbi terræ , commota est , & contremuit terra .

In mari uia tua , & semitæ tuæ in aquis multis , & uestigia tua non sunt cognita .

Deduxisti sicut oues populū tuum in manu Moysi , & Aaron .

## EXPLANATIO.

Voce mea ) Primum describit grauissimam perturbationem animi penè desperantis, deinde docet, quæ medicina tam periculoso morbo adhibenda sit .

Manus mea nocte extēsa fuit, sine intermissione. ] Ita uertit hunc locū Symmachus ; & fideliter quidē .

Renuit consolari ] Cum ( inquit ) animus meus omnem consolationem repudiaret , ad memoriam Dei confugiebam , & illius misericordiam uociā ferans implorabam .

## E X P L A N A T I O

Apprehendisti palpebras ] Id est, magnitudo supplicij tui me somnum capere non sinebat, quin etiam ob gravitatem doloris animo tam perturbato eram, ut loqui non possem.

Cogitavi dies ] Mecum (inquit) considerabam tempora illa, & secula antiqua, quibus Deus tam illustribus, & uere diuinis beneficijs affecerat gentem suam. recordabar item, quoties sanctissimi numinis laudes meis uersibus celebrassem, cum illi gratias agerem pro incredibili benignitate, qua utebatur in nos.

Nunquid in æternum ] Hæc sunt, quæ scribatur animus eius.

Consumptum est uerbum ] An nullam amplius uim habet sermo Dei, quo promisit, se consolaturum moerentes, & afflictos ad se confugientes?

Et dixi, mors mea hæc, annorum dextera excelsæ recordabor ] Quid opus est plura? tanta (inquit) calamitatum est magnitudo, ut aliquando de salute mea penè desperem. sed in tantis acerbitatibus una reliqua est consolatio, ut scilicet labentem, ac propè iacentem animum, beneficiorum tuorum summe pater recordatione sustentem. propterea, quam sæpiissime poterò, mente confugiā ad memoriā superiorum tēporū, quibus maiores nostros grauissime afflictos, & iam desperantes dextera tua salutari ex maximis periculorum angustijs, & calamitatibus eripuisti. Recordabor inquam tua facta mirabilia, & clarissima monumenta misericordie tuæ semper animo contemplantur, atque ita spe erecta, & confirmata

non diffidam amplius, tempus fore, cum omni periculo liberatus immortales tibi gratias agam conseruatori, & parenti salutis meae. Ad hunc modum hic uersiculus nobis explanandus esse uidetur. Illud tamen scire oportet, uocabula hebraea in plures sententias accipi posse, atque ob eam causam ab alijs aliter illa conuerti. Nos uero Chimim, singularis apud Hebraeos auctoritatis interpretem, secuti sumus, quod eius sententia maxime consentanea argumento carminis uideretur.

Deus in sanctitate uia tua ] Sic etiam uertit Symmachus. dicit autem, omnes actiones Dei esse rectas, & sanctas, tametsi uidetur aliquando seuerius nobiscum agere. Hoc ubi animus noster uere sibi persuasit, rebus aduersis facile resistit.

Filios Iacob, & Ioseph ] Mentionem facit Iosephi propter eximiam eius uirtutem, & maxima in gentem Hebraeam beneficia.

Viderunt te aquae ] Celebrat miraculum maris rubri.

Vox tonitruui tui in sphaera ] Sic appellat coelum.

In mari uia tua ] Dicit, Deum fuisse duccem populo transmittenti mare, sed ita, ut Aegyptij uestigia eius cognoscere non potuerint: dum enim fugientes insequi uolunt, omnes interiери mari absorpti.

#### ARGVMENTVM PSAL. LXXVIII.

Narrat, qualibus, & quantis beneficijs affecerit



# EXPLANATIO

Deus gentem Hebraeam, & quàm illa fuerit immemor, & ingrata.

Erudiens ( Canticum ) Asaph,  
Psal. LXXVIII.

Attendite popule meus legem meam, inclinate aurem uestram in uerba oris mei.

Aperiam in parabolis os meum, loquar anigmata temporis prisce,

Quæ audiuiimus, & cognouimus, & patres nostri narrauerunt nobis.

Non sunt occultata à filiis eorum in generatione sequenti,

Narrantes laudes Domini, & uirtutem eius, & mirabilia eius, quæ fecit.

Et suscitauit testimonium in Iacob, & legem posuit in Israel,

Qua mandauit patribus nostris nota facere ea filiis suis, ut cognoscat generatio sequens,

Filij, qui nascentur, & exurgent, & narrabunt filiis suis,

Ut ponant in Deo spem suam, & non obliuiscantur operum Dei, & mandata eius custodiant,

Ne fiant sicut patres eorum, generatio praua, & exasperans,

Generatio quæ non direxit cor suum, & non fuit fidelis cum Deo spiritu eius.

Filij Ephraim armati, & iaculantes arcu ( terga ) uerterunt in die belli.

Non custodierunt testamentum Dei, & in lege eius noluerunt ambulare.

Et obliiti sunt benefactorum eius, & mirabilium eius, quæ ostendit eis.

Coram patribus eorū fecit mirabilia in terra Aegypti, in campo Taneos.

Interrupit mare, & perduxit eos, & fecit stare aquas ueluti aceruum.

Et deduxit eos in nube per diem, & tota nocte in illuminatione ignis.

Interrupit petram in eremo, & adaquauit eos uelut in abyssus multa.

Et eduxit aquam de petra, & eduxit tanquam flumina aquas.

Et apposuerunt adhuc peccare ei, in iram concitauerunt excelsum in solitudine.

Et tentauerunt Deum in cordibus suis, cum peterent escas animabus suis.

Et male locuti sunt de Deo, dixerunt, nunquid poterit Deus parare mensam in deserto?

Ecce percussit petram, & fluxerunt aquæ, & torrentes inundauerunt.

Nunquid & panem poterit dare? aut parare carnem populo suo?

Ideo audiuit Dominus, & iratus est, & ignis accensus est in Iacob, & ira ascendit contra Israel,

Quia non crediderunt in Deum, nec sperauerunt in salutare eius.

Et mandauit nubibus desuper, & ianuas cæli aperuit.

# EXPLANATIO

Et pluit illis manna ad manducandum, & panem  
coeli dedit eis,

Panem angelorum manducauit homo, cibaria mi  
sit eis ad satietatem.

Abstulit Eurum de caelo, & induxit in uirtute sua  
Africum.

Et pluit super eos sicut puluerem carnes, & sicut  
arenam maris uolatilia pennata,

Et ceciderunt in medio castrorum eorum, circa  
tabernacula eorum.

Et manducauerunt, & saturati sunt nimis, &  
desiderium eorum attulit eis, & non sunt fraudati  
desiderio suo.

Adhuc escae eorum erant in ore ipsorum, & ira  
Dei descendit super eos,

Et occidit pingues eorum, & electos Israel pro  
strauit.

In omnibus his peccauerunt adhuc, & non credi  
derunt in mirabilibus eius.

Et defecerunt in uanitate dies eorum, & anni eo  
rum cum festinatione.

Cum occideret eos, querebant eum, & reuertere  
bantur, & diluculo ueniebant ad eum.

Et rememorati sunt, quod Deus adiutor est eorum,  
& Deus excelsus redemptor eorum est.

Et blanditi sunt ei ore suo, & lingua sua mentiti  
sunt ei.

Cor autem eorum non erat rectum cum eo, nec  
fideles fuerunt in testamento eius.

Ipsae autem sunt misericors, & propitius fuit pecca

tis eorum, & non disperdidit eos.

Et abundauit in auertenda ira sua, & non accendit omnem iram suam.

Et recordatus est, quia caro sunt, spiritus uadens, & non rediens.

Quoties exacerbauerunt eum in deserto? in iram concitauerunt eum in solitudine?

Et reuersi sunt, & tentauerunt Deum, & sane Etum Israel circumscripserunt.

Non sunt recordati manus eius, & dici, qua redemit eos de manu tribulantis,

Qui posuit in Aegypto signa sua, & prodigia sua in campo Taneos.

Et conuertit in sanguinem flumina eorum, & riuos eorum, ne biberent.

Misit in eos multiplicem turbam insectorum, & comedit eos, ranam, & disperdidit eos.

Et dedit brucho fructus eorum, & labores eorum locustæ.

Et occidit in grandine uineas eorum, & sycomoros eorum in pruina.

Et tradidit grandini iumenta eorum, & possessionem eorum fulminibus.

Misit in eos iram indignationis sue, indignationem, & iram, & tribulationem, immissionem per angelos malos.

Viam fecit iræ sue, & non pepercit a morte animabus eorum, & iumenta eorum in peste conclusit.

Et percussit omne primogenitum in terra Aegypti.

# EXPLANATIO

pti, primitias fortitudinis eorum, in tabernaculis Cham.

Et abstulit sicut oves populum suum, & perduxit eos tanquam gregem in deserto,

Et deduxit eos tuto, & non timuerunt, & inimicos eorum operuit mare.

Et adduxit eos ad terminos sanctitatis suæ, ad montem istum, quem acquisiuit dextera eius.

Et eiecit à facie eorum gentes, & sorte diuisit eis terram in funiculo distributionis.

Et habitare fecit in tabernaculis eorum tribus Israel.

Et tentauerunt, & exacerbauerunt Deum excelsum, & testimonia eius non custodierunt.

Et auerterunt se, & non seruauerunt pactum, quemadmodum patres eorum conuersi sunt retrorsum, ut arcus dolosus.

In iram concitauerunt eum in excelsis suis, & in sculptilibus suis ad æmulationem eum pronocauerunt.

Audiuit Deus, & iratus est, & abominatus est ualde Israel.

Et dereliquit tabernaculum Silo, tabernaculum suum, ubi habitauit inter homines.

Et tradidit in captiuitatem fortitudinem suam, & gloriam suam in manus inimici.

Et conclusit in gladio populum suum, & contra hereditatem suam indignatus est.

Iuuenes eorum comedit ignis, & uirgines eorum non sunt laudatæ.

Sacerdotes eorum in gladio ceciderunt, & uiduæ

eorum non sunt lamentatae .

Et excitatus est tanquam è somno Dominus , tanquam potens exultans præ uino ,

Et percussit inimicos suos in posteriora , opprobriū sempiternum dedit illis .

Et repulit tabernaculum Ioseph , & tribū Ephraim non elegit ,

Sed elegit tribum Iuda , montem Sion , quem dilexit ,

Et edificauit tanquam ( palatia ) celsa sanctuariū suum , uelut terram , quam fundauit in secula .

Et elegit Dauid seruum suum , & assumpsit eum à caulis ouium , à foetantibus , quas sequebatur , abduxit eum ,

Vt pasceret Iacob populum suum , & Israel hereditatem suam ,

Et pauid eos in innocentia cordis sui , & in prudentia manuum suarum deduxit eos .

#### EXPLANATIO .

Legem meam ] Sic appellat doctrinam saluberrimam , quæ continetur hoc carmine . Eandem uocat parabolas , quod sententiæ inferantur utilissimæ , ac sapientissimæ : item ænigmata , quod hoc genus doctrinæ reconditum , maximeq; obscurum sit ijs , quorum mens nullo alio lumine nisi naturali prædicta est .

Non sunt occultata ] Quidam ita reddunt ex Hebraeo , non calabimus ea à filiis eorum , generationi posteræ narrantes laudes Domini , & fortitudi-

# EXPLANATIO

nem eius, & mirabilia eius quæ fecit.

Et suscitauit testimonium in Iacob ] Ita uocat præceptum, & legem Dei consuetudine linguæ Hebrææ. certam uero illam legem intelligit, quæ Deus sanxit, ut parentes liberis assidue memorarent res illas admirabiles ab ipso gestas, cum gentem Hebræam seruitute Aegyptiorum liberaret, illamq; per mare rubrum, & uastissimam solitudinem ad fines Cananæorum duceret, atque in uberrimis agris collocaret. ea lex scripta est in Deuteronomio, cap. iij. Cur autem Deus uoluerit harum rerum memoriam diligentissime conseruari, docet uir sanctus, paulo post subiungens, Narrabunt filiis suis, ut ponant in Deo spem suam, & non obliuiscantur operum Dei, & mandata eius custodiant. Nimirum harum rerum cognitio, & diligens consideratio pietatem mirabiliter alit, nosq; diuinarum legum studiosos, & amantes facit.

Quæ non direxit cor suum ] Id est, quæ recti amans non fuit, neque rectam de Deo habuit opinionem.

Filij Ephraim armati ] Commemorat peccata Iudæorum, & calamitates, in quas inciderunt propter neglectam uirtutem, & religionem. historia autem, quam hic attingit, ea esse uidetur, quæ scripta est in primo libro Paralip.

In campo Taneos ] Tanis est urbs maxima, quæ sita est ad ostium Nili, quod Taniticum appellant.

Interrupit petram ] Bis eliciuit aquam Moyses è

ses è silice , & utriusque miraculi hic mentionem facit .

Et tentauerunt Deum ] Attingit ea , quæ acciderunt in ijs locis , quæ nominata sunt sepulcra concupiscentiæ . Ea historia scripta est in libro Numerorum .

Ecce percussit petram ] Attende quæso , & uide , quanta sit hominum impietas , & cecitas , nisi Deus illos suo spiritu regat , & gubernet . si gens Hebræa dubitauerat antea de potentia Dei , recens miraculum debebat omnem dubitationem ex animis tollere : quod , admirabile dictu est , quàm contra acciderit : arripuit enim illa ex ea re occasionem potentiæ diuinæ tentandæ , id est , temere , ac insolenter periclitandæ , experiendæq; : sed simul attende , quid agat Deus : morem quidem gerit cupiditati impiorum , ut uel inuiti discant ipsum omnium rerum præpotentē esse : uerum id suo maximo cum malo discunt : dum enim cibus optatis se ingurgitant , subita , atque improvisa morte mutantur .

Et ignis accensus est in Iacob ] Ignem appellat indignationem Dei .

Panem Angelorum ] Sic uocat manna , non quòd mentes illæ beatæ , quæ corporibus uacant , eo cibo utantur , sed quòd is è coelo manarit , quem locum incolunt mentes illæ . sciendum est tamen , uocabulum Hebræum in multas sententias accipi posse , itaque alij uertunt , panem nubium , alij panem fortium .

Et occidit pingues eorum ] Id est , optimas



tes, & primarios uiros. sic in psalmo **XXII**.  
pingues terræ dixit, cum reges, & principes dicere  
uellet.

In omnibus his ] Id est, neque suppliciorū  
grauitate, neque miraculorum magnitudine adduci  
unquam potuere, ut uerbis Dei fidem haberent, seq;  
illius bonitati, præsidioq; committerent. Ex quo per=  
spicuum esse potest, tantam esse labem, & corrupte=  
lam animorum, ut, nisi Deus mentem, & uolunta=  
tem nostram spiritu suo renouet, semper à uera pie=  
tate abhorreamus, neque nos ulla uerborum, aut  
prodigiorum uis adducere possit ad confidendum pro  
uidentia ipsius. itaque Moses in Deuteronomio de  
hac Iudæorum pernicacia loquens scribit ad hunc mo  
dum, Vos uidistis uniuersa, quæ fecit Dominus co=  
ràm uobis in terra Aegypti Pharaoni, & omnibus  
seruis eius, uniuersaq; terræ illius, tētationes magnas,  
quas uiderunt oculi tui, signaq; illa, portentaq; in=  
gentia, & non dedit uobis Dominus cor intelligens,  
& oculos uidentes, & aures, quæ possint audire us=  
que in præsentem diem.

Cum occideret eos ] Describit fictam pœni  
tentiam improborum, qui nonnunquam resipiscere  
uidentur; & grauissime angi, quòd deliquerint,  
& leges Dei uiolarint. uerum his non iniuria, quam  
Deo faciunt, est dolori, sed pœna, quam metuumt,  
aut iam sustinent: itaque cum doleant amore sui,  
non Dei, frustra dolent, & statim in scelera, & fla  
gitia relabuntur: nam qui amor improbos ad dolen  
dum excitat, is amor longe facilius eosdem ad peccan=

dum impellit .

Et diluculo ueniebant ad eum ] Significat  
studium, & diligentiam populi in placanda ira Dei.  
Hunc loquendi modum saepe usurpant literæ sanctæ .

Et abundauit in auertenda ira sua ] Id  
est, magnopere compressit indignationem suam .

Et reuersi sunt ] Ad pristinos mores .

Sanctum Israel circumscripserunt ] Id est,  
eius potentiam certis finibus concluderunt, quippe qui  
non putarent, illum posse omnia omnibus in locis .

Immissionem per Angelos malos ] Id est,  
quæ calamitates importabantur ab Angelis malis .

Primitias fortitudinis ] Sic appellat filios  
primo partu in lucem editos, quos Græci nominare  
solent πρωτοτόκους, id est, uerbum è uerbo, primo  
genitos . uidetur autem Asaphus imitatus Mosem,  
apud quem Iacob in Genesi uocat primitias roboris sui  
Ruben, quem de multis liberis primum susceperat ex  
Lia . Quod uero subiungit, in tabernaculis Cham,  
significat domos Aegyptiorum . nam Mesraimus, unde  
aiunt prognatos esse Aegyptios, patrem habuit, cui  
nomen erat Cham, ut est in Genesi .

Ad terminos sanctitatis suæ ] Id est, ad  
fines, & regionem sanctitati suæ gratam, & acce-  
ptam .

Conuersi sunt retrorsum ut arcus dolosus ]  
Qui scilicet subito uertatur, & aliud feriat, quàm  
uolebat sagittarius .

In iram concitauerunt eum in excelsis suis ]  
Intelligit loca, in quibus falsos Deos colebant .

# EXPLANATIO

Et dereliquit tabernaculum Silo ] Arcam  
Dei, quæ seruabatur in urbe Silo, captam fuisse à  
Palæstinis, & Iudæos accepisse maximam cladem, scri-  
ptum est in libro primo Regum.

Et tradidit in captiuitatem fortitudinem suam ]  
Hunc locum interpretati sumus in explanatione psal-  
mi L X I I I.

Iuuenes eorum comedit ignis ] Ignem uo-  
cat uim, & impetum belli.

Et uirgines eorum non sunt laudatæ ] Id  
est, celebratæ carmine nuptiali, propterea quod ante-  
quam nubarent, ab hostibus uel interfectæ, uel in  
seruitutem abductæ sunt, uel earum sponsi in prælio  
ceciderunt.

Sacerdotes eorum in gladio ceciderunt ]  
Inter hos præcipui fuerunt Ophnis, & Phinees filij  
Heli pontificis.

Et uiduæ eorum non sunt lamentatæ ] Id  
est, funera maritorum non sunt fletu, & lamenta-  
tione prosecutæ, quippe quæ ipsorum uitæ superstites  
non fuere. Videtur autem his uerbis significare casum  
uxoris Phineæ, hæc enim cum illum in prælio casum,  
& arcam fœderis ab hostibus asportatam audisset,  
nimia doloris acerbitate, repentina morte periit, ne-  
que spatium lugendi mariti habuit.

Et excitatus est ] Excitatus inquam est in  
Palæstinos, qui abstulerant arcam, & fœdissimo na-  
tium morbo illos uexauit: antea autem dormire ui-  
debatur, nec cernere impietatem eorum: opprobrium  
uero sempiternum appellat morbum illum, de quo di

ximus .

Et repulit tabernaculum Ioseph ] Id est ,  
noluit amplius commorari in urbe Silo , quæ pertine-  
bat ad hereditatem Iosephi , id est , ad tribum Ephrai  
ni , qui natus est ex Iosepho .

Velut terram , quam fundauit in secula ]  
Id est , quod templum firmum , & stabile uoluit esse  
perinde ac terram , quam stabilivit , ut perpetuo ma-  
neat . Hoc autem uerum non euasit in templo Salomo-  
nis , sed in ecclesia CHRISTI , cuius tem-  
plum illud imago quædam erat .

#### ARGVMENTVM PSAL. LXXIX.

Existimant gentem Hebræam deplorare calamita-  
tes , quas pertulit ab Antiocho Rege , quæ Historia  
scripta est in libris Machabæorum .

#### Canticum Asaph , Psal. LXXIX.

Deus uenerunt gentes in hereditatem tuam , pol-  
luerunt templum sanctum tuum , posuerunt Hierusa-  
lem in acervos lapidum .

Posuerunt cadauera seruorum tuorum escas uola-  
tilibus cœli , carnes sanctorum tuorum bestiis terræ .

Effuderunt sanguinem eorum tanquam aquam  
in circuitu Hierusalem , & non erat , qui sepeliret .

Facti sumus opprobrium uicinis nostris , subsan-  
natio , & illusio ijs , qui in circuitu nostro sunt .

Vsquequo Domine irascere in finem ? exardescet  
uelut ignis zelus tuus ?

## E X P L A N A T I O

Effunde iram tuam in gentes , quæ te non nouerunt , & in regna , quæ nomen tuum non inuocauerunt .

Quia comederunt Iacob , & locum eius desolauerunt .

Ne memineris iniquitatum nostrarum præteritarum , cito anticipent nos misericordiæ tuæ , quia pauperes facti sumus nimis .

Adiuua nos Deus saluator noster , & propter gloriam nominis tui Domine libera nos , & propitius esto peccatis nostris propter nomen tuum .

Cur dicant in gentibus , ubi est Deus eorum ? innotescat in nationibus coram oculis nostris .

Ultio sanguinis seruorum tuorum , qui effusus est : introeat in conspectum tuum gemitus compeditorum ,

Secundum magnitudinem brachij tui libera filios mortis ,

Et redde vicinis nostris septuplum in sinum eorum , improprium ipsorum , quod exprobrauerunt tibi Domine .

Nos autem populus tuus , & oues pascuæ tuæ , confitebimur tibi in seculum .

In generationem , & generationem annuntiabimus laudem tuam .

## E X P L A N A T I O .

Ne memineris iniquitatum nostrarum ]  
Agnoscent , se in has eruminas propter peccata incidisse , itaque ad misericordiam Dei suppliciter consu-

giunt, seq̃; adiuuari deprecantur, non quòd fauore,  
 & auxilio digni sint, sed ne sanctissimum nomen  
 Dei, de cuius tutela gloriantur, ludibrio, & despe-  
 ctui sit nationibus impijs.

Secundum magnitudinem brachij ] Id est,  
 pro magnitudine potentiae tuæ cōserua incolumes eos,  
 qui iam morti addicti sunt.

Et redde vicinis nostris septuplum ] Id est,  
 iniurias, quas nobis finitimæ gentes intulerunt, ita  
 persequere, ut calamitas earum existat nostra multis  
 partibus maior.

#### ARGVMENTVM PSAL. LXXX.

Idem est argumentum huius psalmi, & superio-  
 ris. Describit autem sub elegantissima allegoria ui-  
 neæ res secundas, atque aduersas Hebræorum.

Victori ad Sōsamim, testimonium, &  
 Psalmus Asaph, LXXX.

Qui pascis Israel, intende, qui deducis uelut ou-  
 em Ioseph.

Qui sedes super Cherubin, affulge coram Ephraim,  
 Benjamin, & Manasse.

Excita potentiam tuam, & ueni, ut saluos fa-  
 cias nos.

Deus conuerte nos, & ostende faciem tuam, &  
 salui erimus.

Domine Deus exercituum, quousque irasceris su-  
 per orationem populi tui?

# EXPLANATIO

Cibasti nos pane lachrimarum, & potasti nos lachrimis in maxima mensura.

Posuisti nos contentionem uicinis nostris, & inimici nostri subsannauerunt nos.

Deus exercituum conuerte nos, & ostende faciem tuam, & salui erimus.

Vineam de Aegypto transtulisti, eiecisti gentes, & plantasti eam,

Repurgasti locum illi, & extendisti radices eius, & impleuit terram.

Operuit montes umbra eius, & rami eius cedros Dei.

Extendit palmites suos usque ad mare, & usque ad flumen propagines suas.

Vt quid destruxisti maceriam eius? & uindemiant eam omnes, qui pratergrediuntur uiam?

Vastauit eam aper de sylua, & fera agri depasta est eam.

Deus exercituum reuertere quæso, respice de caelo, & uide, & uisita uitem istam,

Et locum uineæ, quam plantauit dextera tua, & filium ipsum, quem roborasti tibi.

Incensa est igni, & suffossa, ab increpatione uultus tui peribunt.

Sit manus tua super uirum dexterae tuae, & super filium hominis, quem roborasti tibi.

Et non discedimus a te, uiuificabis nos, & nomen tuum inuocabimus.

Domine Deus exercituum conuerte nos, & ostende faciem tuam, & salui erimus.

## EXPLANATIO.

Qui deducis uelut ouem Ioseph ] Iosephum appellauit pro uniuerso populo, ut etiam in psalmo, qui hunc sequitur, cum ait, testimonium in Ioseph posuit illud.

Qui sedes super Cherubin ] Cherubinos significat, qui arcam foederis seruabant, unde Deus responsa dare consueuerat.

Affulge cor dñi Ephraim ] Iosephus carissimus fuit Deo, propterea orans pro salute uniuersi populi, præcipue mentionem facit familie illius, quo magis ad misericordiam moueat Deum.

Deus conuerte nos ] Alij uertunt, Deus reduc nos. quorum uerborum hæc uidetur esse sententia, satis diu fuisti nobis iratus, iam quaeso nos reduc tecum in gratiam.

Cibasti nos pane lachrimarum ] Significat, populum in tantis calamitatibus uersari, ut illi sint lachrimæ pro cibo, & potione.

Posuisti nos contentionem ] Id est, per te factum est, ut uicini nostri inter se de nobis cõtenderet, dum quisque nos sibi uendicare studet.

Vineam de Aegypto ] Gentem Hebræam uineæ comparat, qua similitudine utitur etiã Esaias.

Cedros Dei ] Id est proceras, & maximas. de hac loquendi figura alio loco explicatum est. Significat autem his uerbis, gentem Hebræam bello domuisse, ac subegisse maximos principes.



# EXPLANATIO

Extendit palmites usque ] Terminos imperij dicit fuisse mare interius, & fluvium Euphratem.

Vastavit eam aper ] Impias, & crudeles nationes vocat Apros, & feras.

Et filium ipsum ] Sic appellat gentem Hebræam, de qua loquens Dominus in Genesi ait, filius meus primogenitus Israel. Et apud Oseam, ex Aegypto vocavi filium meum. hunc filium corroboravit Deus, & maxime clarum, & illustrem reddidit ad gloriam nominis sui. sed possumus ex Hebræo vertere etiam hoc modo, & propaginem ipsam, quam roborasti tibi. quod magis congruit cum allegoria perpetua psalmi.

Ab increpatione tua peribunt ] Si (nquit) hæc ira tua perseverat, profecto gens tua funditus interibit.

Sit manus tua ] Iam queso (inquit) manus tua salvari protege homines, quos dextera tua semper tutatus es.

## ARGUMENTVM PSAL.

### LXXXI.

Hortatur populum ad celebrandos Dies festos, atque solennes, & ad Deum pie, ac religiose colendum, commemorans eius præclara in Hebræos beneficia, simulq; admonens, quantum noceat religionis contemptus.

Victori ad Githith, Asaph, Psal.

L X X X I.

Exultate Deo adiutori nostro, iubilate Deo Iacob,  
Sumite psalmum, & date tympanū, psalterium  
iucundum cum cythara

Buccinate in neomenia tuba in insigni die solennis  
tatis nostræ.

Quia præceptum Israel est, & iudiciū Dei  
Iacob.

Testimonium in Ioseph posuit illud, cum exiret de  
terra Aegypti, linguam, quam non nouerā, audiui.

Subduxi ab oneribus dorsum eius, manus eius ab  
ollis (faciendis) recesserunt.

In tribulatione inuocasti me, & liberaui te, exau  
diui te in abscondito tonitru, probaui te apud aquam  
contradictionis.

Audi populus meus, & contestabor te, Israel si  
audieris me, non erit in te Deus extraneus, neque ado  
rabis Deum alienum,

Ego enim sum Dominus Deus tuus, qui eduxi te  
de terra Aegypti, dilata os tuum, & implebo illud.

Et non audiuit populus meus uocem meam, &  
Israel non attendit mihi.

Et dimisi eos secundum desideria cordis ipsorum,  
ambulauerunt in consilijs suis.

Si populus meus audisset me, Israel si in uijs meis  
ambulasset,

Breuiſſimo tempore inimicos eorum humiliassem,

# EXPLANATIO

Et super tribulantes eos misissem manum meam .

Inimici Domini mentiti fuissent ei, Et fuisset tempus eorum in secula ,

Et cibassem illos ex adipe frumenti , Et de petra melle saturassem eos .

## EXPLANATIO.

Buccinate in Neomenia tuba ] Significare uidetur Calendas septimi mensis , quem appellabant diem festum clangoris , Et tubarum , de quo die scriptum est in Leuitico , Et Numeris .

Quia praeceptum est ] Celebrate inquam hunc diem solēnem , quoniam id uobis praecepit Deus , Et ita iudicauit , Et statuit esse faciendum .

Testimonium in Ioseph ] Hunc(inquit)ritum sacrorum Deus posuit testimonium in Iosepho, id est , lege sanxit , Et mandauit obseruari à posteritate Iosephi, nimirum ab Hebraeis, quo tempore illi ex Aegypto egressi sunt , Et Deū ipsum loquentē audierūt. Hoc enim significat , ut sentit Abrahamus Esdra, cum ait sub persona populi , linguam , quam non nouerā, audiui . Quid uero , si populus significet his uerbis peregrinationem , Et seruitutem suam apud Aegyptios alienae linguae homines ?

Subdixi ab oneribus ] Deum inducit loquentem , Et beneficia sua erga Iudeos cōmemorantē .

Manus eius ab ollis ] Nam in eiusmodi operibus efficiendis occupati erant Hebraei , cum Aegyptijs seruirent . Hinc illud in Exodo , Ad amaritudinem perducebant uitam eorum seruitute dura in lu-

to, & lateribus, ac omni opere agresli.

Et exaudiui te in abscondito tonitruum ] Vie  
detur innuere tonitrua, & tēpestatem illam, quam  
excitauit Deus in Aegyptios in mari rubro, de qua  
in psalmo LXXVII. Quod autem dicit, in ab-  
scondito tonitruum, significat, se nimbis, & nubibus,  
unde horrida illa tonitrua erumpebant, circumfus-  
sum affuisse, & pro ipsis propugnauisse.

Probaui te ] Cum tot, ac tanta beneficia  
à me accepisses, tamen te ingratum, & immemore  
potentie, ac misericordie meae ostendisti, cum ad ex-  
plorandum animum tuum permisisses, ut te aqua  
deficeret.

Israel si audieris me ] Sæpe admonuimus,  
Hebræam linguam esse admodum angustam, &  
concisam. quæ res magnam sæpe parit obscuritatem,  
nisi aliqua addantur ad explendas sententias. quod  
nonnulli hoc loco esse faciendum existimant, ut hi  
uersiculi ad hunc modum explanentur, uel etiam ex  
hebræo exprimantur: Si audieris me, si non erit in  
te Deus extraneus, si non adorabis Deum alienum,  
(ego enim sum Dominus Deus tuus, qui eduxi te de  
terra Aegypti) dilata os tuum, & implebo illud: id  
est, si ea, quæ dico, obseruaueris, pete, quicquid optas,  
neque unquam repulsam feres.

Et dimisi eos ] Nullo ferè maiore supplicio  
afficere potest Deus illos, qui parere nolunt salutari-  
bus monitis ipsius, quàm si eos patiatur indulgere, at-  
que obsequi cupiditatibus suis, & sua consilia sequi,  
quibus sibi pestem, ac perniciem machinantur, &

comparant, idq; tum maxime, cum sibi sapere, ac rebus suis optime consulere uidentur. Itaque semper orandus est Deus, ut nos ipse spiritu suo regat, & gubernet: quicumque enim spiritu Dei ducuntur, ut ait diuus Paulus, y sunt filij Dei, ceteri Deum non propitium, sed iratum habent.

Inimici Domini mentiti fuissent ] Id est, bello domiti simulassent beneuolentiam, & uoluntaria seruitutem. De hac loquendi figura dictum est in explanatione psalmi XVIII.

Et fuisset tempus eorum in secula ] Id est, æuum populi mei perpetuo florisset. Sic explanant nonnulli. Theodoretus autem, & Euthymius hoc ad inimicos Dei referunt, & aiunt, hanc esse senectiã horum uerborum, impiarum nationum calamitates perpetuas futuras fuisse: affirmant enim, uocabulum temporis apud Syros in eam sententiam accipi.

Et cibassem illos ex adipe ] Hoc uersiculo si significare uoluit omnium reru affluentiam, & agrorum fertilitatem eximiam. sic in Deuteronomio, suzgeret mel ex petra, & oleum è saxo durissimo.

ARGVMENTVM PSAL.

LXXXII.

Inducit Deum reprehendentem iudices populi sui, eosq; acriter accusantem iniustitiæ.

Psalmus Asaph, LXXXII.

Deus stat in synagoga Deorum, in medio autem

Deos indicat .

Vsquequo indicatis iniquitatem , & facies peccatorum sumitis ?

Iudicate egeno , & pupillo , humilem , & pauperem iustificate .

Eripite pauperem , & egenum de manu peccatoris liberate .

Nescierunt , neque intellexerunt , in tenebris ambulante , mota sunt omnia fundamenta terræ .

Ego dixi , Dij estis , & filij excelsi omnes ,

Attamen sicut homines moriemini , & , sicut unus de principibus , cadetis .

Surge Deus , iudica terram , quoniam tu hæreditabis in omnibus gentibus .

#### EXPLANATIO .

In Synagoga Deorum ] Deos appellare solent literæ sanctæ principes , & iudices , propterea quòd eiusmodi administratio sit res quædam diuina , non humana , ut ait Iosaphat in secundo libro Paralip. Hos igitur monet , ut meminerint Deum interesse iudicijs ipsorum , & graue supplicium sumpturum esse de ijs , qui à iustitia , & æquitate declinant .

Et facies peccatorum sumitis ] Id est , improbis fauetis , & eorum gratiam aucupamini innocentibus opprimendis .

Iudicate egeno , & pupillo ] Id est , illos ab iniuria , & calumnijs improborum prohibete , & tenuiores iniuste in iudicium uocatos absoluite .

Nescierunt , neque intellexerunt , ] Frustra

## E X P L A N A T I O

(inquit) moneo, neque enim resipiscunt, sed in tenebris ignorantiae, & iniustitiae perseuerant. hinc fit, ut omnis humanae uitae ratio, & ordo peruertatur, & omnia plena sint tumultu, & confusione.

Ego dixi, Dii estis ] Ego (inquit Deus) uos appellatione mea dignatus sum ob excellentiam officij, quo fungimini, uosque filios meos nomino, scitote tamen, uos aequae ac homines infimos esse morituros, neque magis uitaturos mortem, quam alium quemuis ex principibus, & iudicibus, qui respublicas impiarum gentium administrant: itaque iustitiam, & aequitatem colite, illud intelligentes, uos breui reddituros esse rationem administrationis uestrae. Theodoretus existimat, Deum minari his uerbis, iniquos iudices sic casuros, ut Diabolus cecidit, qui ob superbiam, & iniustitiam deiectus est de altissimo dignitatis gradu, in quo Deus illum collocarat. Quidam uocabulo principum hoc loco existimant significari tyrānos, qui ad inferos praecipitantur.

Surge Deus ] Precatur Deum, ut quando omnes iudices à iustitia recesserunt, ipse iudicandi, & regendi negotium suscipiat misso ad homines filio suo. quod quidem futurum providens subiungit, omnes gentes hereditate ad Deum peruenturas, quae prius in potestate Diaboli erant.

## A R G V M E N T V M   P S A L .

### L X X X I I I .

Populus orat auxilium Dei contra gentes finitimas,

mas , quæ facta conspiratione bellum intulerant .

Canticum psalmi Asaph, LXXXIII.

Deus ne sileas , ne taceas , neque quiescas Deus ,  
Quoniam ecce inimici tui sonuerunt , & qui odes-  
runt te , extulerunt caput .

Aduersus populum tuum astute excogitauerunt  
consilium , & consultauerunt aduersus absconditos  
tuos .

Dixerunt , uenite , & disperdamus eos de gente ,  
& non memoretur nomen Israel ultra .

Quoniam conspirauerunt unanimiter simul , ad-  
uersus te fœdus fecerunt tabernacula Idumæorum , &  
Ismaelite ,

Moab , & Agareni , Gebal , & Amon , & Ama-  
lech , Philistei cum habitantibus Tyrum .

Etiam Assur uenit cum illis . facti sunt in adiuto-  
rium filys Loth .

Fac illis sicut Madian , & Sisare , sicut Labin in  
torrente Cisson .

Disperierunt in Endor , & facti sunt sterquiliniũ  
terræ .

Pone principes eorum sicut Oreb , & Zeb , & Ze-  
bee , & Salmana :

Omnes principes eorum , qui dixerunt , hereditas  
te possideamus habitacula Dei .

Deus meus pone illos ut rotam , & sicut stipulam  
ante faciem uenti .

Sicut ignis qui comburit syluam , & sicut flamma



# EXPLANATIO

comburens montes ,

Ita persequere illos tempestate tua, & turbine tuo conturba eos .

Imple facies eorum ignominia , & quærent nomē tuum Domine .

Erubescant , & conturbentur in seculum seculi, et confundantur , & pereant ,

Et cognoscent , quòd nomen tibi Dominus , tu. sō= lus altissimus in omni terra .

## EXPLANATIO.

Deus ne sileas ] Id est , ne scelera impiorū , quæ uides , dissimula , ne ue te contine à supplicio il= lorum .

Aduersus absconditos tuos ] Quanquam satis declarasse uidemur in explanatione psalmi XXXI, cur Asaphus Hebræos uocet absconditos Dei, tamen operæpretium erit, pauca hæc adiungere . Deus misericordiæ parens salutem piorum tutissima quidem custodia tegit , ac munit , sed hoc tutelæ ge= nus tam remotum est ab oculis humanæ rationis , ut aliquando pij maxime à Deo negligi , & derelinqui uideantur , cum Deus illos maxima cum beneuolentia tuetur . denique qui status , quæ conditio , quàm se= cura , quàmq; beata sit eorum uita , qui ueram pie= tatem colunt , nemo pietatis expers suspicari potest, ne dum intelligere . iure igitur & merito gentem he= bræam , quæ sola ex omnibus nationibus Deum san= cte uenerabatur , Asaphus appellat absconditos Dei , neque diuus Paulus ob aliam causam dicere uidetur

uitam Christianorum in Deo absconditam esse.

Filys Loth   Id est, Moabitis, & Ammonitis.

Sicut Madian, & Sisare   Exercitum Madianitarum Gedeon profligauit casis ducibus Orebo, & Zebo, & Zebee, & Salmana. quæ historia scripta est in libro Iudicum. Sisara autem, ut est in eodem libro, Dux fuit copiarum Iabini regis Cananai, quas copias delcuit Baracus, & Sisaram quidem fugientem interemit Iael uxor Cabari, Iabinus uero in pralio casus est.

In Endor   Is locus erat in ea regione, quæ assignata fuit tribui Manassæ, ut scriptum est in libro, qui inscribitur Iosue.

Facti sunt sterquilinium terræ   Relicti scilicet in agris insepulti.

Possideamus habitacula Dei   Id est urbes, & oppida Hebræorum.

Pone illos ut rotam   Id est instabiles, & agitados instar rotæ. hac similitudine utitur etiam Esaias.

Et quærent nomen tuum   Et potentiam tuam experti nomen tuum uenerabuntur, & solicii quærent, quis nam sit is Deus, qui hostes populi sui tam acriter ulciscatur.

Et cognoscent   Intelligent, te unum esse, cui nomen Domini conuenit, quique omnia terrarum sola gubernas, Deos autem suos esse Deos inanes, & commentitios.

# EXPLANATIO

## ARGVMENTVM PSAL.

### LXXXIIII.

Describitur, quàm ardenti desiderio teneretur Dauid adeūdi ad templum Dei, à quo abesse cogebatur propter uim inimicorum.

Victori ad Githith, filiorum Coræ,

Psal. LXXXIIII.

Quàm dilecta tabernacula tua Domine exercituum, concupiscit, & deficit anima in atria Domini.

Cor meum, & caro mea exultauerunt in Deum uiuum.

Etiam passer inuenit sibi domum, & hirundo nidum sibi, ubi ponat pullos suos.

Altaria tua Domine exercituum, Rex meus, & Deus meus.

Beati qui habitant in domo tua Domine, perpetuo laudabunt te.

Beatus uir, cuius fortitudo in te est, semita in corde eorum, transeuntes uallem fletus fontem ponent eam.

Etiam cisternas pluuia replebit, ibunt de fortitudine in fortitudinem, comparebit (quisque eorum) apud Deum in Sion.

Domine Deus exercituum exaudi orationem meam, auribus percipe Deus Iacob.

Protektor noster aspice Deus, & respice in faciem CHRISTI tui,

Quia melior est dies una in atrijs tuis super millia.  
Elegi ad limē morari domus Dei mei magis, quā  
habitare in tabernaculis peccatorum.

Quia sol, & scutum Dominus Deus, gratiam,  
& gloriam dabit Dominus.

Non priuabit bonis eos, qui ambulant in innocen-  
tia, Domine exercituum, beatus homo, qui sperat in te.

## EXPLANATIO.

Concupiscit, & deficit anima mea in atria Domi-  
ni ] Id est, deficit desiderio adcundi ad tem-  
plum Dei.

Etiā passer ] Quidam ex Hebræis hunc  
locum ita explanant, passeribus, & hirundinibus pa-  
tet aditus ad templum tuum, & apud altaria tua  
nidos fingunt, at mihi ad ea accedere non licet. Alij  
uero sic interpretantur, aues quidē inueniunt locum,  
ubi cum suis pullis quiescant, at ego ad aras tuas Do-  
mine adire non possum, in quibus solis acquiesco. Ha-  
bet autem magnam uim ad exprimendū desiderium,  
& dolorem animi oratio illa imperfecta, altaria tua  
Domine exercituum.

Beati qui habitant ] Beatos ait esse sacerdo-  
tes, & leuitas, quibus concessum sit, in templo Dei  
dies, noctesq; uersari, & laudes eius quotidianis hy-  
mnis celebrare. Beatos item iudicat eos, qui omnem  
suam uim, & fortitudinem in Deo locatam putant,  
& propterea semper habent in animo semitas, quæ  
ducunt ad templum eius, atque illud frequentare nō  
intermittunt. Hi quidem iter facientes per loca atri-

# EXPLANATIO

da, & sitientia, qualis est uallis fletus, in ijs puteos fodiunt, & cisternas ad colligendam aquam pluuiã, ut commoditate itineris homines magis incitentur ad frequentandam ædem Dei. neque uero longitudine uie fatigantur, sed ob singularem animi alacritatem inter eundum magis, ac magis uigent, donec perueniant ad Sionem. Sunt multæ aliæ explanationes horum uersuum, sed ea, quam nos proposuimus, in primis conuenire uidetur argumento hymni. Vallis fletus mentio fit in libro Iudicum.

Exaudi orationem meam ] Qua precor, mihi, & meis aditum patere ad templum tuum.

Et respice in faciem CHRISTI tui ] Aspice (inquit) uultu placido seruum tuum supplican-  
tem, quem tu regem populi tui constituisti.

Quia melior est dies una ] Opto, inquam, & uotis omnibus expeto, mihi facultatem dari accedendi ad templum tuum, quoniam dies unus in atrijs tuis pie, sancteq; ætus, anteponendus est sexcentis annis, itaque malim ego ad limina domus Dei mei despectus iacere, quàm commorari in ædibus magnificentissimis impiorum.

Quia sol, & scutum Dominus Deus ] Dominus est sol mentes hominum suo prospero, & salutari lumine exhilarans, augens, nutricans, sensu iustitiæ, ac pietatis afficiens, omnesq; errorum, & ignorantie tenebras pellens. Dominus est scutum firmissimum, quo piorum innocentia protecta, neque uolentis rerum aduersarum ictibus concutitur, neque ullis improborum, aut mortis, aut Diaboli oppugna

tionibus frangitur. Dominus est uberrimus, & perennis omnium bonorum fons, à quo manat ad cultores suos gratus, & amabilis animi candor, uera sanctitas, solida gloria, dulcissima pax, uita denique beata, & sempiterna. Summe omnium rerum præpotens rector, & Domine, beatus ille, qui omnem suam spem in tua bonitate, & misericordia collocat.

## ARGVMENTVM PSAL.

L X X X V.

Vaticinatur, tempus fore, cum Deus per unigenam filium suum liberabit genus humanum asperissima tyrannide Diaboli, & in terris misericordia, ueritas, pax, & iustitia florebunt. Qui uero prædicationem huius hymni pertinere existimât ad reditum Hebræorum ex Babylone, facile coarguuntur, cum historiæ illi non conueniant, quæ hic prædicuntur.

Victori, filiorum Coræ psalmus LXXXV.

Benedixisti Domine terram tuam, auertisti captiuitatem Iacob.

Remisisti iniquitatem plebis tuæ, operuisti omnia peccata eorum.

Mitigasti omnem iram tuam, auertisti ab ira indignationis tuæ.

Conuerte nos Deus salutaris noster, & auerte iram tuam à nobis.

Nunquid in æternum irasceris nobis? aut extendes iram tuam à generatione in generationem?

# EXPLANATIO

Non ne tu conuersus uiuificabis nos ? & plebs tua  
letabitur in te ?

Ostende nobis Domine misericordiam tuam , &  
salutare tuum da nobis .

Audiam , quid loquatur dominus Deus , quoniam  
loquetur pacem super plebem suam ,

Et super sanctos suos , & non reuertentur ad stul-  
titiā .

Vtique propè timentes eum salutare ipsius , ut ha-  
bitet gloria in terra nostra .

Misericordia , & ueritas obuierunt sibi , iustitia ,  
& pax osculate sunt .

Veritas de terra orta est , & iustitia de cœlo pro-  
spexit .

Etiam Dominus dabit benignitatem , & terra no-  
stra dabit fructum suum .

Iustitia coram eo ambulabit , & ponet in uia gres-  
sus suos .

# EXPLANATIO.

Benedixisti ] Admonuimus alio loco , quæ  
uerborum uoces tempus præteritum , aut instans , aut  
futurum indicant , eas uoces apud scriptores Hebræos  
ita uim , & notionem inter se communicare , ut præ-  
sentia uerbis etiam tempus ueniens , aut præteritum  
significantibus exprimantur , & quæ res euenturæ  
prædicuntur , earum rerum tempora , si formam ip-  
sarum uocum spectes , nonnunquam præterisse ui-  
deantur . itaque nemini mirum uideri debet , si res  
multis post seculis futura exponatur in hoc hymno ,

perinde quasi iam facta esset. Sed nonnulli interpretes Latini cum animaduverterent, eam rem magnam saepe obscuritatem parere, quoties huiusmodi loci inciderent, illos sic conuerterunt, ut proprietates, & usus latinæ linguae postulabat. quam interpretandi rationem qui sequuntur, à doctis, & eruditis iure laudantur. Verum ad ipsam uerborum explanationem ueniamus.

Benedixisti Domine terram tuam ] Id est, populum tuum diuinis, & coelestibus donis afficies, cum è coelo miseris unigenam filium tuum. Hoc ita euenisse, ut hic prædictum est, gratulatur diuus Paulus his uerbis in epistola ad Ephesios scripta, Benedictus Deus, & pater Domini nostri IESU CHRISTI, qui benedixit nos omni benedictione in coelestibus, in CHRISTO.

Auertisti captiuitatem Iacob ] Id est, populum tuum à seruitute Diaboli, & peccati, & mortis eripies. qua de re sic Zacharias pater Ioannis Baptistæ in illo pulcherrimo hymno, quem cecinit lætās, Deum iam exequit, quod hic prædicitur, Benedictus (inquit) dominus Deus Israel, quia uisitauit, & fecit redemptionem plebis suæ, & erexit cornu salutis nobis in domo David pueri sui: Sicut locutus est per os sanctorum, qui à seculo sunt, prophetarum suorum, fore, ut seruaremur ab inimicis nostris, & de manu omnium, qui oderunt nos.

Remisisti iniquitatem plebis tuæ ] Id est, illi condonabis omnia peccata, simul atque IESUS CHRISTVS illa suo purissimo sanguine expia-



rit. Hinc illud apud diuum Lucam, Et uocabis nomen eius IESVM, is enim saluum faciet populum suum à peccatis suis.

Mitigasti omnem iram tuam ] Hoc est, reconciliabis te hominum generi, cui multa iam secula grauissime iratus, atque infensus es. Quo modo autem facta sit hæc reconciliatio, docet diuus Paulus his uerbis in epistola, quam scribit ad Romanos. Commendat autem suam charitatem erga nos Deus, quiddam cum adhuc essemus peccatores, CHRISTVS pro nobis mortuus est: multo igitur magis iustificati nunc sanguine ipsius seruabimur per eum ab ira: nam si, cum inimici essemus, reconciliati fuimus Deo per mortem filij eius, multo magis reconciliati seruabimur per uitam ipsius.

Conuertere nos ] Hactenus diuina prædictio, nunc uates sanctus nomine totius populi precatur, ut qua Deum facturum esse, in superioribus uersibus prædixit, ea Deus maturet perficere: Tu (inquit) ex cuius misericordia pendet omnium salus; conuertere mentes, & uoluntates nostras ad te, ad quem nemo sponte sua se potest conuertere. sic Hieremias, conuertere me, & conuertar, quia tu Dominus meus es: postquam enim conuertisti me, egi poenitentiam; & postquam ostendisti mihi, percussi femur meum, confusus sum, & erubui.

Nonne tu conuersus uiuificabis nos? ]

Nonne tu (inquit) reconciliatus uitam nobis salutemque donabis? Hæc interrogandi formula uim asseruerandi habet, ut etiam in psalmo CXXXIX.

Non ne qui oderunt te Domine, odio habui, & contra inimicos tuos ira excādui? Quid autem hoc uiuificandi uerbo intelligat uates sanctus, explicat hoc modo diuus Paulus in epistola ad Ephesios scripta, Deus, qui diues est in misericordia, propter multā charitatem suam, qua dilexit nos, etiam cum essemus mortui per delicta, conuiuificauit nos und cum CHRISTO (per gratiam estis seruati) simulq; cum eo resuscitauit, & simul cum eo sedere fecit inter coelestes in CHRISTO IESV.

Ostende nobis Domine misericordiam tuam ]  
Ostendere misericordiam in literis sanctis, est illam tribuere. sic diuus Paulus ait, in euangelio patefieri iustitiam Dei, cum dicere uelit, illam euangelium amplectentibus impartiri.

Audiam, quid loquatur Dominus Deus ]  
Vates sanctus post piam precationem aures animi attentas adhibet ad oraculum Dei: quisquis enim pura, & casta mente precatur, sine dubio responsum, & illud quidem gratissimum, fert à spiritu Dei.

Quoniam loquetur pacem super plebem suam ]  
Id est, promittet pacem, & omnia prospera, & secunda populo suo. Eam uero pacem significat, quam coelites praedicauerunt, cum nascente CHRISTO canerent, Gloria in altissimis Deo, & in terra pax, hominibus bona uoluntas. Hunc optatissimum pacis nuntium postea nuntiarunt apostoli toto terrarum orbe, de quibus Esaias, Quam speciosi pedes euangelizantium pacem, euangelizantium bona. Quam uero pacem illi nuntiarint, diuus Paulus his memorabi

# EXPLANATIO

libus uerbis exponit, Deus reconciliavit nos sibi per IESVM CHRISTVM, deditq; nobis ministerium reconciliationis, quandoquidem Deus erat in CHRISTO mundum reconcilians sibi, non imputans eis peccata sua, & posuit in nobis sermonem reconciliationis. Itaque nomine CHRISTI legatione fungimur tanquam Deo uos obsecrante per nos, rogamus pro CHRISTO, Reconciliamini Deo, eum enim, qui non nouit peccatum, pro nobis peccatum fecit, ut nos efficeremur iustitia Dei in ipso. Hæc quidem nuntiarunt apostoli omnibus terrarum oris, sed non omnes eorum uerbis fidem habuerunt: Esaias enim sub ipsorum persona loquens ait, Domine quis credidit sermonibus nostris? propterea uates ait, loquetur pacem super plebem suam, & super sanctos suos, intelligens, hac coelesti pace usuros tantummodo homines sanctos, & populum Dei, id est, illos, qui ueritatem euangelij approbantes ea re Deo chari, & sancti fiunt, quemadmodum CHRISTVS ait apud Ioannem, Pater sanctifica eos per ueritatem tuam, sermo tuus ueritas est. Nam quod subiungitur, & non reuertentur ad stultitiam, id significat, eos, qui euangelium uere amplectuntur, spiritu CHRISTI afflatos auertere animum a uitijs, & insanijs cupiditatibus, & multam salutem dicere humane sapientiæ, quam diuus Paulus asseuerat stultitiam esse apud Deum.

Vtique propè timentes eum salutare ipsius. Præsto est (inquit) Dominus auxilio suo ijs, qui uerentur, & colunt sanctissimum numen ipsius, ita=

que ille miseratus calamitates nostras è caelo mittet ad nos liberandos filium suum, ut aliquando gloriaturi simus, gloriam Dei incolere terram nostram, seq; uidentem oculis mortalium præbere, & cum ciuibus nostris familiarissime uersari. Hoc autem perfectum esse, prædicat diuus Ioannes his uerbis, uerbum caro factum est, & habitauit inter nos, & uidimus gloriam eius, gloriam ueluti unigeniti à patre, plenum gratia, & ueritate.

Misericordia, & ueritas obuiauerunt sibi ]  
Satis perspicuum est, uatem in hoc uersu, & in eo, qui proxime sequitur, de re futura tanquam de præterita loqui. Significat autem his elegantissimis uerborum figuris, eas uirtutes, quarum mentionem facit, inter se coniunctas fore beneficio CHRISTI, per quem misericordiam consecuti sumus à Deo, & cognitionem ueritatis, idemq; nos iustos reddidit ex iniustis, & Deo reconciliauit, atque ita iniustitia, & pax inter se osculatæ sunt. propterea subiungitur, ueritatem ex terra orituram, id est, mortales euangelium, & ueram religionem amplexaturos, & iustitiam è caelo prospecturam, hoc est, Deum illos in gratiam recepturum, & uera iustitia donaturum: iustitiam enim cœlestem uocat iustitiam fidei, per quam Deus hominibus non solum omnia peccata condonat, sed etiam suum spiritum sanctum impartitur, eosq; sibi filios adoptat, & promptos, alacres, ac paratissimos ad omnia uirtutum officia reddit.

Etiam Dominus dabit benignitatem ] id est, humano generi benigne faciet, & terra nostra,

# EXPLANATIO

quæ adhuc sterilis, inculta, atque horrida fuerat, uberrima fiet, ac feracissima. quem uero fructum laetura sit, explicat subiungens, iustitiam coram Deo ambulaturam, hoc est solidam, & germanam iustitiam in animis mortalium spiritu CHRISTI renouatis, & ex cultis regnaturam: semper enim illorum oculis obuersabitur Deus, & summa semper diligentia cauebunt, ne aberrant à uia pietatis, quæ ducit in cælum.

## ARGUMENTVM PSAL.

### LXXXVI.

Precatur hoc suauissimo carmine Deum, ut se tueatur ab insidijs inimicorum, & animum suum amore uirtutis, & pietatis accendat, simulq; prædicat potentiam, & misericordiam eius.

## Oratio Dauid, Psalmus LXXXVI.

Inclina Domine aurem tuam, & exaudi me, quoniam inops, & pauper sum ego.

Custodi animam meam, quoniam sanctus sum, saluum fac seruum tuum Deus meus sperātem in te.

Miserere mei Domine, quoniam ad te clamo tota die, lætifica animam serui tui, quoniam ad te Domine animam meam leuaui.

Quoniam tu Domine benignus, & mitis, & multe misericordiae omnibus inuocantibus te.

Auribus percipe Domine orationem meam, & intende uoci deprecationis meæ.

In die tribulationis meæ clamaui ad te, quia exau-  
disti me.

Non est similis tui in dijs Domine, & non est se-  
cundum opera tua.

Omnes gentes, quasunque fecisti, uenient, &  
adorabunt coram te Domine, & glorificabunt nomen  
tuum.

Quoniam magnus es tu, & faciens mirabilia, tu  
es Deus solus.

Doce me Domine uiam tuam, & ingrediar in ue-  
ritate tua, uni cor meum, ut timeat nomen tuum.

Confitebor tibi Domine Deus meus in toto corde  
meo, & glorificabo nomen tuum in æternum,

Quia misericordia tua magna est super me, &  
eruisisti animam meam ex inferno inferiori.

Deus iniqui insurrexerunt aduersum me, & con-  
gregatio potentium quæsierunt animam meam, &  
non proposuerunt te in conspectu suo.

Et tu Domine Deus miserator, & misericors, tar-  
dus ad iram, & multæ misericordiæ, & ueritatis,

Respice in me, & miserere mei, da fortitudi-  
nem tuam seruo tuo, & saluum fac filium ancillæ  
tuæ.

Fac mecum signum in bonum, ut uideant, qui  
oderunt me, & confundantur quoniam tu Domine  
adiuuisisti me, & consolatus es me.

#### EXPLANATIO.

Inclina Domine aurem tuam ] Aures (in-  
quit) attentas adhibe ad precationem meam, et fer

# EXPLANATIO

opem supplici misericordiae tuae, quoniam inops consili-  
li, & omni humano praesidio destitutus sum ego .  
Tuere quaeso uitam meam, quia pietati, & innocen-  
tiae deditus sum, incolumem serua famulum tuum,  
cuius omnis spes nritur benignitate tua .

Non est similis tui in dijs ] Id est, nemo  
de ijs, qui dii nominantur, tecum est comparandus,  
neque potest quisquam imitari opera tua . quamob-  
rem futurum est tandem, ut omnes gentes te solum  
colant repudiata superstitione, & à Christo ad ueram  
pietatem, & religionem perducantur .

Et ingrediar in ueritate tua ] Hanc sen-  
tentiam explicauimus in explanatione psal. XXVI .

Vni cor meum ] Ut scilicet abiecta omni  
alia cogitatione, & studio te unum amem, & co-  
lam, & in omnibus rebus nihil nisi te unum respi-  
ciam .

Et cruiſti animam meam ex inferno inferiori ]  
Id est, ex grauissimis periculis, & morte certa, &  
manifesta .

Et saluum fac filium ancillae tuae ] Signifi-  
cat, se ex pijs, & religiosiſ parentibus ortum esse,  
uel potius exaggerat seruitutem, nam filius ancillae  
uerna est .

Fac mecum signum ] Ede ( inquit ) illu-  
stre aliquod signum tuae erga me beneuolentiae, ut  
uel inimici mei fateri cogantur, me tibi carissimum  
esse .

Argumentum

ARGVMENTVM PSAL.  
LXXXVII.

*Celebrat Hierosolyma, & ecclesiam CHRISTI,  
quam hæc urbs significabat, simulq; prædicit, ueram  
religionem toto terrarum orbe propagandam.*

Filiorum Coræ psalmus canticæ,  
LXXXVII.

*Fundamenta eius in montibus sanctis, diligit Do-  
minus portas Sion super omnia tabernacula Iacob.*

*Gloriosa dicta sunt de te ciuitas Dei.*

*Memor ero Raab, & Babylonis cū scientibus me.*

*Ecce Palæstina, & Tyrus, & populus Aethiopū,  
ille natus est ibi.*

*Et de Sion dicetur, homo, & homo natus est in  
ea, & ipse fundauit eam altissimus.*

*Dominus numerabit scribendo populos, ille natus  
est ibi.*

*Et cantores sicut tibicines, omnes scaturigines meæ  
in te.*

EXPLANATIO.

*Hic hymnus admodum obscurus est, neque ego  
quicquam habeo, quod pro certo polliceri queam huic  
obscuritati lucem aliquam allaturum. Reliquum est  
igitur, ut eam explanationem, quæ probabilior, &  
magis consentanea pietati uideatur, adhibeam, ma-*



qui sequuntur : cum enim ait, memor ero Raab, & Babylonis, Deum ipsum inducit loquentem, ac pollicentem, se Aegyptios, & Babylonios, & ceteras nationes ad ecclesiam suam aggregaturum: quarum nationum uidebatur oblitus, cum illas pateretur in maximis errorum tenebris uersari. sed possumus uertere hunc uersiculum etiam ad hunc modum, Faciam meminisse Raab, & Babylonis eos, qui nouerunt me. quae uerba tamen eandem sententiam continent: significat enim, se missurum Apostolos, qui eas gentes ab impura, & impia superstitione traducant ad castissimum sui numinis cultum, plenissimamq; sanctitatis religionem. Quod uero sanctus uates subiungit, ille natus est ibi, uidetur indicare, omnes gentes se se coniuncturas cum ecclesia Hierosolymis instituta, propterea quia insignis ille ab omnibus pijs expectatus, in ijs locis oriturus, suumq; regnum initurus sit. quibus de rebus explicatum est in explanatione psalmi secundi. itaque ortus CHRISTI fecit, ut quamplurimi & Hierosolymis, & ceteris omnibus in locis nascerentur ex semine immortali, ut ait diuus Petrus, per uerbum Dei uiuentis, & manentis in aeternum. Hoc significat, cum ait, Et de Sion dicetur, homo, & homo natus est in ea. Sionis autem nomine intelligi in literis sanctis non urbem Iudeorum modo, sed etiam ecclesiam Christi, notissimum est omnibus. itaque quod addit, ipsam Sionem à Deo fundatam esse, id intelligi uult, quod postea res ipsa docuit, ecclesiam CHRISTI non artificio hominum, sed sapientia Dei constitutam esse, & propterea perpetuo perman-

furam, neque uetustate deleri, aut ulla hostium op=  
 pugnatione opprimi posse. quod utrunque eleganter  
 expressit apud Matthæum ipse Christus, cum diceret,  
 se ædificaturum ecclesiam suam, neque portas infero=  
 rum ad eam euertendam uim ullam habituras. Ac  
 cum dixisset, ecclesiam foecundissimam fore, & so=  
 bolem suam toto terrarum orbe propagaturam, re=  
 ète subiungit, Dominus numerabit scribendo popu=  
 los, id est recensabit omnes, qui nati fuerint in Sione,  
 & nomina eorū scribet, qui repudiatis falsis dijs re=  
 ligioni sanctæ adhaeserint. significat autem hoc dicen=  
 di modo, Deum omnium, quicumque erunt ueri Chri=  
 stiani, summam rationem habiturum. quin etiam  
 hæc translatio sumpta uidetur à rege, qui conscribat  
 exercitum. neque profecto aliud est ecclesia sanctorū,  
 nisi exercitus ex hominibus omnium ordinum, & na=  
 tionum comparatus, qui duce CHRISTO con=  
 tinentia bella gerit cum principibus, & rectoribus te=  
 nebrarum uitæ huius. qua de re diuus Paulus scitu  
 dignissima scribit ad Ephesios. Et quoniam ortus  
 CHRISTI tantarum rerum origo, & causa ex=  
 titit, propterea repetitum est, ille natus est ibi. In fi=  
 ne hymni iterum orationem cōuertit ad Sionem, pro=  
 mittens, cantores similiter atque tibicines omne suum  
 studium collaturos ad celebrandas laudes ipsius, quam  
 Deus tam charam, acceptamq; habet. Quin etiam (in=  
 quit) quicquid carminis uena ingenij mei profuderit,  
 id ego omne tibi consacro, & dico. simile est illud  
 poetæ latini:

Sed tamen exiguu quodcunque ex pectore riu  
Fluxerit, hoc patrie seruiat omne mea.

## ARGVMENTVM PSAL.

LXXXVIII.

Psalmus est plenus affectibus, & querelis, in quo  
narrat calamitates suas acerbissimas, & misericor  
diam Domini implorat.

Canticum psalmi, filiorum Cora, Victori ad  
Mahelath propter afflictionem, eruditio Eman  
Ezraite, Psalmus LXXXVIII.

Domine Deus salutis mea, in die clamaui & nocte  
coram te.

Inerit in conspectum tuum oratio mea, inclina  
aurem tuam ad precem meam.

Quia repleta est malis anima mea, & uita mea  
inferno appropinquauit.

Aestimatus sum cum descendentibus in foveam,  
factus sum sicut homo sine fortitudine, inter mor  
tuos liber,

Sicut uulnerati dormientes in sepulcris, quorum  
nulla amplius superest memoria, & ipsi a manu tua  
abscissi sunt.

Posuisti me in lacu inferiori, in locis tenebrosis,  
& profundis.

Super me confirmatus est furor tuus, & omnes  
fluctus tuos induxisti super me.

Longe fecisti notos meos a me, posuisti me abomis  
nationem ipsis.

bili calamitatum tempestate iactatus, nihil aliud cer-  
nit nisi mortem, atque inferos, quippe qui non homi-  
nes solum, sed etiam ipsum Deum grauissime iratum,  
atque infestum experitur, ad quem tamen confugit  
tanquam ad portum, & in maxima omnium rerum  
desperatione, salutis suae spem reponit in eo, quem si-  
bi censet inimicum. Hoc nemo mortalium sua sponte  
facere potest, sed spiritus eius, qui percutit, suppli-  
cat pro percusso gemitibus inenarrabilibus, ut inquit  
diuus Paulus.

Aestimatus sum cum descendantibus in foueam ]  
Id est, adnumeror ijs, quorum cadauera demittun-  
tur in sepulcrum.

Inter mortuos liber ] Euaſi(inquit) ijs simi-  
lis, qui iam sunt ad mortuos aggregati, & liberi ab  
ijs rebus, quae pertinent ad hanc uitam.

Posuisti me in lacu ] His allegorijs exagge-  
rat magnitudinem calamitatum suarum.

Clausus sum ] Iam(inquit) circumuolutus  
sum erumnis intolerandis, neque ulla datur euaden-  
di facultas.

Nunquid mortuis ] Ostendit, ad gloriam  
Dei pertinere, ut homines pii, & religiosi diu uiuant.

In terra obliuionis ] Sepulcrum, uel infe-  
ros appellat terram obliuionis, quoniam mortuorum  
memoria cito interit.

Notos meos in tenebris posuisti ] Id est, tan-  
quam tenebris obductos ab oculis meis remouisti. Hic  
psalmus ualde notabilis est, quoniam solus ex omni-  
bus à principio usque ad finem, nulla interposita spi-

# EXPLANATIO

ritus consolatione, plenus est querelarum, moeroris,  
 & luctus. sed illud in primis in eo dignum observa-  
 tione est, quod uir sanctus tantis rerum aduersarum  
 undis obrutus, Deo tamen fidere non intermittit: sed  
 quo magis ille, quicquid consolationem in se habet, af-  
 flicto eripit, & quicquid dolorem auget, accumulatur,  
 hoc magis ipse noctes, & dies nomen illius suppliciter  
 inuocat, & malis omnibus urgentem assiduus preci-  
 bus urget, neque in summa desperatione desperat: ex  
 quo intelligitur, Deum ne tum quidem pios derelin-  
 quere, cum ipsi derelicti, & proiceti sibi uidentur  
 ab illo, qui suos grauissime solet affligere, ut caro ex-  
 tingatur, spiritus uiuat.

## ARGVMENTVM PSAL.

### LXXXIX.

Prædicat potentiam, & benignitatem Dei erga  
 suos: deinde commemorat promissa illius præclara,  
 Dauidi, po<sup>te</sup>risq; eius facta: postremo queritur,  
 Deum, quasi oblitum eorum promissorum, urbem san-  
 ctam impijs euertendam tradidisse, regiamq; potesta-  
 tem sublatam, & populum ipsum in maximas mise-  
 rias incidisse.

Eruditio Etham Ezræ. Psal. LXXXIX.

Misericordias Domini in æternum cantabo.

In generationem, & generationem annuntiabo  
 ueritatem tuam ore meo.

Quoniam dixi, in æternum misericordia ædifica-

bitur, in coelis ipsis stabilis ueritatem tuam.

Pepigi foedus cum electo meo, iuravi David seruo meo, usque in aeternum stabiliam semen tuum.

Et aedificabo in generationem, & generatione solum tuum.

Confitebuntur caeli mirabilia tua Domine, & ueritatem tuam in ecclesia sanctorum.

Quoniam quis in caelo aequabitur Domino? quis similis erit Domino inter filios Deorum?

Deus maxime tremendus in consilio sanctorum, terribilis super omnes, qui in circuitu eius sunt.

Domine Deus exercituum, qui similis tibi in potentia o Domine? ueritas tua in circuitu tuo.

Tu dominaris superbiae maris, cum attollit fluctus suos, tu compescis eos.

Tu confregisti sicut uulneratum superbum, in brachio uirtutis tuae dispersisti inimicos tuos.

Tui sunt caeli, & tua est terra, orbem terra, & plenitudinem eius tu fundasti, aquilonem, & meridie tu creasti.

Thabor, & Hermon in nomine tuo exultabunt, brachium tuum cum potentia.

Inuicta est manus tua, sublimis est dextera tua, iustitia, & iudicium habitaculum solij tui,

Misericordia, & ueritas praecedunt faciem tuam. beatus populus, qui scit iubilationem.

Domine in lumine uultus tui ambulabunt, & in nomine tuo exultabunt tota die, & in iustitia tua exaltabuntur.

Quoniam gloria fortitudinis eorum tu es, & pro

Visitabo in uirga iniquitates eorum, & in uerbis peccata eorum,

Misericordiam autem meam non dispergam ab eo, neque falsam reddam ueritatem meam.

Neque profanabo fœdus meum, & quæ procedunt de labijs meis, non mutabo.

Semel iurauī per sanctitatem meam, si Dauid mentiar, semen eius in æternum manebit,

Et thronus eius sicut sol in conspectu meo, & sicut luna stabilietur in æternum, & testis in cœlo fidelis.

Tu uero repulisti, & abominatus es, accensus es ira contra CHRISTVM tuum.

Euertisti fœdus serui tui, profanasti in terra diademata eius.

Destruxisti omnes macerías eius, posuisti munitiões eius in confectionem.

Diripuerunt eum omnes transeuntes uiam, factus est opprobrium uicinis suis.

Exaltasti dexteram deprimentium eum, latifcasti omnes inimicos eius.

Auertisti etiam aciem gladij eius, & non es auxiliatus ei in bello.

Destruxisti munditiam eius, & solium eius in terram collisisti.

Abbreuiasti dies iuuentutis eius, operuisti eum confusione.

Vsq̃uequo Domine auertes te semper? exardescet sicut ignis ira tua?

Memor esto, quanti aui sum ego, nunquid frus-

## E X P L A N A T I O

*stra creasti omnes filios hominum ?*

*Quis est homo , qui uiuet , & non uidebit mortem ? eruet animam suam de manu inferi ?*

*Vbi sunt misericordiae tuae antiquae Domine, quas iurasti David in ueritate tua ?*

*Memor esto Domine opprobrij seruorum tuorum, portauit in sinu meo omnia ( opprobria ) multarum gentium ,*

*Quibus affecerunt nos inimici tui Domine, quibus affecerunt uestigia CHRISTI tui .*

*Benedictus Dominus in aeternum . fiat , fiat .*

## E X P L A N A T I O .

*Misericordias Domini* ] Cum gens Hebraea maximis calamitatibus premeretur, atque omnia contra, ac promiserat Deus, euadere uiderentur, poterat facile in dubium uenire misericordia, & fides illius. At uir sanctus ait, tantum abesse, ut ipse ulla rerum aduersarum acerbitate adduci possit ad suspicandum minus pie de diuino numine, ut fidem, & misericordiam eius cantaturus in perpetuum, & suis uersibus omni memoriae sit propagaturus.

*Quoniam dixi* ] Id est, mihi persuasi, misericordiam tuam perpetuo duraturam, & semper augendam, & amplificandam esse, & ueritatem, ac fidem tuam in persoluendis promissis nunquam laefaetatum iri, sed stabilem fore ac sempiternam perinde ac coelum.

*Percussisti fœdus* ] Deum facit loquentem.

*Vsq̃ue in aeternum stabiliam semen tuum* ]



Hoc est fœdus , quod Deus cum Dauide , & posteris eius fecit . Id fœdus multis uerbis describitur infra , & in libro secundo Regum cap. VII. Semen autem Davidis est CHRISTVS , qui regnat in perpetuum , & ecclesia piorum , quæ in omne tempus uigebit , atque æuo sempiterno fruetur .

Confitebuntur cœli ] Et cœlites ( inquit ) & homines p̃j semper prædicabunt tua facta admirabilia , & fidem , & bonitatem numinis tui .

Quoniam quis in cœlo æquabitur Domino ? ] Prædicat potentiam , & fidem Dei , ut ostendat non esse dubitandum , quin ille & possit , & uelit præstare , quod pollicitus est .

Inter filios Deorum ] Filios Deorum dixit , cum Deos dicere uellet , sicut filios hominum appellare solet pro hominibus . Deos autem uocat , ut alio loco admonuimus , mentes illas cœlestes , ab omni concretionem mortali segregatas , quos Angelos quoque nostri usurpare , ac nominare solent .

Et ueritas tua in circuitu tuo ] Id est , non solum potentissimus , sed etiam ueracissimus es , ipsaq; ueritate tanquam ueste indueris .

Tu confregisti ] Id est , Pharaonem illum arrogantem cum uniuerso exercitu tam facile perdidisti , quàm facile interficitur homo , qui iam uulneribus confectus sit .

Thabor , & Hermon ] id est , oriens , atque occidens . nam Thabor situs est ad ortum , Hermon uero ad occasum . hi sunt montes insignes terræ Iudææ .

in tabernaculo suo . de quibus uerborum figuris suis locis explicauimus . Sed quis populus hunc clangorem audit , & cognoscit ? ille nimirum , qui Deum pro certo habens sibi semper adesse , in illius praesidio , & tutela securus , & laetus conquiescit . Hunc populum uir sanctus beatum appellat , & talem esse demonstrat subiungens , Domine in lumine uultus tui ambulabunt . Felices ( inquit ) & uere fortunati , qui te Domine propitium , & praesentem habent : semper illis per has tenebras , & uias uitae difficiles ingredientibus splendor tui spiritus clarissimum lumē ostendit , atque in animis eorum tam ardentes amores excitat omnium uirtutum , ut nihil ijs iucundius , nihil amabilius uideatur , quam pie , iuste , ac temperanter uiuere , neque tamen isti uirtutes suas admirantur , aut gaudent in se ipsis , sed omnis eorum admiratio , & laetitia in nominis tui cognitione uersatur , & merito quidem : neque enim sua iustitia extolluntur . sed tua , tua inquam iustitia iacentes , & abiectos erigit , atque ad altissimum gradum dignitatis extollit , omnia illorum peccata delens , mentes , & uoluntates sanās , conscientias laetas , & tranquillas reddens , spiritu sancto , regno coelesti , & uita sempiterna donans . itaque quod cupiditates temerarias coercet , quod timores omnes , & omnes sollicitudines pellunt , quod neque rerum aduersarum icibus franguntur , neque oppugnationibus humana sapientia de gradu pietatis deiciuntur , totum id referunt acceptum misericordiae tuae , quae animos piorū ita corroborat , & confirmat , ut eorum uirtutem , excelsō , & illustri loco sit

# EXPLANATIO

tam, nulla neque hominum, neque Diaboli labefacta  
 re possit improbitas. Sed cur Dominus tam beneuolus,  
 & liberalis est aduersus homines pios? quia regem,  
 & clypeum illorum charissimū habet. is est CHRIS-  
 TVS, ad cuius tutelam, & regnum pertinent  
 homines sancti omnium seculorum. Hos Deus propter  
 CHRISTVM suum ab omni aeternitate sibi fia-  
 lios adoptauit. quos autem, antequam nascerentur,  
 adoptauit, hos in lucem editos ad pietatem uocat, uo-  
 catiſq; iustitiam primum, deinde uitam immortalem  
 donat. Itaque si quis omnis memoria pios interroget,  
 cur habuerint, atque in perpetuum habituri sint Deū  
 fauentem, & propitium, sine dubio respondeant,  
 quia Domini est clypeus noster, & sancti Israelis rex  
 noster. quod si quis extra tutelam, & regnum  
 CHRISTI est, is neque Deo carus, neque saluus  
 esse potest, idq; ita esse, populus Dei semper sensit, ut  
 auctōr est diuus Petrus in actis Apostolorum. Sed  
 nonnulli existimant, ipsum Dauidem clypeum populi,  
 & regem appellari. quorum sententia num proban-  
 da sit, haud equidem scio, cum praesertim hoc car-  
 men scriptum sit pro posteris Dauidis, qui amisso re-  
 gno in maximis calamitatibus uersabantur. quod si  
 intelligantur ij uersus eo modo, quo nos interpretati  
 sumus, omnia plana, & perspicua existunt.

Posui adiutorium super potente ] Id est,  
 semper ero praesto, semper opem feram Dauidi, qui  
 potens est propter gratiam meam.

Manus enim mea firma erit cum eo ] Id  
 est, nunquam illum destituet, semper illum proteget.

Non

Non opprimit inimicus eum ] Saulem significat, & eius affectas.

Et ponam in mari ] Id est, subiiciam eius imperio loca maritima, & flumina longinqua. quod quidem perfecit Deus, cum David eius auxilio subegit Palestinos, qui ad mare incolunt, & Syros usque ad fluuium Euphratem, & stipendiariam habuit Mesopotaniam, quam Syriam fluminum appellabant.

In æternum seruaabo ] Id est, non repudiabo illum, quemadmodum Saulem, sed fœdus, quod cū illo feriam, stabile, ac sempiternum erit.

Et ponam in seculum seculi semen eius, & thronū eius sicut dies cœli ] Hæc nullo modo uera esse possunt, nisi referantur ad CHRISTVM, qui natus est in familia Davidis, & regnat in perpetuum. neque in aliam sententiam explanauit hoc oraculum Gabriel nuntius, & interpret Dei: is enim Mariam uirginem his uerbis affatur apud Lucam, Ecce concipies in utero, & paries filiū, & uocabis nomen eius IESVM. is erit magnus, & filius altissimi uocabitur, & dabit illi dominus Deus sedem David patris ipsius, regnabitq; super domum Iacob in æternum, & regni eius non erit finis.

Si David mentiar ] Id est, nequaquam Davidem fallam. nam hoc uerbum, si, apud Hebræos aliquando uim negandi habet. hinc etiam illud in psalmo XC V. Quibus iuravi in ira mea, si introibunt in requiem meam.

Semen eius in æternum manebit ] CHRISTVS scilicet, & ecclesia piorum.

# EXPLANATIO.

Et thronus eius sicut sol ] Id est, in perpetuum durabit, ut sol.

Et testis in cœlo fidelis ] Id est, uolo lunam ipsam esse testem perpetuitatis imperij CHRISTI: ut enim illa semper durabit, ita semper uigebit regnū ipsius. Sciendum est tamen, Symmachum sic uertisse, Et contestatus in cœlo fidelis, id est, & qui asseueranter affirmat, hæc se facturum, est in cœlo, neque mentiri unquam potest.

Tu uero repulisti ] Nunc deplorat calamitates populi; & qui supra tantis laudibus extulerat fidem Dei, nunc animo perturbato queritur, omnia contra accidere, quam ille promiserit. Hic animaduvertere operapretium est, quam difficile sit, non dubitare de promissionibus Dei, aut non penitus etiam ijs diffidere, cum præsertim ille, antequam promissa persoluat, ita plerunque omnia contra, ac pollicitus est, euenire patiatur, ut uix credibile sit, ea, quæ prædicta sunt, uera unquam euasura. multa huiusce rei exempla ex literis sanctis apponere possem, sed hæc duo satis erunt. Deus Dauidem in pueritia regem designat, sed quàm acerbis, quàmq; diuturnis illum calamitatibus exagitauit, antea quàm regni possessionem adire permitteret? Idem ore Gabrielis Mariæ pollicetur, IESVM in folio Davidis sessurum, atque imperium illius sempiternum fore. quis hoc nisi diuino spiritu afflatus, sicut prædictum est, euenturum suspicari posset? cum IESVM uideret usque ad trigessimum ætatis annum propter obscuritatem in magna hominum ignoratione uersari, reliquam uero ui

tam inopem, & uagam persequi, ad extremum tanquā perditissimum latronem cruci suffixum acerbissima morte multari. His rebus fit, ut impij promissionibus, & uerbis Dei nullam fidem habeant, & ipsi p̄ sepe ad dubitandum inducantur. quocirca illud saluberrimum praeceptum, Qui crediderit, ne festinet, semper in ore, atque animo est habendum: qui enim moram ferre non potest, is neque constantiam, neque fidendi perseverantiam retinere potest: diffidēs autem, se non solum bonis, quae promissa sunt, indignum reddit, sed etiam grauissimas diffidentiae poenas luit: quisquis enim Deo affirmanti non credit, is profecto, illum esse uanum, & mendacem, credat, necesse est: at qui patiens in mora fidere perseverat, sine dubio promissa bona consequitur, & Deo charissimus est. Hæc omnia diuus Paulus in epistola ad Hebræos scripta breuiter complectitur ad hunc modum. Ne abieceritis fiduciam uestram, quæ magnam habet præmij retributionē: nam patientia uobis est opus, ut ubi uoluntatem Dei perfeceritis, reportetis promissionem: adhuc enim pusillum temporis, & qui uenturus est, ueniet, & non tardabit, iustus autem ex fide uiēturus est, & si se subtraxerit, non probabitur animo meo: at nos non sumus, qui nos subducamus in perditionem, sed ad fidem pertinemus in acquisitionem animæ.

Accensus es ira in CHRISTVM tuum ]  
Id est, in Dauidem, quem tu regem constituisti. ad ipsum enim Dauidem redundare uidebatur, quicquid patiebantur posteri ipsius.

# EXPLANATIO

Destruixisti munditiem eius ] Sic appellat  
splendorem, & dignitatem imperij.

Abbreviaſti dies ] Queritur, regnum fa-  
milie Davidis, quod perpetuum fore promiserat Deus,  
dum adoleſceret, extinctum eſſe.

Memor eſto, quàm brevis aui ] Cogita  
(inquit) quàm ſit brevis uita mortalium. quòd ſi huc  
accedant etiam perpetuæ calamitates, neque ullus de-  
tur reſpirandi locus, non ne uideberis nos fruſtra crea-  
uiſſe? ſimilia multa leguntur in querimonijs Iobi. ſunt  
autem uerba animi perturbati, neque ſatis conſidera-  
tis, cur hominem creauerit Deus.

Quibus affecerunt ueſtigia CHRISTI tui ]  
Sic uocare uidetur reges, qui in Davidis locum ſuc-  
ceſſerant, atque eum repræſentabant. Sed hic locus  
eſt perobſcurus, neque ego aliquam explanationem  
certam habeo. Quidam intelligunt, his uerbis barba-  
rorum impietatem ſignificari, qui Iudæos irriderent,  
quòd ij. CHRISTVM liberatorem expectarent,  
cuius ueſtigia, & pedes uenientis nunquàm uifuri  
eſſent.

Benedictus Dominus in æternum ] Viden-  
tur hæc eſſe uerba hominis poſt magnam animi per-  
turbationem ſe colligentis, & conſiderantis, nullo mo-  
do fieri poſſe, ut Deus fidem datam uiolent, & pro-  
miſſa non ſeruet, itaque patienter ferendam eſſe mo-  
ram; & ſanctiſſimum ipſius numen rebus aduerſis  
æque, ac proſperis laudandum, cum præſertim ille  
ad utilitatem, & ſalutem piorum omnia dirigat etiã  
tum, cum penitus eos abiſſiſſe uidetur.

## ARGVMENTVM PSAL. XC.

Describit miseriam, & breuitatem uitæ humanæ,  
& implorat auxilium Dei, ut, qui omnibus superiori-  
bus seculis consueuerit gentem suam tutari, & ma-  
ximis beneficijs ornare, illam etiam, hoc tempore ma-  
gnis calamitatibus oppressam, subleuet, ac tueatur.

Oratio Moyfi uiri Dei, psal. XC.

Domine refugium factus es nobis à generatione in  
generationem.

Priusquam montes fierent, aut formaretur terra,  
& orbis, à seculo, usque in seculum tu es Deus.

Reducis hominem usque ad contritionem, & di-  
cis, reuertimini filij hominum.

Quoniam mille anni ante oculos tuos, tanquam  
dies hesternæ, quæ præterijt;

Et uigilia in nocte, rapuisti eos ut impetus aqua-  
rum, sunt ueluti somnium,

Mane sicut herba (sunt) quæ mutatur, mane flo-  
ret, & crescit, uespere succiditur, & arefcit.

Etenim deficiimus in ira tua, & in furore tuo tur-  
bati sumus.

Posuisti iniquitates nostras in conspectu tuo, occul-  
ta peccata nostra in luce uultus tui.

Quoniam omnes dies nostri dilabuntur in ira tua,  
consumimus.

Annos nostros ueluti sermonem, dies annorum no-  
strorum septuaginta anni;



cabantur, ut omnibus est notum. Vitæ breuitatem uni ex ips partibus similem dicit, si cum æuo illo sempiterno Dei conferatur.

Rapuiſti eos ut impetus ] Cōparat elegantissime fugam, & inanitatem uitæ humanæ perniciositati fluminum, & somnijs, & herbæ, quæ manc immutatur, id est, in florem se se induit, uestere autem succiditur areſcens.

Etenim deſcimus in ira tua ] His uerbis ſignificat, has uitæ calamitates eſſe poenas, quas Deus a nobis repetit pro ſceleribus, & maleficijs noſtris.

Conſumimus annos noſtros ueluti ſermonem ] Quo nihil citius euaneſcit.

Præcipuum eorum ] Præcipuum annorum uocat iuuentutem, quæ & ipſa plena eſt moleſtijs, ac perturbationibus animi.

Quis nouit uim ] Hunc uerſiculum ita uerterunt Symmachus, & Hieronymus, & quidam alij. Videtur autem hanc ſententiam continere: ſi uel parua indignatio tua tanta mala mortalibus importat, quis poſſit cōgitatione comprehendere, qualis, & quanta ſit iræ uis, qua uteris aduerſus eos, qui improbe, ac impie uixerunt? Quis inquam poſſit intelligere uim iræ tuæ, perinde ut potentia tua formidabilis requirit eam intelligi?

Enumerare dies noſtros ] Docere nos Domine ad hunc modum numerare, ac cogitare dies noſtros, & illorum paucitatem ſemper ante oculos habere, ut hac inani uita contempta nos totos ſapientiæ, & contemplationi rerum æternarum dedicemus.

# EXPLANATIONI

Reuertere Domine, usquequo? Vsq=  
quo abes, & nos in tantis calamitatibus derelinquis?

Appareat in seruis. Id est, nos ita rege,  
ac tuere, ut in nobis eluceat vis salutaris, & benigni-  
tas tua.

Et sit splendor Domini. Id est, & mise-  
ricordia Dei nostri semper adsit nobis, ut, quicquid  
aggredimur, feliciter eius beneficio succedat.

## ARGUMENTVM PSAL. XCI.

Describit elegantissime securitatem, & felicitatem  
eorum, qui omnes suas cogitationes, & spes in  
misericordia Dei collocarunt.

### Psalmus XCI.

Qui habitat in latibulo altissimi, in umbra omni-  
potentis commorabitur.

Dicam Domino, spes mea, & refugium meum,  
Deus meus sperabo in eum.

Quoniam ipse liberabit te de laqueo uenantium,  
& a peste exitiali.

Alis suis obumbrabit tibi, & sub pennis eius fidu-  
ciam habebis.

Scutum, & clypeus est ueritas eius, non timebis à  
timore nocturno,

A sagitta uolante in die, a peste perambulante in  
tenebris, ab exterminio uastante meridie.

Cadent à latere tuo mille, & decem millia à dex-  
tris tuis, ad te autem non appropinquabit.

Veruntamen oculis tuis considerabis, & retributionem peccatorum uidebis.

Quoniam tu es Domine spes mea, altissimum posuisti refugium tuum?

Non accedet ad te malum, & flagellum non appropinquabit tabernaculo tuo,

Quoniam angelis suis mandauit de te, ut custodiant te in omnibus uijs tuis.

In manibus portabunt te, ne forte offendas ad lapidem pedem tuum.

Super aspidem, & basiliscum ambulabis, & conculcabis leonem, & draconem.

Quoniam me diligit, liberabo eum, protegam eum, quoniam cognouit nomen meum.

Clamabit ad me, & ego exaudiam eum. cum ipso sum in tribulatione, eripiam eum, & glorificabo eum,

Longitudine dierum replebo eum, & ostendam illi salutem meam.

#### EXPLANATIO.

Qui habitat in latibulo altissimi ] Id est, qui se committit fidei, & tutelæ ipsius. eam tutelam cur appellet latibulum, declarauimus in explanatione psalmi LXXXIII.

Quoniam ipse liberabit te ] Quisquis es, inquit, qui sincere, & ex animo te misericordiæ Dei commisisti, sis animo leto, & tranquillo, nam ipse te incolumem conseruabit ab omnibus insidijs inimicorum, & à quouis maximo, & manifesto exitio.

# EXPLANATIO

A' sagitta uolante ] His uocabulis significat & morbos, & mala omnia, quæ nobis importantur & ab improbis hominibus, & à Diabolo.

Cadent à latere tuo ] Cum pestilentia, uel impetus prælij sæuiet, cæteris morientibus tu saluus, & incolumis animo quieto, & securo spectabis improbos occidentes, & pœnas malefactorum expedientes. hoc autem tibi continget propterea quod etiam tu Deo dixisti ex animo, Tu Domine spes mea.

Super aspidem, & basiliscum ] Affirmat, neque uenenatas, & immanes bestias, neque Diabolum, & satellites eius, quos uocabulis harum belluarum significat, ullam uim habituros aduersus hominem piûm, & præsidio Dei confidentem.

Quoniam me diligit ] Inducit Deum loquentem, & ea confirmantem, quæ uir sanctus prædicauit de benignitate, & misericordia ipsius.

## ARGUMENTVM PSAL. XCII.

Docet, diebus festis, omiſſa cura, & studio cæterarum rerum, consideranda eſſe conſilia, et facta Dei, & laudes eius celebrandas.

Psalmus cantici pro die Sabbati, XCII.

Bonum eſt conſitèri Domino, & psallere nomini tuo altiffime,

Ad annuntiandum mane miſericordiam tuam, et ueritatem tuam per noctem,

In decachordo, & psalterio, cum cantico in ci-

thara.

Quia letificasti me Domine in opere tuo, et in operibus manuum tuarum exultabo.

Quam magnificata sunt opera tua Domine, nimis profunda factae sunt cogitationes tuae.

Vir insipiens non cognoscet, et stultus non intelliget haec,

Cum germinauerint peccatores sicut herba, et floruerint omnes, qui operantur iniquitatem,

Ut intereant in seculum seculi, tu autem altissimus in aeternum Domine.

Quoniam ecce inimici tui Domine, quoniam ecce inimici tui peribunt, et disperdentur omnes, qui operantur iniquitatem,

Et exaltabitur sicut unicornis cornu <sup>meum</sup> ~~tuum~~, con-

Et respiciet oculus meus in inimicis meis (ultione)  
et de insurgentibus contra me malignantibus audiet auris mea (quae optat)

Iustus ut palma florebit, sicut Cedrus libani multiplicabitur,

Plantati in domo Domini in atrijs domus Dei nostri florebut,

Adhuc fructificabunt in senecta, pingues, et uiscentes erunt, ut annuntient,

Quod rectus est Dominus fortitudo mea, et non est iniquitas in eo.

#### EXPLANATIO.

Ad annuntiandum mane ] Tametsi cum

# EXPLANATIO

noctem, & mane nominat, ea tempora indicare videtur, quæ lege attributa erant precationibus, & sacrificijs, non minus tamen, ut opinio mea fert, significat ips uerbis, cum dies prosperitatum illucescit, misericordiam Dei prædicandam esse, ut omnia, quæcunque nobis secunda eueniunt, illi accepta referamus; at cum nocte rerum aduersarum circumfundimur, fidem eiusdem, dictorumq; constantiam in ore semper habendam, ut spe bona, certaq; simus, nos tandem ex omni periculo, & calamitate euasuros, sicut ille promisit inquitens, Inuoca me tempore difficultatis, & calamitoso, & ego te omnibus ex malis eripiam, tu uero honorabis me.

Quia latificasti me Domine in opere tuo ]

Vt impius animo horret, si quando conscientia illum admonet, Deum piorum, impiorumq; habere rationem: ita pio nulla cogitatio potest accidere incutiendi, quàm de providentia Dei: cum enim is secum reputat, ne unum quidem capillum ex suo capite decidere posse sine illius numine, quem patrem agnoscit, incredibile dictu est, quanta lætitia exultet, quàm secretum, ac beatum ducat. Et sane nihil à patre indulgentissimo potest proficisci, quod filijs emolumento, salutiq; non sit: etsi nonnunquam illi (quæ mentis humanæ infirmitas est) secus accidere putant, & falsa specie, ac uisione terrentur.

Quàm magnificata ]

Non solum ea significat, quæ pertinent ad creationem mundi, sed etiam ea, quæ quotidie geruntur à providentia Dei in administratione rerum humanarum, cuiusmodi sunt, quæ

mox commemorat, improbos scilicet florere, & secundis rebus uti, ut mox acerbiora supplicia sustineant, & in miseras aeternas præcipitentur, cum bonis è contrario omnia uertant in bonum.

Vir insipiens non cognoscet, & stultus non intelliget hæc ] Stultos, & insipientes uocat in primis, quos usus, & uita communis prudentes, & sapientes appellare solet. horum multi tam longe absunt ab istarum rerum intelligentia, ut ne arbitrentur quidem, prouidentiam Dei se ad procurationem rerum humanarum demittere.

Et exaltabitur ] Euertentur homines impij, & nefarij, at ego, & quisquis alius uirtutem, & pietatem colit, beati, & florentes erimus. Comparat autem cornu suum, id est, uires, & potentiam, cornibus monocerotis, quæ cornua sunt durissima.

Consersus sum oleo uiridi ] Allegoria est, qua firmitas animi, & corporis significatur. ea sumpta est à cultu uitæ: oleum enim magnam uim habet ad membra fouenda, & corpus corroborandum. Sed & oleum significat, ut supra didicimus, afflatum, & gratiam spiritus sancti, quæ longe maiorem uim habet ad fouendum, & corroborandum animū, & corpus. hoc cœlesti oleo delibutus erat Dauid.

Iustus ut palma florebit ] Impij quidem tanquam herba florent, quæ celeriter arescit, at homines pijs palmæ similes sunt, quæ diutissime uiuit, ac uiget, & fructus dulcissimos edit.

Sicut cedrus Libani ] Eleganter hominem

## E X P L A N A T I O

pium comparat cedro, cuius odoratus est iucundissimus, eaq; arbor nunquam putrescit, & umbram gratissimā ministrat: quæ omnia ad hominem pium, & sanctum eleganter aptantur.

Plantati in domo Domini ] Qui (inquit) sati, & alti fuerint in ecclesia Dei, semper florebunt, & fructus pulcherrimos ferent uitæ innocentis, et piæ.

## A R G V M E N T V M P S A L . X C I I I .

Celebrat infinitam excellentiam Dei, qui & mundum ex nihilo creauerit, & res humanas sapientissime gubernet. Sed hæc omnia etiam ad imperium CHRISTI aptissime referri possunt, & ad ecclesiam eius undique oppugnatam.

## Psalms . X C I I I .

Dominus regnavit, magnificentiam indutus est, indutus est Dominus fortitudinem, & accinxit se.

Etiam firmavit orbem terræ, qui non commouetur.

Parata sedes tua ex tunc, a seculo tu es.

Eleuauerunt flumina Domine, eleuauerunt flumina uocem suam,

Eleuauerunt flumina fluctus suos, plusquam uoces aquarum multarum,

Et mirabiles elationes maris, mirabilis in altis Dominus.

Testimonia tua ualde sunt certa, domum tuam decet sanctitudo Domine in longitudinem dierum.



## EXPLANATIO.

Dominus regnavit ] Regnavit, dicit, pro  
regnat: qui loquendi abusus frequens est, ut iam ad=  
monuimus.

Et accinxit se ] Accinxit inquam se fortitu-  
dine, & potentia.

Parata sedes tua ex tunc ] Id est, ex omni  
æternitate.

Eleuauerunt flumina Domine ] Allegoria  
est, quæ significat, maximam uim hostium inuasisse  
gentem Dei, quos ille compressit.

Mirabilis in altis Dominus ] Terribilis qui-  
dem est impetus, & immanitas impiorum, qui nos  
inuasērunt, sed longe terribilior est Dominus, qui ha-  
bitat in coelo, & pro nobis acerrime propugnat.

Testimonia tua ] Vera profecto sunt, &  
certa Domine, quæ nobis tua sancta oracula promi-  
serunt, ecclesiam scilicet piorum, quæ domus tua est,  
præsidio tui numinis semper incolumem, ac beatam  
fore: itaque illam decet ornatam esse sanctitate, eoq;  
ornamento in perpetuum decorari, ut, quæ custodem,  
& præsidem sanctum habet, ipsa quoque sancta sit.

## ARGVMENTVM PSAL.

## XCIIII.

Inuehitur in homines impios, & sceleratos, qui  
providentiam Dei negant; & innocentes, iniurijs, &  
uolentia illorum oppressos, consolatur.

# EXPLANATIO

## Psalmus XCIII.

Deus ultionum Domine , Deus ultionum splendide appare .

Exaltare , qui iudicas terram , redde retributionē superbis .

Vsquequo peccatores Domine , usquequo peccatores exultabunt ?

Effabuntur , & loquentur superba ? gloriabuntur omnes , qui operantur iniustitiam ?

Populum tuum Domine attriuerunt , & hereditatem tuam uexauerunt ,

Viduam , & aduenam interfecerunt , & pupillos occiderunt ,

Et dixerunt , non uidebit Dominus , nec intelliget Deus iacob .

Intelligite insipientes in populo , & stulti aliquando sapite .

Nunquid ille , qui plantauit aurem , non audiet ? aut qui finxit oculum , non uidebit ?

Qui corripit gentes , non arguet , qui docet homines scientiam ?

Dominus scit cogitationes hominum , quod uanae sunt .

Beatus homo , quem tu crudieris Domine , & de lege tua docueris eum ,

Vt quietem praebeas illi in diebus malis , donec fodiatur peccatori fovea ,

Quia non repellet Dominus plebem suam , & hereditatem

reditatem suam non derelinquet.

Quoniam ad iustitiam reuertetur iudicium, & sequetur illam omnes, qui recto sunt corde.

Quis consurget pro me aduersus malignantes? quis stabit pro me aduersus operantes iniquitatem?

Nisi dominus adiuuisset me, paulo minus habitasset in inferno anima mea.

Si dicebam, motus est pes meus, misericordia tua Domine sustentabat me.

Secundum multitudinem cogitationum mearum in corde meo, consolationes tuæ latificauerunt animam meam.

Nunquid consociabitur tibi thronus peruersitatis, qui fugit afflictionem pro lege?

Congregantur contra animam iusti, & sanguinem innocentem condemnabunt,

Et erit mihi Dominus in refugium, & Deus meus in petram fiduciæ meæ,

Et retribuet illis iniquitatem ipsorum, & in malitia eorum disperdet eos, disperdet illos Dominus Deus noster.

#### EXPLANATIO.

Deus ultionum Domine ] Sic Deum appellat, quod ad eum pertineat ultio: ipse enim ait in Deuteronomio, Mea est ultio, & ego rependam.

Splendide appare ] Fac, omnes intelligant, ac penè oculis uideant prouidentiam, & magnitudinem potentiæ tuæ, quam negligunt homines impij, & arrogantes.

Intelligite insipientes in populo ] Significat, eos, qui negant Deum intelligere, quid unusquisque agat, quid uel in se admittat, ipsos nihil intelligere, & bestiarum similes esse. & tamen nonnulli ex ijs, quibus doctrinae, & sapientiae primas deferunt, qui crucem CHRISTI stultitiam putant, ausi sunt, haec immanissima, & teterrima monstra dicere, & docere: ut facile appareat, uerissimam esse illam D. Pauli sententiam, Sapientia huius mundi stultitia est apud Deum.

Qui plantauit aurem ] Est ne(inquit)uerisimile, ut qui uim sentiendi, & intelligendi hominibus donauit, ipse cognitione careat rerum humanarum?

Qui corripit gentes ] Qui aliquando supplicio afficit totas nationes, uos ne permittet impune debacchari? qui mortalibus prudentiam, & intelligentiam impartit, is ne uestra maleficia ignorabit?

Dominus scit cogitationes ] Non modo(inquit) Dominus audit, & uidet, uerum etiam intimos hominum sensus intelligit, ac nouit, quam inania sint, & absurda, quae illi cogitant, nisi diuino lumine animi eorum illustrentur. itaque beatum illum in dico, quem tu Domine pro tua incredibili misericordia erudis, & praeceptis legum tuarum instituis: ea enim disciplina maximam illi tranquillitatem pariet rebus aduersis, siquidem omnes iniurias impiorum non solum forti, sed etiam lato animo feret, intelligens, uitam piorum calamitatibus, ut aurum igne, purgari. itaque animo quieto, & tranquillo usque

expectabit, dum impius poenas luat: luet enim poenas, quisquis uiolat innocentes, neque Dominus negliget iniurias, & contumelias gentis suae, neque illam diutius permittet libidini, & ludibrio impiorum, sed aliquando leges, & iustitia in iudicijs ualebunt, & multos sui cupidos, & amantes habebunt.

Quis consurget ] Exponit magnitudinem periculi, in quo uersans implorauerat auxilium hominum, sed frustra, subiungit enim, Nisi Dominus subuenisset mihi, actum erat de salute mea.

Si dicebam motus ] Si querebar, iam uacillare constantiam meam, neque iam posse calamitatum magnitudini obistere, Domine eras praesto, & sustentabas animum meum iam labentem.

Secundum multitudinem ] Quantum excruciabant animum meum cogitationes tristissimae, tantum illum recreabant consolationes tuae incundissimae. Ita diuus Paulus ad Corinthios scribens, sicut (inquit) abundant afflictiones CHRISTI in nos, ita per CHRISTVM abundat etiam consolatio nostra.

Nunquid consociabitur ] Non est, quod aliquis miretur, si tu ades innocentibus, & ab ijs propulsas iniurias impiorum: quid enim tibi commune possit esse cum improborum potestate, ac tyrannide, quae semper occupata est in conflandis calumnijs, & bonis affligendis, idq; sibi pro lege ducit? uel cum ait, solum peruersitatis fingere afflictionem pro lege, significat potius, eos, quorum proprium munus est, leges condere, quibus Respublica optime admi-

## E X P L A N A T I O

nistretur , ac ciuium salus tuta sit , tantum abesse ab hoc officio , ut semper habeant animos intentos ad inueniendas rationes , & vias , quibus uexent , atque opprimant innocentes , atque ita pro legum , & iudiciorum æquitate ab his iniurias , & uim ad perniciem ciuitatis manare . Sed Symmachus uertit ex Hebræo , Qui fingit afflictionem contra præceptum : quæ uerba significant , principes barbaros , & crudeles machinari calamitatem , & perniciem ijs , qui tutelæ ipsorum commendati sunt , contra præcepta , & leges Dei .

## A R G V M E N T V M P S A L . X C V .

Hortatur grauissimis sententijs populum ad colendum Deum , & laudes eius canendas , prædicans ipseus infinitam potentiam , & sapientiam , qui omnia creauerit ex nihilo , nec non misericordiam , & bonitatem , qua pios præcipua quadam beneuolentia regit , ac gubernat . Item exemplo maiorum , qui in solitudine interierunt , deterret ab impietate , & infidelitate aduersus Deum .

## Psalms X C V .

Venite exultemus Domino , iubilemus Deo salutari nostro ,

Præoccupemus faciem eius in confessione , & in psalmis iubilemus ei .

Quoniam Deus magnus Dominus , & rex magnus super omnes Deos .

Quia in manu eius sunt profunditates terræ, & altitudines montium ipsius sunt.

Quoniam ipsius est mare, & ipse fecit illud, & aridam fundauerunt manus eius.

Venite adoremus, & procidamus, & genua flectamus ante Dominum, qui fecit nos, quia ipse est dominus Deus noster,

Et nos populus pascuæ eius, & oves manus eius.

Hodie si vocem eius audieritis, nolite obdurare corda uestra,

Sicut in contradictione, sicut in die tentationis in deserto, ubi tentauerunt me patres uestri, probauerunt, & uiderunt opera mea.

Quadraginta annis offensus fui à generatione hac, & dixi, populus iste errat corde,

Et isti non cognouerunt uias meas, quibus iuravi in ira mea, si introibunt in requiem meam.

## EXPLANATIO.

Venite exultemus Domino ] Admonet, ad cultum, & uenerationem Dei requiri letitiam, & hilaritatem, id quod etiam diuus Paulus confirmat præcipiens Christianis, ut semper leto animo sint. causa uero in promptu est: Deus enim colitur fide, spe, charitate, quarum comites sunt iustitia, pax, & gaudium.

Praoccupemus faciem ] Id est, properemus uenire in conspectum eius cum hymnis, & gratiarum actione.

Nos autem populus pascuæ eius ] Nos (in-

quit) sumus grex uictitans pabulo eius, & omnes, quas ipse manu sua ducit, & regit.

Hodie si uocem ] Super his uersibus multa diuus Paulus scitu dignissima in epistola, quam scribit ad Hebræos. ea nos non subscribimus, satis habentes, locum indicasse.

Sicut in contradictione ] Innuere uidetur historiam, quæ scripta est in Numeris Cap. XIII, & XVII. Quod uero subiungit, sicut in die tentationis, significat rem gestam in Raphidine, quæ res exposita est in Exodo, Cap. XVII.

Quibus iuravi in ira mea ] Illud scire oportet, hanc fuisse imaginem rerum futurarum: ut enim Hebræi omnes, quotquot uerbis Dei fidem non habuerunt, in locis desertis foedissime perierunt à terra Cananæ exclusi, ubi uitam quietam, & omnium rerum copia affluentem traducturi erant, sic qui Deo ad suscipiendum CHRISTI euangelium adhortanti non obediunt, nunquam peruenient ad illas beatissimas oras, ubi placidissima quies, & uita sempiterna uigent, sed seclusi à concilio coelestium in perpetuis miserijs uersabuntur.

Si introibunt in requiem meam ] Id est iuravi, illos non ingressuros amplius in eum locum, quem ipsorum quieti destinaram. nam huic uerbo, si, aliquando apud Hebræos uis negandi inest, ut alio loco dictum est. Tunc autem uere ingredimur in requiem Dei, cum animi nostri in æternam illam domum per uolant, ubi sic requiescimus ab operibus nostris, ut Deus à suis requieuit die septimo. Hic est ille optatissi-



mus sabbatismus, quem diuus Paulus ait reliquū esse populo Dei. Ad hunc quo quisque propius accedit, hoc magis in humano corpore uitam diuinam, & coelestem imitatur. id uero fit, cum perspecta animi nostri deprauatione, insipientia, & inanitate, hoc unum omni studio contendimus, ut ne quid ipsi agamus, sed omnia Deum in nobis agere sinamus.

ARGVMENTVM PSAL. XCVI.

Vaticinatur de regno CHRISTI, et omnes nationes hortatur ad amplexandam ueram religionē, & superstitiones abiiciendas.

Psalmus XCVI.

Cantate Domino canticum nouum, cantate Domino omnis terra,

Cantate Domino, & benedicite nomini eius, annūtiatē de die in diem salutare eius,

Annuntiate inter gentes gloriam eius, in omnibus populis mirabilia eius.

Quoniam magnus Dominus, & laudabilis nimis, terribilis est super omnes Deos.

Quoniam omnes Dī gentium nihil sunt, Dominus autem cælos fecit.

Decus & pulchritudo in conspectu eius, potentia, & magnificentia in sanctuario eius.

Afferte Domino familie gentium, afferte Domino gloriam, & potentiam, afferte Domino gloriam nomini eius (debitam.)

## EXPLANATIO

Tollite munera, & introite in atria eius, adorate  
Dominum in splendoribus sanctuarij eius.

Commoueatur à facie eius uniuersa terra, dicite,  
in gentibus Dominus regnauit.

Et firmabit orbem terræ, ne commoueatur iudicabit  
populos in æquitate.

Latentur coeli, & exultet terra, insonet mare,  
& plenitudo eius, gaudeant agri, & omnia, quæ in  
eis sunt.

Tunc exultabunt omnia ligna sylvarum coram  
Domino, quia uenit, quoniam uenit iudicare terram,

Iudicabit orbem terræ in æquitate, & populos in  
ueritate sua.

## EXPLANATIO

Cantate Domino canticum nouum. ] No-  
ua enim, & omnibus seculis inaudita beneficia Dei no-  
ua carmina requirunt.

Annuntiate de die ] Id est, nunquam in-  
termittite prædicare beneficia, & salutem, quam il-  
le humano generi attulit misso ad nos filio suo.

Annuntiate inter gentes ] Hæc summa di-  
ligentia, & studio perfecerunt Apostoli, qui totum  
orbem terrarum peragrauerunt, ut ueram religio-  
nem docerent.

In sanctuario eius ] Sanctuarium Dei non  
solum appellat coelum, sed etiam ecclesiam piorum,  
in qua uis, & maiestas Dei maximopere elucet.

Dicite, in gentibus Dominus regnauit ]  
Prædicate (inquit) in omnibus terrarum oris, iam

euerſa Diaboli tyrannide Deum per CHRISTVM ſuum regnare .

Et firmabit orbem terræ ] Significat conſtantiam , & inuictum robur eorum , qui regnum Dei ingreſſi ſic innituntur in lapide firmiſſimo, nempe CHRISTO , ut nullo rerum aduerſarum ictu concutiantur , nulla vi, aut oppugnatione Diaboli, & impiorum de pietate , ac tranquillitate animi depellantur .

Latentur coeli ] Merito letari debet rerum uniuerſitas CHRISTO regnum ineunte : ille enim non ſolum corpora piorum immortalitate donaturus , ſed etiam cœlum , & reliquas mundi partes renouaturus eſt : quam quidem renouationem incredibili cum deſiderio totum uniuerſitatis corpus expectat , & , dum illa fiat , nobiſcum ingemiſcit , & , more parturientis ſœminæ, dolore cruciatur , ut auſtor eſt diuus Paulus in epiſtola, quam ſcribit ad Romanos .

Quoniam uenit iudicare terram ] His uerbis non tam ſignificat tempus illud nouiſſimi iudicii , quàm id tempus , quo Deus CHRISTVM ab inferis excitauit , illumq; terris præpoſuit , ut is regeret , ac gubernaret omnes nationes : uerbum enim iudicandi in hanc ſententiam ſæpe accipitur in literis ſanctis .

# ARGVMENTVM PSAL.

## XCVII.

Etiam hoc pſalmo natiſcinatur de regno CHRI

# EXPLANATIO

STI, qui omnes nationes ad cultum ueri Dei reuocauit.

## Psalmus XC VII.

Dominus regnauit, exultet terra, lætentur insulæ multæ.

Nubes, & caligo in circuitu eius, iustitia, & iudicium habitaculum throni eius.

Ignis ante ipsum præcedet, & inflammabit in circuitu inimicos eius.

Illuxerunt fulgura eius orbi terræ, uidit, & commota est terra.

Montes sicut cæra fluxerunt à facie Domini, à facie Domini uniuersæ terræ.

Annuntiauerunt cœli iustitiam eius, & uiderunt omnes populi gloriam eius.

Confundantur omnes, qui adorant sculptilia, & qui gloriantur in Dijs uanis.

Adorate eum omnes angeli eius, audiuit, & lætata est Sion.

Et exultauerunt filiæ Iudæ propter iudicia tua Domine.

Quoniam tu Dominus altissimus super omnem terram; nimis exaltatus es super omnes Deos.

Qui diligitis Dominum, odite malum, custodit Dominus animas sanctorum suorum, de manu peccatoris liberabit eos.

Lux seminata est iusto, & rectis corde lætitia.

Letamini iusti in Domino, & confitemini memo-

riæ sanctitatis eius .

## EXPLANATIO .

Dominus regnavit ] Iam ( inquit ) Dominus regnat in orbe terrarum , in quo ante Diabolus , & superstitio , & omnia scelera regnabant .

Nubes , & caligo ] His uerbis significat , naturam Dei neque oculis cerni , neque animo comprehendendi posse . Sed Euthymius ait , nubem , & caliginem significare corpus , quo diuinitas CHRISTI sese induit .

Iustitia , & iudicium habitaculum throni eius ] Iustitia pertinet ad misericordiam , & beneficentiam , iudicium ad seueritatem , & poenas improborum .

Ignis ante ipsum ] Hunc uersiculum plerique referunt ad tempora illa nouissima , quibus uniuersum genus humanum ad uitam reuocabitur , & CHRISTVS è cælo descendet ad iudicia exercenda : sed non minus hæc uidentur esse dicta de ui , & potestate , qua utitur CHRISTVS etiam nunc in homines impios , & sceleratos . ignem autem sæpe significare in literis sanctis acerbiteratem supplicij , alio loco dictum est .

Illuxerunt fulgura ] Etiam hunc uersum , & sequentes plerique pertinere existimant ad tempora illa mundi nouissima , sed mihi magis placent , qui hæc referunt ad fulgura spiritus sancti , atque ad Apostolos , qui tanquam astra quædam splendidissima breui tempore totum orbem terrarum in maximis errorum tenebris iacentem illustrauerunt , & omnes

# EXPLANATIO

nationes magnitudine miraculorum perterruerunt .  
nam quod subiungit , montes instar cææ liquefactos  
esse ob præsentiam Domini, id dictum esse uidetur de  
Diabolo , & Angelis eius , item de regibus , & ty-  
rannis , qui uel CHRISTO se summisserunt ,  
uel impietatis suæ grauissimas pœnas dederunt .

Annuntiauerunt cœli ] Cœlos appellat cœ-  
lites ipsos , quemadmodum terram sæpe appellare so-  
let pro ipsis hominibus . Angelos autem iustitiam, &  
sanctitatem CHRISTI testimonio suo com-  
probauisse , notissimum est . Quid uero , si Apostolos  
significare uoluit , cum cœlos dixit ? ij enim & cœ-  
lestem uitam in terris coluerunt, & iustitiam Dei præ-  
dicauerunt apud omnes nationes , iustitiam inquam  
non humanam , sed diuinam , & cœlestem , nimirū  
quam Deus ipsi donat , qui spiritu ipsius afflati pro  
certo credunt , IESVM CHRISTVM pec-  
cata , & scelera generis humani suo sanguine luisse .

Et uiderunt omnes populi gloriam eius ]  
Quam ante non poterant intueri obcæcati superstitio-  
nibus , & cultu falsorum deorum .

Confundantur omnes ] Iam uos ( inquit )  
pudeat ò misera gentes colere simulacra inania, & fi-  
ctos Deos .

Audiuit , & letata est Sion ] Et Sion ( in-  
quit ) & reliquæ ecclesiæ ab ista Hierosolymitana pro-  
gnatæ audierunt , quæ prædicata sunt ab Apostolis de  
iustitia Dei , itemq; uiderunt, ab eo res humanas per  
CHRISTVM rectissime , ac felicissime guber-  
nari ; quæ res illas incredibili lætitia affecerunt, cum

præsertim viderent, maiestatem augustissimi numinis omnibus gentibus cognitam, et commentitios Deos abiectos, & repudiatos esse.

Lux seminata est   Lux (inquit) ueræ pietatis, & religionis, perpetuaq; lætitia sata est in animis eorum, qui iustitiam Dei, & præcepta saluberrima CHRISTI non repudiarunt. Itaque uos, quicunque hanc beatissimam lucem in animos vestros suscepistis, lætaminini in Domino, cæteris omnibus gaudijs, & uoluptatibus abiectis, neque unquam intermittite gratias agere infinitæ bonitati eius pro tot, ac tantis beneficijs, quibus uos quotidie ornat, atque in perpetuum ornabit.

## ARGVMENTVM PSAL.

XCVIII.

Idem est argumentum huius psalmi, atque superioris.

Psalmus XCVIII.

Cantate Domino canticum nouum, quia mirabilia fecit.

Saluauit sibi dextera eius, & brachium sanctum eius.

Notum fecit Dominus salutare suum, in conspectu gentium reuelauit iustitiam suam.

Recordatus est misericordiæ suæ, & ueritatis suæ domui Israel.

Viderunt omnes termini terræ salutare Dei nostri.

# EXPLANATIO

Iubilate Deo omnis terra, cantate, & exultate,  
& psallite.

Psallite Domino in cithara, in cithara, & uoce psalmi, in tubis ductilibus, & uoce tubæ cornæ.

Iubilate in conspectu regis Domini, intonet mare, & plenitudo eius, orbis terrarum, & qui habitant in eo.

Flumina plaudant manu, simul montes exultent in conspectu Domini, quoniam uenit iudicare terram.

Iudicabit orbem terrarum in iustitia, & populos in equitate.

## EXPLANATIO.

Saluauit sibi dextera eius. ] Id est, auxilium, & salutem nobis attulit sua tantum dextera, & brachio sancto suo. sic autem appellat unigenam filium Dei. Hac eadem loquendi figura usus est Esdrias, cum inquit, & uidit, quod nemo adesset; & admiratus est, quod non foret, qui occurreret; & saluauit sibi brachium suum: id est, cum Dominus uideret, neminem esse, qui tueretur innocentes, ipse suis uiribus illos serauit.

Notum fecit. ] Apostoli enim apud omnes gentes diuulgarunt euangelium, quo salus mortalium continetur, & iustitia Dei.

Recordatus est misericordiæ suæ. ] Simile est illud Mariæ Virginis, Adiuuit Israele puerum suum recordatus misericordiæ suæ, sicut locutus est ad patres nostros Abraham, & semini eius in secula.



Quoniam uenit iudicare terram ] Hæc  
uerba interpretati sumus in explanatione psal. XCVI.

## ARGVMENTVM PSAL. XCIX.

Prædicat potentiam, iustitiam, & misericordiam  
Dei, & populum ad cultum, & uenerationem illius  
adhortatur.

## Psalmus XCIX.

Dominus regnauit, contremiscant populi, qui se-  
det super Cherubin, commouetur terra.

Dominus in Sion magnus, & excelsus super om-  
nes populos.

Confiteantur nomini tuo, quoniam magnum,  
& terribile, & sanctum est, & fortitudo regis iu-  
dicium diligit.

Tu parasti æquitates, iudicium, & iustitiam in  
Iacob tu fecisti.

Exaltate Dominum Deum nostrum, & adorete  
scabellum pedum eius, quoniam sanctum est.

Moyse, & Aaron inter sacerdotes eius, & Sa-  
muel inter eos, qui inuocant nomen eius.

Inuocabant Dominum, & ipse exaudiebat eos, in  
columna nubis loquebatur ad eos.

Custodierunt testimonia eius, & præceptum, quod  
dedit illis.

Domine Deus noster tu exaudiebas eos, Deus tu  
parcebas eis, & ulcisceris opera eorum.

Exaltate Dominum Deum nostrum, et adorete in

## E X P L A N A T I O

monte sancto eius, quoniam sanctus Dominus Deus  
noster.

## E X P L A N A T I O.

Qui sedet super Cherubin ] Eos Cherubi  
nos significat, qui arcam fœderis custodiebant.

Et fortitudo regis ] Rex ( inquit ) noster  
non minus iustitia excellit, quàm uiribus, & potentia.

Scabellum pedum eius ] Ita uocat arcam  
fœderis, cui Deum insidere, prædicant literæ sanctæ  
ob eas causas, quas alio loco diximus.

Moyse, & Aaron ] Proponit exemplum  
Mosis, & Aaronis, & Samuelis, qui præstantissimi  
fuerunt religione, ac sanctitate, & ob eam rem cha-  
rissimi Deo.

Deus tu parcebas eis, & ulcisceris opera eorū ]  
Hæc non dicit de uiris sanctis, quos commemora-  
uit, sed de ijs, qui eorum imperio subiecti erant.  
neque id cuiquam mirum uideatur: solent enim scri-  
ptores Hebræi ea, quæ uocantur à grammaticis  
pronomina, sæpius ponere, quanquam nihil antece-  
dit, quò illa referri possint: hoc cum ex alijs locis hu-  
ius libri, tum ex illo uersu psalmi XVI. perspicuū  
esse potest, Multiplicata sunt idola eorum, post alium  
accelerauerunt. profecto hæc crimina non conueniunt  
in homines sanctos, quorum mentio fit in uersu su-  
periore, sed in impios, qui defecerant à Deo. Itaque  
uerborum, quæ nunc explanamus, hæc est sententia,  
Deum tam charos habuisse Mosem, Aaronem, & Sa-  
muelem, ut ipsorum causa populo peccanti parceret,  
& grauius

Et grauitè vindicaret, si quis iniuriā eis facere conaretur. cui rei testimonio sunt ij, qui seditionē concitare ausi sunt contra Moſem, Et fratrem eius: illorum enim partim hiatu terræ absorpti sunt, partim ab igne interierunt: qui uero Samuelis principatū repudiarunt, eos subiecit Deus tyrannidi Saulis, d quo maximis incōmodis affecti fuerunt. Hanc explanationem eo libentius amplectimur, quod illa cum Symmachī interpretatione consentit: is autem cum uir eleganti iudicio foret, in conuertendis libris sanctis ex Hebræo non necesse putauit uerbum pro uerbo reddere, sed satis habuit, si sententias commode, ac fideliter exprimeret.

## ARGVMENTVM PSAL. C.

Hortatur omnes mortales, Et præcipue Iudæos, ut memores sint beneficiorum Dei, qui nos creauit, regit, ac tuetur, ut nunquam intermittendæ sint gratiarum actiones.

## Psalmus ad laudem, C.

Iubilare Deo omnis terrā, seruire Domino in lætitia.

Introite in conspectu eius in exultatione.

Scitote, quod Dominus ipse est Deus, ipse fecit nos, Et non ipsi nos,

Nos autem populus eius, Et oues pascuæ eius. introite portas eius in confessione, atria eius in hymnis,

## E X P L A N A T I O

confitemini illi .

Laudate nomen eius , quoniam benignus est Domi-  
nus , in æternum misericordia eius , & usque in ge-  
nerationem , & generationem ueritas eius .

## E X P L A N A T I O .

Seruite Domino in letitia ] Hoc nemo præ-  
stare potest , nisi qui certam spem habet , Deum sibi  
esse benignum patrem . id autem solus spiritus san-  
ctus persuadet , testificans , nos esse filios , & hæredes  
Dei .

Scitote , quid Dominus ] Hæc , quæ iubet  
nos scire uir sanctus , facillima cognitu uidentur , sed  
tunc quisque sciat , se scire , Dominum esse Deum suum ,  
cum spem omnium rerum suarum in ipso collocarit ,  
& gloriam sanctissimi numinis suæ gloriæ , pecuniæ ,  
ac uitæ præposuerit . hæc quandiu non facimus , tan-  
diu , Dominum esse Deum nostrum , ignoramus , im-  
mo uero cum Deum nominamus , huic uerbo quæ sen-  
tentia subiecta sit , non satis intelligimus .

Nos autem populus eius ] Nos (inquit) non  
solum creauit sicut cæteros , sed etiam ex omnibus gen-  
tibus elegit , quos præcipue amaret , ac tueretur .

## A R G V M E N T V M P S A L . C I .

Describit officia pij , & optimi principis : quanquã  
ferè omnia præcepta hæc pertinent etiam ad institu-  
tionem hominum priuatorum .

## Psalmus C I.

Misericordiam, & iudicium cantabo, tibi Domine psallam.

Intelligam in uia immaculata, quando uenies ad me?

Ambulabo in innocentia cordis mei in medio domus meæ.

Non proponam ante oculos meos rem iniustam, facientem prauaricationes odio habebo,

Nec adhærebit mihi, cor prauum recedet a me, malignum non cognoscam.

Detrahentem secreto proximo suo hunc interficiam.

Elatum oculis, & insatiabili corde hunc non tolerabo.

Oculi mei ad fideles terræ, ut sedcant mecum, ambulans in uia immaculata hic mihi ministrabit.

Non habitabit in medio domus meæ, qui facit fraudem: qui loquitur mendacia, non dirigetur in conspectu oculorum meorum.

In matutino interficiam omnes peccatores terræ, ut disperdam de ciuitate Domini omnes operantes iniquitatem.

## EXPLANATIO.

Misericordiam, & iudicium ] Misericordiam (inquit) & iustitiam semper colam, & carminibus meis celebrabo, eroq; semper paratissimus ad hoc

# EXPLANATIO

mines iuuandos, & subleuandos, & ad omnia re=  
ete, ac iuste administranda, in primis tibi Domine  
psallam, & perpetuis hymnis gratias agam, qui has  
uirtutes, & cetera omnia bona largiris.

Intelligam in uia immaculata ] Id est, stu=  
debo uersari sapienter in recta, & pia uiuendi ratio  
ne, sed nihil proficiam, nisi conatus meos ipse iuue=  
ris: quando igitur uenies ad animum meum, illumq;  
splendidissima luce sapientiæ tuæ illustrabis, & amo=  
re sanctissimo inflammabis?

Ambulabo ] Proponit nobis effigiem solida,  
expressæq; uirtutis, quæ siue in publico uersetur,  
siue in domum intimam se se abdat, semper est eadē,  
tantumq; abhorret à scelere, & maleficio, ut etiam  
ipsam cogitationem castam, inuiolatamq; conseruet,  
usum uero, & familiaritatem improborum repudiat,  
seq; ad honestas, & pias amicitias cupidissime adiungit.

Cor prauum à me recedet ] Id est, si quem  
ex meis deprehendero animo prauo, & peruerso, illi  
ego interdicam domo, & familiaritate mea.

Oculi mei ad fideles ] Diligenter inuesti=  
gabo, quinam in terra Iudæa fidem, & iustitiam  
colant, eorumq; familiaritate semper utar.

Non dirigetur in conspectu oculorum meorū ]  
Id est, apud me gratiosus non erit.

In matutino ] Id est, adhibito summo stu=  
dio, & diligentia, nullaq; interposita mora: nam  
hoc uerbo mane sæpissime utuntur in hanc sententiā  
literæ sanctæ, ut alio loco admonuimus.

## ARGVMENTVM PSAL. CII.

Precatio est Hebrææ gentis apud Babylonios diuisa  
 simam seruitutem seruientis, & calamitates  
 suas deplorantis. Vaticinatur autem de reditu  
 illorum ab exilio, item de regno CHRIS-  
 TI, & conuersione omnium gentium ad  
 ueram religionem.

Oratio pauperis, cum anxius esset, & coram  
 Domino effunderet orationem suam,  
 Psalmus CII.

Domine exaudi orationē meam, & clamor meus  
 ad te ueniat.

Non auertas faciem tuam a me: in quacunque die  
 tribulor, inclina ad me aurem tuam.

In quacunque die inuocauero te, uelociter exau-  
 di me,

Quia defecerunt sicut fumus dies mei, & ossa  
 mea sicut torris adusta sunt.

Percussum est ut herba, & aruit cor meum, quia  
 oblitus sum comedere panem meum.

Propter uocem gemitus mei adhæsit os meum car-  
 ni meæ.

Similis factus sum pellicano solitudinis, factus  
 sum sicut nicticorax incolens deserta.

Vigilaui, & factus sum sicut passer solitarius in  
 tecto.

Tota die exprobrant mihi inimici mei, & insula

# EXPLANATIO

tantes mihi per me iurant .

Quia cinerem tanquam panem manducaui , & poculum meum cum fletu miscui

A facie indignationis tuæ , & iræ tuæ , quia eleuans allisisti me .

Dies mei sicut umbra declinauerunt , & ego sicut herba arui ,

Tu autem Domine in æternum permanes , & memoria tui in generatione & generationem .

Tu exurgens misereberis Sion , quia tempus miserendi eius , quia uenit tempus .

Quoniam placuerunt seruis tuis lapides eius , & terræ eius miserebuntur .

Et timebunt gentes nomen tuum Domine , & omnes Reges terræ gloriam tuam .

Quia ædificabit Dominus Sion , & uidebitur in gloria sua .

Respexit in orationem humilium , & non spreuit preces eorum .

Scribantur hæc pro generatione futura , & populus , qui creabitur , laudabit Dominum .

Quia prospexit de excelso sanctuario suo , Dominus de cœlo in terram aspexit ,

Vt audiat gemitus compeditorum , ut soluat filios mortis ,

Vt annuntient in Sion nomen Domini , & laudem eius in Hierusalem ,

Cum conuenerint populi in unum , & reges , ut seruiant Domino .

Afflixit in uia fortitudinem meam , abbreviauit



dies meos .

Dicam , Deus meus ne rapias me in dimidio dierū meorum , in generationem, & generationē anni tui .

Initio tu Domine terram fundasti , & opera manuum tuarum sunt coeli .

Ipsi peribunt , tu autem permanes , & omnes sicut uestimentum ueterascent :

Et sicut opertorium mutabis eos, & mutabuntur, tu autem idem ipse es , & anni tui non deficient .

Filij seruorum tuorum habitabunt, & semen eorum corā te stabilietur .

#### EXPLANATIO .

Et ossa mea sicut torris adusta sunt ] Sic uertit etiam Symmachus . significat autem prae dolore animi corpus ipsum macie confectum esse .

Percussum est ut herba ] Ut herba solis ardore percussa , uel falce demessa exarescit , ita cor meum assiduīs calamitatibus, & angoribus extabit .

Adhaesit os meum carni meae ] Significat his uerbis , carnem suam ita consumptam esse assiduo fletu, & mœrore , ut ossa iam cuti inhaereant, neque ulla caro intercedat : hebraea enim lingua carnem pro cute aliquando appellare solet .

Pellicano solitudinis ] Quidam uerterunt ex Hebraeo , onocrotalo , sed ne Hebraei quidem sciūt, quenam ista aues sint .

Et insultantes mihi per me iurant ] Id est , ad tantam calamitatem , & miseriam uenimus , ut qui iurantes sibi mala uolunt precari , Hebraeorum

# EXPLANATIO

erumnas sibi precentur .

Quia cinerem ] Significat , se in maximo luctu , & mœrore esse : lugentes enim in pulvere iacere consueverant .

Quia eleuans allisisti me ] Elegantissima allegoria exaggerat magnitudinem iræ diuinæ , & calamitatis suæ : nam quæ uolumus ad terram grauius affligere , ea alte extollimus .

Dies mei sicut umbra declinauerunt ] Comparat uitam suam fugacissimam umbræ inclinatæ , & iam , iamq; in tenebras euascenti . Sic in psalmo C I X . Sicut umbra cum declinat , ego pertrāseo . De umbris inclinatis est illud Virgily ,

Maioresq; cadunt altis de montibus umbræ .

Quia tempus miserendi eius ] Significat , LXX illos annos , per quos duratura erat seruitus Hebræorum , iam exactos esse , idq; eo etiam argumento probat , quòd iam Cyro , & Dario placuisset Hierosolyma instaurari . eos autem seruos Dei appellat , propterea quòd Deus opera eorum ad res magnas administrandas usus sit . Sic etiam Dominus apud Esaiam uocat Cyrum seruum suum .

Et omnes reges terræ ] Id fieri coeptum est iam tum à Cyro , & Dario , sed perfectum est postea , cum filius Dei corpus humanum assumpsisset .

Et uidebitur in gloria sua ] Etenim homines à uera religione abhorrentes cum uiderent Hierosolyma , & templum Dei euersa esse , eiusq; cultores omnibus calamitatibus oppressos , irridebant ipsum Deum tanquam imbecillum , quiq; sibi , ac suis opitu-

lari non posset. itaque urbs instaurata, & populus in libertatem uendicatus, & templum magnificētissime extructum, hæc inquam omnia ad maximam Dei gloriam redundatura erant. sed hæc, & ea, quæ sequuntur, in primis dicta sunt à uiro sancto de edificatione ecclesiæ, & regno CHRISTI. quarum rerum imagines, atque umbræ erant res, quæ exponuntur in his uersibus, si quidem cum Deus gentem Hebræam durissima illa seruitute Babylonica liberaret, significabat, se misso CHRISTO liberaturum crudelissima tyrannide Diaboli genus humanum, quod uinculis, & compedibus uitiorum, & scelerum obstrictum, mortiq; sempiternæ addictum erat. Instauratio autem Hierosolymorum, & templi significabat constitutionem religionis christianæ, & ecclesiæ sanctæ, in quam populi, & reges conuenturi erant ad colendum, & uenerandum uerum Deum abiecta superstitione, atque ita ille uidendus erat in gloria sua, id est, nomen eius omnibus terrarum finibus celebre futurum erat, cum scilicet mortales intelligentes ipsum esse, qui per unigenam filium suum non solum omnia peccata delet, sed etiam uitā beatam, & immortalem donat, Deos fictos, & commentitios repudiarent, atque illius sanctissimo numini summa reuerentia preces, cultus, honores adhiberent.

Filios mortis ] Id est, morti iam addictos.

Afflixit in uia ] Attriuit hostis ( inquit )  
uel ipse Deus uires meas longis itineribus, & magnitudine calamitatum breuiorem mihi uitam reddidit.

# E X P L A N A T I O

In generationem, & generationem anni tui ]  
 Consolatur se prædicanda infinita potentia Dei, atque  
 eius æternitate: cum enim ille omnium rerum præpo-  
 tens sit, nulla uis eum prohibere potest, quo minus  
 populum suum è manibus impiorum eripiat, quem  
 admodum se facturum pollicitus est: cumq; idem ut  
 ea optima, & sempiterna sit, unde uniuersis animan-  
 tibus uita manat, & spiritus, profecto homines pij,  
 qui cum ipso tam arcto amoris uinculo conglutinati  
 sunt, ut nihil fieri possit copulatius, nullo modo peri-  
 re possunt, licet oculis insipientium mori uideantur.  
 itaque cum infra dixisset, annos Dei esse innumera-  
 biles, subiungit, filij seruorum tuorum habitabunt;  
 & semen eorum coram te stabilietur, significans his  
 uerbis, si Deus æternus est, etiam eos, qui in terris  
 iuste cum fide, ac pietate Deum colunt, in coelo una  
 cum illo beatos æuum acturos sempiternum.

Ipsi peribunt ] De hoc interitu coeli, atque  
 eius immutatione diuus Petrus in secunda epistola scri-  
 bit ad hunc modum, Veniet autem dies Domini si-  
 cut fur in nocte, quo coeli magno impetu transibunt,  
 elementa uero calore soluentur, terraq; & quæ in  
 ea sunt, opera exurentur. Cum igitur hæc omnia  
 dissoluantur, quales nos esse oportet in sanctis conuer-  
 sationibus, ac pietatibus, expectantes, & acceleran-  
 tes aduentum dñi Domini? per quem cæli incensi uni-  
 uersi soluentur, & elementa ignis ardore liquecent.  
 Sed cælos novos, ac terram nouam iuxta promissum  
 ipsius expectamus, in quibus iustitia inhabitat.

## ARGVMENTVM PSAL. CIII.

Celebrat hoc hymno suauissimo misericordiam, et bonitatem Dei erga humanum genus, & docet nos agere gratias pro beneficijs, quæ ille quotidie in nos liberalissime confert.

## Psalmus David CIII.

Benedic anima mea Domino, & omnia, quæ intra me sunt, nomini sancto eius.

Benedic anima mea Domino; & noli obliuisci omnes retributiones eius.

Qui propitiatur omnibus iniquitatibus tuis, qui sanat omnes infirmitates tuas.

Qui redimit de interitu uitam tuam, qui coronat te misericordia, & miserationibus.

Qui satiat bonis animam tuam, renouabitur ut aquilæ iuuentus tua.

Faciens misericordias Dominus, et iudicium omnibus iniuriam patientibus.

Notas fecit vias suas Moysi, filijs Israel voluntates suas.

Misericors, & clemens Dominus, longanimis, & multum misericors.

Non in perpetuum contendet, neque in æternum ulciscetur.

Non secundum peccata nostra fecit nobis, neque secundum iniquitates nostras retribuit nobis.

Quoniam secundum altitudinem cœli à terra cor

## E X P L A N A T I O

roborauit misericordiam suam super timentes se .

Quantum distat ortus ab occidente , longe fecit à nobis iniquitates nostras .

Quo modo miscretur pater filiorum , misertus est Dominus timentium se , quoniam ipse cognouit figmentum nostrum .

Recordatus est , quòd puluis sumus , homo sicut herba dies eius , tanquam flos agri sic efflorescit ,

Quoniam uentus pertransibit illum , & non subsister , & non cognoscet eum amplius locus eius ,

Misericordia autem Domini ab æterno , & usque in æternum super timentes eum ,

Et iustitia illius in filios filiorum his , qui seruant testamentum eius ,

Et memores sunt mandatorum ipsius ad faciendum ea .

Dominus in coelo stabiliiit sedem suam , & regnum ipsius omnibus dominabitur .

Benedicite Domino angeli eius , potentes uirtute ; facientes uerbum illius ad audiendam uocem sermonum eius .

Benedicite Domino omnes exercitus eius , ministri eius , qui facitis uoluntatem eius .

Benedicite Domino omnia opera eius in omni loco dominationis eius , benedic anima mea Domino .

## E X P L A N A T I O .

Omnia, quæ intra me sunt ] Ita uocat cogitationes, & intimos animi sensus, & affectiones.

Omnes retributiones eius ] Consuetudine

linguæ Hebrææ retributiones appellat beneficia, quæ Deus ultro nobis tribuit pro sua incredibili misericordia.

Qui propitiatur omnibus iniquitatibus tuis ]  
Eas tibi condonans, & sanat omnes morbos animi, & corporis tui.

Qui redimit de interitu ] Ex crebris enim & grauissimis periculis Deus eripuit Dauidem, & illum tandem ad regiam dignitatem perduxit. sed & nos quotidie pericula maxima adiremus, nisi eius misericordia, & clementia tanquam scuto firmissimo protegeremur.

Qui replet bonis animam tuam ] Ita uer-  
timus secuti interpretationem Abrahami Esdræ.

Renouabitur ut aquilæ iuuentus tua ]  
Apuđ auctores probatos nusquam legi, aquilam ex prouectiori ætate ad iuuentutem redire. itaque haud scio, an horum uerborum hæc sit sententia, uires suas ita redintegratum iri, ut robustissimæ iuuentuti aquilæ comparari queat.

Notas fecit uias suas ] Hoc in præcipuis Dei beneficijs numerandum est: nisi enim ille nobis aperuisset, quid de suo numine sentiendum, quæ uera sanctitas, quæ pura, & casta religio, quid in uita sequendum, fugiendumue sit, in maximis profecto errorum tenebris uersaremur. Neque tamen hoc satis est putandum, quòd Deus uias suas errantibus indicarit, nisi idem suo spiritu nos per eas ducat: talis enim, & tanta est animorum infirmitas, & deprauatio, ut eius auxilio destituti nihil boni agere pos-

simus .

Quo modo miseretur pater ] Parentes enim nullis filiorum iniurijs ab amore deterrētur, sed illorum errata modo dissimulant, modo salutariter castigant, eosq; incredibili studio, & pietate amplexantur .

Quoniam ille cognouit figmentum nostrum ] Nouit,inquam, nos non solum è luto fictos esse, sed etiam, dum concipimur in utero matris, ita contagione peccati contaminari, ut ad libidines, atque omnia uitia simus maxime procliuēs .

Tanquam flos agri efflorescit ] Qui enim modo uigebat, & formosissimus erat, dicto citius edita anima tabescit, & penè in nihilum recidere uidetur, non aliter quàm flos, quem ubi uentus aliquis immitior perflauit, illico desinit esse, neque cernit amplius eum locus, ubi paulo ante pulcherrimus floruerat .

Misericordia autē Domini ] Vita quidem hominum fragilis, & fugacissima est, sed misericordia Dei est immortalis, & sempiterna, quæ quidem facit, ut cultores ipsius, quamuis suapte natura sint inanes, & caduci, æuo sempiterno beatissimi fruātur .

Dominus in coelo ] Hæc est maxima piorum consolatio in hac uita fragili, & caduca, plenāq; laborum, & calamitatum, quod certo sciunt, Deum in coelo sempiternum domicilium habere, eiusq; potestate, ac numine omnia regi, gubernariq;, ut minime dubitandum sit, quin ille piorum, impiorumq; rationem habeat .



Benedicite Domino angeli eius ] Itaque cū summus ille Deus sit omnium rerum Dominus, neque solum imperio terrarum potiatur, sed etiam cœlo, coelitisq; præsideat, eosq; perinde ac cætera omnia ex nihilo creavit, tueatur, atque conseruet, adeste ò cœlites beati, & nobiscum una hymnos sanctissimo eius numini cantate, cantate laudes Deo ò fidissimi nuntij, & ministri eius, qui uiribus uestris innumera-  
rabiles copias impiorum ad internecionem sæpe cecidistis, quiq; nihil sanctius, aut antiquius habetis, quàm uestri parentis, & creatoris mandata exequi, atque illius dicto audientes esse.

Benedicite Domino omnes exercitus eius ] Hoc ait, quoniam sunt multi ordines illarū mentium beatarum, quæ corporibus uacant.

Benedicite Domino omnia opera eius ] Hortatur etiam ea, quæ ratione, & sensibus carēt, ad hymnos canendos, significans, ad omnes mundi particulas beneficia Dei permanere, tum etiam, quicquid cernimus, & sensibus usurpamus, ad bonitatem, & sapientiam Dei contemplandam, & prædicandam homines excitare.

#### ARGVMENTVM PSAL. CIIII.

Superiori hymno celebrauerat incredibilem misericordiam, & benignitatem Dei erga se, ac ceteros mortales, hoc elegantissime describit pulchritudinem rerum ab eo creatarum, & excellentiam earum partium, ex quibus hæc admirabilis uniuersi amplitudo

# EXPLANATIO

constituta est , in quibus omnibus elucet infinita uis ,  
 & sapientia , & bonitas Dei .

## Psalmus CIIII.

Benedic anima mea Domino , Domine Deus meus  
 magnificatus es uehementer .

Gloriam , & decorem induisti amictus lumine si-  
 cut uestimento ,

Extendens coelum sicut cortinam , qui tegis aquis  
 coenacula eius ,

Qui ponis nubes currum tuum , qui ambulas su-  
 per pennas uentorum ,

Qui facis angelos tuos spiritus , & ministros tuos  
 ignem urentem ,

Qui fundasti terram super basem suam , non mo-  
 uebitur in seculum seculi .

Abyssus sicut uestimento operuisti eam . super mon-  
 tes stabant aquae ,

Ab increpatione tua fugerunt , a uoce tonitru tui  
 precipites defluxerunt ,

Ascenderunt montes , & descenderunt campi in lo-  
 cum , quem fundasti eis ,

Terminum posuisti , quem non transgredientur ,  
 neque reuertentur operire terram .

Tu emittis fontes in fluuios , qui inter montes la-  
 buntur ,

Bibunt inde omnes bestiae agri , extinguunt onagri  
 sitim suam ,

Iuxta illos uolucres coeli habitant , de medio fron-  
 dium

dium dant uocem .

Tu rigas montes è coenaculis tuis , de fructu operum tuorum satiatur terra .

Tu producis gramen iumentis , & herbam hominibus cultum adhibente ,

Vt educat panem è terra , & uinum lætificat cor hominis ,

Et nitere facis faciem ab oleo , & panis cor hominis confirmat .

Saturantur ligna Domini , & cedri Libani , quas plantauit , illic passeret nidificant .

Ciconiæ domus sunt abietes , montes excelsi ceruicis , petra refugium herinacis .

Tu fecisti lunam in tempora , sol cognouit occasum suum .

Tu ponis tenebras , & fit nox , in ipsa uagantur omnes bestię syluæ ,

Catuli leonum rugientes ad prædam , ut querant à Deo escam sibi .

Oriente sole congregantur , & in cubilibus suis conquiescunt .

Exit homo ad opus suum , & ad laborem suum usque ad uesperam .

Quàm magnifica sunt opera tua Domine , omnia in sapientia fecisti , impleta est terra possessione tua .

Hoc mare magnum , & spatiosum , illic reptilia , quorum non est numerus .

Animalia pusilla cum magnis , illic naues pertranseunt ,

Leuiathan iste , quem formasti ad ludendum in

## E X P L A N A T I O

eo, omnia à te expectant, ut des illis escam in tēpore.

Dante te illis colligent, aperiente te manum tuam omnia replebuntur bonis.

Auertente autem te faciem tuam conturbabuntur, auferes spiritum eorum, & deficient, & in puluerem suum reuertentur.

Emittes spiritum tuum, & creabuntur, & renouabis faciem terræ.

Erit gloria Domini in seculum, letabitur Dominus in operibus suis,

Qui respicit terram, & facit eam tremere, qui tangit montes, & fumigant.

Cantabo Domino in uita mea, psallam Deo meo, quandiu sum.

Iucundum sit ei eloquium meum, ego letabor in Domino.

Deficiant peccatores à terra, & iniqui amplius non sunt, benedic anima mea Domino. Alleluja.

## E X P L A N A T I O .

Gloriam, & decorem induisti ] Nam magnitudo, & præstantia rerum creaturarum tanta est, ut te quasi gloria, & splendore uestire uideatur, dū uniuersos mortales excitat ad suspiciendam, & prædicandam potentiam, & bonitatem, & sapientiam tuam.

Qui tegis aquis coenacula eius ] Videtur innuere id, quod scriptum est in Genesi, & diuise Deus inter medium aquæ, quæ erat infra firmamentum, & inter medium aquæ, quæ erat supra firmamentum.

Qui ponis nubes ] His allegorijs significare uidetur uim diuinam ubique praesentem, seq; per omnes mundi particulas insinuantem, & tanquam celerrime omnia permeantem.

Qui facis Angelos ] Id est, qui uentis, & igne uteris tanquam ministris, & nuntijs. Ventorum ministerio Deus uiam strauit Hebraeis in mari rubro, igne Sodomitae consumpsit. sunt alia multa exempla eiusdem generis in historia sacra. eadem ferè loquendi figura usus est in psalmo CXLIX, cum ait, Ignis, grando, nix, uapor, spiritus procellarum faciens mandatum eius. Ita Hebraei explanant hunc locum. Sed diuus Paulus in epistola ad Hebraeos scripta sic interpretatur, tanquam ea dicta sint de mentibus illis beatis, quæ sunt ab omni admistione corporum puræ, atque synceræ: ut Dauid prædicet, Deum non solum earum rerum, quæ sub aspectum cadunt, sed etiam earum, quæ sola cogitatione percipiuntur, opificem fuisse. Vocauit autem eas mentes spiritus, & ignem urentem, ut celeritatem, & uim, atque efficacitatem earum declararet. Sic Theodoretus, atque Euthymius interpretantur; sed Dionysius hæc diligentius persequitur in libro, qui inscribitur de coelesti Hierarchia.

Qui fundasti terram super basem suam ] Basis terræ est centrum ipsum, ad quod omnes terræ ipsius partes undique suo pondere nituntur, atque ita in medio mundi loco terra immobilis manet.

Abyssus sicut uestimento ] Describit elegantissime opus tertij diei, quo die summus ille opifex or-

# EXPLANATIO

mnem uim aquæ in unum locum coegit , ut existeret terra . Itaque ait, à principio terras omnes aquæ amictu operatas fuisse , sed horrida uoce Dei Oceanum increpitum , & perterrefactum se se in fugam dedisse , tunc primum apparuisse montium altitudinem, camporumq; , ac uallium humilitatem . Non dissimilis est illa Virgilij descriptio ,

- » Tum durare solum , & discludere Nerea ponto
- » Coeperit , & rerum paulatim sumere formas ,
- » Iamq; nouum terræ stupeant lucescere solem ,
- » Incipiant syluæ cum primum surgere , cumq;
- » Rara per ignotos errent animalia montes .

Terminum posuisti ] Humilitas ipsa loci , quo nititur aqua , terminus est , quem Deus ei præfixit, ne terras posset obruere: cum enim illa suapte natura deorsum uersus feratur , terra autem effecta sit excelsior eius receptaculo , qui possit ulla uis maris amplius eam submergere ?

Sedant onagri sitim suam ] Meminit præcipue onagrorum, propterea quòd id animal solitudines maxime persequitur, & ob eam rem in locis arenis ferè commoratur , & siti laborat .

Vt educat panem è terra ] Colit inquam homo agros , ut cibum sibi è terræ sinu eliciat.

Et uinum latificat cor hominis ] Quidam ita uertunt , & uinum , quod latificat cor hominis , & oleum , quod nitidam reddit faciem , & panem , qui cor hominis confirmat .

Saturantur ligna Domini ] Ea genera arborum significat , quæ sunt non rastris hominum, non

ulli obnoxia curæ, sed benignitate Dei sponte sua oriuntur, & foecundis imbribus irrigatæ sitim suam ex plent, seq; formosas, uiridesq; conseruant.

Tu fecisti lunam in tempora ] Id est, ut eius cursu tempora distinguantur, & notentur. sed illud scire oportet, uocabulum hebræum significare ea tempora, quibus homines conueniunt ad dies festos, & solennes celebrandos. ea uero tēpora ad lunæ cursum notabantur, ut scriptum est in Exodo, & Leuitico.

Tu ponis tenebras ] Exponit utilitates, quas percipiunt animantia ex uicissitudine dierum, ac noctium.

Leuiathan iste ] Hoc uerbo significat immanes illas, & uastas belluas maris.

Omnia à te expectant ] Hic est tanquam epilogus hymni, in quo admirabili orationis magnificencia describit prouidentiam Dei, cunctis animantibus spiritum, uitam, uictumq; largientem, ut sine eius presentia, & tutela omnia in nihilum interire necesse sit.

Erit gloria Domini in seculum ] Cum itaque Deus tam multiplicēs res, tamq; admirabili pulchritudine, & uarietate distinctas ex nihilo creauerit, illasq; tanta benignitate tueatur, atque conseruet, iure, ac merito eius gloria semper floret, & ad infinitas seculorum ætates propagatur.

Qui respicit terram ] Hoc uersiculo magnifice describit potentiam Dei, qui uel solo aspectu terras tremefaciat, & montes solo contactu incendat,

# EXPLANATIO

Et fumo, atque igne compleat. Innuat autem rem gestam in monte Sina.

Cantabo Domino in uita mea ] Vir sanctus ex tantarum rerum contemplatione, ad cultum, et uenerationem Dei mirabiliter accensus proficitur, se totam uitam consumpturum in canendis, et celebrandis laudibus Dei, in quo uno omnes suas uoluptates, et incunditates sit collocaturus.

Benedic anima mea Domino. Alleluia ] Non satis esse existimans, si solus ipse laudes sanctissimi numinis cantaret, ceteros quoque ad eam rem hortatur, cum ait, alleluia, quod latine sonat, laudate Deum.

## ARGUMENTVM PSAL. CV.

Hortatur populum ad laudes Dei canendas, exponens immortalia eius beneficia in gentem hebraeam, repetit autem historiam usque ab Abrahamo, eamque perducit ad ea tempora, cum Deus terram Canaaneorum Iudaeis possidendam dedit.

### Psalmus C V.

Confitemini Domino, et inuocate nomen eius, annuntiate inter gentes opera eius.

Cantate ei, et psallite ei, narrate omnia mirabilia eius.

Gloriamini in nomine sancto eius, letetur cor quærentium Dominum,

Quærite Dominum, et fortitudinem eius, quæ



rite faciem eius semper .

Mementote mirabilem eius, quæ fecit, prodigiorum eius, & iudiciorum oris eius,

Semen Abraham serui eius, filij Iacob electi eius .

Ipse Dominus Deus noster, in uniuersa terra iudicia eius .

Memor fuit in seculum fœderis sui, uerbi, quod mandauit in mille generationes,

Quod pepigit cum Abraham, & iuramenti sui ad Isaac,

Et statuit illud ipsi Iacob pro lege, & Israeli in fœdus æternum,

Dicens, tibi dabo terram Canaan funiculum hereditatis uestre .

Cum essent numero exigui, paucissimi, & peregrini in ea,

Et pertransirent de gente in gentem, & de regno ad populum alterum,

Non permisit hominem nocere eis, & corripuit propter eos reges,

Nolite tangere Christos meos, & in prophetas meos nolite maligne agere,

Et uocauit famem super terram, & omne firmamentum panis contriuit,

Misit ante eos uirum, in seruum uenundatus est Ioseph,

Affixerunt in compedibus pedes eius, in ferrum uenit anima eius, donec ueniret uerbum eius.

Eloquium Domini purgauit eum, misit rex, & soluit eum, princeps populorum, & dimisit eum.

Constituit eum Dominū domus suæ, & principem  
omnis possessionis suæ;

Ut uinciret principes ipsius pro arbitrio suo, & se  
nes ipsius sapientiam doceret.

Et intrauit Israel in Aegyptum, & Iacob accola  
fuit in terram Cham,

Et auxit populum suum uehementer, & roborauit  
eum super inimicos eius.

Conuertit cor eorum, ut odirent populum suum,  
& dolum facerent in seruos suos,

Misit Moysen seruum suum, Aaron, quem  
elegit.

Posuerunt inter eos uerba signorum eius, & prodigiorum  
in terra Cham.

Misit tenebras, & obscurauit, & non fuerunt re  
belles uerbis eius.

Conuertit aquas eorum in sanguinem, & occidit  
piscis eorum,

Et dedit terra eorum rands, in penetralibus res  
gum ipsorum.

Dixit, & uenit multiplex turba insectorum, &  
pediculi in omnibus finibus eorum.

Conuertit pluuias eorum in grandinem, in ignem  
comburentem in terra ipsorum,

Et percussit uineas eorum, & ficulneas eorum,  
& concriuit lignum finium eorum.

Dixit, & uenit locusta, & bruchus, cuius non  
erat numerus,

Et comedit omnem herbam in terra eorum, & co  
medit fructum terræ eorum.

Et percussit omne primogenitum in terra eorum,  
primitias omnis fortitudinis eorum.

Et eduxit eos cum argento, & auro, & non erat  
in tribubus eorum infirmus.

Latata est Aegyptus in profectione eorum, quia  
incubuit timor eorum super eos,

Expandit nubem in protectionem eorum, & igne,  
ut luceret eis per noctem,

Petierunt, & uenit coturnix, & pane coeli satu-  
rauit eos,

Interrupit petram, & fluxerunt aquae, decurre-  
runt in sicco flumina,

Quoniam memor fuit uerbi sancti sui, quod ha-  
buit ad Abraham seruum suum,

Et eduxit populum suum in exultatione, & ele-  
ctos suos in letitia,

Et dedit illis regiones gentium, & labores populo-  
rum hereditate possederunt,

Ut custodiant iustificationes eius, & leges eius ob-  
seruent. Alleluia.

## EXPLANATIO.

Gloriamini in nomine sancto eius ] Ille  
gloriatur in Deo, qui eius liberalitati acceptum refert,  
quicquid praeedicabile, & gloriatione dignum se habe-  
re existimat. Fortitudinem Dei quaerit, qui perspe-  
cta inanitate uirium suarum se, ac sua omnia poten-  
tissimi numinis tutelae, praesidioq; committit. Faciem  
Dei semper quaerit, quisquis ante omnia studet, ut  
omnibus in rebus potentiam, bonitatem, & sapien-

tiam illius contempletur, eumq; præsentem, ac propitium semper habeat.

In uniuersa terra iudicia eius ] Penes ipsum est imperium omnium terrarum, & tamen nos cæteris omnibus gentibus chariores habet.

Memor fuit in seculum ] Semper Dominus memor fuit foederis, quod fecerat cum Abrahamo, foederis inquam, quod durare uoluit ad innumerabiles seculorum ætates.

Et statuit illud ipsi Iacob pro lege ] Leges huius foederis erant, ne Hebræi aliquem Deum colerent extra ipsum, ipse contra nullam gentem æque charam haberet atque Hebræam.

Funiculum hæreditatis uestre ] Hæc loquendi figura ducta est à consuetudine Iudæorum, qui funibus agros metiebantur. est igitur sensus, assignabo tibi agros Cananæorum, ut eos possideas iure hæreditario.

Nolite tangere ] Castigauit inquam reges, eos admonens his uerbis, Nolite tangere Christos meos. Christos autem suos appellat eos, quos spiritu suo unxerat, & ueros reges, ac sacerdotes constituerat. de qua unctione dictum est in explanatione psalmi X L V.

Et uocauit famem super terram ] Cognitio earum rerum, quæ attinguntur his uersibus, maximum solatium præbere debet hominibus pijs in calamitate. promiserat Deus terram Cananæorum familie Abrahami, sed antequam illa promissum consequeretur, penè fame enecta in Aegyptum fugere, &

durissimam, maximeq; diuturnam seruitutem apud barbaros seruire coacta est. Idem Iosephum eo consilio præmisit in regionem illam, ut dignitate regi proximus euaderet, neque familiam suam modo, sed uniuersam Aegyptum ab imminente exitio tueretur. sed uide, quam duris iniurijs, & progressionibus adolescentem sibi charissimum ad eum honorem, potētiamq; perduxerit. Hæc intelligens uir pius, cui uita beata, & immortalis promissa est à Deo, tum maxime spe bona, bonoq; animo esse debet, cum maxime calamitosus est: solet enim summus ille pater ad inferos deicere, quos cœlo donare constituit, contraq; impios ad breue tempus in sublime tollit, ut grauiore casu decidunt in misérias sempiternas.

In seruum uenundatus est Ioseph ] Memorable profecto exemplum nobis proponitur, quo intelligamus, bonis omnia uertere in bonum. Venditur à fratribus homini barbaro Iosephus, quid miseriùs? at hæc calamitas non solum maximam prosperitatem iuueni sancto, sed etiam salutem familiæ suæ, & cunctis Aegyptijs peperit. Itaque cum fratres huius nefarij sceleris ueniam, & impunitatem peterent, hoc pulcherrimum responsum ab eo tulerunt, Omittite omnem metum, num repugnare possumus Dei uoluntati? Vos quidem mihi perniciem comparastis, sed Deus culpam uestram conuertit ad bonum, ut me ad eam, quam uidetis, dignitatem extolleret, & consilio, atque opera mea magnam uim mortaliū exitio liberaret.

Omne firmamentum panis contriuit ]

# EXPLANATIO

Ita uocat panem, propterea quòd eo uires corporis sustentantur.

Misit ante eos uirum ] In Genesi Cap. X X X V I I.

In ferrum uenit anima eius ] Id est, in uincula ferrea coniectus fuit: solet enim Hebræa lingua animam appellare pro animante ipso.

Donec ueniret uerbum eius ] Id est, donec mitteretur à Deo uis illa interpretandi somnia, de qua in Genesi Cap. X L.

Eloquium Domini purgauit eum ] Interpretatio inquam illa somniorum squalorem, & sordes carceris illi eluit, & innocentiam, & sanctitatem eius talem esse declarauit, quale est aurum igne purgatum.

Constituit eum Dominum ] In Genesi Cap. X L I.

Vt uinceret principes ] Id est, ut prepositus esset etiam principibus Aegyptijs, eiq; potestas esset illos in uincula coniiciendi.

Et intrauit Israel ] In Gen. X L V. Aegyptum uero appellat terram Cham, propterea quòd is genuit Mesrainum, à quo regio illa coepta est habitari.

Et auxit populum suum ] In Exodo Cap. I.

Conuertit cor eorum, ut odirent populum suum ] Vide, quid agat prouidentia Dei, odia barbaræ gentis incitat in Iudæos innocentes, ut crudelitas impiorum illustrem, & gloriosam reddat potentiam, & misericordiam suam. Itaque cum illi omnibus rebus

asperrime tractarentur ab Aegyptijs, neque ulla spes ostenderetur, melius fore, Moses, & Aaron à Deo mittuntur, qui editis inauditis prodigijs, & uniuersa Aegypto maximis calamitatibus uexata, gentem suam seruitute liberarent, eamq; ad optimam Syriae partem traducerent, quam ipse olim familiae Abrahami se promiserat assignaturum.

Misit Mosén ] Ex capite primo, & quarto Exodi.

Posuerunt inter eos ] Moses ( inquit ) & Aaron ediderunt in Aegypto prodigia maxima uiminis diuini.

Misit tenebras ] In Exodo Cap. X.

Et non fuerunt rebelles ] Deus ( inquit ) portentosa nocte diem obscurauit usus opera Mosés, et Aaronis: ij enim uerbis eius obtemperarunt, neque ueriti sunt, potentissimi regis inimicitias suscipere.

Conuertit aquas eorum ] In Exodo Cap. VII.

Et dedit terra ] In Exodo Cap. IX.

Dixit, & uenit ] In Exodo Cap. X.

Et percussit omne ] In Exodo Cap. XII.

Primitias fortitudinis eorum ] Verba hæc explanata sunt in explanatione psal. LXXVIII.

Et eduxit eos ] In Exodo Cap. XIII.

Expandit nubem ] In Exodo Cap. XIII.

Petierunt, & uenit ] In Exodo Cap. XVI.

#### ARGVMENTVM PSAL. CVI.

Gens Hebræa in seruitutem abducta commemo-

rat, & peccata maiorum suorum, & beneficia Dei erga illos, & opem suis calamitatibus implorat.

Psalmus C V I. Alleluya.

Confitemini Domino, quoniam bonus, quoniam in seculum misericordia eius.

Quis loquetur potentias Domini, auditas faciet omnes laudes eius?

Beati, qui custodiunt iudicium, & faciunt iustitiam in omni tempore.

Memento mei Domine cum bona uoluntate erga populum tuum, uisita me in salutari tuo,

Ut uideam in bono electorum tuorum, & leter in letitia gentis tue, & glorier cum hereditate tua.

Peccauimus cum patribus nostris, iniuste egimus, impie fecimus,

Patres nostri in Aegypto non intellexerunt mirabilia tua, non fuerunt memores multitudinis misericordie tue,

Et rebelles fuerunt iuxta mare, mare rubrum.

Et saluauit eos propter nomen suum, ut notam faceret potentiam suam,

Et increpuit mare rubrum, & exsiccatum est, & deduxit eos per abyssos tanquam per desertum.

Et saluauit eos de manu odientium, & redemit eos de manu inimici.

Et operuit aqua tribulantes eos; unus ex eis non remansit.

Et crediderunt uerbis eius, & cecinerunt lau-



dem eius .

Accelerauerunt , obliui sunt operum eius , & non expectauerunt consiliū eius .

Et concupierunt concupiscentiam in deserto , & tauerunt Deum in solitudine .

Et dedit eis petitionem ipsorum , & misit maciem in animam eorum .

Et emulati sunt Moysen in castris , Aaron sanctum Domini .

Aperta est terra , & deglutiuit Dathan , & operuit congregationem Abyron ,

Et exarsit ignis in congregatione eorum , flamma combussit peccatores .

Et fecerunt vitulum in Oreb , & adorauerunt conflatile ,

Et mutauerunt gloriam suam in similitudinem vituli comedentis fœnum .

Obliti sunt Deum , qui saluauit eos , qui fecit magna in Aegypto , mirabilia in terra Cham , terribilia in mari rubro .

Et dixit , ut disperderet eos , si non Moyses electus eius stetisset in diuisione in conspectu eius ,

Vt auerteret iram eius , ne disperderet eos , & pro nihilo habuerunt terram desiderabilem ,

Non crediderunt uerbo eius , & murmurauerunt in tabernaculis suis , non obedierunt uoci Domini ,

Et eleuauit manum suam super eos , ut prostraret eos in deserto ,

Et ut deiceret semen eorum in nationibus , & dispergeret eos in regionibus .

# EXPLANATIO

Et initiati sunt Beelphegor, & comederunt sacrificia mortuorum,

Et irritauerunt eum in studijs suis, & multiplicata est in eis plaga.

Et stetit Phinees, & uindicauit, & cessauit plaga,

Et reputatum est ei in iustitiam, in generationem, & generationem, usque in sempiternum.

Et irritauerunt eum ad aquas contradictionis, & uexatus est Moyses propter eos, quia exacerbauerunt spiritum eius.

Et perperam locutus est labijs suis, non disperdiderunt gentes, quas dixit Dominus illis.

Et commixti sunt inter gentes, & didicerunt opera eorum, & seruiuerunt sculptilibus eorum, & factum est illis in scandalum.

Et immolauerunt filios suos, & filias suas Daemonijs.

Et effuderunt sanguinem innocentem, sanguinem filiorum suorum, & filiarum suarum, quas sacrificauerunt sculptilibus Chanaam.

Et infecta est terra sanguinibus, & contaminati sunt in operibus suis, & fornicati sunt in studijs suis.

Et iratus est furore Dominus in populum suum, & abominatus est hereditatem suam.

Et tradidit eos in manus gentium, & dominati sunt eis, qui oderant eos.

Et tribulauerunt eos inimici eorum, & afflicti sunt sub manibus eorum, saepe liberauit eos.

Ipsi autem rebelles fuerunt in consilijs suis, & de pressi sunt in iniquitatibus suis.

Et uidit,

Et uidit, cum tribularentur, & audiuit orationem eorum,

Et memor fuit foederis sui, & poenituit cum secundum multitudinem misericordiae suae,

Et dedit eos in misericordias in cōspectu omnium, qui captiuauerant eos.

Saluos nos fac Domine Deus noster, & congrega nos ex gentibus,

Vt confiteamur nomini sancto tuo, & cantemus laudes tuas.

Benedictus Dominus Deus Israel a seculo, & usque in seculum, & dicat omnis populus, Amen. Alleluia.

## EXPLANATIO.

Quis loquatur potentias ] Hæc interrogatio uim negandi habet, significat enim, neminem posse laudes Dei uerbis assequi.

Vt uideam in bono electorum tuorum ] Hæc loquendi forma est hebræa, latine autem sic reddenda erat, ut delecter uidens bona electorū tuorū.

Peccauimus cum patribus nostris ] Hæc est illa animi summissio, quæ diuinum numen uel maximis sceleribus uiolatum placare potest. contra, nihil odiosius superbia Phariseorum, quæ iactat illas uoces, Si fuisset in diebus patrum nostrorum, non essemus socij eorum in sanguine prophetarum.

Et rebelles fuerunt iuxta mare, mare rubrum ] Hæc historia scripta est in Exodo Cap. XIII. Sed quidam ex Hebræo uertunt, iuxta mare, in mari

# EXPLANATIO

rubro : ut sensus sit , illos non solum in littore maris rubri , sed etiam , dum ipsum mare pedibus transmitterent , de Deo conquestos esse , & de eius fide , ac providentia dubitasse , cum uiderent , Aegyptios magno impetu à tergo insequi .

Et crediderunt uerbis eius ] In hoc uersu , & proximo falsa pietas egregie describitur , quæ rebus secundis providentiam Dei magnifice laudat , deq; uerbis , & promissionibus illius dubitare , scelus nefarium censet ; quòd si quid duri incidat , illico se prodit animi morbus , & simulatio , nam timida , querula , sollicita est , neque moram ferre potest , neque Deo confidere , sed illius consilium sua stulta prudentia nititur anteuertere , atque omnem spem in propinquis , amicis , & pecunia reponit , multos inanes Deos pro uno uero comminiscens .

Et cecinerunt laudem eius ] Hymnum pulcherrimum significat , qui scriptus est in Exodo Cap. XV .

Accelerauerunt , obliti sunt operum eius ] Hæc ait , quoniam post tertium diem , quam mare transmiserant , coeperunt maledicere Mosi , & Aaroni , propterea quòd diffiderent providentiæ , & bonitati diuinæ , cum eos aqua defecisset .

Et concupierunt concupiscentiam ] Cap. XVII. Exodi .

Et misit maciem ] Id est , cum fastidirene cibum è caelo demissum , & se carnibus explere , auississime cuperent , obsecutus quidem illis est Deus , sed cum maximo ipsorum malo , nam macies pro sagina ,

mors pro uita consecuta est . de qua re in Numeris  
Cap. II.

Aperta est terra ] In Num. Cap. XVI.

Operuit congregationem Abiron ] Signi-  
ficat ducentos illos & quinquaginta, qui cum Datha-  
ne, & Cora, & Abirone coniurauerunt . Discendū  
est autem ex hac historia, quæ poena maneat eos, qui  
seditiones concitant, & contra legitimam potestatem  
arma ferre non uerentur .

Et fecerunt uitulum ] Cap. XXXII. Exo.

Et mutauerunt gloriam suam ] Deum ap-  
pellat gloriam, & decus Hebræorum .

Et dixit, ut disperderet illos ] Cap. XXXII.  
Exodo .

Si non Moses electus eius steterisset in diuisione in  
conspetu eius ] Id est, nisi Moses se præbuisset  
interpretem, & sequestrem, disunctos, & inter se  
alienatos reconcilians.

Et pro nihilo habuerunt terram ] In Nu-  
meris Cap. X. IIII.

Non crediderunt uerbo eius ] Qui promi-  
serat, se terram illam eis assignaturum hereditario  
iure possidendam.

Et eleuauit manum suam ] In Num. Cap.  
XIIII. Dicit autem iurauisse Deum, se eorum no-  
men ad internecionem redacturum: iurantes enim  
manum ad coelum tollebant . Hinc illud in Deutero-  
nomio, Leuabo ad coelum manum meam, & dicam,  
uiuo ego in æternum. &c. sunt tamen qui simplicius  
interprecentur, Deum scilicet manum sustulisse, quo

# EXPLANATIO

illos grauius feriret .

Et initiati sunt ]

In Num. Cap. XXV.

Et comederunt sacrificia mortuorum ] Sic appellat falsos Deos : colebat enim antiquitas pro dijs, quorum sepulcra ostendebantur .

Et stetit Phinees ]

In Num. Cap. XXV.

Et irritauerunt eum ]

In Num. Cap. XX.

Et uexatus est Moses ]

Nam in fines Cana-

næorum , ad quos populum tanto cum labore adduxerat , ipse ingredi non potuit . peccauit autem Moses ob perturbationem animi , quæ illi acciderat propter maledicta , & assiduos clamores ipsius populi .

Et perperam locutus est ]

Iussus enim fili-

cem alloqui , populum allocutus est , & ita quidem , ut uideretur dubitare , num aqua è saxo elicienda esset , quod tamen Deus ita futurum promiserat . Hæc historia scripta est in Num. Cap. XX.

Non disperdiderunt gentes ]

Hæc , & ea ,

quæ sequuntur , scripta sunt in libro Iudicum .

## ARGUMENTVM PSAL. CVII.

Hymnus pulcherrimus est , in quo celebrat prouidentiam Dei, summa iustitia, & misericordia res humanas administrantem .

### Psalmus CVII.

Confitemini Domino , quoniam bonus , quoniam in seculum misericordia eius .

Dicant , qui redempti sunt à Domino , quos red-

mit de manu inimici, & de regionibus congrega-  
uit eos

A solis ortu, & occasu, ab aquilone, & mari.

Qui errabant in solitudine, in deserto inuio, ne-  
que ciuitatem habitatam inueniebant,

Qui esuriebant, & sitiebant, quorum anima de-  
ficiat,

Hi clamauerunt ad Dominum, cum tribularen-  
tur, & de angustiis ipsorum eripuit eos,

Et deduxit eos in uiam rectam, ut irent in ciuita-  
tem habitationis.

Confiteantur Domino propter misericordias eius,  
& mirabilia eius filiis hominum.

Quia satiauit animam inanem, & animam esu-  
rientem satiauit bonis.

Qui sedebant in tenebris, & umbra mortis, uin-  
cti afflictione, & ferro,

Quia rebelles fuerunt sermonibus Dei, & consi-  
lium altissimi despexerunt,

Et ipse humiliavit in laboribus cor eorum, & cora-  
ruerunt, nec fuit, qui adiuuaret,

Hi clamauerunt ad Dominum, cum tribularen-  
tur, & de angustiis ipsorum liberauit eos,

Et eduxit eos de tenebris, & umbra mortis, &  
uincula eorum dirupit.

Confiteantur Domino propter misericordias eius,  
& mirabilia eius filiis hominum.

Quia contriuit portas arcas, et uectes ferreos con-  
fregit.

Stulti propter uiam iniquitatis sue, & propter in-

injustitias suas uexati fuerunt ,  
 Omnem escam abominata est anima eorum , &  
 appropinquauerunt usque ad portas mortis ,

Et clamauerunt ad Dominum , cum tribularen-  
 tur , & de angustiis ipsorum liberauit eos .

Misit uerbum suum , & sanauit eos , & eripuit  
 eos de interitionibus eorum .

Confiteantur Domino propter misericordias eius ,  
 & mirabilia eius filijs hominum .

Et sacrificent sacrificium laudis , & annuntient  
 opera eius in exultatione .

Qui descendunt in mare nauibus , facientes opera-  
 tionem in aquis multis ,

Ipsi uiderunt opera Domini , & mirabilia eius in  
 profundo ,

Dixit , & excitatur spiritus procellæ , & exaltan-  
 tur fluctus eius ,

Ascendunt usque ad cœlos , & descendunt usque  
 ad abyssos , anima eorum in malis tabescit .

Turbantur , & iactantur , sicut ebrius , & omnis  
 sapientia eorum absorbetur ,

Et clamauerunt ad Dominum , cum tribulareretur ,  
 & de angustiis ipsorum eduxit eos .

Et statuit procellam in tranquillitatem , & silue-  
 runt fluctus eius .

Et letati sunt , quia siluerunt , & deduxit eos in  
 portum uoluntatis eorum .

Confiteantur Domino propter misericordias eius ,  
 & mirabilia eius filijs hominum .

Et exaltent eum in ecclesia plebis , & in confessu se-



riorum laudent eum .

Posuit flumina in desertum , & exitus aquarum  
in sitim ,

Terram fructiferam in salsuginem propter mali-  
tiam inhabitantium in ea .

Posuit desertum in stagna aquarum , & terram  
sine aqua in exitus aquarum .

Et collocavit illic esurientes , & constituerunt ciui-  
tatem habitationis ,

Et seminauerunt agros , & plantauerunt vineas ,  
& fecerunt fructum , & prouentum ,

Et benedixit eis , & multiplicati sunt nimis , &  
iumenta eorum non minorauit ,

Et pauci facti sunt , & uexati sunt à sterilitate ,  
malo , & afflictione ,

Effusus est contemptus super principes , & errare  
fecit eos in solitudine inuia ,

Et subleuauit pauperem de inopia , & posuit sicut  
oues familias .

Videbunt recti , & letabuntur , & omnis iniqui-  
tas oppilabit os suum .

Quis sapiens , & obseruabit hæc & intelliget mi-  
sericordias Domini ?

#### EXPLANATIO.

Dicant , qui redempti sunt à Domino ]  
Qui misericordia Dei seruitute , & calamitatibus li-  
berati sunt , dicant hymnos sanctissimo numini eius .  
Quamuis uero hæc , & reliqua omnia , quæ hoc hym-  
no continentur , ad omnes mortales pertineant , sunt

tamen nonnulla, quæ præcipue beneficia Dei erga Iudeos designare uidentur.

Qui errabant in solitudine ] De misericordia Dei erga errantes in locis desertis.

Confiteantur Domino ] Id est, celebrent laudibus Deum propter infinitam benignitatem eius, & narrent mortalibus admirabilia facta illius. in hanc sententiam interpretatur hunc uersiculum paraphrasys Chaldaea.

Qui sedebant in tenebris ] De misericordia Dei erga eos, qui propter maleficia in carcerem, & uincula coniecti sunt.

Stulti propter uiam iniquitatis ] De misericordia Dei erga eos, qui propter delicta commissa in uarios morbos incidunt.

Qui descendunt in mare nauibus ] De misericordia Dei erga eos, qui tempestate, & fluctibus iactantur in alto.

Ascendunt usque ad coelos ] Hanc sententiam complexus est Virgilius his elegantissimis uersibus,

Tollimur in coelum curuato gurgite, & ijdem  
Subducta ad manes imos descendimus unda.

In portum uoluntatis eorum ] Id est, in portum, ad quem illi cursum tenere optabant.

Posuit flumina ] Canit, Deum arbitrato suo omnia immutare, ab eius prouidentia opes, & inopiam, sterilitatem, & fecunditatem, honores, & ignominiam manare.

Et pauci facti sunt ] Rursus (inquit) cum

eos, qui multitudine hominum, & potentia flore-  
bant, punire uoluerit ob admissa maleficia, immittit  
in eos sterilitatem, morbos, & angores animi, &  
optimates ipsos adeo contemptos reddit, & irrisos,  
ut relictis urbibus se se in solitudines abdant.

Et subleuauit pauperem ] Contra(inquit)  
inopem fortunis locupletat, domumq; eius liberis, &  
nepotibus frequentat.

Videbunt recti ] Homines pii, & religio-  
si hæc diligentissime considerant; cumq; persciciunt,  
nihil fortuito, & casu euenire, omnia diuino numi-  
ne regi, administrariq; , incredibili gaudio afficiun-  
tur, seq; totos misericordie Dei tradunt, & commit-  
tunt, improbi uero, & arrogantes, qui solent pro-  
uidentiam Dei negare, magnitudine rerum perterriz-  
ti, uel inuiti coguntur tacere, & linguam impiam  
continere.

Quis sapiens ] Utinam homines sapiant,  
& ea, quæ continentur hoc hymno, diligenter ani-  
maduertant, & notent: intelligent enim, Deum  
res humanas summa benignitate curare, deq; omni-  
bus, qui ad eius misericordiam confugiunt, optime  
mereri.

#### ARGVMENTVM PSAL. CVIII.

Hic psalmus compositus est fere ex psalmo LVII.  
& LX.

## Canticum, psalmus David CVIII.

Paratum cor meum Deus, paratum cor meum,  
cantabo, & psallam etiam gloria mea.

Exurge psalterium, & cithara, auroram ex-  
citabo,

Confitebor tibi in populis Domine, & psallam ti-  
bi in nationibus.

Quia magna est super cœlos misericordia tua, &  
usque ad nubes ueritas tua.

Exaltare super cœlos Deus, & super omnem ter-  
ram gloria tua, ut liberentur dilecti tui.

Saluum fac dextera tua, & exaudi me, Deus lo-  
cutus est in sanctuario suo.

Exultabo, & diuidam Sichem, & conuallem Suc-  
coth dimetiar.

Meus est Galaad, & meus est Manasses, &  
Ephraim fortitudo capitis mei.

Iuda legifer meus, Moab lebes lotionis meae,  
super Idumæam projiciam calceamentum meum,  
super Philistæa iubilabo.

Quis deducet me in ciuitatem munitam, quis de-  
ducet me usque in Idumæam?

Nonne tu Deus, qui repulisti nos? & non exhibis  
Deus cum exercitibus nostris?

Da nobis auxilium de tribulatione, quia uana sa-  
lus hominis.

In Deo faciemus uirtutem, & ipse ad nihilum de-  
ducet inimicos nostros.

## ARGVMENTVM PSAL. CIX.

Inuehitur in Doegum, & ceteros affeclas Saulis, ut multi existimant, & sub horum persona execratur impietatem Iudæ, qui CHRISTVM nefarie prodidit, & ceterorum, qui filiis Dei infesti sunt: deinde calamitates suas deplorans misericordiam Dei suppliciter inuocat.

## VICTORI, David psalmus CIX.

Deus laudis meæ ne tacueris, quia os peccatoris, & os dolosi super me apertum est.

Locuti sunt aduersum me lingua dolosa, & sermonibus odij circumdederunt me, & oppugnaverunt me sine causa.

Pro eo, quod eos diligebam, aduersabantur mihi, ego autem orabam.

Et retribuerunt mihi mala pro bonis, & odium pro dilectione mea.

Constitue super eum peccatorem, & aduersarius stet à dextris eius.

Cum iudicatur, exeat condemnatus, & oratio eius fiat in peccatum.

Fiant dies eius pauci, & præsecluram eius accipiat alter.

Fiant filij eius orphani, & uxor eius uidua.  
 Instabiles uagentur filij eius, & mendicent, & quærant ex uastatis habitationibus suis.

Illaqueet foenerator omnem substantiam eius, &

diripiant alieni labores eius .

Non sit illi adiutor , nec sit , qui misereatur pupil-  
lis eius ,

Posteritas eius intreat , in generatione una delea-  
tur nomen eius .

In memoriam redeat iniquitas patrum eius in con-  
spectu Domini , & peccatum matris eius non de-  
leatur ,

Sint coram Domino semper , & dispareat de ter-  
ra memoria eorum pro eo , quod non est recordatus  
facere misericordiam ,

Et persecutus est hominem inopem , & mendicum ,  
& contritum corde , ut illum interficeret ,

Et dilexit maledictionem , & ueniet ei , & noluit  
benedictionem , & elongabitur ab eo ,

Et induit maledictionem sicut uestimentum , &  
intrauit sicut aqua in interiora eius , & sicut oleum  
in ossa eius ,

Fiat ei sicut uestimentum , quo operitur , & sicut  
zona , qua semper cingitur .

Hoc opus aduersantium mihi a Domino , & eo-  
rum , qui loquuntur mala aduersus animam meam .

Tu autem Domine Deus fac mecum propter no-  
men tuum , quia bona est misericordia tua .

Libera me , quia egenus , & pauper ego sum ,  
& cor meum conturbatum est intra me .

Sicut umbra cum declinat , ego pertransseo , &  
excussus sum sicut locusta .

Genua mea infirmata sunt propter ieiunium , &  
caro mea exaruit pinguedine ( consumpta )

Et ego factus sum opprobrium illis, uiderunt me,  
& mouerunt capita sua.

Adiuua me Domine Deus meus, saluum me fac  
secundum misericordiam tuam:

Et sciant, quod manus tua hæc, & tu Domine  
fecisti hoc.

Maledicant illi, & tu benedicas, insurgant, &  
confundantur, seruus autem tuus latetur.

Induantur aduersarij mei ignominia, & operian-  
tur tanquam diploide confusione sua.

Confitebor Domino nimis in ore meo, & in medio  
multorum laudabo eum.

Quia adstabit à dexteris pauperis, ut saluam faci-  
at à iudicantibus animam eius.

## EXPLANATIO.

Deus laudis meæ ] Deus, à quo tanquam  
uberrimo fonte manat omnis mea laus, & gloria,  
& quicquid boni habeo, ne quæso dissimula, ne ue-  
permitte, homines sceleratos impune in me debaccha-  
ri. quid uero, si Deum eo appellet Deum laudis suæ,  
quia omne studium suum ponebat in laudibus eius ce-  
lebrandis? hinc illud in psalmo LXXI, de te laus  
mea semper.

Ego autem orabam ] Id est, ego autem  
pro illorum salute me deprecatores apud te præbe-  
bam. uel sic, ego uero undique oppugnatus ad te  
Domine confugiebam.

Et aduersarius stet à dextris eius ] Id est,  
qui meam innocentiam tanto odio persequitur, hæc

# EXPLANATIO

beat & ipse aduersarium, qui nunquam ab eius late  
re discedat, qui semper eum oppugnet, & omni acer  
bitate exagitet.

Et oratio eius fiat in peccatum ] Id est,  
deprecatione sua potius augeat peccata, quam pecca-  
torum supplicium à se deprecetur.

Et quærant ex uastatis habitationibus suis ]  
Id est, mendicitas eos exire cogat ex ædibus euersis,  
& exinanitis ad quærendum uictum.

Sint coràm Domino semper ] Peccata ma-  
tris suæ, & maiorum suorum semper ante oculos  
Dei uersentur, ne illa in hoc sceleratissimo, atque im-  
pio homine uindicare obliuiscatur. Hoc ait memor il-  
lius sententiæ, ego sum Dominus Deus tuus fortis, Ze-  
lores, uisitans iniquitatem patrum in filios in tertiam,  
& quartam generationem eorum, qui oderunt me,  
& faciens misericordiam in millia ijs, qui diligunt  
me, & custodiunt præcepta mea.

Et dilexit maledictionem ] Significat his  
uerbis, aduersarium suum usque eò studiosum fuisse  
crudelitatis, & omnium scelerum, ut uideretur opta-  
re execrationem, & odium Dei.

Hoc opus aduersantium mihi à Domino ]  
Quidam clarius uerterunt ad hunc modum, hæc sit  
merces à Domino ijs, qui aduersantur mihi.

Sicut umbra ] Euanesco (inquit) ad si-  
militudinem umbræ, quæ unà cum die se se inclinat,  
& in tenebras noctis euanescit.

Et excussus sum sicut locusta ] Id est, ita  
excuior, & ab inimicis exagitor, & uagam uitam



persequi cogor, ut locustæ comparari possim, quæ  
nunquam ferè quiescit.

Genua mea infirmata ] Significat, se de-  
ditum fuisse ieiunijs, & precationibus, ut misericor-  
diam Dei sibi conciliaret in tantis calamitatibus.

Et caro mea exaruit pinguedine consumpta ]  
Sic emendauimus hunc locum secuti explanatores He-  
bræos.

Et sciant, quod manus tua hæc ] Fac,  
tam illustre sit auxilium tuum, ut omnes perspiciant,  
me non humanis opibus liberatum esse, sed potentia  
numinis tui. Alij sic explanant, fac, intelligant ad-  
uersarij mei, me non uiribus suis oppressum fuisse,  
sed omnia mihi tuo consilio accidisse, quippe qui uo-  
lueris animum meum tanquam durum rerum aduer-  
sarum igne purgare.

Vt saluam faciat à iudicantibus ] Ita uo-  
cat Saulem, & eius affeclas: indices enim appellare  
solet hebræa lingua principes, & gubernatores ciui-  
tatum.

#### ARGVMENTVM PSAL. CX.

Predictio est de ortu, & nece CHRISTI,  
deq; illius regno, & sacerdotio sempiterno.

Dauid, psalmus CX.

Dixit Dominus Domino meo, sede à dextris meis,  
Donec ponam inimicos tuos scabellum pedum tuo-  
rum.

## E X P L A N A T I O

Virgam uirtutis tuæ emittet Dominus ex Sion, dominare in medio inimicorum tuorum.

Populus tuus (aderit) uoluntarius in die uirtutis tuæ, in splendoribus sanctitatis, ab utero auroræ tibi ros generationis tuæ.

Iurauit Dominus, & non pœnitebit eum, tu es sacerdos in æternum secundum ordinem Melchisedec.

Dominus à dextris tuis, confringet in die iræ suæ reges.

Iudicabit in gentibus, implebit (omnia) cadaueribus, percutiet caput super terram multam.

De torréte in uia bibet, propterea exaltabit caput.

## E X P L A N A T I O.

Dixit Dominus Domino meo ] Dixit (inquit) pater ille cœlestis C H R I S T O Domino meo, sede ad dexteram meam. Hoc autem perfectum fuit, cum I E S V S ascendit cœlum, ut testatur diuus Petrus in actis Apostolorum.

Sede à dextris meis ] Id est, constituo te supra omnem principatum, & potestatem, & uirtutem, & dominationem, & omne nomen, quod nominatur non solum in hoc seculo, sed etiam in futuro, & omnia subycio pedibus tuis, teq; do caput supra omnem ecclesiam, quæ est corpus tuum, & plenitudo tua. His uerbis explanat hunc locum diuus Paulus in epistola ad Ephesios scripta.

Donec ponam inimicos tuos ] Significat, Diabolum, mortem, atque impios tandem fronditus euertendos, atque omnia peccata è regno C H R I

S T I

STI radicitus extirpanda . Hoc autem perficietur , cum tempus illud nouissimum uenerit , quo tempore mortui omnium seculorum reuiuiscunt , & qui iuste cum pietate , ac temperantia uixerunt , unda cum corporibus penetrabunt in cœli regiones , ubi beati æuo sempiterno fruuntur , ceteri omnes unda cum Diabolo , & angelis eius relegabuntur in tartara , ubi nullus suppliciorum , & miseriarum modus erit , aut finis .

Virgam uirtutis tue ] Significat , imperium CHRISTI ex Hierosolymis , ubi ortum est , in omnes terras propagandum .

Dominare in medio inimicorum tuorum ] Non'ne CHRISTVS dominari cœpit inter hostes suos , cum primum spiritum sanctum è cœlo demisit ad apostolos die festo pentecostes ? quo die subegit imperio suo tria millia Iudeorū , & cum in dies magis augetur uis , & numerus hostium , non'ne tanto illustrius , ac magnificentius propagabatur eius dominatio ?

Populus tuus aderit uoluntarius ] Populus ( inquit ) tuus non inuitus , & coactus , sed summa uoluntate parebit imperio tuo , ut si pro nomine , & gloria tua sint omnes cruciatus perferendi , ac mors millies oppetenda , id pulcherrimi muneris loco ducant , seq; tum proxime ad uitam beatam accedere arbitrentur . quo quidem tempore uim , & potetiam , & splendidissimam lucem sanctitatis ; & diuinitatis tuæ declarabis superstitione delenda , & omnibus gentibus ad pietatem , & cultum ueri Dei perducendis . Sed illud , in splendoribus sanctitatis , commodè re-

# EXPLANATIO

ferri potest etiam ad ipsum populum, quem uates præuidebat fore illustrem moribus, & pietate.

Ab utero auroræ tibi ros generationis tuæ ]  
 Hæc duo pium quæque scire uolumus, primum in uersiculo hebræo nullam luciferi mentionem fieri, deinde, cum alij aliter ipsum uertant, nos eam interpretationem secutos esse, quæ ab eius linguae peritissimis optima iudicatur, & sententiam sanctitatis plenissimam continet, si quidē illa castissimus. CHRISTI conceptus, atque ortus ex uirgine tam apte, tamq; concinne describitur, ut nihil fieri possit elegantius: ut enim terrenus uapor uel coelesti in sublime fertur, atque ibi sub auroram concretus cogitur in rorem, qui decedens terram uberem, letamq; efficit, ita purissimus sanguis Mariæ uel spiritus sancti in uterum influens, sine ullo uirili satru concreuit in corpus Domini nostri IESU CHRISTI, qui in lucem editus, & susceptus humanum genus mirabiliter exhilarauit, atque omni genere uirtutum maxime ferox, & fecundum reddidit. His rationibus inductus, opinor, Esaias eundem conceptum, atque ortum etiam ipse rori comparat dicens; Rorate cœli de super, & nubes pluant iustum. Nos uero eo libentius hanc explanationem amplectimur, quod D. Augustinus, licet ipse hunc uersum aliter interpretetur, non tamen improbat, si quis partum uirginis eo prædictum intelligat. quin etiam uerba editionis uulgatæ ad hanc sententiam accommodare conatur. sed quoniam, quod attinet ad proprietatem uerborum, non minus fideliter ex Hebræo sic reddi potest, Ab utero

aurora tibi ros iuuentutis tuæ, propterea nonnulli sententiam horum uerborum cum superiore parte uersiculi ita coniungunt, ut sensus sit, tam magnum fore numerum mortalium, qui libentissimis animis religionem, & disciplinam CHRISTI amplexbuntur, ut comparari queant cum multitudine, & copia roris, quem fecundissima gignit aurora. Verum explanatio hæc meo iudicio cum altera nullo modo conferenda est.

Iurauit Dominus ] Ostendit CHRISTVS non tantum regno, sed etiam sacerdotio prædicitum esse, quod sempiternum fore, Deus iurauerit: iurauit autem propter nos: tanta est enim imbecillitas animi nostri, procliuitasq; ad diffidendum, ut difficillime inducamur ad credendum, filium Dei nostrum esse pontificem: itaque Deus, cum rem tam præclaram, tamq; salutarem nobis promitteret, ad maiorem fidem faciendam promissionem ipsam iure iurando firmavit.

Tu es sacerdos in æternum secundum ordinẽ Melchisedec ] Vt. n. Melchisedecus & regnũ administrabat, & sacerdotium, ita CHRISTVS est noster pontifex, & rex. sacerdotis autẽ proprium est, primum religione sancta, & scientia rerum salutarium populum imbuere, deinde peccata illius donis, & sacrificijs expiare, tum Deum pro salute, & incolumitate eiusdem continenter deprecari. ad regẽ autem pertinet ea gubernandi ratio, quæ legibus, atque armis salutem, & pacem eorum tueatur, & conseruet, qui se, ac sua omnia in tutelam ipsius tra-

# E X P L A N A T I O

didere. Hæc autem officia, & munera sunt CHRIS-  
T I ita propria, ut in eo solo ex cunctis sacerdoti-  
bus, & regibus, qui unquam optimi fuerunt, per-  
fecta, & omnibus suis numeris, & partibus exple-  
ta reperiantur. Ille enim primus mysteria maxima  
rerum sanctissimarum nobis aperuit, & cognitio-  
nem, ac cultum ueri Dei per uniuersas terrarum oras  
longe, lateq; propagauit. ille peccata nostra sacrificio  
sui corporis, & purissimi sanguinis effusione expia-  
uit. ille sedens ad dexteram Dei ab illo pacem, &  
ueniam, & omnia bona nobis precari nunquam in-  
termittit. idem suo spiritu nos amantissime regit,  
& gubernat, mentem, atque animum ingenti amo-  
re in Deum, resq; diuinas inflammans. idem uaden-  
tes per has uias uitæ difficiles, & periculosas tuetur  
ab insidijs, & impetu Diaboli, qui nos odio, & bel-  
lo persequitur sempiterno. idem suorum omnium cõ-  
stantiam ita corroborat, & confirmat, ut nulla uis  
calamitatum, aut periculorum illos de uia pietatis de-  
pellere possit. sed hunc uersiculum magnis mysterijs  
refertum magna uerborum, & sententiarum copia  
diuus Paulus explicat in epistola ad Hebræos scripta,  
ad quam ego te reijcio.

Dominus à dextris ] Dominus (inquit)  
semper ad latus tuum adhærebit pro te fortissime pro-  
pugnans, & reges potentissimos tui nominis hostes  
funditus euertet, suppliciumq; sumet de gentibus, quæ  
imperium tuum repudiarint. itaque omnia plena  
erunt cadaueribus caesorum. Has autem calamitates  
primi percepere Iudæi non ita multo post acerbissi-

mān necem CHRISTI.

Percutiet caput super terram multam ]  
His uerbis quidam significari putant excisionem impe-  
rii Romani, quod fuit caput omnium penē terrarum,  
sed non minus Turcarum, & Antichristi regnum de  
signari uidetur.

De torrente in uia bibet ] Nonnulli He-  
braeos secuti existimant, uatem intelligere, tam ma-  
gnam fore hostium cadem, ut cruor quasi torrens  
per uias feratur. quod uero ait, regem ex eo torren-  
te bibiturum, hanc dicunt esse descriptionem plenae ui-  
ctoriae, quaeq; feliciter, & planē ex sententia contige-  
rit: atque ad hanc sententiam comprobendam Mo-  
sem quasi testem citant, apud quem Balaamus ita lo-  
quitur in Numeris, Ecce populus ut leona consurget,  
& quasi leo erigetur, non accubabit, donec deuoret  
praedam, & occisorum sanguinem bibat. Nobis ue-  
ro haec explanatio parum probabilis uidetur: nam  
quod attinet ad uerba Moſis, quis non uideat, pota-  
tionem sanguinis ad leonem, cuius similitudo induci-  
tur, referendam esse? itaque ad intelligentiam huius  
uersiculi haec scire necesse est, in literis sanctis bibendi  
nomen dolorum, & poenarum perpeſſionem, aquas  
poenas ipsas, & calamitates, uiam uitam hanc mor-  
talem, & caducam significare: de quibus rebus in  
alijs locis huius libri explicatum est. itaque uates san-  
ctus cum dicere uellet, CHRISTI uitam usque  
ad extremum spiritum maxime afflictam, & cala-  
mitosam fore, illum dixit è torrente potaturum, tor-  
rentis uerbo utens ad significandam uim, & magni-

tudinem erumnarum , quas ille pro nobis exhausit : qui enim omnia peccata omnium mortalium pro suis proprijs agnouit ; eorumq; poenas pertulit , is , necesse fuit , ut tales , ac tantos dolores , & cruciatus sustineret , quales , & quantos nemo unquam neque uerbis assequi , neque animo possit comprehendere . subiungit autem , C H R I S T V M propterea sublaturum caput , quoniam praeuidebat , illum per has erumnas , & acerbitates ad potentiam , & regnum sempiternum , quod supra descriptum est , esse peruenturum . Hoc est , quod diuus Petrus in prima epistola dicit , spiritum C H R I S T I uatibus antiquis praesignificasse ipsius C H R I S T I afflictiones , & gloriam , quae illas secutura erat . quae quidem omnia iampridem perfecta esse , exploratissimum habemus , & Iudaeorum cecitatem miseramur , qui C H R I S T V M adhuc expectant , illumq; opibus , & copijs , rerumq; bellicarum gloria imperium sibi comparaturum putant . sed libet hunc uersiculum D. Pauli uerbis explanare . Is in epistola , quam scribit ad Philipenses , quasi mysterium , quod latet sub obscuritate horum uerborum , nobis aperire uelit , haec ponit . Is sensus sit in uobis , qui fuit etiam in C H R I S T O I E S V , qui cum in forma Dei esset , non rapinam arbitratus est , esse se aequale Deo , sed exinaniuit semet ipsum forma serui sumpta , in similitudine hominum constitutus , & habitum inuentus ut homo humiliauit semet ipsum , factus obediens usque ad mortem , mortem autem crucis , propter quod & Deus illum in summam extulit sublimi



tatem, & donauit ei nomen, quod est supra omne nomen, ut in nomine IESV omne genus flectatur coelestium, & terrestrium, & infernorum, & omnis lingua confiteatur, quod dominus sit IESVS CHRISTVS, ad gloriam Dei patris.

# ARGVMENTVM PSAL. CXI.

Hymnus est, in quo praeedicat sapientiam, & misericordiam Dei, qua ille praecipue usus est erga gentem Hebraeam.

## Alleluia, psalmus CXI.

Confitebor tibi Domine in toto corde meo, in consilio iustorum & congregatione.

Magna opera Domini; exquisita ad omnes voluntates eorum.

Gloria, & magnificentia opus eius, & iustitia eius manet in seculum seculi.

Memoriam fecit mirabilium suorum misericors, & miserator Dominus, escam dedit timentibus se.

Memor erit in seculum testamenti sui, uirtutem operum suorum annuntiabit populo suo,

Cum daret illis hereditatem gentium, opera manuum eius ueritas, & iudicium.

Fidelia omnia mandata eius, confirmata in seculum seculi, facta in ueritate, & equitate.

Redemptionem misit Dominus populo suo, mandauit in aeternum testamentum suum.

Sanctum, & terribile nomen eius, initium san-

## E X P L A N A T I O

*pientiae est timor Domini .*

*Intellectus bonus omnibus facientibus ea , laudatio eius manet in seculum seculi .*

## E X P L A N A T I O .

*Magna opera Domini* ] *Significare uide-*  
*tur , opera Dei tam exquisite facta , tamq̃; omnibus*  
 *suis numeris esse perfecta , ut homines iusti , & pii*  
 *nihil in ijs desiderare queant . Sed hic uersiculus apud*  
 *Hebræos est obscurus , illumq̃; alij aliter uertunt .*

*Gloria , & magnificentia* ] *Id est , quic-*  
 *quid agit Dominus , plenum est gloria , & magnifi-*  
 *centia , ac omnes mortales incitat ad celebrandam sa-*  
 *pientiam , & misericordiam ipsius .*

*Memoriam fecit* ] *Tam (inquit) illustrat̃ ,*  
 *& mirabilia sunt ea , quæ gessit Dominus , ut nulla*  
 *temporum longinquitate possit intercidere memoria*  
 *eorum . Videtur tamen loqui præcipue de beneficijs ,*  
 *quibus ille gentem hebræam affecerat , quam etiam*  
 *aluit in Aegypto in maxima caritate annonæ , & in*  
 *solitudine XL annos coelesti cibo sustentauit .*

*Memor erit* ] *Nunquam obliuiscetur Deus*  
 *fœderis , quod fecit cum Abrahamo , & posteris eius ,*  
 *quibus iam illo tempore declarauit magnitudinem ,*  
 *& præstantiam potentiae , & misericordiae suæ , cum*  
 *ipsos Aegyptiorum seruitute liberatos in uberrimis*  
 *agris Cananæorum collocauit .*

*Opera manuum eius* ] *Quicquid agit Do-*  
 *minus , est plenum fide , & æquitate : quicquid item*  
 *agendum præcepit , æquum , & iustum est , tamq̃;*

fixum, & immobile, ut nulla ratione possit anti-  
quari.

Redemptionem misit ] Eripuit Dominus  
gentem suam è durissima seruitute Aegyptiorum, sed  
ea lege, ut illa seruaret in perpetuum fœdus, quod  
cum ipsa fecerat, & summa diligentia caueret, ne  
sanctissimas leges uiolaret. quod sane omni studio ob-  
seruandum est: nam Dei nomen sanctum, & terri-  
bile est, & sapientiæ caput est plena sanctitatis reli-  
gio, & pietas aduersus Deum. itaque qui præcepta  
Domini diligenter obseruant, ij uere sapiunt, & pru-  
dentia saluari præditi sunt, eorumq; laus, & glo-  
ria nunquam intermoriatur: laudantur enim ij à  
Deo Opt. Max. & sempiternis honoribus afficiuntur.

#### ARGVMENTVM PSAL. CXII.

Exponit, quàm beati sunt, qui Deum colunt, eiusq;  
benignitatem, & misericordiam imitantur.

#### Alleluia. Psalmus CXII.

Beatus uir, qui timet Dominum, in mandatis eius  
uolet ualde.

Potens in terra erit semen eius, generatio recto-  
rum benedicetur.

Abundantia, & diuitiæ in domo eius, & iusti-  
tia eius manet in seculum seculi.

Exortum est in tenebris lumen rectis misericors,  
& miserator, & iustus.

Vir bonus miseretur, & commodat, disponet ser-

## E X P L A N A T I O

mones suos in iudicio, quia in æternum non commouebitur.

In memoria æterna erit iustus, ab auditione mali non timebit.

Quoniam firmum est cor eius speras in Domino; confirmatum est cor eius; non commouebitur, donec (ultionem) uideat in inimicis suis.

Dispersit, dedit pauperibus, iustitia eius manet in seculum seculi, cornu eius exaltabitur in gloria.

Peccator uidebit, & irascetur, dentibus suis fremet, & tabescet, desiderium peccatorum peribit.

## E X P L A N A T I O.

Beatus uir, qui timet Dominum ] **¶** Timor Domini, quemadmodum alijs locis admonuimus, appellatur in literis sanctis pura, & sincera religio, & pietas aduersus Deum: in quibus rebus uir sanctus uitam beatam rite constituit. quisquis autem uere pius, & religiosus est, in mandatis eius uolet ualde, id est, meditatione legum diuinarum uehementer delectatur, neque illarum obseruatione quicquam habet antiquius.

Et iustitia eius manet in seculum seculi ] **¶** Nam cum migrantem e corpore sequitur in coelum.

Exortum est in tenebris ] **¶** Deus (inquit) misericors, & clemens, & iustus lucem præbet hominibus pejs, dum alij in tenebris iacent. tenebras autem uocat res aduersas, lucem contra appellat securitatem, & uitæ prosperitatem.

Vir bonus miseretur, & commodat ] **¶** Id est, liberalis est, & maxime propensus ad homi-

nes iuuandos, & benigne faciendum indigentibus, opera, pecunia, consilio.

Disponet sermones suos in iudicio ] Hoc est, nihil temere, aut inaniter effutit, neque lingua sine præcurrere cogitationem, sed rei, loci, & temporis magnam rationem habet, ut quicquid loquitur, uerum, rectum, atque audienti fructuosum, & salutare sit. illud autem scire oportet, uocabulum Hebræum, tametsi proprie uerbum significat, sæpissime tamen pro re ipsa usurpari. itaq; Symmachus uertit hoc modo, dispensabit res suas cum iudicio. quæ quidem uerba sententiam significant cum ea, quæ proxime antecedit, optime coherentem: est enim sensus, uirum bonum esse illum quidem, beneficium, & liberalem, deq; re sua familiari libenter egentibus impartiri, sed iudicium in dando, & prudentiam adhibere, omniaq; recte, atque ordine administrare: ita hunc locum explanat etiam Chimis.

In æternum nō commouebitur ] Viri enim sancti nullis rerum aduersariū fulminibus terrentur, nullis oppugnationibus improborum hominum franguntur, aut debilitantur: persuasum enim habent, bonis nihil mali euenire posse, nec uiuis, nec mortuis: itaq; nullius rei aduersæ auditione d' latiticia, & tranquillitate animi depelli queunt.

#### ARGVMENTVM PSAL. CXIII.

Hortatur ad hymnos canendos Deo, prædicans eius potentiam, & providentiam misericordiæ plenam.

# EXPLANATIO

Alleluja, Psalmus CXIII.

Laudate serui Domini laudate nomen Domini.

Sit. nomen Domini benedictum ex hoc nunc, & usque in seculum.

A solis ortu usque ad occasum laudabile nomen Domini.

Excelsus super omnes gentes Dominus, & super coelos gloria eius.

Quis sicut Dominus Deus noster, qui in altis habitat, & demittit se ut aspiciat (omnia) in coelo, & in terra?

Suscitans à terra inopem, & de stercore erigens pauperem,

Ut collocet eum cum principibus, cum principibus populi sui.

Qui habitare facit sterilem in domo matrem filiorum letantem.

## EXPLANATIO.

Quis sicut Dominus ] Quamuis (inquit) maiestas Dei rebus omnibus in immensum excellat, nihil est tamen in uniuerso tam paruum, & humile, quò se non demittat prouidentia eius. quod cum ita sit, uitam sic colere debemus, tanquam ille omnibus nostris cogitationibus, uerbis, & actionibus intersit. re enim uera Deus omnia uidet, omnia audit, atque omnium mentes, ac intimos animorum sensus introspicit, licet plerisque ex ijs, qui falso sapientiae nomine

gloriantur, secus uideatur. quòd uero ait, Deum se demittere, ut cœlestia cernat, hoc intelligi uult, ipsum mentibus quoque cœlestibus infinita altitudine celsiorem esse.

Suscitans à terra inopem ] Hanc beneficentiam Dei expertus erat ipse Dauid, qui ex infimo loco perductus fuerat ad altissimum regie dignitatis gradum.

Qui habitare facit sterilem ] Id est, qui sua misericordia facit, ut quæ adhuc sterilis fuerat, domum habeat, id est familiam, & facta fecunda iucunditate liberorum oblectetur. cui rei testimonio sunt Sara, Rebecca, Anna, atque aliæ multæ foeminae pudicitia, & sanctitate illustres.

## ARGVMENTVM PSAL.

CXIIII.

Hymnus est elegantissimus, in quo celebrat prodigia, quæ Deus edidit, cum Hebræos ab Aegypto traduceret in regna Cananæorum.

Alleluia, Psalmus CXIIII.

Cum exiret Israel de Aegypto, domus Iacob de populo barbaro,

Factus est Iuda sanctificatio eius, Israel potestas eius.

Mare uidit, & fugit, Iordanis conuersus est retrorsum,

Montes subsilierunt ut arietes, & colles sicut agni

# EXPLANATIO VI

Quid est tibi mare, quodd fugisti? Et tu Iordanis,  
quodd conuersus es retrorsum?

Montes cur subsilistis sicut arietes, Et colles sicut  
agni ouium?

A facie Domini mota est terra, a facie Dei Iacob.

Qui conuertit petram in stagna aquarum; Et si-  
licem in fontes aquarum.

## EXPLANATIO.

Factus est Iuda sanctificatio eius Id est,  
tunc precipue Deus Hebræos sibi asciuit, quos præ cæ-  
teris gentibus charissimos haberet, Et suo sancto nu-  
mine gubernaret. de qua re illud est in Exodo, Vos  
eritis mihi in regnum sacerdotale, Et gens sancta.

Montes subsilierunt Id est, Sine, Et uicinarum  
montium conquassationem, quæ acciderat, cum Deus  
eò descenderet ad leges ferendas, comparat arietibus,  
Et agnis exultim ludentibus.

## ARGUMENTVM PSAL. CXV.

Precatur Deum, ut defendat iniurias gentis suæ,  
quam impie nationes inuaservant, ut appareat,  
ipsum esse uerum Deum, cæterorum autem  
Deos esse fictos, Et commentitios.

## Psalmus CXV.

Non nobis Domine, non nobis, sed nomini tuo da  
gloriam.



Propter misericordiam tuam, & ueritatē tuam,  
quare dicant gentes, ubi est nunc Deus eorum?

Deus autem noster in cœlo, omnia, quæcunque  
uoluit, fecit.

Simulacra gentium argentum, & aurum, ope-  
ra manuum hominum.

Os habent, & non loquentur, oculos habent, &  
non uidebunt.

Aures habent, & non audient; nares habent, &  
non odorabunt.

Manus habent, & non palpabunt, pedes habent,  
& non ambulabunt, non loquentur in guttore suo.

Similes illis fiant, qui faciunt ea, & omnes, qui  
confidunt in eis.

Domus Israel speret in Domino, adiutor eorum,  
& protector eorum est.

Domus Aaron speret in Domino, adiutor eorum,  
& protector eorum est.

Qui timent Dominum, sperent in Domino, ad-  
iutor eorum, & protector eorum est.

Dominus memor erit nostri, & benedicat nobis.

Benedicet domui Israel, benedicet domui Aaron.

Benedicet omnibus, qui timent Dominum, pusil-  
lis, & maioribus.

Adijciat Dominus super uos, super uos, & super  
filios uestros.

Benedicti uos à Domino, qui fecit cœlū, & terrā.

Cœli, cœli Domino, terram autem dedit filiis ho-  
minum.

Non mortui laudabunt te Domine, neque omnes,

## E X P L A N A T I O

qui descendunt in silentium.

Sed nos benedicemus Domino ex hoc nūc & usque  
in seculum . Allcluya .

## E X P L A N A T I O .

Non nobis Domine ] Non gloriæ nostræ cau-  
sa uictoriam à te precamur, inquit, sed ne sanctissimū  
nomen tuum ludibrio sit gentibus impijs . itaq; serua  
nos Domine pro tua benignitate, & fide, quam de-  
disti, te fore semper Deum nostrum .

Domus Israel speret in Domino ] Confidit  
impie gentes simulacris suis, tu gens Hebræa omnem  
tuam spem repone in Domino; ipse enim præsto est  
ijs, qui confugiunt ad eum, illosq; ab omni periculo  
incolumes seruat .

Adiciet Dominus super uos ] Id est, auge-  
bit in dies magis, ac magis beneficentiam suam erga  
uos, & posteros uestros: uos enim præter alias natio-  
nes grati estis Domino .

Cœli, cœli Domino ] Cœlum, cœlum in-  
quam Dominus sibi uendicauit, terras autem dedit  
habitandas hominibus, à quibus inuiolate coleretur,  
& perpetuis hymnis, & honoribus afficeretur. quòd  
si Domine permittis, gentem tuam ab impijs nationi-  
bus deleri, quis prædicabit laudes tuas? quis te pie,  
sancteq; uenerabitur? num hostes, qui sanctissimum  
nomen tuum nefarie execrantur? num mortui? at  
ij gloriā tuam in terris celebrare qui possint? itaq;  
nos Domine posterosq; nostros saluos, & incolumes  
conserua, non nostri quidem, sed tui nominis causa,  
ut semper

ut semper aliqua gens sit, quæ tuo sanctissimo numini preces, cultus, honores adhibeat.

## ARGVMENTVM PSAL. CXVI.

Vir sanctus liberatus maximo periculo gratias agit Deo, cuius benignitate salutem retinuerat.

## Psalmus CXVI.

Dilexi, quoniam exaudiet Dominus uocem orationis meæ.

Quia inclinauit aurem suam mihi, & in diebus meis inuocabo.

Circumdederant me funes mortis, & angustie inferni inuenerant me.

Tribulationem & dolorem inueneram, & nomen Domini inuocaui.

Obsecro Domine libera animam meam, misericors Dominus & iustus, & Deus noster miseretur.

Custodit paruulos Dominus, miser eram, & saluauit me.

Conuertere anima mea ad requiem tuam, quia Dominus benefecit tibi.

Quia eripuit animam meam de morte, oculos meos à lacrimis, pedes meos à lapsu.

Ambulabo coram Domino in regione uiuorum.

Credidi, propter quod locutus sum, ego autem afflictus eram nimis.

Ego dixi in præcipiti fuga mea, omnis homo mendax.

## E X P L A N A T I O

Quid retribuam Domino pro omnibus, quæ retribuit mihi?

Calicem saluationum accipiam, & nomen Domini inuocabo.

Vota mea Domino reddam coram omni populo eius, pretiosa in conspectu Domini mors sanctorum eius.

O Domine quia ego seruus tuus, ego seruus tuus, & filius ancillæ tuæ.

Dirupisti uincula mea, tibi sacrificabo hostiã laudis, & nomen Domini inuocabo.

Vota mea nunc Domino reddam in conspectu omnis populi eius, in atrijs domus Domini, in medio tui Hierusalem. Alleluia.

## E X P L A N A T I O.

Dilexi quoniam ] Omnem amorem meum in Domino fixi, & locaui: ille enim nunquam repudiatur preces meas, semper attentas aures præbet rogationibus meis. itaque quandiu uiuam, ad eum solum confugiam, solam ipsius opem, & misericordiam implorabo.

Misericors Dominus ] Qui preces miserorum benignus exaudit, iustus Dominus, qui non sinie innocentes opprimi, custodiens paruulos Dominus, id est simplices, qui, ut pueri parentum curæ, sic ipsi tutelæ Dei se, ac sua omnia committunt.

Pedes meos a lapsu ] Significat his uerbis omnis incommodi uitiationem. Sed hic uersus unicuique pio maxime conuenit: etenim omnes miseri, &

calamitosi nascimur : nam quæ maior calamitas esse potest , quàm Deum habere iratum ? at ille amore CHRISTI sui nos non solum odisse desinit , sed etiam maximis beneficijs ornat , liberans animos nostros à morte , in qua perpetuo mansuri erant ; oculos à lacrimis , ne amplius defleant damnationem suam ; pedes à lapsu , ne grauiore aliquo casu denuo præcipitent in mortem . Eripit autem Deus animos nostros è manifesto exitio , cum pœnitentibus omnia peccata cōdonat , unde incredibilis lætitia , lacrimarumq; finis existit . liberat autem pedes nostros à lapsu , cum suū Spiritum sanctum nobiscum communicat , qui vires animi sic corroboret , ut stadium præceptorum suorū sine ulla periculosa offensione curramus .

Ambulabo corā Domino ] Ambulare corā Deo , ut alio loco diximus , est pie , sancteq; uiuere , & Deum semper ante oculos habere . diximus item , terram uiuentium appellari terras ipsas , in quibus hæc uita degitur . Significat igitur , se adhuc uitam retenturum cōtra existimationem inimicorum , & omne studium in colendo , & contemplando Deo positurum .

Credidi propter quod ] Credo (inquit) & certissimam fidem adhibeo promissionibus Dei , propterea summa cum fiducia loquor . quin etiam cum in maximis angustijs uersarer , & fugerem præcepta aduersarios mihi iam , iamq; imminentes , dicebam tamen , mentiuntur quidem omnes homines , sed Deus certe mentiri non potest , itaque illè me incolumem conseruabit , & hostibus de medio sublatis in regia di-

# EXPLANATIO

gnitate constituet. Quam igitur gratiam referam Domino, qui mihi salutem attulit, & me, ac familiam meam tantis beneficiis ornavit?

Calicem saluationum accipiam. Solebant sacra celebrare conuiuia, cum gratias agerent Deo, periculo aliquo maiore liberati. itaque significat his uerbis, se eiusmodi conuiuium ornaturum, & apparaturum, in quo nomen Domini inuocans poculum saluis accipiet, poculum inquam gratiarum actionis pro uita, & salute conseruata beneficio Dei. Sic Hebraei quique doctissimi hunc locum explanant.

Pretiosa in conspectu Domini. Magno (inquit) aestimat Dominus mortem piorum, itaque non facile permittit, eos ab impijs necari: id quod ego iam sepiissime expertus sum.

## ARGVMENTVM PSAL.

### CXVII.

Hortatur uniuersos mortales, ad gratias agendas Deo pro misericordia, quam adhibuit in eorum calamitatibus misso filio suo, qui eos erroribus inextricabilibus implicatos ad uiam ueritatis reuocaret, ac beatos faceret immortalitate donata.

### Psalmus CXVII.

Laudate Dominum omnes gentes, laudate eum omnes populi,

Quoniam multiplicata est super nos misericordia eius, & ueritas Domini manet in aeternum.

## EXPLANATIO.

Quoniam multiplicata est. ] Verissime prædicat, auctam esse & multiplicatam misericordiam Dei erga Hebræos, & cæteras omnes nationes CHRISTO nobis donato: huius enim beneficentiæ tanta est magnitudo, ut ea nulla cogitatione comprehendi possit. Quanquam uero misericordia pertinet ad omnes mortales, quisquis enim salutem, & uitam beatam consequitur, illam dono, & benignitate Dei consequitur: tamen proprie ueritas ad Iudæos, misericordia ad cæteras gentes referenda est: illis enim promissus fuerat CHRISTVS, istis nulla intercedente promissione exhibitus est: qua de re sic diuus Paulus in epistola ad Romanos scripta, Illud autem dico, IESVM CHRISTVM ministrum fuisse circumcisionis pro ueritate Dei ad confirmandas promissiones patrum. cæterum ut gentes pro misericordia glorificent Deum, sicut scriptum est, propter hoc confitebor tibi in gentibus, & nomini tuo canam. & rursus dicit, Gaudete omnes gentes cum populo eius. & rursus, Laudate Dominum omnes gentes, laudate eum omnes populi.

Et ueritas Domini manet in æternum ] Veritatem appellat fidem, dictorumq; constantiam. quod si fides Dei semper inuiolata manet, pro certo habere debemus, illum promissa nobis esse facturum. promisit autem uitam beatam et sempiternam, si pietatem coleremus, atque omnem salutis nostræ fiduciam in CHRISTI sanguine, & meritis reponeremus.

# EXPLANATIO

## ARGVMENTVM PSAL.

### CXVIII.

Hunc pulcherrimum hymnum cecinit David, cum superatis aduersarijs regiam potestatem summa omnium uoluntate acciperet, atque ab innumerabili gratulantium multitudine deductus ad templum gratias ageret Deo.

### Psalmus CXVIII.

Confitemini Domino, quoniam bonus, quoniam in seculum misericordia eius.

Dicat nunc Israel, quoniam in seculum misericordia eius.

Dicat nunc domus Aaron, quoniam in seculum misericordia eius.

Dicant nunc, qui timent Dominum, quoniam in seculum misericordia eius.

De angustia inuocaui Dominum, & exaudiuit me in latitudine Dominus,

Dominus mihi adiutor, non timebo, quid faciat mihi homo.

Dominus est pro me cum auxiliantibus mihi, & ego (optata) uidebo in inimicis meis.

Melius est confidere in Domino, quam confidere in homine,

Melius est sperare in Domino, quam sperare in principibus.

Omnes gentes circundederant me, in nomine Do-



mini , quia ultus sum in eas.

Circumdederant me , circumdederant inquam me ,  
in nomine Domini quia ultus sum in eos .

Circumdederant me sicut apes , extincti sunt sicut  
ignis spinarum , in nomine Domini quia ultus sum  
in eos .

Impellens impulisti me , ut caderem , & Dominus  
adiuuit me ,

Fortitudo mea , & canticum Dominus , & factus  
est mihi in salutem .

Vox exultationis , et salutis in tabernaculis iustorū .

Dextera Domini fecit fortitudinē , dextera Domini  
exalta est , dextera Domini fecit fortitudinem .

Non moriar , sed uiuā , & narrabo opera Domini .

Castigans castigauit me Dominus , & morti non  
tradidit me .

Aperite mihi portas iustitię , ingressus in eas con=  
fitebor Domino , hæc porta Domini , iusti intrabunt  
in eam .

Confitebor tibi , quoniam exaudisti me , & factus  
es mihi in salutem .

Lapidem , quem reprobaucrunt adificantes , hic  
factus est in caput anguli .

A Domino factum est istud , & hoc est mirabile  
in oculis nostris .

Hęc est dies , quam fecit Dominus , exultemus , &  
laetemur in ea .

Obsecro Domine salua nūc , obsecro Domine da nūc  
prosperitatē . benedictus qui uenit in nomine Domini .

Benediximus uobis de domo Domini , Deus Domini

## E X P L A N A T I O

nus, & illuxit nobis.

Redimite solennitatem frondibus usque ad cornua altaris.

Deus meus es tu, & confitebor tibi, Deus meus es tu, & exaltabo te.

Confitemini Domino, quoniam bonus, quoniam in seculum misericordia eius.

## E X P L A N A T I O.

Et exaudiuit me in latitudine Dominus ] Id est, ex maximis illis periculis, & angustiis perduxit me in locum amplum, & spatiosum; nimirum ad quietem, & securitatem.

Extincti sunt sicut ignis spinarum ] Elegantiissima est similitudo: nam spinæ ignem facile concipiunt, qui magnum fragorem edit, & uicina quæque consumpturus uidetur, sed statim ipse extinguitur.

Impellens impulisti me ] Videtur his uerbis appellare Saulem, qui eum acerrime oppugnauerat.

Vox exultationis ] Personant (inquit) omnia plausu, & faustis clamoribus bonorum gratulantium de salute, ac dignitate mea.

Dextera Domini fecit uirtutem ] Quod uitam retinuerit, quod hostes bello superarit, quod regiam dignitatem adeptus sit, attribuit Deo, non prudentie, aut uirtuti, & uiribus suis.

Castigans, castigauit me Dominus, & morti non tradidit me ] Significat, se à Deo non hostilem in modum, sed paternum castigatum esse. castigat enim Dominus, quem diligit, uerberibus cedit, quos-

cunque sibi adoptat.

Aperite mihi portas iustitiæ ] Sic appellat  
fores templi.

Lapidem, quem reprobauerunt ] Abie-  
cerant (inquit) me edificantes, id est, qui rerum po-  
tiebantur, tanquam lapidem inutilem, & nulli rei  
aptum: sed benignitate Dei cernunt, me nunc colloca-  
tum in capite anguli, nimirum in potiore, ac dignio-  
re edificiij loco. erat autem constitutus rex totius ter-  
ræ Iudææ. in ea uero re imperium CHRISTI  
adumbravit: quapropter ille apud Matthæum hunc  
uerficulum Iudæis obiecit. Eundem appellat etiam  
Esaias lapidem angularem, utpote qui totum edifi-  
cium ecclesiæ contineat, & duos parietes in unum an-  
gulum copulauerit, hoc est, Hebræos, & ceteras na-  
tiones ab ijs religione, ac moribus dissidentes in unum  
corpus coagmentarit, cuius corporis ipse caput est.

Et est mirabile in oculis nostris ] Iure qui-  
dem mirabantur omnes, Dauidem ab uniuerſa gente  
Hebræa amplissimo regis honore, ac nomine affectum  
esse, qui loco humili natus erat, & regnante Saule  
multos annos uitam uagam, inopem, acerbam ui-  
xerat, & post obitum regis diuturnis optimatū odijs  
exagitatus fuerat: sed multo magis mirabantur, qui  
IESVM uiderant a principibus sacerdotū tanquā  
hominem impium, & pestiferum in crucem tolli,  
cum paucis post annis eundem cernerent pro saluari  
Deo omnibus terrarum finibus coli, regnumq; illius  
hoc magis longe, lateq; propagari, quo magis a do-  
ctissimis uiris, & potentissimis quibusq; regibus omni

# E X P L A N A T I O

conatu, & crudelitate oppugnaretur, quod tamen defensores haberet exiguos numero, genere infimos, & lingua barbaros, quiq; profiterentur, se nihil scire præter IESVM CHRISTVM, & hunc quidem supplicio crucis affectum. Nonne qui hæc uidebant, uel inuiti fateri cogeantur, ea non humanis opibus, sed numine diuino geri? neque post hominum memoriam quicquam tam inopinatum, tamq; admirabile contigisse?

Hæc est dies, quam fecit Dominus ] Verba hæc sunt populi gratulantis, dum David regiam dignitatem accipit. Sed eisdem uerbis gratulatur longe maiore gaudio ecclesia piorum CHRISTO ad uitam redeunti, & imperium cœlitum, atque hominum à patre accipienti: nullus enim alius dies unquam ita laetus, pulcher, faustus, & salutaris generi hominum illuxit. hoc die tyrannis acerbissima Diaboli euersa, peccatum sublatum, mors extincta, lacrimæ miserorum abstersæ, iniustitiæq; , & uita sempiterna in uniuersas terrarum oras introducta est.

Obsecro Domine ] Hæc populus faustis, & secundis acclamationibus pronuntiabat orans Deum, ut regem, ac ciuitatem incolumem conseruaret, & regnum fortunaret, quod Saulis culpa, & improbitate maxime labefactatum erat. His eisdem uocibus populus CHRISTVM prosecutus est, cum ille asina uectus Hierosolyma ingrederetur.

Benedictus, qui uenit ] Videntur hæc uerba esse sacerdotum excipientium regem, & populum intra fores templi.

Deus Dominus, & illuxit nobis ] Deus  
( inquit sacerdotes ) est Dominus noster, quare bo-  
no animo esse debetis; ille enim pro benignitate sua,  
depulsis tenebris omnium calamitatum, lucem nobis,  
& omnium rerum prosperitatem attulit, cum tam  
pium, tam sanctum, tamq; sapientem regem nobis  
dedit.

Redimite solennitatem ] Id est, die tam  
leto, & fausto redimite atria templi frondibus festis  
usque ad cornua altaris. sunt qui uertant hunc uersi-  
culum hoc modo, alligate hostiam funibus ad cornua  
altaris.

# ARGVMENTVM PSAL. CXIX.

Differit, beatam uitam positam esse in obseruatio-  
ne legum diuinarum, itaque precatur Deum, ut il-  
larum doctrina, & amore animum suum imbuat,  
quo possit & pietatem colere, & ipsi Deo charissi-  
mus esse.

## Psalmus CXIX.

### A L E P H.

Beati immaculati in uia, qui ambulant in lege  
Domini.

Beati, qui custodiunt testimonia eius, in toto cor-  
de exquirunt eum:

Non enim operantur iniquitatem, qui in uis eius  
ambulant.

Tu mandasti mandata tua custodiri ualde.

# EXPLANATIO

Vtinam dirigantur uiae meae ad custodiendas iustificationes tuas.

Tunc non confundar, cum respexero ad omnia mandata tua.

Confitebor tibi in directione cordis, cum didicero iudicia iustitiae tuae.

Iustificationes tuas custodiam, ne me derelinquas usquequaque.

## BETH.

In quo corrigit adolescentior uiam suam? in custodiendo sermones tuos.

In toto corde meo exquisiui te, ne aberrare sinas me à mandatis tuis.

In corde meo abscondi eloquia tua, ut non peccem tibi.

Benedictus es Domine, doce me iustificationes tuas.

In labijs meis pronunciaui omnia iudicia oris tui.

In uia testimoniorum tuorum delectatus sum, sicut in omnibus diuitijs.

In mandatis tuis exercebor, & considerabo uias tuas.

In iustificationibus tuis delectabor, non obliuiscar sermones tuos.

## GIMEL.

Retribue seruo tuo, ut uiuam, & custodiam sermones tuos.

Reuela oculos meos, & considerabo mirabilia de lege tua.

Aduena ego sum in terra, non abscondas à me

mandata tua .

Attrita est anima mea præ desiderio iustificationũ  
tuarum in omni tempore .

Increpasti superbos , maledicti , qui declinant à  
mandatis tuis .

Aufer à me opprobrium , & contemptum , quia  
testimonia tua custodiui .

Etiam sederunt principes , & aduersum me loque  
bantur ,

Seruus autem tuus exercebatur in iustificationi-  
bus tuis ,

Nam testimonia tua delectationes meae sunt , &  
consiliarij mei .

## D A L E T H .

Adhaesit pulueri anima mea , uiuifica me secun-  
dum uerbum tuum .

Vias meas enuntiaui , & exaudisti me , doce me  
iustificationes tuas .

Viam iustificationum tuarũ instrue me , & exer-  
cebor in mirabilibus tuis .

Liquefacta est anima mea præ anxietate , confir-  
ma me iuxta uerbum tuum .

Viam iniquitatis amoue à me , & legem tuam do-  
na mihi .

Viam ueritatis elegi , iudicia tua mihi proposui ,  
Adhaesi testimonijs tuis Domine , noli me confun-  
dere .

Viam mandatorum tuorum curram , cum dilata-  
bis cor meum .

# EXPLANATIO

## HE.

Doce me Domine viam iustificationum tuarum ,  
& custodiam eam semper .

Da mihi intellectum , & custodiam legem tuam ,  
& custodiam illam in toto corde meo .

Deduc me in semita mandatorum tuorum , quia  
ipsam uolui .

Inclina cor meum in testimonia tua , & non in  
auaritiam .

Auerte oculos meos , ne uideant uanitatem , in  
uia tua uiuifica me .

Confirma seruo tuo eloquium tuum , quod (inci-  
tat) ad timorem tuum .

Aufer opprobrium meum , quod timui , quia iu-  
dicia tua sunt bona .

Et concupiui mandata tua , in iustitia tua uiuifi-  
ca me .

## V A V.

Et ueniat super me misericordia tua Domine , sa-  
lutare tuum secundum eloquium tuum .

Et respondebo exprobrantibus mihi uerbum , quia  
speraui in sermonibus tuis .

Et ne auferas de ore meo uerbum ueritatis usque-  
quaque , quia in iudicijs tuis speraui .

Et custodiam legem tuam semper in seculum , &  
in seculum seculi .

Et ambulabo in latitudine , quia mandata tua ex-  
quisiui .

Et loquar de testimonijs tuis in conspectu Regum ,  
& non confundar ,



Et delectabor in mandatis tuis, quæ dilexi,  
Et leuabo manus meas ad mandata tua, quæ dilexi,  
& meditabor in iustificationibus tuis.

MEMOR ESTO. Z A I.

Memor esto uerbi tui seruo tuo, in quo mihi spem dedisti.

Hæc est consolatio mea in afflictione mea, quia eloquium tuum uiuificauit me.

Superbi deriserunt me nimis, d lege autem tua non declinaui.

Memor fui iudiciorum tuorum a seculo Domine, & consolatus sum.

Horror tenuit me pro peccatoribus derelinquentibus legem tuam.

Cantica mihi fuerunt iustificationes tuæ, in domo peregrinationis meæ.

Memor fui nocte nominis tui Domine, et custodiui legem tuam.

Hoc factum est mihi, quia iustificationes tuas exquisiui.

HE T H.

Portio mea Domine, dixi, custodire uerba tua.

Deprecatus sum faciem tuam in toto corde meo, miserere mei secundum eloquium tuum.

Cogitaui uias meas, & conuersti pedes meos in testimonia tua.

Festinaui, & non tardaui custodire mandata tua.

Funes peccatorum circumplexi sunt me, & legem tuam non sum oblitus.

Media nocte surgam ad confitendum tibi super in

## E X P L A N A T I O

*dicijſ iuſtitie tue.*

*Socius ego ſum omnium timentium te, & cuſto-*  
*dientium mandata tua.*

*Miſericordia tua Domine plena eſt terra, iuſtifica-*  
*tiones tuas doce me.*

### T E T H.

*Bonitatem feciſti cum ſeruo tuo Domine ſecundum*  
*uerbum tuum.*

*Bonum guſtum, & ſcientiam doce me, quia man-*  
*datis tuis credidi.*

*Priusquam tribularer, ego deliqui, nunc autem*  
*eloquium tuum cuſtodio.*

*Bonus es tu & beneficus, doce me iuſtificationes*  
*tuas.*

*Concinnauerunt aduerſum me ſuperbi mendacia,*  
*ego autem in toto corde meo cuſtodiam mādāta tua.*

*Incrasſatum eſt ſicut adeps cor eorum, ego uero*  
*in lege tua delectatus ſum.*

*Bonum mihi, quia afflixiſti me, ut diſcerem iuſti-*  
*ficationes tuas.*

*Melior mihi lex oris tui, quā millia auri, & ar-*  
*genti.*

### I O T H.

*Manus tue fecerunt me, & plasmaverunt me,*  
*da mihi intellectum, ut diſcam mandata tua.*

*Qui timent te, uidebunt me, & latabuntur,*  
*quia in uerba tua ſperaui.*

*Scio Domine, quod æquitas iudicia tua, & in ue-*  
*ritate tua afflixiſti me,*

*Fiat miſericordia tua, ut conſoletur me, ſecundū*  
*cloquium*

eloquium tuum seruo tuo .

Veniant mihi miserationes tuæ , & uiuam , quia  
lex tua delectatio mea est .

Confundantur superbi , quia iniuste opprimere no-  
luerunt me ; ego autem exercebor in mandatis tuis .

Reuertantur ad me timentes te , qui nouerunt tes-  
timonia tua .

Sit cor meum immaculatum in iustificationibus  
tuis , ut non confundar .

## C A P H .

Defecit in salutare tuum anima mea , & in uere-  
bum tuum speravi .

Defecerunt oculi mei in eloquium tuum , dicentes,  
quando consolaberis me ?

Quia factus sum sicut uter in fumo , iustificatio-  
nes tuas non sum oblitus .

Quot sunt dies serui tui ? quando facies de perse-  
quentibus me iudicium ?

Foderunt mihi superbi foveas , quod non est secun-  
dum legem tuam .

Omnia mandata tua ueritas , iniqui persecuti sunt  
me , adiuua me .

Paulo minus consumpserunt me in terra , ego au-  
tem non dereliqui mandata tua .

Secundum misericordiam tuam uiuifica me , &  
custodiam testimonia oris tui .

## L A M E D .

In æternum Domine uerbum tuum permanet in  
cælo .

In generationem , & generationem ueritas tua ,

# EXPLANATIO

fundaſti terram, & permanet,

Ordinatione tua perſeuerat dies, quoniam omnia ſeruiunt tibi.

Niſi quod lex tua meditatio mea eſt, tunc forte periſſem in afflictione mea.

In æternum non obliuiſcar iuſtificationes tuas, quia in iſtis uiuiſcaſti me.

Tuus ſum ego, ſaluum me fac, quoniam iuſtificationes tuas exquiſiui.

Me expectauerunt peccatores, ut perderent me, teſtimonia tua intelligebam.

Omnis conſummationis uidi finem, latum mandatum tuum nimis.

## M E M.

Quã dilexi legẽ tuam, tota die meditatio mea eſt. Supra inimicos meos prudentem me feciſti mandato tuo, quia in æternum mihi eſt.

Supra omnes docentes me intellexi, quia teſtimonia tua meditatio mea eſt.

Supra ſenes intellexi, quia mandata tua cuſtodiui. Ab omni uia mala prohibui pedes meos, ut cuſtodiam uerba tua.

A iudicijs tuis non declinaui, quia tu docuiſti me.

Quã dulcia faucibus meis eloquia tua, ſupra mel ori meo.

A mandatis tuis intellexi, propterea odiui uiam iniquitatis.

## N V N.

Lucerna pedibus meis uerbum tuum, & lumen ſemitis meis.

Iuravi, & statui custodire iudicia iustitiæ tuæ.

Afflictus sum usquequaque Domine, uiuifica me secundum uerbum tuum.

Voluntaria (sacrificia) oris mei placeant tibi Domine, & iudicia tua doce me.

Anima mea in manibus meis semper, & legem tuam non sum oblitus.

Posuerunt peccatores laqueum mihi, & à mandatis tuis non erravi.

Hæreditate acquisiui testimonia tua in æternum, quia exultatio cordis mei sunt.

Inclinaui cor meum ad faciendas iustificationes tuas in æternum propter retributionem.

## S A M E C H.

Iniquos odio habui, & legem tuam dilexi.

Latibulum meum; & scutum meum es tu, & in uerbum tuum speraui.

Dedinate à me maligni, & custodiam mandata Dei mei.

Confirma me secundum eloquium tuum, & uiuam, & ne confundas me ab expectatione mea.

Sustenta me, & saluus ero, & delectabor in iustificationibus tuis semper.

Conculcasti omnes discedentes à iudicijs tuis, quia iniusta cogitatio eorum.

Velut scoriam sustulisti omnes peccatores terræ, ideo dilexi testimonia tua.

Inhorruit timore tui caro mea, & à iudicijs tuis timui.

# EXPLANATIO

## A I N.

Recta iudicium, & iustitiam, ne tradas me opprimen-  
tibus me.

Obleſta ſervum tuum in bonum, non opprimant  
me ſuperbi.

Oculi mei defecerunt in ſalutare tuum, & in elo-  
quium iuſtitie tue.

Fac cum ſervo tuo ſecundum miſericordiam tuam,  
& iuſtificationes tuas doce me.

Servus tuus ſum ego, da mihi intellectum, ut  
ſciam teſtimonia tua.

Tempus faciendi Domine diſſipaverunt legem tua.  
Ideo dilexi mandata tua ſuper aurum, & topa-  
rium.

Propterea omnia mandata omnium recta iudicas  
ut, & omnem viam falſam odio habui.

## P H E.

Mirabilia teſtimonia tua, ideo cuſtodiunt illa ani-  
ma mea.

Oſtium ſermonum tuorum illuminat, & intelle-  
ctum dat parvulis.

Os meum aperui, & attraxi ſpiritum, quia man-  
data tua deſiderabam.

Aſpice me, & miſerere mei ſecundum iudicium  
diligentium nomen tuum.

Greſſus meos dirige ſecundum eloquium tuum, &  
non dominetur mihi ulla iniuſtitia.

Redime me ab oppreſſione hominum, & cuſta-  
diam mandata tua.

Faciem tuam illumina ſuper ſervum tuum, &

doce me iustificationes tuas .

Riuos aquarum profuderunt oculi mei , quia non custodierunt legem tuam .

## S A D E .

Iustus es Domine , & rectum iudicium tuum .

Mandasti iustitiam in testimonijs tuis , & ueritatem tuam ualde .

Tabescere me fecit Zelus meus , quia obliti sunt uerba tua inimici mei .

Examinatum igne eloquium tuum uehementer , et seruus tuus dilexit illud .

Paruulus sum ego , & contemptus , iustificationes tuas non sum oblitus .

Iustitia tua , iustitia in aeternum , & lex tua ueritas .

Tribulatio , & angustia inuenerunt me , mandata tua delectatio mea est .

Aequitas testimonia tua in aeternum , intellectum da mihi , & uiuam .

## C O P H .

Clamavi in toto corde , exaudi me Domine , iustificationes tuas custodiam .

Clamaui ad te , saluum me fac , & custodiam mandata tua .

Præueni diluculum , & clamaui , uerbum tuum expectaui .

Præuenerunt oculi mei uigilias , ut meditarer eloquia tua .

Vocem meam audi secundum misericordiam tuam , & secundum iudicia tua uiuifica me .

## E X P L A N A T I O

Appropinquauerunt persequentes me iniquitati, d  
lege autem tua longe facti sunt.

Propè es tu Domine, & omnes uia tua ueritas.

Initio cognoui de testimonijs tuis, quod in æternū  
fundaueris ea.

R E S.

Vide afflictionem meam, & eripe me, quia legē  
tuam non sum oblitus.

Iudica causam meam, & redime me, propter elo-  
quium tuum uiuifica me.

Longe d peccatoribus salus, quia iustificationes tuas  
non exquisierunt.

Misericordiæ tuæ multæ Domine, secundum iudi-  
cium tuum uiuifica me.

Multi sunt, qui persequuntur me, & tribulant  
me, d testimonijs tuis non declinaui.

Vidi prauaricantes, & tabescebam, quia eloquia  
tua non custodierunt.

Vide quoniam mandata tua dilexi Domine, in mi-  
sericordia tua uiuifica me.

Caput uerborum tuorum ueritas, in æternum o-  
mnia iudicia iustitiæ tuæ.

S I N.

Principes persecuti sunt me sine causa, & d uer-  
bis tuis formidauit cor meum.

Lator ego super eloquio tuo, sicut qui inuenit spo-  
lia multa,

Iniquitatem odio habui, & abominatus sum, le-  
gem autem tuam dilexi.

Septies in die laudem dixi tibi super iudicijs iusti-



tiae tuae.

Pax multa diligentibus legem tuam, & non est illis scandalum.

Expectavi salutare tuum Domine, & mandata tua obseruavi.

Custodiuit anima mea testimonia tua, & dilexit ea uehementer.

Seruauit mandata tua, & testimonia tua, quia omnes uiae meae in conspectu tuo.

## T A V.

Appropinquet clamor meus in conspectu tuo Domine, iuxta eloquium tuum da mihi intellectum.

Iniret postulatio mea ad conspectum tuum, secundum eloquium tuum eripe me.

Eruentur labia mea hymnum, cum docueris me iustificationes tuas.

Pronunciabit lingua mea eloquium tuum, quia omnia mandata tua aequitas.

Sit manus tua auxiliatrix mea, quoniam mandata tua elegi,

Concupiui salutare tuum Domine, & lex tua delectatio mea est,

Viuat anima mea, & laudabit te, & iudicia tua adiuuabunt me.

Erravi sicut ouis, quae periit, quere seruum tuum, quia mandata tua non sum oblitus.

## EXPLANATIO.

Beati immaculati in uia ] Id est, qui uiam  
tam pure, & innocenter agunt.

# EXPLANATIO

Tu mandasti ] Ostendit, quanto studio, et diligentia sint colendæ leges Dei, itaque optat uitam suam sic institui, & gubernari à Deo, ut nunquam ab earum obseruatione aberraret. tunc ait futurum, ut omnia sibi pulcherrime succedant, si semper eas leges ante oculos habuerit, & omnes actiones suas earum regula metietur. tunc etiam dicit, se sincere, & ex animo celebraturum laudes Dei.

In quo corrigit adolescentior uiam suam? ] Deus in Genesi testatur, hominem ab ineunte ætate ad uitia præcliuem esse: at qualis est adolescentia, id est & senectus, ut Salomon inquit: itaque uir sanctus monet, dum ætas adhuc tenera est, & flexibilis, mores deprauatos emendandos esse, atque ad normam legum diuinarum dirigendos. quia uero id facile quidem est ad præcipiendum, sed factu nihil difficilius, propterea in persona sua postea docet, qua uia, & ratione ad hanc uirtutis excellentiam peruenire adolescentescens queant.

In corde meo abscondi eloquia tua ] Significat, se præceptis Dei sic affectum esse, ut ea tanquam pretiosissimum thesaurum in intimo animo recondita seruet, contra quam multi facere solent, qui simulatione sanctitatis leges quidem diuinas semper ore iactant, sed animum ab illarum amore prorsus abhorrentem habent.

Retribue seruo tuo ] Retribuere apud Hebræos non solum est beneficium reddere, sed etiam ultro dare: atque in hanc sententiam accipitur hoc loco: orat enim uir sanctus Deum, ut liberalitate utatur.

tur, & benigne sibi faciat, quo uiuere, & præcepta ipsius obseruare possit: his enim uiolatis uita nulla est.

Reuela oculos meos ] Verba hæc notatū dignissima sunt, indicant enim id, quod etiam diuus Paulus asseueranter affirmat, mentem hominis cognitionem rerum diuinarum sine diuino auxilio capere non posse, quemadmodum neque oculus solem sine luce solis intueri ualeat.

Aduena ego sum in terra ] Animus (inquit) meus non capitur rebus terrenis, & caducis, sed tanquam peregrinus hanc uitam transco, ad regiones cæli summo desiderio festinans, itaque Domine ne me cæles mysteria legum tuarum, quarum scientia, & obseruatione ad uitam cœlestem, & beatam peruenitur.

Increpasti superbos ] Merito (inquit) amo, & colo præceptiones tuas: nam superbos, & arrogantes, qui illas despiciunt, increpare, & ex-crari soles.

Aufer à me opprobrium ] Vindica me ab iniurijs, & contumelijs istorum superbiorum, qui me acerbissime insectantur, propterea quod uident, me tuarum legum studiosum esse.

Seruus autem tuus ] Cum principes ciuitatis maledictis me insectarentur, ego meditatione, et obseruatione præceptorum tuorum muniebam me, illis me in rebus aduersis oblectabam, illa in rebus dubijs, & difficilibus in consilium adhibebam.

Adhæsit pulueri anima mea ] In maximo periculo uersor, ut penè iam oppressus sim, & pro-

# EXPLANATIO

xiimus morti, at tu Domine salutem mihi restitue, quē admodum te facturum promisisti, quoties homines ad tuam misericordiam confugissent. Et profecto cum immineret mihi periculum aliquod, aut aliquid graue, Et difficile mihi agendum esset, semper oraculum tuum consului, semper auxilium tuum imploravi, semper te propitium, Et misericordem experiebam. itaque Domine hac fiducia fretus oro te, ut doceas me cōlestem scientiam sanctissimarū legum tuarum, ut earum meditatione corroboratus possim animo erecto, atque constanti resistere tantis calamitatibus, quibus undique oppugnor.

Noli me confundere ] Id est, ne permitte, ut ea spes me fallat.

Viam mandatorum tuorum ] Significat, hominem praecepta Dei seruare non posse, nisi Deus illi spiritum suum impertiat, viresq; suppediet.

Doce me Domine ] In his octo uersibus apertissime ostendit, naturam hominis imbecillam esse ad intelligendas, amandas, Et sequendas leges diuinas, nisi Deus ipse spiritu suo mentem illuminet, uoluntatem inflammet, totumq; animum renouet. itaque diuus Augustinus ad hanc sententiam probandam contra Pelagianos hos uersus saepenumero testes citat.

Confirma seruo tuo eloquium tuum ] Id est, in animo meo firmam fac Et stabilem legem tuam.

Et respondebo exprobrantibus ] Adsis inquam Domine, Et mihi salutem affer, ut sit, quod

respondeam exprobrantibus mihi, quod profiteri so-  
leam me. confidere promissionibus tuis.

Et ne auferas de ore meo uerbum ueritatis ]

Ego quidem natura maxime procliuus ad errandum,  
imbecillus, timidus, nullius animi sum: at tu Domi-  
ne, qui me in uiam ueritatis deduxisti, ne quæso per-  
mitte mentem meam ab illa unquam aberrare, tan-  
tumq; animi, & firmitatis suffice, ut me nulla uis,  
aut metus inducere possit ad dicendum aliquid, quod  
doctrinæ, & legibus tuis sanctissimis repugnet.

Et ambulabo in latitudine ]

Cum Dei spi-  
ritus abest, recta uiuendi uia difficillima est, contraq;  
illo præsentē, & leges Dei iucundas, & amabiles ef-  
ficiente, omnia aspera, & angusta se se conuertunt  
in uias latas, & planas.

Et loquar de testimonijs tuis ]

Hic uersus  
eam sententiam continet, quam CHRISTVS  
apud Lucam exprimit clarius, cum prædicat, discipu-  
los suos ad Regum, & iudicum tribunalia ductū iri,  
quo religionis, & doctrinæ suæ rationem reddant,  
eosq; mionet, ut sine ulla præmeditatione defensionis  
accedant, se enim sapientiam, & uerba suppeditatu-  
rum, quibus aduersarij resistere non possint. Hac sa-  
pientia fretus uir sanctus gloriatur, se coram regibus  
de doctrina, & legibus Dei libere locuturum, neque  
aliquem fore, quā possit ipsum redarguere.

Et leuabo manus ]

Id est, summa alacri-  
tate perficiam ea, quæ iubent leges tuæ.

Memor esto uerbi tui seruo tuo ]

Id est,  
memento eorum, quæ mihi pollicitus es.

## E X P L A N A T I O

Hæc est consolatio mea ] Iampridem ( inquit ) me animus , & uita defecisset præ magnitudine calamitatum , nisi uerba tua afflictum , & iacentem erexissent .

Superbi deriserunt me nimis ] Arrogantes , & oraculorum tuorum contemptores me stultissimum iudicant , quod uerbis tuis fidem adhibeam , & retinendæ pietatis causa nullum incommodum recussem , sed ego nulla re ab obseruatione , & studio legum tuarum deterreri possum .

Memor fui iudiciorum ] Sæpe animo recolo , quanta benignitate semper tutatus sis homines pios , quantis eos præmijs affeceris , & ea quidem cogitatio mirandum in modum recreat me .

Horror tenuit me ] Horror inuadit me , quoties cogito miseriam , & impietatem eorum , qui negligunt leges tuas .

Cantica mihi fuerunt ] Cum in exilium pulsus fuisset , calamitates meas solabar cantandis legebis tuis : hoc unicum perfugium mihi fuit in tantis malis . uel peregrinationem appellat uitam hanc , quæ degitur in terris .

Memor fui nocte nominis tui ] Tanta est magnitudo uoluptatis , quam de te cogitans capio , ut , dum alij ob leuandos labores , & curas somno , & quieti se tradunt , ego uigilans in rerum tuarum meditatione conquiescam .

Hoc mihi contigit ] Omnia ( inquit ) bona , quæ commemorauimus , mihi contigerunt , propterea quod leges tuas diligenter obseruauimus .

Portio mea Domine ] Habeant alij sibi suas opes, honores, & potentiam, tu Domine hereditas, & luculentum patrimonium meum, tu unus mihi omnia bona es, itaque proposui, in colendis legibus tuis omnem curam, & diligentiam ponere. sed hoc ego qui potero exequi, nisi tu, qui hanc mihi mentē donauisti, incēptis, & conatibus meis exitus quoque prosperos dones? propterea ad te confugio, & tuam misericordiam suppliciter imploro, tu quaeso illam mihi tribue, quēadmodum te facturum esse promissisti.

Cogitauī uias meas ] Ego quidem mores, rationes, atque instituta uitæ meæ diligenter excussi, cumq; nihil boni in ijs comperirem, nulla interposita mora omne meum studium conuerti ad seruandas leges tuas. quanquam uero ob eam rem in maxima pericula, & angustias adductus sum ab hominibus sceleratis, & impijs, tamen uitam mihi eripi, quā hārum legum obseruationem, malo.

Misericordiam tuā Domine ] Tam libera-  
lis, & benignus es Domine, ut neminem in toto terrarum orbe patiari expertem esse misericordiæ tuæ: hac tu utere aduersus me, potissimum ad docendas leges tuas.

Bonum gustum, & scientiam doce me ]  
Ea est humani iudicij deprauatio, ea cæcitas animorum, & ignorantia, ut falsa pro ueris, & mala pro bonis ut plurimum amplectamur. At tu Domine, qui iam seruo tuo benigne facere cœpisti, ita mentem meam illumina, ut perspiciam, quid appetendum, uitandumq; sit: ita gustum animi mei sana, ut uero

# EXPLANATIO

rum bonorum suauitatem sentiam, cetera omnia iudicem amara.

Præquam tribularer, ego deliqui ] Gratias ago tibi summe pater immortales, quod multa mihi aduersa tuo consilio euenerint: cum enim mihi omnia secunda cederent, sic animo elato eram, ut contra leges tuas multa committerem: nunc illis nihil mihi sanctius, nihil antiquius est, illarum obseruatione ego omnia posteriora duco. At tu, qui bonus es, tuamq; bonitatem liberaliter impertis, harum sanctissimarum legum scientiam mihi trade.

Concinnauerunt aduersum me ] Homines superbi, & doctrinæ tuæ contemptores multa confinxerunt ad speciem sanctitatis adumbrata, quo me diuina ueritatis ad sua futilia commenta traducerent, at ego leges tuas colere summa constantia perseuero.

Incrassatum est sicut adeps ] Habent isti homines mentem hebetem, & crassam, quippe quam corporis uoluptatibus, & rerum terrenarum cogitationibus alunt, propterea neque scientiam legum diuinarum tenent, neque ijs delectantur.

Manus tuæ fecerunt me ] Tu me Domine tuis manibus effinxisti, tu rex, tu pater, tu creator meus es, itaque bonam mentem mihi dona, atque animum meum sic imbue scientia legum tuarum, ut nihil cogitare, aut loqui, aut facere me delectet, quod à pulcherrimis illarum præceptis abhorreat.

Scio Domine ] Persuasissimum habeo, quod nihil nisi rectum, & iustum à tuo sancto numine manat, itaque non dubito, quin iure, ac me-



rito me afflixeris, sed iam quæso mihi misericordiam tribue, & consolare afflictum, & iacentem, id enim pollicitus es seruo tuo.

Reuertantur ad me ] Sublatis de medio impijs reuertantur ad me homines pii, qui metu perterriti uitam inopem, & uagam persequuntur.

Defecit in salutare ] Defecit penè iam animus meus præ sollicita expectatione auxilij tui, quonititur omnis salus mea: ipsi etiam oculi mei iam defecerunt, in cælum dies, noctesq; suspicientes, si qua forte uiderent salutem uenientem, quam seruo tuo promissisti. Sed quanquam præ magnitudine calamitatum, & assiduo mœrore confectus sum, atque adeo exesus, ut cutis mea utri ad fumum suspensocomparanda sit, nunquam tamen legum tuarum oblitus sum, sed tu quandiu permittes, seruum tuum tanta crudelitate uexari? quando tandem de impijs aduersarijs meis supplicium sumes?

In æternum Domine ] Prædicat, legem Dei non posse antiquari, & quicquid ipse constituerit, ratum, & fixum esse, quod perennitas cœli, & terræ apertissime testificatur, quas ille res ea lege creauit, ut nullo tempore interirent.

Ordinatione tua ] Quicquid ab initio creauisti, usque in hodiernum diem ita consistit, ut à sapientia tua constitutum fuit. denique omnia imperio tuo parent, nihil temere, nihil fortuito fie in uniuerso, omnia diuini numinis tui consilio administrantur. Hæc nisi ego assidue cum animo meo cogitasset, & meditatione legum tuarum me ipsum oblectasset,

# EXPLANATIO

profecto magnitudine calamitatum interissem .

Me expectauerunt ] Insidias machinantur  
mihi impij , at ego ad scientiam legum tuarum me  
recipiam , earumq; presidio tutissimo me comuniam .

Omnis consummationis ] Nihil tā absolu-  
tum , tamq; perfectum oculis meis cerno , cuius inte-  
ritum uidere non possim : at lex tua nullis temporum  
finibus circumscribitur , nulla ui , aut uetustate consu-  
mi , uel obliterari potest .

Quā dilexi legem tuam ] His octo uersi-  
bus exponit , quā praeclarum fructum ceperit ex  
studio , & obseruatione legum diuinarum : se enim  
tantos progressus in prudentia , & cognitione rerum  
praestantissimarum fecisse gloriatur , ut omnibus ijs ,  
qui harum uirtutum laudibus florent , multo antecel-  
lat . Addit praeterea , se amore pietatis , & iustitiae  
sic incensum esse , ut haec sibi antiquissima cura sit ,  
ne quid committat unquam , quod merito reprehendi  
queat .

Quia in aeternum mihi est ] Id est , quia  
semper in animo meo , & memoria infixae haerent prae-  
cepta tua .

A mandatis tuis intellexi ] Id est , me-  
ditatione , & scientia praeceptionum tuarum pru-  
dens fio .

Lucerna pedibus meis ] In tenebris uitae hu-  
ius ingredienti lex tua tāquam fax praelucet , ne quid  
offendam , ne ue aberrem ab ea uia , quae ducit ad ui-  
tam beatam , & immortalem .

Voluntaria sacrificia oris mei placeāt tibi Domine ]

Hymnos

Hymnos præcipue, quos Deo cantabat, appellat uoluntarium sacrificium: ea enim sacrificia, quæ neque præcepto legis, neque pro expianda culpa, sed pro gratiarum actione fiebant, sic uocabantur.

Anima mea in manibus ] Id est, nunquam leges tuas obliuiscor, etsi nunquam non uersor in maximo periculo. Nam apud Hebræos, animam manibus ferre, est uitam omnibus periculis propositam habere. hinc illud in libro primo Regū, Posui animam meam in manu mea.

In æternum propter retributionem ] Id est, propter amplissima dona, quæ pro tua maxima liberalitate studiosis legum tuarum promissisti. In his donis ipse Deus numerandus est, quo fruuntur in perpetuum, qui conuenienter præceptis ipsius uiuere perseverant. Sed illud scire oportet, uocabulum Hebræum non minus significare finem, quàm mercedem, quæ propter alij sic uertunt, in seculum, & usque in finē.

Ideo dilexi testimonia tua ] Amatores enim legum diuinarum poenas defugiunt, quas earum contemptores sustinent, & maximis præterea honoribus afficiuntur à Deo.

Inhorruit timore tui caro mea ] Toto(inquit)corpore cohorrui, dum cogitarem, quàm graues poenas dare soleant, qui à tuis legibus desciscunt.

Oblecta seruum tuum in bonum ] Sic animum meum amore uirtutis, & pietatis inflamma, ut omnes meas uoluptates, & delectationes in his rebus constitutas habeam.

Tempus faciendi ] Iam tempus appetit, quo

# EXPLANATIO

tempore supplicium sumes de ijs, qui leges tuas uiolant, euertuntq;.

Propterea omnia mandata tua ] Propterea omnia praecepta rerum omnium, quas praecepisti, reuera, & iusta esse, existimauit.

Ostium sermonum tuorum ] Id est, non modo si quis in intima arcana legum tuarum ingreditur, & penetret, sed etiam si uel ostium earum tantum attingat, & primoribus (ut diuine) labris scientiam illam diuinam degustet, statim coelesti quodam lumine illustratur, ut facile perspicere possit, quid sequendum, quid fugiendum. hanc uero intelligentiam non superbi, & impuri, sed simplices, & innocentes homines consequuntur.

Os meum aperui ] Allegoria est, qua exprimit animum anhelantem praed desiderio coelestis sapientiae.

Et miserere mei secundum ] Miserere inquam mei, meq; ita tracta, ut eos tractare soles, qui pie colunt nomen tuum.

Gressus meos dirige ] Fac, ut omnes meae uiuendi rationes ad normam legum tuarum dirigantur, meq; ab omni peccato, & scelere purum, integrumq; conserua.

Riuos aquarum profuderunt ] Exprimit amorem, & studium suum erga leges diuinas: quas cum uideret ab impijs negligi, & uiolari, praed dolore incredibilem uim lacrimarum profundeabat.

Iustus es Domine ] Qui nihil potes uelle, nisi quod iustum, rectum, & sanctum est, ex quo fit,

ut non possint esse non iusta, & salutaria cuncta, quæ nobis inuiolate seruanda præcepisti. itaque incredibili dolore conficior, quid inimici mei uerba tua despiciant, ac pro nihilo putent: uerba enim tua puriora sunt auro, quod artifex sæpe, ac sæpius igne purgauit. Sed quam uolent impij contemnant excellentissimas leges tuas, contemnant etiam, & nihili faciant me, propterea quod illas plurimi facio: ego certe prius obliuiscar mei, quàm cælestem hanc doctrinam ex memoria deponere possim: iustitia nanque tua iustitia est sempiterna, lex tua ueritatis regula est, perfugiumq; & dulcissimum solatium omnium curarum, & calamitatum: iustitia inquam legis tue semper uiget, ac floret, nulla eam temporis circumscriptio metiri ualet: itaque fac Domine, ut illam intelligam, amplectar, amem, sequar, & ego quoque immortalis ero, & uita sempiterna fruamur.

Clamaui in toto corde meo ] Imploro misericordiam tuam Domine conscius imbecillitatis meæ, at tu quæso supplicis tui uoces propitius exaudi, ut possim obseruare leges tuas.

Præueni diluculum ] Antelucanis horis euigilo, atque opem tuam magnis clamoribus imploro, propterea quod omnis mea spes nititur promissionibus tuis.

Præuenerunt oculi mei uigilias ] Significat, se usque eò studiosum fuisse legum diuinarum, ut totas noctes in earum meditatione consumeret.

Propè es tu Domine ] Abeunt quidem improbi longe à legibus tuis, at tu semper es præsto co-

# EXPLANATIO

lentibus nomen tuum .

Principes persecuti sunt me ] Quamquam homines potentissimi me capite, ac fortunis oppugnabant, nunquam tamen tam eorum uim formidauī, quā ne aberrarem ab obseruatione præceptionum tuarum .

Septies in die laudem dixi tibi super iudicijs iustitiæ tuæ ] Quotidie tibi gratias ingentes ago, tuamq; bonitatem, & sapientiam crebris laudibus effero, propterea quod omnia iuste, recte, atque ordine administras, & in monumentis legum tuarum testatum reliquisti, quæ sequenda, fugienda ue sine, ut ad uitam beatam, & immortalem peruenire possimus .

Pax multa diligentibus legem tuam ] Amātes enim legum diuinarum Deo charissimi sunt; eoq; fauente in tempestate quiescunt, in tenebris uiuent, ex rebus nocentibus utilitatem capiunt; inimicos amant, omnia, quæcunque faciunt, euentus prosperos habent, honores, opes, uitam, & cætera fragilia, & caduca contemnunt, Deum colunt, uerentur, diligunt, atque ab illo diliguntur, eamq; beneuolentiæ charitatem fore sempiternam, persuasum habent. quæ opes, quæ imperia, aut quæ uoluptates cū hoc cœlesti uitæ statu, & tam dulci pace, & tranquillitate animi conferendæ sunt?

Et non est illis scandalum ] Spiritus enim Dei infusus in animos piorum uiam uirtutis planam, & facilem reddit, atque omne impedimentum de medio remouet. non illi falsis opinionibus inducti à ue-

ritate defciscunt, non malefacta alterius intoleranter ferunt, quin potius imbecillitatem, fragilitatemq; humani generis miserantur, & multa accipiunt in meliorem partem. ad summam, aliena peccata legum diuinarum cultores non solum non impediunt, sed etiam ad uirtutem iuuant: Deus enim suos hoc pulcherrimo dono afficit, ut omnia illis ad beatam uitam consequendam sint utilia.

Quia omnes uiae meae ] Intelligo Domine omnes meas non modo actiones, uerum etiam cogitationes, & intimos animi sensus tibi notissimos esse, propterea operam do, ut praecepta legum tuarum diligenter obseruem.

Erraui sicut ovis, quae periit ] Ego miser dum longius a te recedo, procul a recta uiuendi uia decerraui, neque sponte redire possum, unde digressus sum. At tu Domine pro tua infinita bonitate quae re seruum tuum, ne tanquam ovis imbecilla luporum praeda existam, meq; reduc ad herbas illas saluberrimas, & prata latissima, ubi propter fontes, & riuos gregem tuum scientia pascis, & iudicio. Hoc ego fretus misericordia tua fidenter oro, quia nec dum praecepta tua sum oblitus: quanquam illa, nisi me adiuuas, sequi, & seruare non possum.

#### ARGVMENTVM PSAL. CXX.

Queritur uir sanctus se patria pulsum inter homines improbos, & fraudulentos uitam agere.

# EXPLANATIO

Canticum graduum, psal. CXX.

Ad dominum cum tribularer, clamaui, & exaudivit me.

Domine libera animam meam à labijs mendacij, & à lingua dolosa:

Quid dabit tibi, aut quid adiiciet tibi lingua dolosa?

Sagittæ potētis acutæ cum carbonibus iuniperorū.

Hei mihi quòd incolatus meus apud Mesech est, & habito cum tabernaculis Cedar, multum incola fuit anima mea.

Apud eos, qui oderunt pacem. Ego uir pacis sum, & cum loquor (de pace) ipsi ad bellum (incitantur.)

## EXPLANATIO.

Canticum graduum ] Cur hic psalmus, & XIII, qui deinceps sequuntur, appellantur Cantica graduum, uel ascensionum, nihil certi à quoquam afferri uideo, fabulis autem Iudæorum nos minime delectamur.

Domine libera animam meam ] Exponit, quid petierit à Deo, cum magnis clamoribus eius opē imploraret.

Quid dabit tibi ] Orationem ad eum conuertit, qui mendacys, & fraudibus delectabatur. Quem (inquit) fructum, quod' ue emolumentum tibi afferebat lingua fraudulenta?

Sagittæ potentis acutæ ] Comparat mēda-



cia, & calumnias hominum impiorum sagittis ab homine ualentissimo contortis, intima quæque penetrantibus; item prunis iuniperi, quas aiunt & urere uehementius, & ignem retinere diutius.

Hei mihi quod ] Homines illos impios, & fraudulentos, apud quos exulabat, comparat Ismaelitis hominibus immanibus, & truculentis, qui partem Arabiæ incolunt, & omnia incursionibus, & latrocinij infesta habent. Cedar Ismaelis, Mesechus Iapheti filius fuit.

#### ARGVMENTVM PSAL. CXXI.

Docet, in periculis ad misericordiam Dei confugiendum esse, qui solus & possit, & uelit nos incolumes conseruare, & omnibus bonis augere, & cumulare.

#### Canticum graduum, psal. CXXI.

Leuaui oculos meos in montes, unde ueniet auxilium mihi.

Auxilium meum a Domino, qui fecit coelum, & terram.

Non dabit in commotionem pedem tuum, neque dormitabit, qui custodit te.

Ecce non dormitabit, neque dormiet, qui custodit Israel.

Dominus custodit te, Dominus umbra tua ad manum dexteram tuam.

Per diem sol non uret te, neque luna per noctem.

# EXPLANATIO

Dominus custodit te ab omni malo, custodiet animam tuam Dominus.

Dominus custodiet introitum tuum, & exitum tuum ex hoc nunc & usque in seculum.

## EXPLANATIO.

Leuavi oculos meos in montes ] Alij coelum sic appellari putant, alij montes illos designari, ubi posita erant Hierosolyma: uiri enim sancti cum peregre Deum precarentur, ad eam partem ora conuertere solebant, quod in ea urbe foret templum illud augustissimum, in quo se coli iusserat Deus.

Auxilium meum ] Ille, cuius auxilium ex peeto, coelum, & terram creauit, atque ex nihilo fecit ut existerent uniuersa: quid igitur mihi nocere possit illo propugnante, qui uitam, & mortem, & cetera omnia in sua ditione, ac potestate habet?

Non dabit in commotionem pedem tuum ] haec sunt uerba plena fiducia, quibus animum suum confirmat in periculo. Non sinet (inquit) Deus uacillare constantiam tuam: ille tibi tantum animi, & fortitudinis prestabit, ut omnia pericula, omnesq; difficultates facile superaturus sis.

Neque dormitabit ] Sape quidem Deus dormire nobis uidetur, neque cernere, quae gerantur in terris, cum uexamur ab improbis: sed ille noctes, & dies excubat, uigilatq; pro salute omnium piorum, neque patitur quicquam illis euenire, quod ad uitam beatam utile non sit.

Dominus umbra tua ] Haerebit (inquit) Do

minus semper ad latus tuum, & instar umbraculi te defendet ab aestu omnium malorum, ut nihil tibi neque interdiu, neque noctu nocere possit.

Dominus custodiet introitum tuum, & exitum tuum. Id est, siue domi fueris, siue foris, ille semper erit salutis tue fidissimus custos, & propugnator. Utinam misericordiae parens hanc gratiam nobis faciat, ut de sua providentia, & benignitate erga nos ea sentiamus, quæ continentur his uersibus, profecto tantus amor iustissimè in animis nostris aduersus illum exardescet, tantaq; lætitia, & quies, & securitas consequetur, ut status noster penè cum coelestium uita possit comparari.

## ARGVMENTVM PSAL.

## CXXII.

Solebant omnes tribus Hierosolyma conuenire ter in singulis annis ad agendos dies festos, & solennes: inducit igitur homines pios gratulantes, uenisse tempus eiusmodi conuentus, & urbem sanctam laudibus celebrantes, illiq; omnia bona precantes.

## Canticum graduum, psalmus CXXII.

Lætatus sum, cum dicerent mihi, in domum Domini ibimus.

Stabunt pedes nostri in portis tuis Hierusalem.

Hierusalem ædificata est ut ciuitas, quæ coniuncta est sibi ipsi simul.

Illuc ascendunt tribus, tribus Domini, testimo-

## E X P L A N A T I O

nium Israel ad confitendum nomini Domini ,

Quia illic constitutæ sunt sedes ad iudicium , sedes domus David .

Precamini pacem ipsi Hierusalem, sit bene ijs, qui diligunt te .

Sit pax in mœnibus tuis , & abundantia in domibus tuis .

Propter fratres meos, & proximos meos nunc precabor pacem tibi ,

Propter domum Domini Dei nostri quæsuâ bona tibi .

## E X P L A N A T I O.

Hierusalem ædificata est ] Ait in ædificanda urbe sancta eam descriptionem, & elegantiam adhibitam esse, quæ convenit urbibus, illamq; pace, & civium concordia florentem esse, illuc convenire omnes tribus ad colendum, & venerandum Deum: quod quidem oraculo diuino præceptum est Israeli, id est, genti Hebrææ: ibi iudicia exerceri, & solium regni constitutum esse: quare optandam esse pacem, & omnium bonorum affluentiam huic præstatiissimæ civitati, in qua nititur pax, & salus cæterarum civitatum terre Iudææ .

## A R G V M E N T V M   P S A L .

### C X X I I I .

Homines pijs ab impijs oppressi misericordiam Domini implorant .

## Canticum graduum, CXXIII.

Ad te leuavi oculos meos qui habitas in cœlis .

Ecce sicut oculi seruorum ad manus dominorum suorum ,

Sicut oculi ancillæ ad manus Domini suæ, ita oculi nostri ad Dominum Deum nostrum, donec misereatur nostri .

Miserere nostri Domine, miserere nostri, quia multum repleti sumus despectione ,

Quia multum repleta est anima nostra derisione abundantium , & despectione superborum .

## EXPLANATIO.

Ecce sicut oculi seruorum ] Elegantissima similitudo est , quæ naturam ueræ pietatis penè oculis subiicit: ut enim seruus ui potentioris oppressus fidem, & præsidium Domini implorat, in unum illum spectat, neque aliud ullum se putat habere perfugium, ita uir pius, qui se in seruitutem Deo sancte dicauit, atque omnem spem suam in illius benignitate reposuit, cum uexatur ab impijs, & importunis hominibus, ad misericordiam sanctissimi numinis confugit, Deum intuetur, is est unus, in quo nitatur eius salus, cetera omnia præsidia pro nihilo habet .

Donec misereatur nostri ] Ita se gerit uera pietas in rebus aduersis, est enim perferens moræ, neque oculos a Deo deijcit, aut orare intermittit, quoad misericordiam clementissimi numinis exoret :

## E X P L A N A T I O

ceteri nisi quamprimum obtinent , quæ uolunt , ad præsidia infirmissima se conuertunt , & quem honorem soli Deo tribuere debebant , ut illi considerent , eum honorem ad homines , atque alias res caducas , & inanes transferunt , quæ maxima est impietas .

### A R G V M E N T V M   P S A L .

#### C X X I I I .

Gens sancta præsentis periculo mortis liberata gratias agit Deo .

Canticum graduum, psalmus CXXIII.

Nisi Dominus fuisset in nobis , dicat nunc Israel ,  
nisi Dominus fuisset in nobis ,

Cum exurgeret homines in nos , tunc uiuos deglutissent nos ,

Cum irasceretur furor eorum in nos , tunc aqua absorbuisset nos ,

Torrents transisset super animam nostram , tunc transissent super animam nostram aquæ intolerabiles .

Benedictus Dominus , qui non dedit nos in prædam dentibus eorum ,

Anima nostra sicut passer erepta est de laqueo uentantium , laqueus contritus est , & nos liberati sumus .

Adiutorium nostrum in nomine Domini , qui fecit cælum , & terram .

## E X P L A N A T I O .

Nisi Dominus      ]      Hic hymnus elegantissimus

est, & sanctitatis plenus: uir enim pius longinquè tē-  
poris usu, & periclitatione doctus nullam uim ha-  
bere humana præsidia, acceptum refert uni Deo,  
quod ciuitas sancta ab imminente exitio liberata sit.  
comparat autem impetum, & uiolentiam hostium  
impiorum torrentibus incitatis, crudelitatem feritati  
belluarum, insidias laqueis aucupum, populum uero  
simplicem, & imbecillum auiculæ, quæ tamen ne-  
que ui, neque dolo potuerit opprimi, tantum in o-  
mnes partes ualeat pietas uni Deo confidens.

## ARGVMENTVM PSAL. CXXV.

Describit securitatem eorum, qui omnes spes suas  
collocant in Deo.

## Canticum graduum, psalmus CXXV.

Qui confidunt in Domino sicut mons Sion immo-  
bilis in seculum manens. Hierusalem

Montes habet in circuitu suo, & Dominus est in  
circuitu populi sui, ex hoc nunc, & usque in seculū.

Quid non relinquet Dominus uirgam peccatorū  
super sortem iustorum, ut non extendant iusti ad ini-  
quitatem manus suas.

Benefac Domine bonis, & rectis corde,

Declinātes autem ad prauitates deducet Dominus  
cum operantibus iniquitatem. pax super Israel.

## EXPLANATIO.

Qui confidunt in Domino, sicut mons Sion.]

# EXPLANATIO

Ille pure, ac sincere Deo confidit, qui perspecta cæterarum rerum imbecillitate se, ac sua omnia in illo ponit, quod nemo sine instinctu diuino facere potest. qui uero se tam alte extulit, eum omnibus humanis casibus superiorem esse, necesse est, atque animum ipsius uel ruenæ cælo immobilem persistere. quæ uis enim ad illum aspirare possit, qui se, ac sua omnia in Deum abdidit? sed hanc fiduciæ præstantiam non ita multi consequuntur: quo autem quisque ad illam propius accedit, eo plus fortitudinis, constantiæ, ac securitatis acquirit. Hæc ita esse, qui harum rerum usum habent, certo sciunt, cæteri fabulas putant.

Hierusalem montes habet in circuitu ]

Quemadmodum (inquit) Hierosolyma circumcirca montibus muniuntur, sic Dominus præsidio suo populum suum sepit, ac munit.

Quia non relinquet ] Tutabitur Dominus gentem suam; neque permittet, pios tyrannide impiorum oppressos teneri, ne forte legibus, & iudicijs extinctis, & religione conculcata etiam ipsi ad peccata, & scelera impellantur exemplo, & profleritate improborum incitati.

## ARGUMENTVM PSAL. CXXVI.

Describit lætitiã gentis Hebrææ, è Babylone domum redeuntis.

Canticum graduum, psalmus CXXVI.

Cum conuerteret Dominus captiuitatem Sion, fa



Eti sumus sicut somniantes ,

Tunc repletum est risu os nostrum , & lingua nostra exultatione .

Tunc dicebant inter gentes , magnifice fecit Dominus cum istis ,

Magnifice fecit Dominus nobiscum , facti sumus letantes .

Reduc Domine captiuitatem nostram sicut torrentes in austro .

Qui seminant in lacrimis , in exultatione metent ,  
Euntes ibant , & flebant mittentes semina sua ,

Venientes autem ueniunt cum exultatione , portantes manipulos suos .

#### EXPLANATIO.

Sicut somniantes ] Cum liberati seruitute illa acerbissima rediremus in patriam , tanta erat lætitiæ magnitudo , eaq; res tam nobis inopinata contingerat , ut somniare nos putaremus , non re ipsa tanta uoluptate , ac iucunditate potiri .

Magnifice fecit Dominus cum istis ] Tunc homines uulgo admirantes dicebant , magna profecto sunt , quæ Deus facit pro salute , & commodis istorum .

Reduc Domine ] Non omnes Hebræi simul redire in Iudæam ex Babylone , sed partim regnante Cyro , partim Dario , partim Xerse Darij filio . qui igitur primi redierant , precantur Deum pro libertate eorum , qui remanserant , ut scilicet multitudo reuertentium imitetur torrentes abundantes

## E X P L A N A T I O

flante austro : is enim uentus & pluuijs gignendis, & niue liquefacienda torrentes plurimum auget, & magno impetu impellit . Hoc modo explanant Græci hunc uersiculum , & simplicius , opinor , ac melius quàm Hebræi .

Qui seminant in lacrimis ] Comparat lætitiā Hebræorum ab exilio redeūtiū agricolarum gaudio , qui magnam uim frugum perceperint ex agris , in quibus iecerant semina lacrimantes , ac penè desperantes propter sterilitatem soli : seuerant autem homines pijs lacrimantes , cum in exilio illo calamitoso Deum precarentur , & misericordiam eius implorarent , neque ulla calamitate à religionis studio , & pijs actionibus deterrentur : ex qua quidem satisfactione pulcherrimos fructus libertatis , & lætitiæ perceperunt . Hoc idem omnibus pijs contingit : nemo enim Christi discipulus esse potest , nisi crucem suam tollat quotidie , atque illum sequatur : itaque uita Christiani lacrimis redundat , id est , rebus asperis , & calamitosis , sed quo maior lacrimarum sementis facta fuerit , hoc uberior lætitiæ , & iucunditatis futura est messis . sunt autem omnia , quæ mala corporis , & fortune uulgo nominantur , breuissima , bona uero , quæ fortibus , & patientibus parata sunt in cœlo , sempiternis seculorum ætatibus manent .

## A R G V M E N T U M   P S A L .

### C X X V I I .

Docet , & domus , & familiæ , & ipsius ciuitatis salutem , & custodiam in unius Dei prouidentia constitutam

stitutam esse, & ab eodem uictum, & cultum omnibus suppeditari.

Canticum graduum, psalmus CXXVII.

Nisi Dominus edificauerit domum, in uanum laborauerunt, qui edificant eam.

Nisi Dominus custodierit ciuitatem, frustra uigilat qui custodit eam.

Vanum est, uos ante lucem surgere, & tardare sessionem manducantes panem dolorum.

Sic dabit dilectis suis somnum, ecce hereditas Domini filij, merces fructus uentris.

Sicut sagitta in manu potentis, ita filij iuuentutis.

Beatus uir, qui impleuit pharetram suam ex ipsis, non confundentur, cum loquentur inimicis suis in porta.

EXPLANATIO.

Nisi Dominus edificauerit domum ] Cum dicit edificationem domus, ex consuetudine lingue Hebraeae omnia complectitur, quae pertinent ad tuendam, & amplificandam rem priuatam, itaque sensus est, nisi Dominus & liberos, & familiam, & honores, & diuitias largiatur, inaniter laborant, qui rebus his comparandis student.

Nisi Dominus custodierit ciuitatem ] Significat, omnem salutem, & rectam administrationem rerum publicarum unius Dei ope, ac praesidio niti, sine quo nihil neque domi, neque belli feliciter

## E X P L A N A T I O

administrari potest, ut tam publice, quàm priuatim summa ueneratione, ac pietate Deus colendus sit.

Vanum est uobis ] Vos admoneo, quicumque uobis uictum summa cum sollicitudine comparatis, frustra surgitis ante lucem ad labores obeundos, frustraquē illos protrahitis ad multam noctem, nisi Dominus uos inuet.

Sic dabit dilectis ] Concludit, ut omnes labores, & conatus hominum sine auxilio Dei sunt irriteri, sic illo fauente hominibus p̄is quietem, & tranquillitatem contingere, & summa cum facilitate omnia ad uictum, & cultum necessaria suppeditare. cuius rei magnifica promissio extat in Leuitico, cap. XXVI.

Ecce hæreditas Domini filij ] Filij sunt hæreditas Domini, id est dono, & liberalitate Dei nobis contingunt, & fructus uentris, id est foecunditas mulierum est merces, & munus eiusdem Dei: mercedem enim appellant Hebræi etiam quæ ultro dono dantur. Comparat autem uim, & robur filiorum, quos Dominus donat, sagittis, quas iacit homo ualentissimus: & ait, illum esse beatum, qui ijs sagittis, id est, liberis abundat: neque enim eiusmodi pater, & filij afficientur ignominia, cum disceptandum erit cum aduersarijs in porta, id est, in iudicio: nam apud Hebræos, ut alio loco dictum est, iudicia exercebantur ad portas ciuitatum. significat autem, illos ea integritate, ac innocentia fore, ut nullo negotio oblatas criminationes depulsuri sint. Quod uero hos appellat filios inuentutis, hoc intelligit, Deum cul

toribus suis mature liberos donare, quo possint eos re-  
 ete, ac pie instituere, & diutius eorum uirtutibus  
 frui: quæ quidem non contingerent ijs, qui iam senes  
 liberos procrearent.

## ARGVMENTVM PSAL.

## CXXVIII.

Prædicat, in summa rerum, prosperitate uitam  
 acturum, quicumque Deum pie, sancteq; coluerit.

Canticum graduum, psal. CXXVIII.

Beati omnes, qui timent Dominum, qui ambulāt  
 in ujs eius.

Labores manuum tuarum quia manducabis, bea-  
 tus es, & bene tibi erit.

Vxor tua sicut uitis abundans in lateribus domus  
 tuæ,

Filij tui sicut nouellæ oliuarum in circuitu mensæ  
 tuæ.

Ecce sic benedicetur homo, qui timet Dominum.

Benedicet tibi Dominus ex Sion, & uidebis bona  
 Hierusalem omnibus diebus uitæ tuæ.

Et uidebis filios filiorum tuorum, pacem super  
 Israel.

## EXPLANATIO.

Labores manuum ] Id est, non frustra la-  
 borabis in colendis agris, sed magnos fructus inde  
 percipies, & perceptis lætus, tranquilluscq; perfrueris.

# EXPLANATIO

## ARGUMENTVM PSAL.

### CXXIX.

Gratias agit Deo , quod populum suum ab impijs  
semper oppugnatum saluum , incolumemq; semper  
conseruauerit .

Canticum graduum , psal. CXXIX.

Sæpe oppugnauerunt me à iuuentute mea , dicat  
nunc Israel ,

Sæpe oppugnauerunt me à iuuentute mea , attamen  
non præualuerunt mihi .

Supra dorsum meum arauerunt arantes , prolon=  
gauerunt sulcum suum .

Dominus iustus concidit funes impiorum , confun=  
dantur & conuertantur retrorsum omnes , qui ode=  
runt Sion .

Fiant sicut herba tectorum , quæ priusquam euel=  
latur , exaruit .

De qua non impleuit manum suam , qui metit , &  
sinum suum qui manipulos colligit .

Et non dixerunt , qui præteribant , benedictio Do=  
mini super uos , benediximus uobis in nomine Domini .

## EXPLANATIO .

Attamen non præualuerunt mihi ] Id est ,  
non potuerunt me extinguere .

Supra dorsum meum ] Significat his uer=  
bis contumelias , & uerbera , quibus affectus fuerat

à Babylonijs in durissima illa seruitute : cuius vinculis se exolutum esse à Domino , gratulatur .

Fiant sicut herba tectorum ] Herbæ , quæ nascuntur in tectis , propter sterilitatem soli , antequam ad iustam magnitudinem perueniant , & fructum aliquem ferant , ardore solis exarescunt : sic igitur impios de medio tolli , & immatura morte precatur extingui .

Et non dixerunt ] Viatores , si cernunt segetes uberes , & lätas , laudare solent diligentiam agrorum , & bene precantur metentibus illas , ijs uero , qui herbam tectorum metunt , nemo bene precari solet .

## ARGVMENTVM PSAL.

## CXXX.

Precatio est hominis conscientia peccatorum grauissime cruciati , seq; misericordiæ diuinæ fiducia consolantis .

Canticum graduum , psalmus CXXX.

De profundis clamaui ad te Domine , Domine exaudi uocem meam .

Fiant aures tuæ intendentes in uocem deprecationis meæ .

Si iniquitates obseruaueris Domine , Domine quis sustinebit ?

Quia apud te propitiatio est , propterea timeris , expectaui Dominum ,

## E X P L A N A T I O

Expectauit anima mea, & in uerbo eius speraui  
anima mea Dominum (expectat)

Magis quàm custodes mane, quàm custodes ma-  
ne. speret Israel in Domino,

Quia apud Dominum misericordia, & copiosa  
apud eum. redemptio,

Et ipse redimet Israel ex omnibus iniquitatibus  
eius.

## E X P L A N A T I O.

De profundis ] Profunda, & barathrum  
uocat ingentes illas mortis angustias, atque acerbita-  
tes, quas animus eius sustinebat ob conscientiam pec-  
catorum, et metum iræ diuinæ.

Si iniquitates obseruaueris ] Affirmat, eos  
etiam, qui sanctissimi iudicantur, graues poenas  
daturus, si Deus in quocunque animaduertere uelit pro  
eo ac cuiusque peccata promerentur. itaque diuus  
Augustinus hunc locum explanans ita scribit: Non  
dixit, ego non sustinebo, sed quis sustinebit? uidit  
enim propè totam uitam humanam circūlatrari pec-  
catis suis, accusari omnes conscientias cogitationibus  
suis, non inueniri cor castum præsumens de sua iusti-  
tia. si ergo cor castum non potest inueniri, quod præ-  
sumat de sua iustitia, præsumat omnium cor de mise-  
ricordia Dei, & dicat Deo, Si iniquitates obseruaue-  
ris Domine, Domine quis sustinebit? quæ autem spes  
est? quoniam apud te propitiatio est. & quæ est ista  
propitiatio, nisi sacrificium? & quod est sacrificium,  
nisi quod pro nobis oblatum est? sanguis innocens fu-



sus delenuit omnia peccata nocentium, pretium tantū datum redemit omnes captiuos de manu captiuantiū inimici. ergo est apud te propitiatio: nam si non esset apud te propitiatio, si iudex solum esse uelles, & misericors esse nolles, & obseruares omnes iniquitates nostras, & quæres eas, quis sustineret? quis ante te staret; & diceret innocens sum? quis staret in iudicio tuo? Spes ergo una est, quoniam apud te est propitiatio. Hæc diuus Augustinus.

Quia apud te propitiatio ] Id est, propterea quod homines norunt clementiam, & infinitam misericordiam tuam, idcirco reuerentur, & colunt sanctissimum numen tuum. quod si in peccatis condonandis inexorabilis esses, nemo profecto te ex animo ueneraretur, sed omnes ferè tanquam tyrannum aliquem horrerent. Timorem autem appellari in literis sanctis pro reuerentia, & pietate aduersus Deum, sæpe iam diximus.

Et in uerbo eius speraui ] Id est, in promissionibus eius omnem meam spem locatam habeo. promisit autem Dominus, se ueniam daturum resipiscantibus; & ad misericordiam suam confugientibus opem allaturum.

Anima mea Dominum magis quàm ] Animus (inquit) meus ardentiore desiderio expectat auxilium Dei, quàm uigiles nocturni tempus matutinum, quàm uigiles inquam nocturni, qui somno grauati lucem audivissime expectant, quo possint corpora defatigata tradere quieti. sic Abrahamus Esdra uir doctissimus inter Hebræos interpretatur hunc locum, &

# EXPLANATIO

eleganter quidem , ni fallor . Ista autem geminatio uerborum & uim habet & leporem , eaq; exornatio usurpatur etiam alijs in locis huius libri .

Speret Israel in Domino ] In certamine cōscientiæ , cum lex , Diabolus , & sensus peccati nos accusant ad tribunal Dei , quod maxime quidem euenit imminente morte , difficillimum est desperationi resistere , sed optime sperandum est , neque uerendum , si nos poeniteat , quin summus ille rector omnium delictorum gratiam faciat : infinitis enim partibus maior est misericordiā illius , quā totius humani generis improbitas , & copiosa apud eum est redemptio : quamobrem si captiuus es , implora confidenter benignitatem Dei , ille sui sanguinis pretio redimet te , atque ab omni uitio , & impuritate liberatum traducet in regnum suum .

## ARGVMENTVM PSAL.

### CXXXI.

Monet nos exēplo suo , fugiendam esse superbiam , & importunitatem , atque in sola Dei misericordia ssem ponendam esse .

### Canticum graduum , psal. CXXXI.

Domine non est exaltatum cor meum , neque elati sunt oculi mei ,

Neque ambulauī in magnis , neque in mirabilibus super me ,

si non depressi , & humiliāui animam meam .

Qualis ablaētatus erga matrem suam, qualis ablaētatus, talis in me anima mea.

Speret Israel in Domino ex hoc nunc, & usque in seculum.

## EXPLANATIO.

Neque ambulavi ] Nihil unquam conatus sum, quod uires, & uita mea statum superaret, id quod arrogantes facere solent.

Si non depressi ] Oratio est imperfecta, cuiusmodi oratione uti solent scriptores Hebræi, cum adhibita execratione aliquid asseuerare uolunt. eam sic explere, atque interpretari possumus, nisi modestiam, atque animi summissionem semper colui, fac Domine grauissimas arrogantiae poenas luam.

Qualis ablaētatus ] Cum uellet ostendere, quam demisse, ac humiliter de se ipso sentiret, elegantissime animum suum comparauit infanti, quem modo mater lacte alere desijt: ut enim ille totus in materna charitate conquiescit, propterea quod neque per ætatem corpus curare, neque sine alterius adminiculo pedibus insistere ualet, ita uir sanctus tota cogitatione pendebat ex Deo, sine cuius auxilio se neque rectū aliquid uel conari, uel cogitare, neque ipsum quidem spiritum ducere posse intelligebat. Hæc est illa sancta animi summissio, quæ hominem Deo, Deumq; homini charissimum facit, utrūque inter se arētissimo amoris uinculo coniungens.

Speret Israel in Domino ] Hortatur populum, ut exemplo suo omnem spem salutis ponat in mi

# EXPLANATIO

sericordia Dei.

## ARGUMENTVM PSAL.

CXXXII.

Describit studium Dauidis in parando loco, ubi templum edificaret. Inducitur etiam Deus loquens, ac promittens, familiam Dauidis sempiterno regno potituram. quod quidem perfectum est CHRI-  
S T O rege coelitum, atque hominum constituto.

Canticum graduum, psalmus CXXXII.

Memento Domine Dauid, & omnis mansuetudinis eius,

Qui iurauit Domino, uotum uouit Deo Iacob,  
Si introiero in tabernaculum domus meae, si  
ascendero in lectum strati mei,  
Si dederō somnum oculis meis, & palpebris meis  
dormitationem,

Donec inueniam locum Domino, tabernaculum  
Deo Iacob.

Ecce audiuiimus eum in Ephrata, inuenimus eum  
in campis syluae.

Introibimus in tabernaculum eius, adorabimus ante  
scabellum pedum eius.

Surge Domine in requiem tuam tu, & arca for-  
titudinis tuae,

Sacerdotes tui induantur iustitia, & sancti tui  
exultent.

Propter Dauid seruum tuum ne auertas faciem

CHRISTI tui.

Iurauit Dominus David ueritatem, & non frustrabitur eam, de fructu uentris tui ponam super sedem tuam.

Si custodierint filij tui testamentum meum, & testimonia mea, quæ docebo eos,

Etiam filij eorum usque in seculum sedebunt super sedem tuam.

Quoniam elegit Dominus Sion, desiderauit eam in habitationem sibi,

Hæc requies mea in seculum seculi, hic habitabo, quoniam concupiui eam.

Victum eius benedicens benedicam, pauperes eius saturabo panibus.

Sacerdotes eius induam salutare, & sancti eius exultatione exultabunt.

Illic germinare faciam cornu David, parauit lucernam CHRISTO meo.

Inimicos eius induam confusione, super ipsum autem efflorescit diadema eius.

## EXPLANATIO.

Memento Domine   Populum inducit loquentem.

Votum nouit Deo   Existimant explanatores Hebræi, hoc uotum à Davide fuisse nuncupatum, quo tempore pestilentia grassabatur in populum. cuius rei mentio fit in libro primo Paralip. Eodem loco scriptum est, uatem, cui nomen erat Gad, iussu Dei mandasse Dauidi, ut in area ornæ lebusæi aram adia-

ficaret ad sacrificia facienda . id fortasse accidit, cum David esset Bethleemi, quam urbem etiam Ephratam appellabant, & propterea subiungitur, Ecce audiui mus de eo loco in Ephrata: uerisimile est enim, Dauidem cogitauisse, locum illum fore aptissimum ædificando templo, quem locum ipse Deus indicasset ad extruendam aram. quod eius consilium comprobauit ostentum illud insigne, cum Deus de cœlo demisset ignem, qui hostiam consumeret: legimus enim, hac rei nouitate commotum Dauidem eum locum templo destinauisse, atque ob eam causam ex tota Iudæa operarios coegisse, quorum partim lapides caderent, partim cæsos eò comportarent. hoc significare uidetur uir sanctus, cum dicit, inuenimus eum in campis syluæ. sic enim nominatam existimant aream ornæ Iebusæi.

Si introiero ] De hac iurandi formula dictum est in explanatione superioris psalmi: dicit autem, Dauidem iureiurando confirmasse, se neque limen domus suæ intraturum, neque corpus quieti traditurum, antequam aream ædificando templo reperisset.

Introibimus in tabernaculum. ] Populus pollicetur, se celebraturum, & pie, sancteq; ueneraturum templum Dei, cui ædificando iam inuentus erat locus. Appellat autem arcam fœderis scabellum pedum Dei, ut etiam in psalmo XCIX.

Surge Domine in requiem tuam ] Id est, relinque Domine Gabaonem, teq; recipe in locum perpetuæ quieti tuæ destinatum. nam antequam ædifi-

caretur templum, nullum certum domicilium habebat arca foederis.

Propter David ] Precatur populus pro Salomone filio Davidis. ne auertas (inquit) faciem CHRISTI tui, id est, ne regis nostri, qui seruus tuus est, preces repudia, ne ue illum tutela, & presidio tuo spoliatum à te reijce. hac enim dicendi figura utitur hebraea lingua in hanc sententiam.

Hæc requies mea ] Significat, se non amplius mutaturum locum, sed uates sanctus cum hæc scriberet, oculis mentis coelestem Sionem intuebatur, id est, ecclesiam CHRISTI, in qua Deus perpetuum domicilium sibi collocauit.

Sacerdotes eius induam salutari, ] Id est, uirtute, ac pietate: omnis enim salus nostra posita est in his rebus.

Illic germinare faciam ] Significat, nunquam extinctum iri splendorem, & gloriam familie Davidis, & regnum eius in posteros propagandum esse.

## ARGVMENTVM PSAL.

### CXXXIII.

Commendat concordiam, & sanctam animorum inter se coniunctionem.

Canticum graduum, psalmus CXXXIII.

Ecce quàm bonum & quàm iucundum habitare fratres in unum.

## E X P L A N A T I O

Sicut unguentum optimum super caput ( effu-  
sum ) quod descendit in barbam , barbam Aaron ,

Quod descendit in oram uestimentorum eius , si-  
cut ros Hermon , qui descendit in montes Sion .

Quoniam illic mandauit Dominus benedictionē ,  
& uitam usque in seculum .

## E X P L A N A T I O .

Sicut unguentum ] Comparat suauitatem  
concordiæ unguento suauissimo , quo sacerdotes , &  
uasa templi illinebantur , de quo in Exodo .

Sicut ros Hermon ] Comparat concordiam  
rori , qui montem Hermonem , & loca montana Sio-  
nis fecunda , & feracia reddit : uerbum autem ros  
in hoc uersu repetendum est hoc modo , sicut ros Her-  
moni , sicut ros , qui descendit in montes Sion .

Quoniam illic ] Ostendit , se iure concor-  
diam laudibus efferre , ac rori comparare , quo terra  
fit fecundior : ubi enim homines se concordia amici-  
tia , & sancta charitate complectuntur , ibi Deus  
suppeditat omnium bonorum copiam , & uitam sem-  
piternam .

## A R G V M E N T V M   P S A L .

### C X X X I I I I .

Hortatur Leuitas , & alios uiros religiosos , qui  
noctu uigilias agebant in templo , ut precibus , atque  
hymnis Deum uenerentur .



Canticum graduum, psalmus CXXXIIII.

Ecce benedicite Dominum omnes serui Domini,  
 Qui statis in domo Domini,  
 In noctibus extollite manus uestras ad sancta, &  
 benedicite Dominum,  
 Benedicat te Dominus ex Sion, qui fecit cælum,  
 & terram.

# EXPLANATIO.

Ad sancta ] Id est, uersus eas templi par-  
 tes, quæ uocantur sancta sanctorum.

## ARGVMENTVM PSAL. CXXXV.

Hoc hymno prædicat potentiam Dei, eiusq; præci-  
 piam benignitatem erga gentem Hebraeam.

Alleluya, psalmus CXXXV.

Laudate nomen Domini, laudate serui Domi-  
 num,

Qui statis in domo Domini, in atrijs domus Dei  
 nostri,

Laudate Dominum, quia bonus Dominus, psallite  
 nomini eius, quoniam suauis.

Quoniam Iacob elegit sibi Dominus, Israel in pos-  
 sessionem sibi.

Quia ego cognoui, quod magnus est Dominus,  
 & Deus noster præ omnibus Dys.

# EXPLANATIO

Omnia , quæcunque uoluit , Dominus fecit in coe-  
lo , & in terra , in mari , & in omnibus abyssis ,  
Educens nubes ab extremo terra , fulgura in plu-  
uia fecit ,

Qui producit uentos de thesauris suis , qui per-  
cussit primogenita Aegypti ab homine usq; ad pecus ,  
Et misit signa , & prodigia in medio tui Aegypte ,  
in Pharaonem , & omnes seruos eius ,

Qui percussit gentes multas , & occidit reges  
fortes ,

Seon regem Amorraeorum , & Og regem Basan ,  
& omnia regna Chanaan ,

Et dedit terram eorum hereditatem , hereditatem  
Israel populo suo .

Domine nomen tuum in æternum , Domine me-  
moriam tuam in generationem , & generationem ,

Quia iudicabit Dominus populum suum , & in  
seruos suos erit placabilis .

Simulacra gentium argentum , & aurum , ope-  
ra manuum hominum .

Os habent , & non loquentur , oculos habent , &  
non uidebunt ,

Aures habent , & non audient , neque enim est spi-  
ritus in ore ipsorum ,

Similes illis fiant , qui faciunt ea , & omnes , qui  
confidunt in eis .

Domus Israel benedicite Domino , domus Aaron  
benedicite Domino ,

Domus Levi benedicite Domino , qui timetis Domi-  
num , benedicite Domino ,

Benedictus

Benedictus Dominus ex Sion, qui habitat in Hierusalem. Alleluja.

## EXPLANATIO.

Educens nubes ab extremo terræ ] Extremum terræ appellat terram ipsam, quæ est ultima pars mundi. sic interpretatur Abrahamus Esdra. uel extremum terræ uocat ipsa uiscera terræ. constat autem, nubes cogi ex terræ exhalationibus.

Fulgura in pluuiam fecit ] Hoc tãquam admiratione dignum commemorat, quòd Deus coniungat ignem cū aqua, neque tamen altera res alteram perdat.

Producit uentos de thesauris suis ] Thesauros appellat loca occulta, atque abdita, unde exire uidentur uenti.

Iudicabit Dominus populum suum ] Id est, illum suo patrocínio tuebitur, ac reget.

ARGVMENTVM PSAL.  
CXXXVI.

Argumentum huius hymni est idem ferè atque superioris.

Alleluja, psalmus CXXXVI.

Confitemini Domino, quoniam bonus, quoniam in seculum misericordia eius.

Confitemini Deo Deorum, quoniam in æternum

*miserericordia eius .*

*Confitemini Domino Dominorum , quoniam in æternum misericordia eius .*

*Qui facit mirabilia magna solus , quoniam in æternum misericordia eius .*

*Qui fecit coelos in intellectu , quoniam in æternum misericordia eius .*

*Qui extendit terram super aquas , quoniam in æternum misericordia eius .*

*Qui fecit luminaria magna , quoniam in æternum misericordia eius ,*

*Solem in potestatem diei , quoniam in æternum misericordia eius ,*

*Lunam , & stellas in potestatem noctis , quoniam in æternum misericordia eius .*

*Qui percussit Aegyptum in primogenitis eorum , quoniam in æternum misericordia eius .*

*Qui eduxit Israel de medio eorum , quoniam in æternum misericordia eius ,*

*In manu potenti , & brachio extenso , quoniam in æternum misericordia eius .*

*Qui diuisit mare rubrum in diuisiones , quoniam in æternum misericordia eius .*

*Et eduxit Israel per medium eius , quoniam in æternum misericordia eius ,*

*Et excussit Pharaonem , & exercitum eius in mari rubro , quoniam in æternum misericordia eius .*

*Qui traduxit populum suum per desertum , quoniam in æternum misericordia eius ,*

*Qui percussit reges magnos , quoniam in æternum*

num misericordia eius ,

Et occidit reges fortes , quoniam in æternum misericordia eius ,

Seon regem Amorraeorum , quoniam in æternum misericordia eius .

Et Og regem Basan , quoniam in æternum misericordia eius ,

Et dedit terram eorum hæreditatem , quoniam in æternum misericordia eius ,

Hæreditatem Israel seruo suo , quoniam in æternum misericordia eius ,

Quia in humilitate nostra memor fuit nostri , quoniam in æternum misericordia eius ,

Et redemit nos ab inimicis nostris , quoniam in æternum misericordia eius ,

Qui dat escam omni carni , quoniam in æternum misericordia eius ,

Confitemini Deo cœli , quoniam in æternum misericordia eius ,

Confitemini Domino Dominorum , quoniam in æternum misericordia eius .

#### EXPLANATIO.

Fecit cœlos in intellectu ] Id est , summo  
artificio , & sapientia .

Solem in potestatem dici ] Id est , ut præ  
esset dici .

In humilitate nostra ] Hoc est , cum ma-  
gnis calamitatibus oppressi iaceremus .

# EXPLANATIO

## ARGVMENTVM PSAL.

### CXXXVII.

Gens Hebræa in Babyloniam adducta commemorat hoc dulcissimo carmine luctum, & maerorem suum, & prædicit excisionem imperij Chaldaeorum.

### Psalmus CXXXVII.

Iuxta flumina Babylonis sedimus, & fleuimus, cum recordaremur tui Sion.

In salicibus in medio eius suspendimus citharas nostras,

Quia illic petierunt à nobis, qui captiuos duxerant nos, uerba cantionum,

Et pro ululatu nostro letitiam, cantate nobis de canticis Sion.

Quo modo cantabimus canticum Domini in terra aliena?

Si oblitus fuero tui Hierusalem, obliuiscatur (artis sue) dextera mea,

Adhæreat lingua mea faucibus meis, si non meminero tui,

Si non posuero Hierusalē in principio letitiæ meæ.

Memor esto Domine filiorum Edon, in die Hierusalem.

Dicentium, exinanite, exinanite usque ad fundamentum in ea.

Filia Babylonis misera, beatus, qui retribuet tibi

retributionem tuam, quam retribuisti nobis.

Beatus qui tenebit, & allidet paruulos tuos ad petram.

## EXPLANATIO.

Et pro ululatu nostro lætitiā ] Cum nos in perpetuo luctu, & lamentis uersaremur, ij petebant à nobis carmina læta, & iucunditatis plena. sed hæc uerba alio quoque modo uerti possunt ex Hebræo propter ancipitem significationem.

Cantate nobis ] Cantate nobis (dicebant Babilonij) de ijs hymnis, quos olim in templo Dei uestri canere solebatis. Nos contra, quo modo possimus animum inducere, ut cantemus hymnos sanctitatis pleæ nos apud exterarum nationes? Nolebant homines religiosi res sanctas dare canibus, & proijcere gemmas ante porcos.

Si oblitus fuero tui Hierusalem ] Si ullo tempore oblitus fuero tui ciuitas sancta, obliuiscatur, & dediscat psallere dextera mea, adhæreat lingua mea faucibus meis, ne possim canere, si non meminero semper tui, si ulla re lætabitur animus meus, antequam Hierosolyma instaurentur, & in antiquum dignitatis locum restituantur.

Memor esto Domine ] Precatur mala Idumæis, qui incitauerat Babilonios contra Hebræos. diē uero Hierosolymorum appellat tempus illud, quo tempore capta, & uastata fuit urbs ab hostibus.

Filia Babilonis misera ] Prædicat calamitatem imminentem Babilonijs, quos Cyrus bello supera-

EXPLANATIO

uit, & maximis incommodis affectit.

ARGUMENTVM PSAL.

CXXXVIII.

Gratias agit Deo pro beneficijs acceptis, eiusq; in se benignitatem prædicat.

Psalmus David, CXXXVIII.

Confitebor tibi Domine in toto corde meo, quoniam audisti uerba oris mei.

In conspectu deorum psallam tibi, adorabo ad templum sanctum tuum, & confitebor nomini tuo.

Propter misericordiam tuam, & ueritatem tuam, quoniam magnificasti super omnia nomen tuum, & uerbum tuum.

In die, quo inuocaui te, exaudisti me, multiplicasti in anima mea fortitudinem.

Confitebuntur tibi Domine omnes reges terræ, quia audierunt uerba oris tui.

Et cantabunt in uis Domini, quod magna est gloria Domini,

Quod excelsus est Dominus, & humilia respicit, & alta à longe cognoscit.

Si ambulauero in medio tribulationis, uiuificabis me, & contra iram inimicorum meorum extends manum tuam, & saluum me faciet dextera tua.

Dominus perficiet pro me, Domine misericordia tua in seculum, opera manuum tuarum ne derelinquas.



## EXPLANATIO.

In conspectu Deorum ] Deos appellat homines claros, & insigni aliqua præditos potestate.

Quoniam magnificasti super omnia ] Celeberrimum (inquit) reddidisti & nomen, & sermonem tuum, alterum propter admirabilem misericordiam, qua communiter uteris aduersus omnes mortales, & separatim aduersus homines pios, & iustitiæ amantes, alterum propter ueritatem, & summam fidem, qua promissa persoluis.

Confitebuntur tibi ] Omnes finitimi reges excitabuntur ad celebrandum augustissimum nomen tuum, cū audierint, quā benigne, quāq; prolixè mihi persolueris, quæ pro tua misericordia promiseras. promiseras autem fore, ut ego humili, & obscuro loco natus, & à potentissimo rege capitali odio multos annos oppugnatus, ad regiam dignitatem peruenirem, & imperium Hebræorum longe, lateq; propagarem. cantabunt itaque reges uias Domini, id est facta, & consilia eius admirabilia; immensam scilicet esse gloriam, & maiestatem summi rectoris, & illum quidem excelsissimum esse, humiles tamen amare, & eos, qui se summis gerunt, in sublime extollere, elatos contra, & de se magnifice sentientes eminus cognoscere, quippe qui indigni sint, qui à Deo amantur, & familiariter ab eo cognoscantur.

## ARGVMENTVM PSAL. CXXXIX.

Prædicat admirabili orationis magnificentia pro-

uidentiam, & cognitionem Dei, cui singula quæque hominum dicta, & facta, & cogitata sint notissima.

Victori, psalmus David CXXXIX.

Domine explorasti me, & cognouisti me, tu cognouisti sessionem meam, & surrectionem meam, Intellexisti cogitationes meas de longe, semitam meam, & accubationem meam circundedisti,

Et omnes vias meas aduertisti, quia non est sermo in lingua mea,

Et ecce tu Domine cognouisti totum illum, retro, & ante tu formasti me, & posuisti super me manum tuam.

Mirabilior est scientia quam ut ego (consequar:) exaltata est, & non potero ad eam (pertingere)

Quò ibo à spiritu tuo, & quò à facie tua fugiā? Si ascendero in cælum, tu illic es: si lectum mihi strauero in inferno, ecce ades.

Si sumpsero alas auroræ, & habitauero in extremitate maris,

Etiam illuc manus tua deducet me, & tenebit me dextera tua.

Si dixero, forsitan tenebræ occultabunt me, nox quoque lux erit circa me,

Nec tenebræ habent tenebras apud te, & nox sicut dies illuminat, similes sunt tenebræ, & lux.

Quia tu possedisti renes meos, operuisti me in utero matris meæ.

Confitebor tibi, quia stupendis, & mirandis mo-

dis formatus sum, mirabilia opera tua, & anima mea id cognoscit nimis.

Non fuit occultum ( ullum ) os meum tibi, quando formabar in occulto, & miro artificio tenebar in inferioribus terræ.

Informem foetum meum uiderunt oculi tui, & in libro tuo omnia ( membra mea ) scripta erant, quæ per dies formata sunt, & nullum in eis.

Quam pretiosæ sunt mihi cogitationes tuæ Deus; quam multiplicatæ sunt summæ illarum,

Dinumerabo eas, & super arenam multiplicabuntur; uigilaui, & adhuc sum tecum.

Si occideres Deus peccatores, uiri sanguinum declinate à me,

Qui loquuntur contra te scelerate, assumunt ( nomen tuum ) frustra hostes tui.

Non ne qui oderunt te Domine, odio habui? & contra inimicos tuos indignor?

Perfecto odio odi illos, inimici facti sunt mihi.

Scrutare me Deus, & cognosce cor meum, explora me, & cognosce semitas meas,

Et uide, si uia iniquitatis in me est, & deduc me per uiam æternam.

## EXPLANATIO.

Tu cognouisti sessionem meam ] Omnia ( inquit ) tibi nota sunt, quæ sedens, stans, ambulans; cubans cogito, atque ago.

Quia non est sermo ] Antequam lingua mea enunciet sensa animi, tu nosti, quid sim locutus

# E X P L A N A T I O

rus, neque id mirandum accidere debet, siquidem tu mihi animum ipsum largitus es, & omnes partes corporis mei finxisti, & tua ipse manu me totum perfecisti. Sed superat captum ingenij mei incredibilis magnitudo scientiæ tuæ, neque ad eius infinitam altitudinem possum aspirare.

Quò ibo à spiritu tuo ] Canit, Deum ubique præsentem esse.

Si sumpsero alas auroræ ] Si mihi contingat uelocitas solis, & auroræ, ut possim uolare ad ultimas oras maris, non tamen occultare me poterò, quin immo tua uis eò me perferet, atque in tua potestate semper ero.

Quia tu possedisti ] Tu Domine omnes intimos sensus, & cogitationes meas in tua potestate habes, neque id mirum, cum tu formaueris me in utero matris meæ, meq; operimento carnis, & cutis obduxeris.

In inferioribus terræ ] Ita uocat uterum matris, quòd sit tanquam antrum abditum terræ.

Informem fixtum meum ] Cum adhuc essem foetus informis, tu me intuebaris, & omnia membra mea, quæ suo quæque tempore formanda, & fingenda erant, tanquam in libro descripta habebas, nullum ex ijs, anteaquam existeret, tibi notum non erat.

Dinumerabo eas ] Si uelim numerare cogitationes, & præclarissima consilia, atque inuenta tua, frustra suscipiatur omnis labor: superant enim multitudinem arenam maris. Ego certe istis consideran

dis semper inuigilo, neque à contemplatione sapientiae  
tuae unquam animum auerto .

Si occideres Deus impios ] Cū uir sanctus  
ob præclaram istam contemplationem providentiæ Dei  
animaduerneret, quàm pie, quàm sancte ille ab om-  
nibus colendus esset, merito excandescit in impios,  
qui illum contemnunt, & pro nihilo habent. O si  
perdas impios, & sanguinarios Deus, facessite inquā  
impij, & sanguinarij à me: non enim ferre possum,  
qui de te Domine impie loquuntur, quiq; nomē tuum  
cum contemptione usurpant. Verbum illud, si, habet  
uim optandi, ut etiam apud Latinos,  
Si nunc se nobis ille aureus arbore ramus,  
Ostendat nemore in tanto, inquit Virgilius;

& Horatius,

O si angulus ille Proximus accedat .

Perfesto odio. ] Id est, maximo, & cui  
nihil accedere possit .

Scrutare me Deus ] Quanquam affirma-  
uerat, se pietatis studiosissimum esse, tamen confides-  
rans, quantæ latebræ sint in animis hominum, uere-  
tur, ne quid fuci, & doli insit in spiritu suo, itaque  
ait, Domine fac quæso periculum innocentiae meæ,  
atque ut aurum, & argentum igne perspiciunt, sic  
tu intimos sensus, & cogitationes animi mei diligen-  
ter explora, & uide, num ego imprudens de recto  
uitæ curriculo defleam, tuq; pro tua infinita boni-  
tate duc me per eam uiuendi rationem, qua itur ad  
uitam beatam, & immortalem. Hic uides, quantum  
intersit inter pium, atque impium. alter, si possis,

# EXPLANATIO

nihil de rebus suis Deum non coelatum uelit, alter non solum non moleste fert singula quæque Deo nota esse, sed etiam in maximi beneficii loco numerat, quod ille omnes latebras, atque intimos recessus animi sui diligenter exploret.

## ARGUMENTVM PSAL. CXL.

Orat auxilium aduersus uim, & insidias inimicorum.

### Victori, psalmus David CXL.

Eripe me Domine ab homine malo, a uiro iniquo eripe me,

Qui cogitauerunt iniquitates in corde, tota die congregantur ad prælia.

Acuerunt linguas suas sicut serpentes, uenenum aspidum sub labijs eorum.

Custodi me Domine de manu peccatoris, & ab hominibus iniquis eripe me.

Qui cogitauerunt supplantare gressus meos, absconderunt superbi laqueum mihi,

Et funibus extenderunt rete, iuxta semitam offendicula posuerunt mihi.

Dixi Domino, Deus meus es tu, exaudi uocem deprecationis meæ,

Domine Deus fortitudo salutis meæ, obumbrasti super caput meum in die belli.

Ne permittas Domine, ut desideria impij fiant, cogitationem eius ne perficias, ne exalcentur.

Caput circumdantium me afflictio labiorum eius  
operiat eum,

Cadant super eos carbones igniti, deiciat eos in fo-  
ueas, ne resurgant.

Vir linguosus non dirigetur in terra, uirum in-  
iustum malum uenabitur ad interitum.

Cognoui quia faciet Dominus iudicium inopis, &  
uindictam pauperum.

Ut que iusti confitebuntur nomini tuo, & habita-  
bunt recti cum uultu tuo.

## EXPLANATIO.

Caput circumdantium me ] Id est, male-  
dicta, & mendacia, & fraudulenta consilia eius,  
qui dux, & impulsor est illorum, qui mihi insidian-  
tur, in ipsius caput recidant.

## ARGUMENTVM PSAL. CXLI.

Preccatur a Deo, eam sibi mentem dari, ut impio-  
rum quamuis potentium gratiam, & amicitiam sem-  
per repudiet, & familiaritatem bonorum amplectatur.  
Inuocatur etiam in aduersarios suos.

## Psalmus David CXLI.

Domine clamaui ad te, festina ad me, intende uo-  
ci meae, cum clamaui ad te.

Dirigatur oratio mea sicut incensum in conspe-  
ctu tuo, eleuatio manuum mearum sacrificium ue-  
spertinum.

## E X P L A N A T I O .

Pone Domine custodiam ori meo , custodi ostium labiorum meorum ,

Ne inclines cor meum in rem malam , ne tentem operationes impias

Cum hominibus operantibus iniquitatem , neque comedam de ijs , quæ eis sunt iucunda .

Percutiat me iustus in misericordia , & increpet me , oleum autem pretiosum ne frangat caput meum .

Quoniam adhuc oratio mea contra malitiam eorum , præcipitentur in locis petrosis iudices eorum ,

Vt audiant uerba mea , quoniam suauia sunt . si cut cum agricola terram proscindit , & frangit ,

Ita dissipata sunt ossa nostra secus infernum , quia

Ad te Domine Deus oculi mei , in te speravi , ne effundas animam meam .

Custodi me à laqueo , quem extenderunt mihi , & à scandalis operantium iniquitatem .

Cadant in rete eius peccatores simul , donec ego transeam .

## E X P L A N A T I O .

Dirigatur oratio mea ] Quoniam uir sanctus in exilium pulsus non poterat interesse sacrificijs , quæ fiebant in templo , loco thuris , & hostiarum de dicat Deo sanctas preces .

Pone Domine custodiam ori meo ] Hoc ait uir sanctus intelligens , quàm difficile sit , linguam coercere , ne de fama detrahas innocentis , ne per irâ contumelias dicas , ne multa loquaris ad uoluntatē alterius , contra quàm sentis , ne plurima inutilia ,



leuia, inania temere effutias, quorum omnium red-  
dituri sunt homines rationem, ut CHRISTVS  
minatur apud Matthæum. Quo circa semper oran-  
dus est Deus, ut linguam nostram moderetur, ne  
quid unquam loquamur, quod ad gloriam ipsius, at-  
que aliquem fructum aliorum non redundet.

Neque comedam ] Neque tam mala men-  
te unquam sim, ut delecter ijs uoluptatibus, quas im-  
pij studiose persequuntur.

Percutiet me iustus ] Malo ( inquit ) casti-  
gari, atque etiam uapulare ab hominibus pijs, quam  
ab impijs unguento quamuis pretioso deliniri: casti-  
gationes enim, & uerba piorum morbos animorum  
sanant, at impiorum unguenta, id est, blanditiæ,  
delitiæq; caput frangunt, id est, mentem, & ratio-  
nem dissipant. Ita explanat hunc locum Abrahamus  
Esdra uir doctus in primis.

Iudices eorum ] Sic appellat saulem, &  
ceteros uiros primarios, quos optat interire, ut cete-  
ri eorum exemplo territi resipiscant, & libenter au-  
diant admonitiones, & exhortationes suas ad pietas-  
tem, cæterasq; uirtutes.

Sicut cum agricola ] Vt solet agricola su-  
bigendo, & glebas frangendo terram dissipare, ita  
uiri impij ossa, & uires meas, & meorum infrege-  
runt, nosq; in eas angustias coegerunt, ut morti iam  
propinqui simus.

Quia ad te Domine ] Cum ( inquit ) in  
tua misericordia omnis spes mea posita sit, ne quæso  
permitte, me ab impijs uita spoliari.

# EXPLANATIO

Cadant in rete eius ] Incidant hostes mei  
in ea mala, quæ mihi machinatur eorum dux, &  
caput, at ego incolumis euadam.

## ARGVMENTVM PSAL. CXLII.

Exponit, quæ precatione Deum ueneratus sit, cum  
desperata penè salute se in specum abdidiſſet, fugiens  
Saulen: quæ historia scripta est libro primo Regum.

Eruditio David, cum eſſet in ſpelunca, oratio,  
Pſalmus CXLII.

Voce mea ad Dominum clamaui, uoce mea ad Do-  
minum deprecatus ſum.

Effundam in conſpectu eius orationem meam, tri-  
bulationem meam coràm ipſo pronuntiabo,

Cum deſicit in me ſpiritus meus, & tu cognoui-  
ſti ſemitas meas.

In uia, qua ambulabam, abſconderunt laqueum  
mihi,

Conſiderabam ad dexteram, & uidebam, &  
non erat, qui cognosceret me,

Perijt fuga à me, & non eſt, qui requirat ani-  
mam meam.

Clamaui ad te Domine, dixi, tu es ſpes mea, por-  
tio mea in terra uiuentium,

Intende ad deprecationem meam, quia afflictuſ  
ſum nimis,

Libera me à perſequentibus me, quia roborati ſunt  
ſuper me,

Educ

Educ de carcere animam meam, ut confitear nomini tuo, me circumdabunt iusti, cum retribueris mihi.

## EXPLANATIO.

Et tu cognouisti semitas meas ] Tu certe Domine nosti me iniuria ab inimicis tanta mala pati: tibi enim nota est uita, & innocentia mea.

Et non erat qui quæreretur ] Nemo erat, cui curæ esset salus mea.

Portio mea in terra uiuentium ] Alio loco ostendimus, terram uiuentium appellari in literis sanctis terram hanc, in qua degitur uita. significat igitur, reliqua omnia sibi crepta esse in hac uita præter misericordiam Dei.

Educ de carcere ] Carcerem uocat speluncam illam, in qua conclusus latitabat.

Me circumdabunt ] Si mihi dederis hoc beneficium, homines pii, ac religiosi ad me lati accurrerent, scq; mihi studio gratulandi circumfundent.

## ARGVMENTVM PSAL. CXLIII.

Hic psalmus est eiusdem argumenti atque superior.

Psalmus CXLIII.

Domine exaudi orationem meam, auribus percipe obsecrationem meam in ueritate tua, exaudi me in



# EXPLANATIO

tua iustitia,

Et non intres in iudicium cum seruo tuo, quia non iustificabitur in conspectu tuo omnis uiuens,

Quia persecutus est inimicus animam meam, humiliavit in terra uitam meam.

Collocauit me in obscuris sicut mortuos seculi, et anxius est in me spiritus meus; in me turbatum est cor meum.

Memor fui dierum antiquorum, meditatus sum in omnibus operibus tuis, et in factis manuum tuarum meditabar.

Expandi manus meas ad te, anima mea sicut terra sitiens ad te.

Velociter exaudi me Domine, defecit spiritus meus.

Ne auertas faciem tuam a me, ne similis fiam descendentibus in foueam.

Fac me audire mane misericordiam tuam, quia in te speraui.

Notam fac mihi uiam, in qua ambulem, quia ad te leuaui animam meam.

Eripe me de inimicis meis Domine, ad te confugi, doce me facere ueritatem tuam, quia Deus meus es tu.

Spiritus tuus bonus deducet me in terram re-

Etiam, propter nomen tuum Domine uiuificabis me in iustitia tua.

Educes de tribulatione animam meam, et in misericordia tua disperdes inimicos meos.

Et perdes omnes, qui tribulant animam meam;  
quoniam ego seruus tuus sum.

## EXPLANATIO.

Auribus percipe ] Opem tuam Domine suppliciter imploro, tu quæso succurre laboranti pro singulari bonitate, & fide tua: pollicitus enim es, te præsidio futurum omnibus, qui sanctissimum nomen tuum inuocassent.

Et non intres in iudicium cum seruo tuo ]  
Nam si me uoces in iudicium, deq; uita, & moribus meis quæstionem exerceas, nulla misericordia seueritatem iuris mitigante, nihil ostenditur mihi ad spem salutis: quis enim tam pie, tam sancte uiuit in terris, ut rationem reddere iussus ad tribunal tuum, causam suam defendere, ac tueri possit; si uelis exigere omnia, quæ tibi & meritissimo, & optimo iure debentur? Si iniquitates obseruaueris Domine, Domine quis sustinebit? Has sententias significant uerba uiri sancti, cum ait, non iustificabitur in conspectu tuo omnis uiuens. Itaque diuus Augustinus in explanatione huius uersiculi cum dixisset, neminem in terris, atque in humano corpore uiuentem excipi, ne Apostolos quidem, multaq; in hanc sententiam disse-ruisset, concludit his uerbis, Dicant ergo Apostoli, dicant; Dimitte nobis debita nostra, sicut & nos dimittimus debitoribus nostris: & cum eis dictum fuerit, quare hoc dicitis? quæ debita uestra? respondeant, quia non iustificabitur in conspectu tuo omnis

# EXPLANATIO

uiuens. Idem in sermone XLIX de tempore, explanans hunc eundem uersiculum scribit hæc. Non intres in iudicium cum seruo tuo, quid est, non intres in iudicium cum seruo tuo? non stes mecum in iudicio, exigendo à me omnia, quæ præcepisti, & omnia quæ iussisti: nam me inuenies reum, si in iudicium intraueris mecum. opus est ergo (inquit) misericordia tua potius, quàm liquidissimo iudicio tuo. Sed uerbis Augustini libet adiungere sententiam quoque Bernardi uiri sanctissimi. is in primo sermone, quem scribit in diem festum omnium sanctorum, loquitur ad hunc modum, Sed quid potest esse omnis iustitia nostra coràm Deo? non ne iuxta prophetam uelut pannus menstruatus reputabitur? & si districte iudicetur, iniusta inuenietur omnis iustitia nostra, & minus habens? Quid ergo de peccatis erit, quando ne ipsa quidem per se poterit respondere iustitia? propterea obnixè cum propheta clamantes, Non intres in iudicium cum seruo tuo Domine, tota humilitate ad misericordiam recurramus, quæ sola potest saluare animas nostras.

Collocauit me in obscuris ] Ita uocat speluncas, & latebras, in quas se abdebat metu Saulis: mortuos uero seculi appellat eos, qui iam pridem mortem obierunt.

Memor fui dierum antiquorum ] Dum in tantis angustiis, & periculis uersor, memoria repero monumenta misericordiae tuæ, quot uidelicet & quantis calamitatibus liberaueris maiores nostros,

quanta benignitate tutatus sis Abrahamum, Iosephū,  
Mosem, uniuersam denique nationem nostram. Hæc  
assidua cogitatio recreat animum meum, meq; ad  
implorandam misericordiam tuam adhortatur. ita-  
que supplices manus tendo, ut terra sitiens audivissime  
pluiam expectat, sic ego auxilium tuum continen-  
ter imploro.

Notam fac mihi uiam, in qua ambulem ]  
Ut scilicet euadam ex insidijs inimicorum; & recto  
itinere ad te perueniam.

Spiritus tuus bonus deducet me in terrā rectā ]  
Id est, per eam uiuendi uiam, quæ ducit ad te.

## ARGVMENTVM PSAL.

## CXLIIII.

Gratias agit Deo, cuius benignitate hostes bello su-  
perare soleat: & ipsius auxilium implorat aduersus  
impias nationes.

## Psalmus David CXLIIII.

Benedictus Dominus fortitudo mea, qui docet ma-  
nus meas ad prælium, & digitos meos ad bellum.

Misericordia mea, & refugium meum, adiutor  
meus & liberator meus.

Clypeus meus, & in ipso speraui, qui subdit popu-  
lum meum sub me.

Domine quid est homo, quod agnoscis eum? & fi-

# EXPLANATIO

lius hominis, quid repueas eum?

Homo uanitati similis est, dies eius sicut umbra præteriens.

Domine inclina cælos tuos, & descende, tange montes, & fumigabunt.

Fulgura fulgur, & dissipa eos, mitte sagittas tuas, & disturba eos,

Demitte manum tuam ex alto, eripe me, & libera me de aquis multis, & de manu filiorum alienigenarum.

Quorum os locutum est uanitatem, & dextera eorum dextera iniquitatis.

Deus canticum nouum cantabo tibi, in psalterio, & decachordo psallam tibi,

Qui das salutem regibus, qui redemisti Dauid seruum tuum de gladio maligno, eripe me,

Et erue me de manu filiorum alienigenarum, quorum os locutum est uanitatem, & dextera eorum dextera iniquitatis,

Ut sint filij nostri sicut plantulae crescentes in iuuentute sua,

Filiae nostrae sicut anguli ornati ad similitudinem templi,

Promptuaria nostra plena sint, eructantia ex uno genere annonae in aliud,

Greges nostri mille pariant, pariant decem millia in compitis nostris, boues nostri sint ferendis oneribus apti,

Non sit interruptio, non emigratio, non cla-



mor in plateis nostris ,

Beatus populus , cui hæc sunt , beatus populus , cuius Deus est Dominus .

## EXPLANATIO.

Homo uanitati similis est ] Vanitatē appellat inanitatem , & ipsum nihilum .

Domine inclina coelos ] Implorat auxilium Dei contra reges falsorum Deorum cultores , utitur autem ornamentis orationis elegantissimis , de quibus explicauimus in explanatione psalmi XVIII.

Ut sint filij ] Descriptio est plena leporis , & uenustatis , qua complectitur omnes prosperitates , & cōmoda uitæ , quæ optari possunt reipublicæ .

Filiæ nostræ sicut anguli ] Angulos ædium magnificarum significat , qui solebant eleganter exornari .

Non sit interruptio ] Ne perrumpantur moenia machinis hostium , ne abducantur ciues in seruitutem , ne uel lamenta , aut iurgia audiantur in compitis nostris . Sic Abrahamus Esdra interpretatur hunc locum .

Beatus populus , cui hæc sunt ] Hoc ait , quoniam Deus in suis legibus testatum reliquerat , horum bonorum copiam , & affluentiam suæ in populum beneuolentiæ signum certissimum fore , contraq; morbos , famem , & bellum urbes , & agros uastatura , cum ipse iratus foret , ac sui foederis uiolati pœnas à populo repeteret .

# EXPLANATIO

## ARGVMENTVM PSAL. CXLV.

Hymnus est, in quo celebrat maxima uerborum,  
& sententiarum grauitate potentiam, bonitatem,  
providentiam, & misericordiam Dei, qua is utitur  
promiscue aduersus omnes animantes, tum præcipue  
erga homines pios, & iustitiæ cultores.

### Hymnus David psal. CXLV.

Exaltabo te Deus meus Rex, & benedicam nomi=  
ni tuo in seculum & seculum seculi.

Per singulos dies benedicam tibi, & laudabo no=  
men tuum in seculum & in seculum seculi.

Magnus Dominus, & laudabilis nimis, & ma=  
gnitudinis eius non est finis.

Generatio generationi laudabit opera tua, & po=  
tentiam tuam annuntiabunt,

Decorem gloriæ magnificentie tuæ loquentur, &  
mirabilia tua narrabunt,

Et uirtutem terribilium (operum) tuorum dicet,  
& ego magnitudinem tuam memorabo.

Memoriam eximie bonitatis tuæ loquentur, & iu=  
stitiam tuam prædicabunt,

Clemens, & miserator Dominus, tardus ad irā,  
& multum misericors

Bonus Dominus uniuersis, & miserationes eius su=  
per omnia opera eius.

Confiteantur tibi Domine omnia opera tua, & sancti tui benedicant tibi.

Gloriam regni tui dicent, & potentiam tuam loquentur,

Ut notam faciant filiis hominum potetiam tuam, & gloriam magnificentie regni tui.

Regnum tuum regnum omnium seculorum, & dominatio tua in omni generatione, & generatione.

Fidelis Dominus in omnibus uerbis suis, & sanctus in omnibus operibus suis.

Sustentat Dominus omnes, qui corruunt, & erigit omnes depresso.

Oculi omnium in te sperant Domine, & tu das escam illis in tempore oportuno.

Aperis tu manum tuam, & imple omne animal benedictione.

Iustus Dominus in omnibus iis suis, & sanctus in omnibus operibus suis.

Prope est Dominus omnibus inuocantibus eum, omnibus inuocantibus eum in ueritate.

Voluntatem timentium se faciet, & deprecationem eorum exaudiet, & saluos faciet eos.

Custodit Dominus omnes diligentes se, & omnes peccatores disperdet.

Laudationem Domini loquetur os meum, & benedicet omnis caro nomini sancto eius, in seculum & in seculum seculi.

E X P L A N A T I O

A R G V M E N T V M   P S A L .

C X L V I .

Prædicat iustitiam, & misericordiam Dei, &  
monet nemini confidendum esse præterquam  
eius benignitati.

Psalmus CXLVI. Alleluia.

Lauda anima mea Dominum, laudabo Dominum  
in uita mea, psallam Deo meo, quàm diu fuero.

Nolite confidere in principibus, in filiis hominum,  
in quibus non est salus,

Exibit spiritus eorum, & reuertentur in terram  
suam, in illa die peribunt omnes cogitationes eorum.

Beatus, cuius adiutor est Deus Iacob, cuius spes  
est in Domino Deo suo, qui fecit cælum & terram,  
mare, & omnia, quæ in eis sunt,

Qui custodit ueritatem in seculum, qui facit iudi-  
cium iniuriæ patientibus, dat escam esurientibus,

Dominus soluit compeditos, Dominus illuminat  
cæcos.

Dominus erigit depressos, Dominus diligit iustos.  
Dominus custodit aduenas, pupillum, & uiduam  
subleuabit, & uias peccatorum disperdet,

Regnabit Dominus in secula, Deus tuus Sion in  
generationem, & generationem.

## ARGVMENTVM PSAL.

## CXLVII.

Hortatur populum ad laudes Dei canendas, promittens fore, ut gens Hebræa de exilio reducta in finibus patriæ secura conquiescat: utq; ita futurum esse, certam spem habeant, prædicat potentiam Dei, eiusq; benignitatem singularem aduersus hæc gētem.

## Psalmus CXLVII. Alleluia.

Laudate Dominum, quoniā bonum est psallere Deo nostro, quoniam iucunda, decoraq; laudatio.

Aedificans Hierusalē Dominus, dispersiones Israelis congregabit,

Qui sanat contritos corde, & alligat uulnera eorum.

Qui numerat multitudinem stellarum, & omnia eis nomina uocat.

Magnus Dominus noster, & magna uirtus eius, & sapientiæ eius non est numerus,

Subleuans mansuetos Dominus, humilians autem peccatores usque ad terram.

Canite Domino cum gratiarum actione, psallite Deo nostro in cythara,

Qui operit cælum nubibus, & parat terræ pluuiam,

Qui producit in montibus herbam,

Qui dat iumentis escam suam, & pullis coruorum

EXPLANATIO

rum inuocantibus eum .

Non in fortitudine equi uoluptatem habebit, nec in  
tibijs uiri beneplacitum erit ei ,

Beneplacitum est Domino in timentibus ipsum, &  
in eis , qui sperant in misericordia eius .

Lauda Hierusalem Dominum, lauda Deum tuum  
Sion ,

Quoniam roborauit seras portarum tuarum, be-  
nedixit filijs tuis in te.

Qui posuit fines tuos pacem, & adipe frumenti  
satiat te ,

Qui emittit eloquium suum terræ, uelociter cur-  
rit sermo eius ,

Qui dat niuem sicut lanam, nebulam sicut cine-  
rem spargit ,

Proiecit glaciem suam sicut buccellas, ante faciem  
frigoris eius quis sustinebit ?

Emittit uerbum suum, & liquefacit ea, stat sti-  
ritus eius, & fluunt aquæ .

Qui annuntiat uerba sua Iacob, præcepta sua, &  
iudicia sua Israeli.

Non fecit taliter ulli nationi, & iudicia sua non  
manifestauit eis . Alleluia .

ARGVMENTVM PSAL.

CXLVIII.

Hortatur omnes res animatas, & inanimas ad  
prædicandas laudes Dei .

## Psalmus CXLVIII.

Laudate Dominum de cœlis, laudate eum in excelsis,

Laudate eum omnes Angeli eius, laudate eum omnis exercitus eius,

Laudate eum sol, & luna, laudate eum omnes stellæ fulgentes,

Laudate eum cœli cœlorum, & aquæ, quæ super cœlos sunt, laudent nomen Domini,

Quia ipse dixit, & facta sunt, ipse mandauit, & creata sunt,

Statuit ea in seculum, & in seculum seculi, præceptum posuit, & non præteribit.

Laudate Dominum de terra dracones, & omnes abyssi,

Ignis, grando, nix, uapor, spiritus procellarum faciens uerbum eius.

Montes, & omnes colles, ligna fructifera, & omnes cedri,

Bestiæ, & uniuersa pecora, serpentes, & uolucres pennatæ,

Reges terræ, & omnes populi, principes, & omnes iudices terræ,

Iuuenes, & uirgines, senes cum iunioribus laudent nomen Domini, quia exaltatum est nomen eius solius,

Gloria eius super cœlum, & terram, & exalta-

# EXPLANATIO

uit cornu populi sui ,

Hymnus omnibus sanctis eius , filiis Israel, populo  
appropinquant sibi . Alleluia .

## EXPLANATIO.

Hymnus omnibus sanctis eius.] Nulla qui-  
dem res est in uniuerso , quæ non debeat hymnos Deo  
canere , in primis tamen homines pios , & religiosos ,  
quales sunt Hebræi , decet hymnus .

## ARGUMENTVM PSAL. CXLIX.

Hortatur Hebræos ad canendas laudes Dei , præ-  
dicens fore , ut liberati seruitute Chaldæorum non so-  
lum in patriam reuertantur, sed etiam imperium lon-  
ge , lateq; propagent .

Psalmus CXLIX. Alleluia .

Cantate Domino canticum nouum , laus eius in  
ecclesia sanctorum ,

Latetur Israël in eo , qui fecit eum , & filie Sion  
exultent in rege suo .

Laudent nomen eius in choro , in tympano , &  
psalterio psallant ei ,

Quia beneplacitum est Domino in populo suo , &  
exaltabit mansuetos in salutem ,

Exultabunt sancti in gloria , letabuntur in cubi-  
libus suis .

Exaltationes Dei in gutture eorum , & gladij an-



capites in manibus eorum

Ad faciendam uindictam in nationibus, increpationes in populis,

Ad alligandos reges eorum in compedibus, & nobiles eorum in manicis ferreis,

Vt faciant in eis iudicium cōscriptum, gloria hæc est omnibus sanctis eius. Alleluia.

# EXPLANATIO.

Ad faciendam uindictam ] Hæc quidem omnia euenire imperantibus Machabæis, de quorum rebus gestis, & magnitudine imperij multa scribit Iosephus, uerum hæ res fuerunt umbræ atque imagines earum rerum, quæ a CHRISTO, & Apostolis gestæ sunt.

Vt faciant in eis iudicium cōscriptum ] Id est, ut exercent in eos iudicium, de quo scriptum est in Deuteronomio, ubi pollicetur Deus se supplicium sumpturum de ijs, qui gentem suam afflixerint.

## ARGVMENTVM PSAL. CL.

Hortatur populum ad prædicandam potentiã Dei.

Psalmus CL. Alleluia.

Laudate Dominum in sanctitate eius, laudate eum in firmamento potentiæ eius,

Laudate eum in uiribus eius, laudate eum secundum multitudinem magnitudinis eius,

Laudate eum in sono tubæ, laudate eum in psalterio, & cythara,

# EXPLANATIO

Laudate eum in tympano, & choro, laudate eum in chordis, & organo.

Laudate eum in cymbalis bene sonantibus, laudate eum in cymbalis iubilationis: omnis spiritus laudet Dominum.

# EXPLANATIO.

Laudate Dominum ] Laudate (inquit) Dominum ob præstantissimam sanctitatem eius, & ob mirabile opificium cœli, quæ sedes est potentie suæ.

Omnis spiritus ] Id est, quicquid uita & spiritu fruitur.

# FINIS.

Errata ita corrigenda.

uir doctissimus	car. 19. b	quis autem studiosus	83. b
igne explorant	26. a	ad decus	83. b
Delicta q̃s intelliget?	33. b	Sina, in sanctuario	125. b
posteritati prædicet	41. b	deplorare calamitates	
iusius, aut rectius	47. b	155. a	
ob eam causam	57. a	sicut Deus noster?	148. a
iudicium, misericordia Do		exercituum, q̃s similis	173. a
mini	58. a	dextris tuis	182. b
lacrimas meas ne	71. b	timor Domini.	220. b
eius: apud me oratio	78. a	benedicet nobis	224. a
fortitudo mea :	79. b	misericordia tua Domine	
annuntiauerunt nobis	0 =	239. a	
pus,	80. b	percutiat me iustus	264.

\*    A B C D E F G H I K L M N O P Q R S T  
      V X Y Z,    A A B B C C D D E E F F  
      G G H H I I K K L L.

*Omnes quaterniones, præter \* duernionem,  
      & L L quinternionem.*

VENETIIS, APVD ALDI FILIOS.  
M. D. XLV.

